

刘忠肃集

刘
摯

文硕阁

wenshuoge.com

目录

关于我们	3
御题刘摯忠肃集六韵	5
提要	6
原序	7
卷一	10
卷二	18
卷三	26
卷四	34
卷五	42
卷六	48
卷七	56
卷八	64
卷九	73
卷十	81
卷十一	86
卷十二	92
卷十三	98
卷十四	107
卷十五	117
卷十六	126
卷十七	138
卷十八	147
卷十九	157
卷二十	166

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

御题刘挚忠肃集六韵

御题刘挚忠肃集六韵

散篇裒集还全璧世久湮沦传始今【刘挚文集四十卷见於宋史艺文志及马端临经籍考世久无传本今从永乐大典各韵中裒集编缀各体具备共得文二百八十五首诗四百四十三首以原书卷目相校尚可存十之六七云】必有鬼神来呵护自然天地佑忠忱未尝释卷於经遽却匪空言见理深出处一身守直亮是非两字辨金壬明陈十害邪辞辟分析二章正气森六百载余惜惓笃裕陵见摈独何心

提要

钦定四库全书 集部三

忠肃集 别集类二 【宋】

提要

【臣】等谨案忠肃集二十卷宋刘摯撰摯字萃老东光人家於东平登嘉佑四年甲科神宗朝累迁礼部侍郎哲宗即位历官门下侍郎尚书右仆射以观文殿学士罢知郢州绍圣初坐党籍累贬鼎州团练副使新州安置卒绍兴中追赠少师諡忠肃事蹟具宋史本传其文集四十卷见於宋史艺文志久无传本今从永乐大典各韵中裒辑编缀以原书卷目相较尚可存十之六七除青词斋疏等文十七篇谨禀承

圣训删削不録各以类排纂厘为二十卷而仍以刘安世原序冠之於首摯忠亮骨鯁於邪正是非之介辨之甚严终以见愠羣小贬死荒裔其为御史时论率钱助役之害至王安石设难相诘而摯反覆条辨侃侃不挠今其疏并在集中他若劾蔡确章惇诸疏见於宋史者亦并存无阙其所谓修严宪法辨别淄澠者言论风采犹可想见固不独文词畅达能曲鬯情事已也至集中有讼韩琦定策功疏论王同老攘功冒赏之罪而道山清话遂谓文彦博再相摯於帘前言王同老劄子皆彦博教之乞下史官改正宣仁不从彦博因力求退今考此事史所不载而集中有请彦博平章重事疏其推重之者甚至尤足以证小说之诬盖当时党论交讐好恶是非率难凭据幸遗集具在得以订正其是非於论世知人之学亦不为无补矣乾隆四十九年十一月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

原序

原序

宣和六年七月六日宣教郎知开封府临河县丞刘跂寓书於元城刘安世曰先人平生为文方弃诸孤仅存一篋类次之已成編集念当有序引以信於後晚年迁谪事同诸公身後怨家诬谤又蒙朝廷核实已赐昭雪然而元佑大臣不幸亡歿者类皆不敢纳铭於圻植碑於隧始终大节不应无闻於後也愿因集序并载一二使他日有考焉顾惟衰拙自少受知於先丞相素叨国士之遇中荷荐引寢阶禁从晚岁迁谪复同忧患而又被谴以来行三十年固穷守道俯仰无愧似不为知己之辱虽怀自顾不足之羞而莫敢辞者盖义之所在不可得而避也公讳摯字莘老永静军东光人也幼而敏悟有成人风年未弱冠被荐於渤海声誉籍甚凡四预乡贡礼部奏名为第一复中甲科初始南宫已着风绩英宗诏二府各荐士充阁馆忠献韩公琦以应诏补公馆阁校勘王文公安石初秉政搜择人材擢为中书校正居月余议论多不合会除监察御史欣然就职语家人曰趣装无为安居计即上疏论亳州狱起不止小臣意在倾故相富弼以市进今弼已责愿寬州县之罪神宗皇帝励精求治獎进臣下公既对面赐褒谕且问从学士安石耶安石称卿器识公对曰臣东北人少孤独不识安石也因论人物邪正奏对移时上意向纳公退益感遇思所以称因上疏论率钱助役官自顾人其事有不可胜言者略陈十害切中时病会御史中丞杨公绘亦论新政并公章下司农司农条件疏校遂劾绘与公险詖中怀向背有旨分析公奏曰臣有言责采士民之说敷告於陛下是臣之职也今有司駁奏遂令分析交口相直无乃辱陛下耳目之任哉所谓向背则臣所向者义所背者利所向者君父所背者权臣愿以臣章及司农所奏宣示百官者定当否奏入不报明日复上疏极论时政遂罢御史落馆职拟窜岭外上不暇乃贬衡州哲宗皇帝嗣位宣仁圣烈太皇太后以祖母共政见连年水旱西鄙未宁百姓劳敝而国有大故当务休息遂散遣京城役夫減皇城司覘者废物货场罢户马等事皆从中出又戒敕内外无敢苛刻扰民已而进退大臣选用台諫擢公为御史公受命之始即具以熙宁告神考之语复陈於哲庙之前两宫听纳尽行其言曾未期月人情於变使天下有泰山之安而无一朝之患者公之力也公既被遇知无不言姦佞刻薄之吏事状显着者公皆正色弹劾多所贬出中外肃然时人以此包希仁吕献可上察其忠义诚信可属事任未几遂大用焉公在中书一日内降画可二状其一裁节宗室冗费其一減定六曹吏额房吏请封送尚书省公曰常时文书録黄过门今封送何也对曰尚书省以吏额事每奏入必径下本名已久今误至此公曰中书不知其他当如法令遂作録黄初尚书令史任永寿精悍而猾与三省吏不能相数以姦弊告诸宰执吕丞相大防信任之时户部裁节浮费後省裁定吏额皆论年未就吕丞相专权狠愎尽取其事置吏额房於都省以司空府为局召永寿辈领之未尝谋及同列也永寿见録黄愕曰两省初不与今乃有此即禀丞相命两省各选吏赴局同领其事以是白公公曰中书行録黄法也岂有意与吏为道地今乃使就都省分功何耶他日又持奏禀以丞相旨禀公曰吏额事今欲慎密而速故请径下然未经立法欲三省同奏依致仕官文书法公曰他非其类也更当聚议明日吕相又袖橐厉色示公曰势不可不尔公不欲立异勉应曰诺其後事毕永寿以劳进官时忱苏安静时恠皆迁秩有差於是外议喧然不平台諫交章论列以为事在後者成就已十八九永寿等攘去才两月而都司不用司勳格擅拟优例冒赏徇私章数十上时公已迁门下每於上前开陈吏额本末此皆被

省者鼓怨言章风闻适实不足深言吕丞相亦以语客曰使上意晓然者刘门下力也然自此忌公益甚陰謀去之遂引杨畏在言路諫官疏其姦邪反覆章十余上竟不能回士大夫趋利者汹汹交诤其事於是朋党之论起矣公语丞相曰吾曹心知无他然外议如此非朝廷所宜有愿少引避丞相曰行亦有请是岁八月一日奏事毕少留奏曰臣入处近列器满必覆愿赐骸骨避贤者路上遣中使召公入对太皇太后谕曰侍郎未可去须官家亲政然後可去使者数辈趋入视事公不得已受命顷之吕丞相亦求退不许明年公继为丞相不满岁前日汹汹者在言路诋公竟去位朋党之论遂不可破其本末如此公辅政累年刚明重厚達於治道朝廷赖之及为相益总大体务守法度辅佐人主於无过之地其於用人先器识後才艺进拟之际必察其人性行厚薄终不轻授以职任故才名之士或多怨公公知之不恤也取人不问识与不识或多南士有以萧望之郑明事諫公曰楚士奈何笑而不答论者谓元佑相以来能以人物为意知所先後而无适莫者公为之首奏事上前言直事核不为缘饰多见听用与同列语公平不欺未尝以私属人人有所欲多惮公闻之公闻之亦为尽力然终不以语也精力絶人远甚一见宾客及闻其语终身不忘事无剧易临之晓然省吏每以事试公不以久近区处如一言皆可复故三省事经公所裁定者後皆遵用莫能改云赵彦若子败官下狱彦若奏与监司有嫌乞移狱他路言者论彦若罔上不实王巩除知宿州言者论巩前在扬州不法彦若巩皆公姻家也语稍及公公请辞位章七八上遂迁就外舍诏遣近侍宣召公入既对谕曰彦若巩辈事何预也言者皆谓交通邢恕及章惇之子牢笼小人为异日计公心知为言者所中不复自明谢曰臣愚闇招致人言愿就贬责既退固请益坚乃罢相以殿学士守郢给事中駁奏谓刘某忠义自奋力辨邪正有功朝廷擢之大位一旦以疑而罢天下不见其过并给事中罢之於是中外疑骇莫所知谓久之乃知言者虽多专以章邢事为媒孽初公家子弟与章惇之子相识因入都应举而公家子弟亦游科场尝至府第而言者指为交通之迹邢恕谪官至京师以书抵公公答以手简其末云为国自爱以俟休复茹东济为东排岸官数有请求而公不之许蓄怨甚久适见公简陰録其语以示言者言者缴上之且解释云休复语出周易以俟休复者俟他日太皇太后复辟也刘某所怀如此盖媒孽之语不一而此最为甚朝野愤之其後杨畏遂升从官搢绅共恶甚於虺蜴东济亦除提举常平諫官复论其素行士论不齿不宜任以监司除命遂寢人情更以为快公天性高明不以己长格物既贵恭俭好礼不改平素淳静嗜书自幼至老未尝释卷家藏书多皆自雠校得善本或手抄録孜孜无倦平居不亲妾媵家事有无不以经意虽在相府萧然一室其後南迁不知者谓公不堪其忧亲族门人乃知公谪居自奉简约与在相府无以异也凡有议论惟尚中道不习异说不责苟难务在谨名教而已少好礼学讲三礼视诸经尤粹晚好春秋考诸儒异同辨其得失通圣人经意为多公文章雅健清劲如其为人辞达而止不为长语表章书疏未尝假手凡奏议论说记序铭志诗赋诸文章千余篇次第着集为四十卷藏於家公自青社罢职和黄州又分司徙蕲州语诸子曰上用章丞相吾势当得罪若章君顾国事不迁怒百姓但责吾曹死无所恨第恐意在报复法令益峻奈天下何忧形於色初无一言及迁谪也岭表之谪公拜命即日就道惟从一子家人涕泣愿侍皆不听水陆犇驰见星乃止至贬所屏迹不交人事亦无书自随宴坐静默家人具饌告之食则食喜怒不形意澹如也公年未五十即屏嗜慾晚岁南迁气貌安强无衰瘁之色居数月得微疾公自谓将终戒飭後事精神不乱安卧而薨公既歿於岭外所属为公请归葬於朝不许已而诸子坐废家属徙他郡而不着罪於状又无知其故者虽公亦不知也今上登极大赦天下公既归葬而文及甫蔡渭皆贬湖州然後人稍知其事起於此初及甫持丧在洛

阳邢恕谪永州未赴亦以畏在怀州数通书有怨望语及甫又以公在中司尝弹罢其左司郎官怨公尤深以书抵恕其略曰改月遂除入朝之计未可必当涂猜怨於鹰扬者益深其徒实司马昭之心路人所知也大意谓服除必不得京师官当求外补故深诋当路者绍圣初恕以示蔡硕蔡渭渭数上书讼吕丞相及公而下十余人?害其父确及谋危宗社引见甫书为验朝廷骇之委翰林学士蔡京御史中丞安惇?治焉遂逮及甫就吏而所通初无事证但托以亡父曾说之?治所问司马昭谓谁及甫对意谓公也问其证据事状则曰无有但疑其事势心意如此朝廷照知其妄狱事遂缓会公薨闻犹用蔡京奏以不及考验为辞但坐诸子而已时绍圣五年五月四日也其为诸子叔复护丧还乡里公嗣子跂径伏阙下上疏诉其事又持副封诣都堂叩宰相韩忠彦曾布等皆取实封案牒开视知其谬妄明白其以语跂至建中靖国元年二月二十五日有旨文及甫蔡渭所陈显无实状已行贬责绍圣五年五月四日指挥更不施行然复公歿後谗谤所坐皆得解释渭今改名懋云崇宁元年正月癸酉葬公於蕲州须城县太谷山之原先茔之东曹国夫人任氏祔焉有诏特依前宰臣例又除公壻通直郎蔡蕃知阳谷县应副葬事送终之礼极其褒荣四方观者莫不叹息呜呼公之厚德高行追配古人嘉谟伟绩播於天下士民者固不可胜数今特取大节载之其余非公出处所系皆略而不书八月一日承议郎提举南京鸿庆宫赐紫金鱼袋刘安世序

卷一

钦定四库全书

忠肃集卷一

宋 刘摯 撰

制敕

元佑三年御试进士制策

朕肇膺骏命涉道寡昧惧无以奉承太母之慈训而彰先帝之休德夙夜以思乐得天下之忠言嘉谋庶以济兹今子大夫羣至在廷朕甚嘉之盖闻天之灾祥以类而至古之善言天者能推斯变以应斯事若合符节粤自去冬大雨雪至於春二月不止人大失职广罹冻饥殍死者衆夫恒寒之罚久陰之异必有以召之其故安在朕为政於兹四年蠲天下逋负轻征而散利苟可以足下无不为者而民力犹未裕也捐金币之厚廓信义之庶以安边柔远而戎心犹未革也岂所谓至恩者未可崇本务欵特施設之序或失其当欵官之流至多门也举天下之阙不足以居其人财之费至无艺也量天下之入不足以为之出将革之乎或疑於伤恩将因之乎惧无以善後必有至道未烛厥中先王之时上之陰阳和风雨时下之稼穡茂衣食足官简而士贵财通而礼行四夷欵附边場安堵又何修而至於斯欵夫切而不迫缓而不迂朕非求空於言也盖将考而行焉矣其悉心茂明之

元佑三年御试特奏名制策

朕观先王之时道德一於上风俗同於下家有孝悌鄉有忠信人人知礼义之守廉耻之行其进退斯有制取舍斯有分虽虞人也招之非其物则不往虽乞人也予之不以礼则不受习俗既成施於後世虽世衰道丧势利出其前祸患临其後而终不以易节故其姦雄或为之屈寇盜或为之避彼上之所以养之与士之所以自养者何道而至於此国家昭德塞违示人以不争信赏必罚示人以好恶学士大夫莫盛於斯世然所谓道义重则轻王公志道修而骄富贵风之所被使贫夫则廉薄夫则敦者其亦有是人乎朕欲使仕者不独为贫学者皆知为已所以厉其节与其志盖有道子大夫必其考古之所宜施於今者着於篇

元佑六年御试进士前策

朕闻六艺之教同适於治而礼乐为急制中以节民情导和以养民性政行斯二者刑防斯二者四达而不悖然後上下辑睦之一乎中和兹二帝三王所以昌也先皇帝悼道之鬱滯建官设属以讨礼文足雅乐必自郊庙行之朝廷以风天下规模宏远矣而美意未终泽不下?朕奉

承遺烈夙夜興寐嘉與宇內臻於斯路今夫下之俗分守不明僭侈相勝家自爲禮人不知樂自學士大夫齊人編戶率以其意從事故是非生於貴賤隆殺系其富貧風俗流溢和氣弗兆昔者聖人雖未制作必因先王之禮樂宜於世者用以教化是禮樂之於天下不可一日緩也今頗欲考古今之宜剖經史之義立爲昏姻喪祭之文器服宮室之制隆雅頌之聲斥優侏之音使習俗知節謬戾不作建中和之極以述成先皇帝鴻業而其損益先後之序朕不敢知固以待周詢而博訪焉子大夫以爲如之何而可或謂解今之法而更張之民將駭而難從姑因循其舊而徒加厲禁又終不足以合乎先王之法度然考古便今必有中制焉昔漢修三雍行大射調八音聽樂均號稱永平唐損益曲台制度亦盛於貞觀開元之間采其遺意概之先王之法其亦有合於今乎不然史家所載前代之迹粲然具存要必有可言者至於賈誼劉向其論深美而不可施用房迂林如晦達於爲政而不知禮樂其失安在乃若節文度数其詳則有司能言之非所問子大夫也其推古今之所以廢興與施於當世而宜者著於篇

奉敕擬上皇太妃冊文并繳進劄子

臣准敕撰皇太妃冊文臣詞學鄙陋不能鋪紀皇太妃休德盛美上稱詔旨勉強以成冒塵聖覽臣不任惶懼愧汗之至謹具繳進以聞謹進

維元祐二年歲次丁卯某月某日皇帝某謹再拜言曰昔我神考迪祖宗休德孝以事親正以御家而天下化之方是時皇太妃實左右內治以柔順誠敬奉事兩宮以仁淑勤儉綏帥九御受祉上帝篤生冲眇以顧以復以濟及茲俾獲紹統序欲報之德物無以稱竊惟人君之行莫加於孝而孝雖四海九州之責莫大於顯其親之名矧我神考厥有訓命予末小子敢不敬之茲用稽合犀志恩與義稱不勝至愿謹奉玉冊金寶上懿號曰皇太妃?惟皇太妃於詩書所載輔佐之道施於家邦者備矣宜膺典禮丕顯徽懿上焉寧承崇慶隆佑之尊下焉保安持盈守成之子永懷多福光照無窮某誠懼誠忭 拜謹言

表

賀英宗皇帝即位表

祇膺先志昭履慶基凡在覆臨舉深欣戴?以皇帝陛下睿智天縱聰明日躋迪靈源之休祥抱五聖之仁孝昊穹眷命主祀鬯以承祧正統傳歸大帝華而協德離重明而繼照乾六龍以御天化政光華三靈泰定舜盡循於堯道武能廣於文聲宅后膺符協謳歌之所載守成保極與天地以無窮

賀神宗皇帝即位表

順承顧命寅踐丕圖大號四孚萬方一庆?惟皇帝陛下几神明哲性德靖淵佑民作君宅天衷之所相守道繼體一神器於有歸璿玑察而七政齊聖人立而萬物覲光符歷數之在丕協人神之依亶矣紹堯烝哉下武潤色大業作者謂聖而述者謂明守成太平傳之無窮而施之罔

极

元丰八年贺即阼表

祗若遗训嗣膺太历诏命所逮罔不慰幸伏以皇帝陛下圣质天授同符祖宗帝统有归万世永赖正位之始四海欣欢

贺立皇后表

椒房懿德宝册降衷庆溢宫闈欢腾宇宙窃以握乾垂统必资助於坤仪理外宣风示光成於内治母仪斯备妇顺以明稽合旧章懋隆新制?惟皇帝陛下纘承丕绪绍复洪图踵遐武之重光措函生於累洽先乎民物明王者之至公及於闕門着天下之大义惟皇立配体国承家载嗣徽音将以正心而逮下不加崇号无以示民之有尊诞赐洪名荣褒淑德然家人利正讲闻羲易之辞而君子好述载美关雎之义自古所重於今足称位定壺中化成天下

贺安南捷奏表

威灵所被万里收功凯捷布闻兆民赖庆臣闻圣人之於征伐也用非得已先王之於寇敌也威然後怀物萃聚而除戎时丰亨而致法盖方飭治之既备故苟犯顺而必诛虞帝所以事有苗之征宣王所以有淮夷之伐监此前载率於盛时?惟皇帝陛下刚健体天休明超古万方顺以无侮三灵和而允怀曾尔交蛮於我天讨跳踣肆於南土?刘及於数州不示大刑曷惩不轨军声振叠肃如金鼓之下天皇泽渐濡泽若云霓之救旱俄?然而请命因示之以好生惟盛德所以成无战之征惟至诚为能有不杀之武出车薄伐既奋蛮荆之威俟后来苏行夺西夏之气海隅大定氛?一清赫然盛勲若无前古

谢监衡州盐仓表

议令献言知典刑之无赦原心观过荷仁圣之有容贷其余生处以善地伏念臣稟生艰拙遭世盛明学不能穷理而知几材不足趣时而适变曦名途以孤进滥文馆之末游和铅何功索米逾岁间承人乏偶摄掾於中堂旋误圣知使备员於宪府仍职书林之旧就行御史之中始自愚臣前无故事方陛下继承於五圣而国朝平治者百年力勤肯获之田大解不调之瑟蒐拔羣材而审以器变使化百度而旷然日新臣於此时职在言路誓殫忠义敢避势权宁以孤睽訐切拂衆而身危不忍从容倡和负恩而速进狂愚自矢裨益无功故宿官之日几何而瞽言之罪非一至如均民而弛役因之率户而出泉虽虑始乐成者愚人之不知然损下益上者先王之大戒辄条十害冀补万分议臣见疑以为败谋而乱化清衷独见知其有责而尽忠特徇以诚止容其去褫台阁之二职置潇湘之一隅有禄食使之存全有职事可以报效衔恩载幸揣分增忧此盖伏遇皇帝陛下察臣孤忠全国大体不惜骖一夫之法庶几留衆正之门谨当上体恩仁期於必报下坚节义死而不渝

谢滑州到仕表

去职逾年法初得调赐符出守恩责过优内省叨踰窃深震惧伏念臣之所领地实近畿自昔汉唐之要津为今赵魏之孔道中间一废新造未完河流方洪骋传将至萑蒲之啸间发輿梁之缮始兴谓宜得王尊之获民叔圉之治客消盗之术有如龚遂济人之政贤如国侨乃如愚臣学蕴昧陋资材濶疎幸遭睿明每备任使愚有余故专於尽瘁智不足故无以自休所向多艰岂堪治剧单车?命使道疾驰视人郡章犹或惊异谕上恩旨罔不欢欣此盖伏遇皇帝陛下明道德以建太平修法度以熙庶政谓孤臣之多所虑取拙者之或能勤敢不祇力夙宵疾心事职况诏令明具止於奉宣德泽汪洋易於?达庶虑覆幬之祉小効涓尘之劳

谢御史中丞表

无非常之才被不次之命叨荣自省震悸靡遑伏念臣学谊朴疏稟资中下不佞薄闻乎大道窃思少补於斯民念事君者先立身故不为枉尺然守义而弗知变故未可与权孤负清时侵寻白首比者不遗於坠履使之?冠於惠文无所建明谓宜澄汰忽起从於横榻俾遂正於中司此盖伏遇皇帝陛下迪德圣神绍休祖考仁心惠泽昭百姓而協万邦大公至明开衆正而杜羣枉主张孤蹇付畀纪纲仲山不吐刚而茹柔汲黯愿拾遗而补过期殫此节上报误知

上太皇太后谢御史中丞表

粤自台端起专宪席虽有故事曾无几人何意孱愚遽兹叨冒伏念臣奋迹寒陋逢辰盛熙多历岁年每叨任使窃慕古人之所立不知直道之难行无补事功动罹罪悔晁错之为远虑或谓之愚潘岳之?免官皆由於拙复尘风宪滋触怨?方俟旷官之诛顾蒙越次之宠此盖伏遇太皇太后陛下乾坤为德日月并明知臣至孤誉无闻於左右察臣所论意不出於阿谀全付耳目之司使冠纪纲之地任之隆则责亦重恩之厚则报敢轻誓竭一心无辞九陨

辞免尚书右丞表

叠上囊封愿收恩检诚言可信本期十百之见从天听弥高敢避?三之有渎伏念臣承学浅陋稟生拙艰难久玷於名途无可称之官阙纪纲执宪愧古人直清之风帷幄行经乏名儒道义之益坐糜稍廩动畏讥诃已烦善贷之仁敢意非常之擢负且乘足以致寇名与器敢谓假人方陛下明道德以建太平修法度以康四海所与共此宜得何人自非廊庙谟明之才曷副廉陛都俞之托今顾及於至陋是将强其不能伏望皇帝陛下思国体之重轻在柄臣之贤否追选纶綍之命以释氷渊之危上不累知人之明下以息徼幸之望

上太皇太后辞免尚书右丞表

横被殊恩擢居重任竭愚衷而引避邈宸鉴之未回叠降训词弥深陨越窃以进有德则朝廷为之尊任惟人故公辅不必备此古今之所同慎盖治忽之所由生臣以一介之微遇四朝之

盛比从末路骤玷中司志少戇而不渝言多迂而难用莫逃临照日俟谴诃岂期尚屈於圣知更使参承於国论永惟絀薄敢犯是非身之伛而升高将有笑者器既盈而必溢固其理然詎自爱於捐躯盖深忧於累国伏望太皇太后陛下慎重名器无以假人眷求审明与之共政庶各安贤愚之常分不至召中外之烦言特鉴至诚收还成命誓坚犬马之志仰报天地之仁

谢尚书右丞表

伛偻至於循墙空稽授命号令难於反汗竟致叨逾抚心兢慙无地局踣窃以国家建夫三省政事行於中台稽古以董正厥官置丞以左右其长进陪四辅退率六聯若网在纲如车有辖苟任人之非称欲兴治以何由臣出於诸生藐然孤进外之更州县筦库之任内之徧台阁省府之游誉不足以偿毁功不足以补罪为邦司直晚备中执法之员正色指邪慙无古君子之节方俟瘝官之黜敢期共政之图幸有非常进惊不次比盖皇帝陛下孝於述事以丕承祖宗哲於知人以允蹈尧舜物有可用菲下体而不遗积非以功薪後來而或上曾是孱琐冒滋宠荣臣敢不以道事君以身徇国义之所在知无不为庶收铢髮之劳仰报乾坤之造

上太皇太后谢尚书右丞表

愚款既殫睿恩滋宠终夺匹夫之志遂尘四辅之班揆分遇涯当荣为惧?惟太皇太后陛下以上圣之德抚多难之时声气不动而邪正分堂帟不下而华夷治所与同邦家之休戚岂不在股肱之二三宜擢异才以副公望臣学不造於道义智不研於变通惟是朴直愚鲁之资安於所禀至於得失利害之际初不自谋谬长宪纲无裨经幄方且忧虞於大谴岂期超预於近司力小难胜器盈将覆此盖伏遇太皇太后陛下宅俊以翼嗣圣至公以馭万方谓孤臣之虑常深或能有达谓一人之材不备无求其全特出圣明之知不缘左右之誉矧由言路久辅政机昔之常所敷陈人将责其施設知之亦允蹈岂非甚艰言之必可行敢不自勉惟矢心於忠义以报德於生成

辞免尚书左丞表

窃以国之爵禄以待贤能士之进退必循名义有或异此何以示民伏念臣絀力薄材至愚极陋比蒙误宠擢备近司乏宏远之规模空销疲於精銳未尝小补方俟天诃敢期恩怜更进位序考其岁月则既非久次课其职业则又无显劳倘辄冒居实干清议伏望皇帝陛下慎名器以厉在位明是非以正有功深察诚言许伸愚分无难反汗之命庶拯临渊之忧

上太皇太后辞免尚书左丞表

宠厚恩深已忧於未报力小任重不可以有加敢过量以贪荣辄叩阁而?请臣误遭识拔超寘顒严慷慨大忠初不自量其孤拙低徊寡术今皆不出於寻常窃禄可慙黜幽是俟敢意包荒之度更推进位之恩况在官之日几何而宿业之劳未着惧人言之一起累国体之非轻伏望太皇太后陛下於辅弼必观其心於爵禄必慎所与矜臣非矫伪之志免臣於颠仆之危特徇

忱辞收迁成命

谢尚书左丞表

朝有虚位宜名贤是求名无假人乃次第而进危於据蒺愧若负芒伏念臣学不足与有明道未至於无固事君之义惟有愚忠涉世之疎真同强?安能谋王体定国论何以塞厚望称明恩不狩猎而有貒久慙尸素譬江湖之集雁无系少多未谪旷官更叨进秩随增封户之数并益冰渊之忧此盖伏遇皇帝陛下绍休祖宗同德天地常体道以为用故万物曲成不求备而与人故小材无弃致兹孤拙常冒宠灵敢不激昂大忠奋厉懦志庶有一得以补万分

上太皇太后谢尚书左丞表

进位一等自讼於无功诏班十行趣使之就列?於承命惕然为忧伏念臣足以謏闻暗於大体亲逢圣运滥迹天台出於流离孤塞之余任以左右弼谐之责断断自守略无他奇落落难成空嗟懦志位高禄厚功少过多方近辅之惟人坐期汰砾会左纲之虚次乃使续貂进其爵封益以户赋控辞勿固祗服若惊此盖伏遇太皇太后陛下以任姒之圣仁即唐虞之休治知臣有忠於所事之节察臣无善自为谋之私容之以底其成进之以厉其志臣敢不以礼以义惟几惟康庶收尘向之劳仰报生成之造

辞免门下侍郎表

劳能不闻名品益进惧必投於颠仆敢冒贡於诚情臣进德不强造道甚近逡巡尺寸之守遭会圣神之知久负丘山莫报之恩初无丝毫可纪之善粤参天政乃令骤至於四迁升寅东台所历遂周於三省益高股肱之任况备喉舌之句爵视上公邑增真食倘罔功而滥处实累国以起羞伏望皇帝陛下如日烛幽体天成物察臣底里之既尽矜臣器量之已盈特收误恩以允清议

上太皇太后辞免门下侍郎表

发政西台无裨於圣治陞班东省忽霈於恩书揣分未安控词自列惟先王制爵禄之等以待贤能而君子谨进退之方必循礼义臣起於寒晚躋至顯严独特圣明特达之知不缘党友更相之助历尘近辅更涉累年愚於直者人情之易睽公而固者衆怨之所聚每幸仰蒙於善贷保此孤危岂敢更冒於误恩迁其位叙上乖朝廷陟明黜幽之典下致臣子见得忘义之讥伏望太皇太后陛下慎名器以申大公明劝惩以厉百辟收还成命改授有劳

谢门下侍郎表

辅政备员久无功於右省冒恩进次预出令於东台悬至伋墙终无反汗臣资蘊不足拙方有余虽心危而虑之深然力小而任己重谓之事道而有愧乎圣贤之方至於徇公或以负於天

地之鑑士无可述圣有所姑保全已費於至仁叙擢更頒於异数况夙夜出纳之地以侍从駁正为官授之非人凜若无地此盖伏遇皇帝陛下明见万物道御四海体貌之以厉其心驯致之以底其绩敢不?事君之大义庶以报含物之异恩

上太皇太后谢门下侍郎表

才屡试而已穷位每迁而逾重弗容恳避徒积忧危臣力不逮心名常浮实猥以口耳之学遂玷股肱之司初不自量实拳拳於谋国迄无所就徒碌碌以因人此宜清朝汰斥之必加岂复要地褒升之敢冀矧今左省乃古纳言审王命之允而复行受国事之成而不作均为执政尤号近司夫岂孱愚所宜叨冒此盖伏遇太皇太后陛下躬任似之德御成康之朝忘已之圣而资於愚取人之长而略其短吹嘘成就至哉造物之难酬寤寐勤劳惟以捐躯而自誓

辞免右仆射表

揆席久虚治廷敷号猥及非才之錄久惊羣听之公敢冒至恩辄忘素守臣愚窃以论相虽人上之职得贤乃太平之基必先含德之老成或待远方之特起伏念臣本由疎贱叨寅顒严备数迹臣获进帝王之说预闻大政顾慙礼乐之文尧作章而继成汉分府以方重谓宜简斥更辱延登夫褒德者天下之大公而竭节者人臣之常分念蚤尘於机要已久席於高华奚事屡迁乃能毕力威望匪重将取侮於四夷智略更疎无可言之十事苟从昧进曷慰具瞻悦选於衆而求之多出於臣之右者伏望皇帝陛下慎名与器以尊朝廷绍德选劳以劝臣下俯徇富平之恳曲成考父之名收还过恩庶允清议

上太皇太后辞免右仆射表

敷告於廷畴咨以位惕然惊汗浹於愧顏窃以师长百司位隆於端揆权輿大政地重於西台进德则朝廷尊当贤则臣下服而臣学不足以断国论才不足以达事经孤奉恩私稽留岁叙处非其据者已久受过其量而莫胜方兴引分之言冀追妨贤之责敢期含垢更使代工倘怀苟得之图妄作自贤之行公器不嫌於多取岂曰知难高位必致於疾顒安能图报上则诒盛朝之累下则躡衆正之资伏望太皇太后陛下别择臯夔改图丙魏登寅宰路使秉国成大明庶物之情不夺匹夫之志亟收涣渥以息烦言

辞免右仆射表

辞受匪轻殫愚诚而自列训词申敕邈天听之逾高敢授稽命之诚冀鉴由衷之请?以皇帝陛下以盛德绍天地以至孝承祖宗?默无为方在持盈守成之日左右同体宜得秉道明义之臣如臣学术甚疏智谋弗竞虽事君之义固守不移之愚然陈力以来初无可纪之善久尸官而谤积蚤多病而志销当返田庐遽跻鼎铉无杨绾之德必不足以化在位非臯陶之举必不足以远不仁徒召烦讥上孤涣渥伏望皇帝陛下念辅臣之当否系国体之重轻特照孤忠曲全晚节敢还成命改授真贤

上太皇太后辞免右仆射表

微志未伸诚言难止倘获安於名分其敢追於典刑?以国家之辅相难其人臣子之进退必以道盖治忽之所由系而荣辱之於是生臣遭会四朝周旋三禁感慨忠义常见古人白璧不为之非风采功名愧乏大臣岩石具瞻之望略无报効久俟谴诃遽闻猷告之音擢寘宰司之重力不胜任实忧代斲之必伤伋而非高将有指顶而见笑下招覆餗之辱上玷知人之明况有庙堂之耆明而多中外之俊乂改畴公望乃協师言伏望太皇太后陛下昭鉴至诚保全晚节使器盈者不至於溢植躬者亦足以支持反误知庶无虚授

谢右仆射表

?以周王之慎令不反惟行虽如安世之自量深辞弗得竟尘非据伏积内忧窃惟命相之难为邦所重粤五帝三代而後逮两汉有唐之隆蔚然多贤昭於方册惟皇盛世尤慎此官君臣赓歌今百三十载勲业继踵裁五十二人上之职在理三光而调四时下之责以镇百姓而遂万物苟非选道德高世之望何以绍今古得人之光如臣至愚於世孤进先朝过听擢台阁省府之华二圣误恩寘辅弼疑丞之地位高徒闻於播恶德薄不足以尊朝功少过多怨丛谤积未诏士师之议遽咨端右之迁名与器是谓假人负且乘殆将致寇已循墙而至伋终涣汗以难安谓如臣宣为愚莫避汉廷之公议曰俞咨益汝往终非虞帝之命官危不自遑凛无所处此盖伏遇皇帝陛下保龟鼎之重稽祖宗之谋体尧之在知人本汤之不求备臣敢不?事君之义厉报国之忠虽爝火无补於大明然弩马可勤於十驾庶收尘露仰答乾坤

上太皇太后谢右仆射表

使节皇皇临门而慰宠诏词噩噩申命之丁宁虽考父之益?慙富平之竟拜窃以百揆之任师长於中台万事之几本源於右省用道德之望则可以总方略而广教化非贤明之选则何以制号令而平典章臣可与小知无他大略会两宫之识拔允三府之推移劳不足以偿罪尤誉不足以除讥谤黄霸见谓功名之已损贡禹徒以质直而见嘉区区其间录録何有请避贤路尝投劾以自言终贪国恩复尸官而未去敢意非常之宠遽膺爰立之求并进秩勲益敦封食三篇纳海远慙传说之来十事可行近愧姚崇之进顾视圭组若临冰渊此盖伏遇太皇太后陛下躬任姒之徽音翼成康之嗣圣敷求忠直保人成平臣敢不职思其忧义之与比安社稷为悦期勉慕於前人非尧舜不陈庶答扬於休命

忠肃集卷一

卷二

钦定四库全书

忠肃集卷二

宋 刘摯 撰

表

谢赐资治通监表

来事之师莫如稽古作者谓圣嘉此成书思前训之共由敕有司而申锡敢期孤浅曲被宠荣窃以帝王之道虽同治忽之时不一史惟广记欲俾後世之多闻书不胜繁常患当年之莫简则易治统之有纲惟先朝之缉熙遂诏名儒而论次网罗乎数千载之事洁齐於三百篇之中类集羣书刘邵上皇览之要发明旧典譙周成史考之篇秘以名山之藏进於华光之读今期传信更及分颁此盖伏遇皇帝陛下圣学日新孝思善继亦既省观於座右又将训迪於臣工曾是衰愚预叨恩礼学如皇谥方兴表借之心能愧班游遂有家藏之幸臣敢不玩篇籍之载求臣子之宜考终始以择是非因成败以昭劝戒庶见古人之大致少副盛德之万分

谢生日赐羊酒米麪表七首

恩班中禁庆集私门每於生育之辰膺此便蕃之宠义无以避情不自遑臣既龢而孤为贫以仕赋分凉薄逢时盛明遂以斗筭之微越承廊庙之任设孤复旦自伤弗逮於亲存颁馈示恩敢谓不缘於人废纶言温厚使节光华将内府之醪牵兼太仓之穈麦礼虽有旧恩实非常此盖皇帝陛下守位曰仁使臣以礼道契两仪仁函万类恩爰庆赏槩及疎愚尽鹿鸣之心非徒推饮食之惠効天保之报愿以致冈陵之崇

玺书将训玉府班常发为好赐之仁宠及诞弥之日拜嘉兴感揣分戴慙伏念臣学本小知器难远用幸遭圣明才不求备之旦亦玷左右民所具瞻之司惟涉事多艰故易销於精銳而尸官既久徒自积於谤讥留显绶而未行识包荒之已厚尚矜旧物曲记始生皇乎使节之光华肃传天语馈以公台之仪物荣发私门此盖伏遇皇帝陛下谨六圣之典章本二仪之亭育亦既饮食推所以燕嘉宾之心继之廩庖行所以养君子之道顾惟极陋孤奉至恩誓坚忠义之持仰报生成之施诞育纪辰方起思亲之感匪颁錫福遽瞻遣使之华餐牵有加醪醴惟旨伏念臣志愚於古材散而蟠越承共政之图曾乏尊朝之德留连岁月辱三禁之四迁穷竭技能无万分之一补窃位之刑未正匿瑕之泽已深会析木之集辰实左弧之纪日敢期眷记特沛训词驰酒正之上尊缀饗人之厚饩岁膺庆式幸积私庭此盖伏遇皇帝陛下体貌四邻兴行百礼嘉与四海同忠厚之政惠及臣下得燕乐之心不缘无能而废故事禄不逮养虚饗推食

之恩进思尽忠岂独属餍之幸

猥以诞辰上纓眷敕公台而发馈贲私室以为光拜受以还兢慙莫喻臣越从羈冗误被延登徒殫小知无补兴运下考清议未免窃位而妨贤仰赖至仁有以包荒而含垢敢谓此日记其始生方怀顾复之恩遽拜匪颁之渥此盖伏遇皇帝陛下体貌近辅劝养衆材饮食已尽其心既冒嘉宾之赐福祿以报其上敢忘万寿之歌誓竭忠愚用酬覆焘

生育复辰方起思亲之感光华遣使遽膺锡福之仁内自省循莫胜慙惧臣志虽慕古虑不极深区区岁月之间録録弼谐之地上焉万分之何所补下焉多士之无所称尚容素殮已愧善贷岂谓门弧之旧旦更颁函诏之深词馈以饩牵劳之酒醴此盖太皇太后陛下道成万物公御羣臣推所欲以及其私不以人而废其礼祿不逮养空饗仪物之丰孝可移忠惟誓捐糜之报使节皇皇诏词噩噩贲以匪颁之数宠其诞育之辰内惟至愚曷称优渥臣本非远业偶玷近司虽葵藿自然知倾於委照而腹背之细何益於高飞素飡怀不稼之忧肉食甘无谋之消未蒙澄汰更辱眷存祿弗及亲方感门弧之旦人无废礼亟蒙台馈之恩授受以还进退无所此盖伏遇皇帝陛下德冒万物政稽二仪欲以尽忠臣之心推此养君子之道予以馭其幸仰戴于至仁忠可移于君誓坚于素节台之有馈本所以养贤辰及始生误叨於锡福感深铭骨愧极汗顔臣幸遭异知擢备近辅事君以道福败取於容容当官而行功不闻於赫赫空饗优廩日惧大词尚烦推食之恩政及设弧之日兹惠之渥见於训言饩醴之丰荣於私室此盖伏遇皇帝陛下体天丕冒合日大明道成乎物而不遗礼不为人而或废欲养不俟常拜赐而念亲作忠可移期捐軀而报国

谢生日赐器币鞍马表

析木集辰适及贱生之日细书命使遽推庆赐之仁腆名物以在门抚孱虚而局地伏念臣本非国器误玷宰司当路妨贤久怀於多惧无功报祿更积於内忧徒依末光未谄严谴斗筭之器既盈而将倾雨露之私有加而无已於此诞弥之日曲烦齿及之恩咨内府以班常勅近亲以将命冰纨文绮发珍筓之兼衣幃革镂錫解上闲之良驷攻金之器璀璨织文之币纓华容莫逮於报亲力非繇於稽古服乘而拜俛仰以兢此盖伏遇皇帝陛下谨六圣之典章笃四邻之体貌德薄而礼之厚功少而锡之多以尊隆本朝以风劝在位天高地厚莫知图报之宜义重命轻更识矢心之所

乞外任表

臣闻事君必尽其诚故当无隐陈力有时而止盖以不能辄倾底里之怀仰渎高明之鉴伏念臣所学昧陋稟生拙艰敢希当世之功名徒慕古人之节行逮四朝而窃仕遭二圣之误知滥厠羣材遂预初政迁进历尘於三省首尾已及於四年不系去来无能轩轅匪惟智虑浅而已竭加以忧患多而早衰两目频昏百骸多疾迟徊恋宠出入腴顔内招窃祿之灾外坐妨贤之罪与其待人言而後去上烦典刑不若揣已分以自陈犹全出处辄倾孤恳愿丐一州伏望皇帝陛下廓日月之明广乾坤之度矜此已疲之犬马贷其无补於涓尘特推从欲之仁不惜分

符之宠使有民社宣惠泽而下流庶於桑榆收微劳以自効

再乞外任表

臣闻不备而惟其人故辅臣必用贤者无功而在其位则诗人所以刺之辄控吁天之诚冀逃累国之责伏念臣越从羈远擢真顒严才不足以达政经学不足以断国论无嘉猷以副虚伫之托无重望以慰具瞻之心顾慕留连逡巡俯仰虽皇慈之善贷岂清议之所容夫物理之常器满则必覆古人之戒位高者疾颠加之多惧而积忧足以早衰而易病外虽强而中涸日常耗而髮童日迫倾危上孤任使再殫蝼螳之志敢避鈇钺之威伏望皇帝陛下大明烛幽至道成物察臣今日进退之计本无他肠贷臣累年尸素之愆俾全晚节庶几稍循于礼义以免大玷于生成藩宣倘畀于一州报効敢辞以九陨叩阍俯伏得请是期

再乞外任表

近上封章愿辞职任?承批答尚秘俞音辄再冒於谴诛非敢轻於出处臣误膺獎拔本乏器能一预政几四更岁龠有妨贤之积愧无事道之显名每惊弱植之漂摇常赖至仁之掩覆满溢必殆盈虚有时非不知圣神之运难逢天地之恩未报然材智止於如此疎谬见於已然用之易穷如鼠之五技去不为少若鳧之双飞况爵禄者天下之至公难贪而久处进退者人臣之大节窃冀於少完俛可効於涓埃顾何分於内外伏望皇帝陛下惻其恳款赐以始终大譴大诤稍翫黜幽之宪有民有社愿膺共治之咨誓将勤养於小民尚得仰酬於洪造

谢郢州到任表

上书归相知政路之罔功出守分符荷天仁之从欲仍以仲连之节临兹故社之邦内省幸荣曷胜感惧伏念臣起身一介窃禄四朝比辱使令擢从孤远初由蓬莱道山之府载服柱後惠文之冠以横榻之散郎正中司之报法无为容於左右不自意其感通遂预政机继尘宰枋然而据非其所者危之道技多而短者易以穷空精銳之坐销曾分毫之未报罪多而功不见誓至而毁亦随思其所安去犹有补章哀祈者六七诏敦谕而再三不求所穷惜东野之御将败敢释其位察次孺之辞以诚秘殿清切以宠其名东方浩大以为之部张良微志止愿得封於留汉帝重恩乃使归侯於绛以时去国不日到州示以印章人生荣观识其城郭心喜来归既见一方所部之吏民具道二圣爱人之恩德感嗟顿首鼓舞瞻天已获逢白髮之故人又得拜先楸於旧陇书生之幸仕路几希此盖伏遇陛下纯仁厚义以康保万方至公大明以照临百辟事丛至而有是非之辨人杂进而识邪正之情使肆慝愚获全出处臣敢不谨进退之义厉始终之成子子藩方身虽在外惓惓王室心不谓遐更期宣化之余益誓纳忠之报

贺南郊礼成表

圣人能飡熙事备成皇矣顾怀隤拥肇禋之福沛然敷锡肆均大賚之恩?惟皇帝陛下凝命乾刚重熙离照西清访道学緝於光明东朝致?孝通乎上下以小愆之心求助以皃鷖之道守成

谓大祀之重五经谨始郊以见上帝朝荐真馆裸告太宫侯长日以道迎肃圆丘而陟降百神之灵受记诸福之物致祥宣室储精既逆厘於三极端闾涣号俾作解於羣方仁入有生欢通无外臣叨蕃宣之任布寬大之书执玉甘泉莫効骏奔之力驰心魏阙获同庆賚之私鼓舞昌辰百倍常品

上太皇太后贺表

精意以享昭格天人之休敷錫厥民丕宣雷雨之庆车书所底蹈舞同荣?以太皇太后陛下全德在躬大公御政夏涂山之教化周太姒之勤劳声气渊嘿而赏罚行堂闈天高而夷夏治扶维重器自置於安平拥佑清躬益跻於圣教吉礼咸秩肇禋告成寒暑正而风雨时福祿来而菑害去反始报本丕錫福於洪禧荡垢涤瑕与更新於庶域有生茂豫嘉气横流臣幸守藩方亲承惠泽云天在望迹类於周南玉帛侍祠心驰於汉時

谢青州到任表

东方大国莫如郛青愚臣何人继命帅守莅官兹始揣已不遑伏念臣器蘊至浅智灵弗竞遭会继明之始越膺共政之图三俯空逮於六朝千虑蔑闻於一得虽进退必由其道常愿学乎圣人而功烈如此其卑终虽收於士论寬典刑於司败假丘陇之便藩报政稽期实愧三年之鲁改符易地犹叨四履之齐惟时东秦号一都会士知礼义境控海山厥民富饶少斂攘之旧习其俗舒缓有平易之余风谨於承流可以无事曾是迂愚之品获尘寄委之忧此盖伏遇皇帝陛下乾健而粹纯丰中而光大沈机以观变化定监以御妍媸人无遐遗材以器使臣敢不振厉衰境激昂至恩简礼去烦稍?前修之治推仁宣泽庶求远俗之安悦集涓微仰酬覆焘

乞致仕表

事君主於无隐诚必自通陈力至於不能势宜知止辄露引年之请仰祈从欲之仁伏念臣亲际盛明蚤尘华显文章不足以润色才业有愧於经纶历事三朝殆踰四纪内之清涂严闕极侍从之荣外之名城大都徧藩守之选乏嘉猷以告於后无膏泽之下於民徒以忠义愚直之心期於弗变至於得失利害之故初不自谋缘兹误被於圣知尝亦预闻於国论士儒至此幸遇已多比奉对於清闲颇自陈於衰晏出保留宫之钥坐安乔木之邦惟厚禄不可以久叨顾良时忽焉而如失年龄寢迈疾疹交乘神明溃虚难支於外虑筋骸摧薊顿异於前时荣敢尚贪福知已过非特招满盈之祸惧将累覆轡之恩迫此忧危敢祈引谢伏望皇帝陛下曲矜旧物深烛至诚贷其无补於涓埃哀此已疲之犬马许上还於印绶俾退养於丘园顺服经生悦保完於余喘顾陪乡老永歌颂於太平上以成君父始终之仁下以全臣子进退之节伏望圣慈许臣致仕

第二表

敢期睿眷未赐俞音惧汗虽濡危诚难止伏念臣材质极陋迹援至孤夤缘三圣之知简拔衆

人之上事功何有禄位过盈虽爱君之心死然後已而从公之力毫矣无能向被恩怜许叨居守厉衰残而振迅不免旷官怀宠遇以留连又将满岁灾衅乘时而或至疾病攻老而日深形神之劳两皆敝竭外内之敌纷莫支持臣非不知圣明之治难逢天地之恩未报迫兹颓朽无以勉强况今时不乏人物皆遂性自惟出处无所重轻曲烦优诏之丁宁益重孤忠之感涕伏望皇帝陛下测其底里保以始终俾解组以去归获全生而退养逍遥漳浦之卧休息茂陵之居既以免钟鸣不止之讥又以脱器满则倾之祸陶然歌圣乐以自终则於君父之仁岂特丘山之重

第三表

未赐允俞倍深感涕在念旧之恩虽厚顾吁天之愿未从敢沥肺膺 干鈇钺臣蚤缘一介获际三朝出入恩荣周旋幸遇积岁时而徒久曾报称之蔑闻居怀窃位之慙且困负薪之疾比乘燕见颇尝恳激於引年贪奉德音乃复逡巡而就次坐持留钥又浹岁笊衰龄益颓壮气益耗精竭形疲而莫之复日改月化而益以深疾相与以侵陵势无因而勉强俛俛末路犬马之力无余奄奄余辉桑榆之期有几故抗章告老谢病乞骸敢谓圣度寛大而不忘其愚训言惻怛而未容其去虽事君之礼要以承命为然陈力有期至於不能则止苟免贪於厚禄殆自迫於余生岂独贪冒以取世讥亦将满盈而致阴祸上孤覆焘下丧始终敢竭一诚复申三请伏望皇帝陛下廓日月之明而幽无不烛推天地之造而物皆遂生特赐残年俾还故里奉松楸而躬事完桑梓以裕生释去轩裳以消灾危之数辅近药石以冀衰疾之康悦形神之可支安畎亩以自乐优游老境歌咏圣宸

谢分司蕲州居住表

伏读训示俯循罪迹理不容於万死恩犹畀其余生祗命奔驰悼心陨越伏念臣羈孤无助勤苦自为承家本出章句之儒所望不过州县之吏偶缘人乏获预於政机寢以次迁遂坐於宰席以罍缶之器而渡江汉以翺蠕之力而负丘山空竭一心曾无远虑待罪期月而已固尝不胜於人言去国三年於兹终至再烦於朝论衅恶暴列弹劾交兴擢髮不足以数罪辜伏鑽不足以谢公议敢累好生之德曲推念旧之仁祗令分务於别都更俾安身於善地咎深谪薄感激涕零此盖伏遇皇帝陛下同德昊穹绍休前烈记臣久侍於帷幄怜臣自蹈於典刑昔常察其所安未忍置之於理如犬马簪屨之贱犹弗弃之虽天地父母之慈不过如此臣敢不省非内讼劾意自新往咎莫追长负误朝之愧来日无几尚坚糜骨之忠

谢新州安置表

上负国恩自干罪宪悔心追悼感涕莫收伏念臣以一介之微叨四朝之禄当大明之继照由外服而赐归历尘近司实奉初政心贪荣利久窃位而无慙识闇事几日播恶而不悟仰累任人之哲自贻误国之愆置散投闲固公言之未厌後咎余责谓显戮之必申前蒙异恩聊复远斥此盖伏遇皇帝陛下好生以奉天地任德以法祖宗载加震曜之威备示存全之泽譬父母之譴其子或赐矜怜然瘡痍之逼於身何能淹久傥厚德之可报誓孤忠而弗渝

代张安道南京谢表

天近威顔初违於咫尺地兴王业叨任於保厘已见吏民奉宣恩德恋荣兼甚感愧内并伏念臣奋出诸生驯致膺仕惟两朝獎遇寢阶文武之崇资虽一节始终初乏涓尘之小补曩从留务起殿辅藩逮归覲於路朝旋跻荣於薇省虽时陟降瞻奉於清光曾无谋猷仰裨於愿治屡缘颺晏自丐便安圭符之荣恩方颁於俞命车服之赐礼特异於故常洪惟别都是谓大国奉藏衣之原庙谨留钥之离宫襟带淮濉左右齐楚当舟车之一会列府卫之万兵闾巷熟锦衣之荣儿童习竹马之旧岁时足以展先楸之拜恩礼足以交故老之欢内省欲然其何称是此盖伏遇皇帝陛下作新大治总厉庶工怜臣之於践更既劳而久察臣之於义利粗识所趋特示眷怀宠绥优寄敢不殚犬马之効庶以报乾坤之仁劄子

辞免监察御史劄子

窃以御史者朝廷纲纪之所在而天下公议之所出居是官者必得博学多识刚明方重之人然後为称其任如臣谊蘊空疎性智昏塞材亡所长名不着见天听之过遽此拔任深恐轻累风宪之地而无以厌服天下之望臣实不敢冒处须至沥恳辞免伏望圣慈特赐矜允所有合门敕命不敢祇受

再辞免监察御史劄子

闻命震恐罔知所措窃以臣之事君虽以承命为恭然而不度已之能否贪冒以任事者亦不可谓之忠矣今御史之属缺员日久天下皆知陛下慎择精选思得行谊素重可以表率在位之人以充其任而臣既无学术以明考典故又无素望以取信清议一旦出於过听强之此职某何以副圣君所以用人之意而允中外之望哉伏念近岁以来御史补外者虽一时以言事得罪然其人皆有公忠亮直之节窃谓陛下宜赐召还处以旧职必能有补以慰天下如臣之愚不敢冒处所以敕命乞行寝罢

辞免御史丞劄子

窃以御史府自近世不置大夫而中丞为之长其职在肃正朝廷纪纲绳遏内外姦枉天下之事无不可论非夫有德有言刚明厚重临义理而知所择者其谁宜居之臣智疎材下资浅望轻承乏台端已逾器量虽殚狂瞽无补毫分日怀失职之忧敢意误恩之及陛下进臣名位不若行臣之言加臣宠荣不若使臣无愧况备官之未久实揣分以难安伏望矜察愚衷追寝成命

再辞免御史中丞劄子

臣供职以来为日未久略无裨益方俟谴诃恩制横加莫知其故衆人见臣超擢将谓言事有功则恐侥幸生心妄想希効沽激之义倾訐之风争进纷然郤致多事然则臣虽以能言而进

其弊犹且若斯况臣所论之无功乃是当黜而反陟且官为御史本在绳愆苟身冒过恩何以自信此所以夙夜内省蹶蹶靡遑上系朝廷惩劝之方下系臣子进退之分

辞免兼侍读劄子

伏念臣孤拙不肖自待罪中执法夙夜忧畏志虑耗竭长恐颠仆孤奉恩獎今复寘之经筵岂敢当此?以皇帝陛下春秋富盛向意经术讲读辅道正在得人而儒学之士布满近列猥以属臣实非其称伏望追还成命非独下副公议而使臣安分毕力以守职事获逃咎责则陛下赐臣厚矣

再辞免兼侍读劄子

仰戴宠遇惧不自胜理有未安义难苟止方陛下嗣服之始储意经艺将以尊所闻而极高明凡在帷幄左右之臣宜皆博访宿儒以极天下之选而臣素无资格德义不闻此臣揣分而不敢受也又臣自去冬初备台职首曾言讲读臣僚宜慎择经术之人当时颇蒙采纳今若冒荣滥处则是前日之言臣自以为己实能堪之此又臣畏议而不敢当也伏望察臣区区非有饰说特赐寝罢

辞免尚书右丞劄子

恭闻宠命惊陨失次伏念臣浅闻寡识无所肖似昨蒙召自孤外任以风宪愧无古人正色献替之效莫副陛下虚已听纳之公腴颜尸官日俟罪谴敢冀误宠擢寘近司今二辖之官为四辅之任用人当否系国重轻况旧德老成布在要近其闻望皆出臣之右其践历皆在臣之前舍而不求乃在虚受苟辄冒处必致颠危伏望追寝以安愚分

再辞免尚书右丞劄子

天听甚高愚诚不达典颁训敕益用震惶臣窃以士平居时常叹无位以行其道臣今幸仁圣在上好善求材长短毕用遭遇斯时而擢於可为之地自人情观之宜若可以奋迅而进也臣所以逡巡不敢受者盖逢时爱日虽当汲汲而审已揆分又有义存焉臣愚而多艰或可以小用不可以大受苟力不能自量学未能自信而遽务谋猷国事是所谓苟得者其於国体为累甚大臣一身颠仆安足道哉伏念中执法其任已重常忧不胜今愿得因此并解言责别除一闲局庶可以自効伏望察其诚心哀而怜之

再辞免尚书右丞劄子

使车光华里閤荣叹拜制词之深厚听口敕之丁宁恩渥有加兢慙无地臣非敢伪为廉退以邀誉於流俗亦非肯故自违慢以干诛於宪典实以陛下今日之势於左右政事之臣必当纯用德望乃可以重朝廷而镇羣下臣材质弩下自度不可大任故不避再三稽命之戮实愧玷

圣明知人之鉴伏望追罢恩制改任贤杰庶允公议以全蝼蚁之命伏闻御史中丞已差人讫敢乞别赐一差遣亦足以自効

辞免中书侍郎劄子

伏念臣出於孤平骤遭识拔备员省辖漫已逾年虽矢心毕力图报万分而略无善状日俟严谴方欲自为投劾之请岂敢更冒迁次之荣况中书之地几政所出其所付任尤须得人臣自揣量实难称副

辞免门下侍郎劄子

臣才质空陋久玷近列徒以国恩未报不敢引身退避而累蒙迁擢职位愈高退自揣量实不遑处况东台出纳制命其任尤重伏望察臣不逮收寝新命以允公议

忠肃集卷二

卷三

钦定四库全书

忠肃集卷三

宋 刘摯 撰

奏议

乞结絶亳州狱奏

臣伏见亳州官吏昨以往滞俵散青苗本钱朝旨下本路转运司差官取勘及今累月尚未结絶访闻命官及干系人等在禁者其数甚衆遂成大狱惊骇物听臣愚以谓本州官吏所犯止于不依限支散青苗钱其罪可以一言而定非有晦隐难穷之状而起狱不止有司未测朝廷风旨张皇事势连逮证佐当此暑月追呼淹系殊可矜恤欲望陛下连降指挥严责勘司须令日近完结其证佐人逐旋先次疎放所贵盛夏不至淹延取进止

论役奏

臣伏见近日有畿县百姓数百人就宰相居第告助役新法不便及诣开封府山头又赴御史台陈诉称系东民税户今来令出钱助役各系贫户生业微薄每年赋税并诸色官债已是供输不前难于更出助役钱数及称提点司升起逐户等第已蒙晓示起纳期限数百人往来街市京师喧然臣窃以畿向者天下根本之地常宜安辑之而爱养其财力使有丰佚闲暇之乐故可与为善而不可与为非义所以重都下根本之势昨者团结保甲是时西边用兵法令一出民间惊骚至今忧惑而未宁今又作法使人均出缗钱非时升立户等期会急迫所以人情惶骇无所赴愬恐非所以强干内重爱人寛役之意实由有司未能奉宣陛下大均之意以立法度乃为此等纷扰臣伏愿先降指挥告示逐县今来新法未得施行别听朝旨以安衆心然後乞根柢昨来承准是何条制辄有升降户等及如何出榜依理施行所在役法臣愚欲望陛下深求民情博采中外之论再行讲求其要不至重斂动衆而可以经久者而後行之系民休戚此最大难惟陛下谨虑而审取之天下幸甚

贴黄

臣闻王庭老张靓将两浙差役合用钱数增起一倍科在民间本路人情嗟怨不安今来府文又敢擅升户等此等皆是妄意朝廷欲以羨余为功臣窃虑诸路亦有似此擅升等第多配役钱去处乞速降指挥严为约束

论用人疏

君子小人之分在义利而已小人才非不足用特心之所向不在于义故希赏之志每在事先奉公之心每在私後陛下有劝农之意今变而为烦扰陛下有均役之意今倚而为聚斂其有爱君之心忧国之意皆无以容于其间今天下有喜于敢为有乐于无事彼以此为流俗此以彼为乱常畏义者以进取为可耻嗜利者以守道为无能此风寢成汉唐党祸必起矣惟君子为能通天下之志臣愿陛下虚心平听审察好恶前日意以为是者今更察其非前日意以为短者今更用其长稍抑虚夸轻伪志迫忘远幸于苟合之人渐察忠厚慎重难进易退可与有为之士收过与不及之俗使会于大中之道则施設变化惟陛下号令之而已【案本传摯为监察御史时入见神宗面赐褒谕因问摯从王安石学?安石极称器识摯对以少孤独学不识安石退而上此疏今永乐大典本阙谨据宋史补入】

论助役十害疏

臣闻孟子曰徒善不足以为政言人君虽有仁心仁闻苟不因先王之道为良法度以行之亦不免于民不得被其泽恭惟陛下至诚好治忧念元元谓天下役法久失其平故慨然有意其大均之也然有司建议立法颇无以上副诏旨而下协人情者臣请言之其法曰率钱助役官自雇人臣谓其势有不可胜言而略陈其害天下户籍均为五等然十七路三百余州军千二百余县凡人之虚实役之重轻类皆不同今斂钱用等以为率则所谓不同者非一法之所能齐若随其田业腴瘠因其所宜一州一县一乡一家各自立法则纷错散殊何所总统非所谓画一者其害一也新法患旧籍之不得其实故令品量物力别立等第以定钱数然旧籍既不可信则品物品量何以得其无失不独搔扰生弊亦使富者或输少贫者或输多其害二也上户常少中下之户常多上户之役数而重故或以今之助钱为幸中户之役简而轻下户役所不及故皆以今之助钱为不幸优富苦贫非法之意其害三也新法所以令品量立等不取旧簿者意欲多得雇钱而患上户之寡故临时登降升补高等以充足配钱之数疲匮之人何以堪命近日府界其事已验其害四也岁有丰凶而役人有定数助不可阙则是助钱非若赋税有倚阁减放之期其害五也夏秋二熟农人惟有丝绢麦粟之类而助法欲用现钱故须随时货易逼于期会价必大贱借使许令以物代钱亦复有退拣壅塞及夤缘乞索之患其害六也两税及科买贷债色目已多使常无凶灾犹病不能又起庸钱竭其所有恐斯人无悦而愿为农者天下户口日当耗失则去为商贾为客户为惰游或父母兄弟不相保抵冒法禁折而入下户大而聚而为盗贼其害七也徼幸之人又能夤缘法意虚收大计如近日两浙科起一倍钱数欲自以为功而使国家受聚斂之谤其害八也夫既为之民而服役于公家乃所谓治于人者事人天下之通义也况乡县定差循环相代上大役至速者犹须十余年而一及之至于下役则动须一二十年乃复一差今使槩出缗钱官自召雇盖雇之之直不重则不足以募不轻则不足以给轻之则法或不行重之则民不堪命其害九也夫役人必用乡户盖以其有常产则必知于自重性愚实则罕至于欺公旧法虽有替名乡人自任其责今既雇募恐止得轻猾浮浪奸伪之人则所谓帑庾场务纲运凡所以生财者不惟不尽心于干守亦恐县官之物不胜其盗用而抵冒法令罪狱日报至于弓手耆状承符散从手力胥力之类职在捕察盗贼发行文书追督公事者则恐遇寇有畏逸之患因事有骚扰之姦而舞文鬻无日有虚伪其

害十也夫民可安而不可动财可通而不可竭以臣之浅闻寡见而所列如此其沸于民口有大于此而臣未敢有言者其又何穷然臣尝为陛下博访而深计之盖天下差役莫重于衙前今司农新法一项云乡户衙前更不抽差其长民人等并听依旧将天下官自出卖到酒税坊场并州县坊郭一户助役钱数以酬其重难臣谓此法有若可行然坊郭一等户自来已是承应官中配价之物及饥馑盗贼河防城垒缓急科率郡县赖之今亦难为使之均出助钱外旧来官中将场务给与市前对折役过分数然多是估价不尽亏郤官中实数今既官自拍收用私价召卖则所入固多又应系衙前当役去处事件官为裁省使无旧日糜费而支酬之际稍优其数则人情必当乐为可宽乡户重役而似无害民之事臣乞陛下将此一法诏有司讲求其详逐路坊场钱户可以了得本路召雇衙前酬獎则详其条目行而观之以二三年间若见其利则其他役法更革无难矣所在助钱之法伏望早赐睿断一切寝议以幸天下夫更令创制可以渐而不可以暴况欲内自畿甸外至海隅一槩率钱可谓重歛又欲迫急而成之使生灵不得以自全陛下安得不慎重其事哉

论助役法分析疏

臣近曾上言论助役之法其害有十今奉圣旨批送下司农寺曾布劄一条件诘难奉圣旨令臣分析者窃以助役之法有大臣主之于中书有中书之属官及御史知画者讲画于司农寺有大寺所选择监司举官官行之于诸路上下布置其势若此可谓易行矣然旷日弥年未有定论可以为法者其故何也不顺乎民心而已矣民之所不欲古今未有可以势力强而成者也故虽命使者奔驰道路禀之于内而刼之于外然其拟议参差条制殊异衆情纷然不知其可行之计则此法利害明若观大矣臣有言责故前日采中外士民之说敷告于陛下今司农之辩说既如此陛下以臣言为是耶则事尽于前奏可以覆视陛下以臣言为非耶则贬黜之而已虽复使臣言之亦不过所谓十害者不惟费辞文过烦紊天听而风宪之官岂与有司较是非胜负交口相置如市人之交竞者则无乃辱陛下耳目之任哉有司谓臣等险詖欺诞则上有陛下之聪察而下有中外之公议所谓中外向背则臣所向者公所背者私所向者义所背者利所向者君父所背者权臣今方辩助法之利害而无故立向背之论以朋党之意教诱天下此可骇也所谓曾无忌惮则陛下之法臣所畏也陛下容受忠直臣为御史实不敢隐情自为忌讳今司农欲使臣畏忌权臣则诚臣之所不能者也伏望陛下将臣前後所论助役章奏与司农之言宣示二府大臣中外百官以考是非若臣言有所取乞速罢之奏议以安天下之心若稍有欺罔则乞重行窜逐以谢专权之人而戒妄言者

分析第二疏

臣昨日准圣旨批下司农曾布劄子为诘臣所言助役事寻已具分析奏闻去讫臣窃以耳目之于人也事物过者必见必闻以赴其心而心必受之末有不信其耳目而反以其能视听为疑者先王以言置官代天下耳目内外相信无以异于一体之相为用也其言虽直必容虽多必受则国家安治不然则反此故谤木谏鼓不设危乱之国鼎鑊斧鑕不在圣明之朝恭以陛下躬上圣之德好问乐善凡延见臣下虽贱官小吏必温恭和容以访逮之此尧舜之盛也然至于臣等以职事为言则使之分析者中外皆知非陛下意乃司农挟宠以护改作大臣设法

以蔽聪明尔因事献忠敢一言之今天下之势陛下以为安耶治耶抑未耶苟以为未安未治也则以陛下之睿智言动起居躬蹈德礼夙夜厉精以亲庶政而天下未至於安治者将谁致之耶陛下即位以来注意责成以倚望太平而日以太平为已任得君专政安石是也二三年间开阖动摇举天地之内无一民一物得安其所者盖自青苗之议起而天下始有聚斂之疑青苗之议未竟而均输之法行均输之法方扰而边鄙之谋动边鄙之祸未父而漳河之役作漳河之害未平而助役之事兴其间又求水利也则民劳而无功又凿淤田也则废大而不效又省州县也则诸路莫不强民以应令人起东西府也则大困财力禁门之侧斧斤不絶者将一年而未已其议财也则商贾市井屠贩之人皆召而登政事其徵利也则下至于历年日而官自鬻之推此而往不可究言古之贤人事君行道必驯致之有渐持久而後成至于设施皆有次序今数十百事交举并作欲以岁月变化天下使者旁午牵合于州县小人挟附佐佑于中外至于轻用名器混淆贤否忠厚老成者摈之为无能侠少儇辨者取之为可用守道忧国者谓之流俗败常凿民者谓之通变能附已者不次而进之曰吾方擢才不可招者为名而斥之曰吾方行法凡政府谋议所以措置经画除用进退独与一属掾曾布者论定然後落笔同列预闻乃在布後故奔走丐乞者布门如市虽然犹有系国家之体而大于此者祖宗累朝之旧臣则镌刻鄙弃去者殆尽国家百姓之成法则剗除废乱存者无几天下所谓贤士大夫比岁相引而去者凡几人矣陛下亦尝察此乎去旧臣则势位无有轧已者而权可保也去异已者则凡要路皆可以用门下之人也去旧法则曰今所以治驭天下者是已之所为而陛下必将久任以听其伸缩也嗟夫此事之实也其名则曰革弊而兴治是以陛下乐闻其名而?察其实也夫赏罚号令乃陛下所以砥砺天下而鼓动四方以为劝信者今有人焉能舞公事以倾勲旧能兴大狱以逐官吏其事是耶乃其职尔何至超任以为职司耶赵济是也又有人焉以渭南欺罔之始既以此得罪而终始以此增秩王韶是也程昉事漳水以兴大役困一方而无成功赵子几挟情以违法禁按史以防民言则皆置而不问乃是赏反施于圣人之所当罚罚不及于王法之所当诛也畿邑之民以助钱为诉也陛下圣旨令召情愿东明知县以不能禁民有诉而被劾也陛下圣旨止令劾擅升户等之事二者皆独断之善政而中书皆格而不下此则陛下之号令不行也西师无功而曰非朝廷之本谋天下但见给军之费輶出于京师空名之语驰下于西路又命一知制诰于将幕使专代天下之言报复号令络绎于道苟以为非耶何不止之迨其事败则曰非政府谋也捐费缗钱以千万计秦晋之人肝脑涂地日增军士之怨结边疆之衅而不自谋咎乃致陛下发中诏以责躬抑徽号而不受忠义之士谁不痛心而疾首至如助役之法臣尝言之矣其条制纖悉臣虽未能究见然终以为使天下百姓赋税贷债公私息利之外无故作法升进户等使之?出缗钱皆非为人父母爱养基本之所宜为者故臣谓之聚斂非妄言也陛下任遇辅臣如此其重而致主之术乃用此道是皆大臣之误陛下而大臣所误者误诸臣也今既颠谬乖错败乱纲纪知天下之不容惧宸衷之回悟以谓虽中外之士畏避无敢言者然其尚敢言者独御史有职尔故又使司农荧惑天听作为偏辞令臣等分析以摧沮风宪之体艰梗言路欲其忧惧苟容而緘默或欲撩其危言从而挤逐不知忠臣节士虽戮辱不惧所以尽事君之义尔今羌夷之款未入反侧之兵未安三边疮痍疲溃未瘳河北大旱诸路大水民困财力县官匱竭圣君恭勤思治万方之所知而在辅弼者方欲蔽天聪明使下情不得而上达其何心耶臣愿陛下思祖宗基业之艰难念天下生灵之危苦少回几虑收还威柄深恐异时专权肆志将有陛下所不能堪者则必至于亏失臣君之恩是今日养之适所以害之也若夫冯京王珪同列预政皆依违自固不扶顛危虽心悟其非而无

所掇正己之进退又嬖媚而不决皆非所谓辅臣之体臣四海之内孤立独进陛下过听任以风宪尝窃思之近岁台谏官叠以言事罢免岂其言皆无补于事欤岂皆愿为讦激险直之语以自为名而去欤尝以为欲言政府之事者其譬如治湍暴之水可以循理而渐导之不可以堤防激鬬而发其怒不惟难为功亦为患滋大故臣自就职以来窃慕君子之中道欲其言直而不违于理辞顺而不屈其志庶几愚衷少悟天听而亦不敢倬倬然如贱丈夫以一言一事轻决去就致圣朝数数逐去言事而无所裨补思以上全国家体而下亦能久其职业而成功名两月之间才十余疏其言及助法者止三疏耳当天下多事之时而臣言简缓又不足以感悟则其负陛下亦多矣不意大臣之怒已至如此令臣等分析分析之前代无之祖宗无之近年已来乃为此法以摧言者之气方陛下孜孜听治嘉于纳谏而大臣所为则不得正目而视此所以发臣之狂言而不能默也伏愿陛下深察其事物之变安靖之治以休生民有所措置以大小缓急为先后之序以义利经权为本末之辨自兹凡有献替于陛下者乞有以诱掖奨厉之罢分析之命以尊严朝廷而养多士敢言之气臣不胜惓惓愤懣爱君待罪之至

代留守张方平留阙伯微子张许三庙奏

伏见司农寺奏请降制应天下祠庙并依坊场河渡例召人承买状取净利本府管下所管祠庙五十余处各已施行内有阙伯宋公微子庙阙伯庙岁纳钱四十六贯微子庙十三贯并三年为一略臣窃以阙伯远自唐尧迁此商丘之地主祀大火而火为国家盛德所乘而王本庙历世尊为大祀微子宋之始封君开国于此亦为本朝受命建号所因载之祀典垂之甲令所当洁以时奉祀又有双庙乃是唐张巡许远以孤城死贼所谓能扞大患有功于民者今既许承买日後小人以利为事必于其间营求招聚纷杂冗何所不至慢神渎祀莫此为甚岁收甚微实损大体其余利害不敢尽言欲乞朝廷详酌留此三庙特免出卖以称国家寅恭典祀崇尚前烈之志

乞慎择讲读官奏

臣窃以圣人之德其聪睿神智固天性之所自有然孔子曰吾非生而知之好古敏以求之者也孟子亦谓人皆有四端是犹火之始然泉之始达在乎充之而已苟不充之将失其本然之性则虽圣人方其始也学问以达之范围以成之者其可少哉昔有周成王幼冲践阼其师保之臣傅之德谊道之教训者周公召公太公其人也夫左右之人既如此则成王虽幼其耳目所入盖无有不正者矣我仁宗之初亦以盛年嗣服用李维晏殊为侍读冯元孙奭为侍讲惟兹数人皆名儒宿德极天下之选是时方亲庶政听断之暇每于双日召使入侍讲说经典或读祖宗故事盛明之政庆泽无穷恭惟皇帝陛下绍膺天命傳序统命夫以异禀之资夙成之善而又上有太皇太后陛下之至仁厚德保护开佑所以成就者罔不备至矣然方春秋鼎盛在所资养左右前后宜正人与居语默见闻宜正事是接所以起善养源保微慎始尊德美而长智习致广大而熙光明则劝讲进读辅道之官其可不慎择也哉伏见兼侍讲给事中陆佃蔡卞皆新进少年越次暴起论德业则未试语分望则素轻使在此官衆谓不宜伏请罢其兼职以允公议仍欲望圣慈于内外两制以上官内别选通经术有行义忠信孝弟淳茂老成之人以充其任遇非听政之日便殿燕坐时赐廷对使之执经诵说陈天下之义理古今君臣父

子之道以广睿志仰副继善求治之意臣不胜愚欵取进止

请依程颐所乞奏

臣伏覩制命以布衣程颐为通直郎崇政殿说书者恭以尊儒重道振举遗逸使天下归心固圣朝之所宜为也然臣窃惟进退者臣子之大节爵禄者天下之公心进退不失其义则人道立爵禄不轻所与则士心劝二者盖不可不慎也颐始则节行自守陛下高其风故以州推官西京教授起之颐既力辞从而赴召而陛下又以宣德郎秘书省校书郎待之颐既至未即受命而陛下又赐之廷对官之以通籍置之于经筵盖颐之逊避不已而陛下恩命每有加焉臣恐颐于出处辞受之际义有难安者也孔子曰如有所誉其有所试矣孟子曰仕有时乎为贫辞尊居卑辞富居贫颐好学求志有君子之行遭际盛世其心岂徒欲以声名自售哉固愿有所未就也颐亲老家贫兄顥有贤行官不达而死在颐之义当仕也为贫而仕则若孟子所谓居卑者可也今有誉而不试每辞而加进臣于是知颐之不敢受也若夫纷纷之论致疑于颐者非独如臣之言也直以谓自古以来先生处士皆盗虚名无益于用若颐者特以迂阔之学邀君索价而已天下节义之士乐道不出如颐等辈盖亦不少彼无所援乎上故不闻尔又以谓颐辞免爵命之日曰前朝召举布衣故事具在是颐之志欲为仕之常秩而亟欲得台谏侍从者尔臣固知论者之或过也然而是非疑似陛下亦不可以不察也圣人自有中道过之则偏天下自有常理背之则乱伏望陛下审真伪重名器闻颐方辞恩制乞降指挥依颐所乞成就其节止授以初命之官既使得以禄养其亲又使授之有义免于似是之谤後日见其可用而进擢之盖未晚也于陛下尊德举贤之道无过不及者不亦休哉取进止

贴黄

闻颐有所建请数事如欲令经筵侍臣坐讲之类又有非所宜言者衆传以为笑不知有是事乎惟望速降圣旨依颐辞免但命之以初官试之以西京教授庶几成颐之志完颐之节以息羣议而亦不害异日擢用也夫廉耻不立于天下久矣今幸而有一人焉若授受不当于义则使天下靡然益不以廉耻为事岂不重哉

乞增谏员及许察官言奏事

臣蒙恩过听使备员御史固将竭尽愚论知无不及而窃惟陛下即阼听政之始其所先者宜莫若广言路故臣今就职之日首献其说盖圣人以一心御万事而无遗虑以一视周四海而无遗照非能身亲而目得之也为能资询访度致之人言开辟其涂使无壅蔽上之公卿大夫百执事下之虽工瞽执技之贱刍豨负薪之陋皆得输意自竭杂然至前而听吾之所择惟惧乎言者之不能如祖宗以来谏官御史张设员品罕不备足凡在职者皆有言之责臣今伏见计官止大夫官一员御史台自中丞而下虽十员然止于中丞侍御史两殿中法得言事外监察御史六员专于察治官司公事文事之稽违者而不预于言则是在朝廷以一言官而任其责者裁此五人而已天下之大臣工之衆权强之渐朋比之萌民之休戚政之利病其于献纳伺察诚恐耳目之未广事或有不得尽闻于圣听者此非帝王明四目达四聪开衆正屈羣策

者也臣欲于谏院增置谏官数员本台监察御史并许言事其所领察耳目不废如故所贵共尽忠力交辅圣政臣不胜惓惓取进止

依旨推择监察御史奏

准尚书省劄子节文臣僚上言近降指挥御史台察官并许言事台官共置六员则在台八员之中当减二员莫若指挥长贰察视本台除言事官外某可使者某可罢奉圣旨依奏续准尚书省劄子朝散郎试御史中丞黄履奏现今监察御史六员除刘拯外其五人并系臣论荐伏念臣既尝称其材以进之又择其不材而退之在臣私义实恐未安欲望圣慈指挥止令侍御史刘某推择奉圣旨依奏并劄付臣者右谨件如前臣契勘本台监察御史六员旧来专领察按近制并许言事逐官皆系臣僚保荐堪充御史之人今除陈次升一人现今奉使差出臣未之职外有刘拯安惇二员刘任久次可以减罢伏望圣慈量才别加任使其余合依近降朝旨指挥施行

乞依旧令封駁司关报差除奏

检会准元丰五年五月七日门下省劄子门下省奏据给事中廳状封駁房勘会昨会封駁司准元丰五年七月十八日中书劄子节文御史中丞李定状奏乞应有差除并令封駁司限当日关报本台奉圣旨依奉续准当年九月二日中书劄子节文同知谏院蔡卞奏乞应有差除及改更事件并令封駁司抄录关报奉圣旨应差除及改更事件到封駁司者并令抄录关报者勘会近准新制拨封駁司归门下省为封駁房其旧封駁司准朝旨废罢又准官制新条谏院已废谏官系中书门下官外即不言旧条合与不合行使所有本房承受差除及改更事件今来未敢依旧关报亦未敢便行住关白帖子称如合依旧关报未审以何司存为名如以本房缘以隶门下省若以本省又恐内省无关报外司之理及检会式令即无门下省关牒外司条式奉圣旨更不关报臣窃以朝廷慎于出令故使官司更为检察内之则门下侍以封駁外之则台谏许其论列然朝省之上事有漏泄禁罪不轻人谁敢传若非门下以司关移则台谏所闻常在命令已行之後此定与卞之所以有请而先帝所以从之也其後给事中徒以封駁改司为房人疑内省不敢关报外司遂作申禀致有续降指挥厘革今来惟是敕命已至六曹已作奉行方始随事关报苟理有未安给事中失于駁正或虽駁而失当其差除之告命政令改更之制往往已授受施行矣而台谏官方从其後论之虽以圣慈优容听纳必无难于追改若或者以为号令已行不可反汗则是虽设之官而无补于事也故臣愚欲乞且用元丰三年指挥凡差除及改更事件并令门下封駁官依旧于当日关报谏官御史台所贵成命未下先事裨补而朝廷亦易于施行

贴黄

封駁司改为房名号虽亦小异而事任不殊若谓不可用关恐合以给事中移牒逐处乞详酌

乞令台谏先次上殿奏

臣昨于十一月十日曾具状奏乞先次令言事官上殿不蒙施行後來窃闻恐候开年降指挥以此不敢频有申请今来已是岁尽伏望早赐圣旨先次许令台諫官上殿奏事所贵公议人情不至隔塞得以详悉开陈上达天听

论三省枢密院差除奏

臣唯吏部牒十月十六日三省枢密院同奉圣旨唐淑问除左司諫等事又牒十月二十八日三省枢密院同奉圣旨陆佃等罢侍讲事臣窃睹自来朝制及近降官制格凡差除有中书进拟者有枢密院者有三省者有三省枢密院同进者盖建官分职各有所治法无相参也三省枢密院同取旨者似止于差除帅臣边镇大吏内臣近上差遣而已今来差諫官罢侍讲不识枢密何为而预也外言籍籍皆以三省容纵密院侵紊政体莫不疑异臣窃以国家所可恃者在纲纪大臣所宜守者在名分纲纪正于上则下无邪志名分治于下则政无多门一有夺移何患不起况朝廷今日正当尊强君道谨守祖宗法制严臣下之分以消压权僭之心今废置官吏陛下大政而三省之事也枢密院非其职逾法出位横造议论公然犯分臣恐积微至着交乱官守渐行私意以害政事上则陛廉之等慢下则倾夺之患生杜渐防微实系国体望圣慈特降谕旨戒谕三省枢密院臣僚凡以差除拟进者各依自来条制班次取旨所贵正名定分事无侵逾以尊朝廷以正在位取进止

贴黄

臣又虑上件差除諫官等事曾降圣旨特许枢密院同进借有特旨乃是圣恩优礼报政欲合同衆论之意而大臣之节自当引义辞免惜朝廷纲纪以安分守不应乘便冒进渐隳失体制

忠肃集卷三

卷四

[集部,别集类,北宋建隆至靖康,忠肃集]

钦定四库全书

忠肃集卷四

宋 刘摯 撰

奏议

岁旱乞修政事奏

臣伏见自入冬以来并无雨雪亢阳为厉被灾甚广羣情瞠瞠惊忧四顾考原经典可谓大异夫人之气与天地陰阳之气相为出入流通而往来者也人情和于下则天道顺于上人事乖于此则天变效于彼是谓天人相与之际也故圣人之事天也知其在上不远应以类至则凡祈禳消伏以谓末节小数而专修政事以应之窃以陛下委国仰成与之均休戚同荣辱者不在三省枢密院执政之臣乎今庙堂之上大臣八人情志乖睽谋谟不一无同心同德之节有分曹怀二之意故议政之际排抵依违相激相鬪其语往往播在中外所以政令壅隔而不下文书稽滞而不行官爵滥于无名而不应于典故公道屈于贵近而独施于疎远私邪朋比上下隔絶况当皇帝陛下渊默谅闇之日太皇太后陛下制出房闕之时朝廷政权尽在大臣而大臣不咸如此故天下但闻颇僻之事而不见和善之政政不和则人情不和人情不和则天地之气繆沴而生此变也书曰肃时雨若五行传以谓冬旱政舒缓之所致也今上下可谓不肃朝廷之政可谓骄慢废弛号令可谓二三不振矣古者灾异水旱咎在變理陰阳之官故策免三公以塞其譴今来岁已穷尽早暵如此宿麦在野无润泽之入春气相乘有疫疠之变生民一岁之大命岂可不念之哉又一月以来日青无光风霾昏翳考之占验皆非小变而上之人恬不以为怪此中外之所以恐惧而不宁也伏望圣慈深省上天警告之意俯察朝廷乖戾之变特诏大臣修饬政事凡赋敛之害人者法令之未安者大改而更张之至于决狱讼之私枉趣诸司之稽违进忠良退阿諛通蔽塞去疑贰务以至诚实事上塞天譴下救生民则和氣之应将不旋日而得之矣臣不胜惓惓之心取进止

贴黄

今外议皆谓朝廷自升祔以来政事懈弛不及日前此盖有以召之非虚言也

乞祷雨疏

臣伏见近日都城之中火灾频起人情惶惧转相惊讹盖自冬春以来久旱所致今昼夜暴风气候乾燥故易以致火必得雨泽乃可消伏欲望圣慈命官精洁祈祷以安人心以致天泽兼已近四月中气春麦方实夏麦将结正渴雨之时也伏乞速降指挥取进止

贴黄

臣按五行传曰贤佞分别官人有序率由旧章则火得其性若信道不笃或谗夫昌邪胜正则火失其性惟陛下圣政英断其于辨别贤佞固已至矣然更愿陛下常以此事留心勿使谗言可进邪或胜正则

天人之际应如影响一雨不难致而滥焰息矣

岁旱待罪奏

臣等伏睹春夏以来旱沴深广徧走羣望雨泽未应上烦圣虑焦劳惻怛奉今月九日诏书避殿损膳深自退抑臣等伏惟灾异之应必由政事政事失当咎在臣等今乃致陛下降刻责之言裁居养之节则是归过君父臣等夙夜悚惕伏望特赐罢黜以惩不职或先次依故事各降官职庶几少谢天戒臣等以三省阙人不敢合门待罪各且在职听命伏乞早赐处分

论政事稽滞疏

盖闻传曰朝廷正则百姓理又曰衆贤和于朝则万物和于野今夫上之人诚能同德一心尽公忧国则必有和善之政而下无朋比之士苟人有异意转相非疑则必有僻违之政而下有向背之俗于是民被其害矣臣伏见昨者皇帝陛下太皇太后陛下听治之初惠绥天下去民之所同患更法之所不安至于振淹滞绌贪刻发政施命无有虚日故近自畿甸至于海隅莫不鼓舞承风倾耳以听太平而近者一两月以来政事号令之见于施行者旷然希阔中外颙颙无所闻见深求其故皆以谓执政大臣情志不同议论不一之所由致也有陰拱以坐观者有阳合而内睽者有强横以肆制者有忍耻以怀咎者滞事积前相顾而不发故仁泽屯于上而不下庶事壅于朝而不行以至文书稽留人情隔塞圣人之化虽曰久于其道而後成然固有缓急之事今事至轻小小有比例或止于一法令之增损一官吏之废置犹不肯倡端主论则方今边鄙之大利害赋役之大是非天下百姓之困苦如在倒垂而望解者当谁任其责何时而议也幸遭圣明哀愍元元为庙朝大计而谋国之人方身是恤方私是图坐玩岁月亦可谓不仁矣况今皇帝陛下以盛年居谅闇太皇太后陛下以垂帘而称制于此时也而辅弼不咸相擅相激非独政事壅积而已诚恐疑贰渐深分曹固党使倾险之士煽于其间上下乖戾何事不生此又臣之所为深忧也伏望圣慈深察事变防微杜渐特诏辅臣当务同寅协相与以信去其贰志以济国家之事今来政事之稽滞未决者趣令条上取旨则望圣明发自睿断别白施行以幸天下

论景灵宫帝后同殿乞下近臣疏

臣伏见神宗皇帝神主既祔太庙窃计于景灵宫当依祖宗神御别建朝殿伏缘宫中地步今已隘逼若或开展民区则理有未安臣惟原庙之说始见于西汉而其制度盖不传而无闻今景灵宫之聚神御也固有祖于原庙之意然帝之与后各建殿室盖缘旧来神御散在诸寺故亦各殿乃出于一时规画别无义据臣愚窃谓既尊曰庙当仿于宗庙之制帝后宜同御一殿如此则今日神宗所御遂可无事于兴作矣奉迁昭宪皇后于宣祖殿合配而复以太始殿易名为神宗之殿非徒简节劳费便于时而已也考之礼典则无违质之人情则为顺此大事也伏望圣慈诏三省两制礼官杂议以处其当听陛下圣断焉臣浅陋妄议合即罪诛窃谓如此自与庙制相合逐时酌献行香亦无妨碍取进止

论降诏疏

臣闻朝廷议欲降诏中外慰安人情传闻二三臣不敢信僥果如此臣实未喻伏见陛下即位以来修先朝政事损益法令进退臣吏大要专以安民四方晓知上指坦然明白矣至于怀私负衅贵近不赦而忠信之言虽小必录此又人人皆能道之臣独不知国家尚安所疑欲家至而户晓也若谓日者黜责一二臣僚恐附离党与不无反侧故以诏书安之臣谓人情无甚相远不从上令而从其意动民以言不若示之以行事自古而然朝廷果将吹毛洗垢搜抉宿过则诏令随行人亦不信但令朝廷罚罪之意出于公议惟责大体不问其余则虽无所言何患人不知之近者朝廷法令方具功罪明白吏民安堵自如正宜镇静无事何故自生疑贰猥欲以言语区区过自分说以胜士大夫之心臣恐中外有以窥陛下也前世汉唐以来因诛鉏叛逆或剋复僭伪危疑之始虑有动摇故亟下诏令慰抚未萌今升黜官吏何时无之何至张皇自生不安之意臣窃以为过矣抑臣闻之人才实难自非大奸大猾怀邪怙终此外安有终身弃置之理古人以功赎过所谓使功不如使过良以此尔前以罪退後以功进是乃国家所以公天下者见之一二则中外将不待言而信矣臣谓安反侧之计无以尚此何必空言哉伏望睿断寢降诏之议免四方疑惑以幸天下臣不胜惓惓取进止

再论降诏疏

臣近闻朝廷议欲降诏中外得于传闻未见本末然窃谓朝廷举动不可不慎昨已具状论列今者外议籍籍又异于前大意谓陛下即位以来增损法令进退官吏今已改意自悔故欲下诏委曲解说又深厌台諫言事故欲止约多士转相告语且谓自此臣僚虽有罪犯无复忧畏台諫虽有闻见无复敢言诏令未下人已非议臣备位言路所闻如此不敢不论臣窃谓刑赏予夺天下公器非苟顺人情惟当而已日者朝廷加惠元元取官吏蠹国贼民之尤无状者显黜一二以励其余此甚大惠陛下其以为当耶未当耶诚以为当则足矣何必家至户晓自起疑贰之意使忠义自失奸罔幸免臣所未喻也台諫臣僚类皆疏贱孤寒之人而使以讥切主上弹治贵近为职其势固已不胜若稍加沮抑且使有诛夷之忧则人人顾私自便谁肯尽言又况听与不听上系朝廷去取大抵欲言十事退思反顾已去五六其言虽上又经裁择则言而听者率不过十一二然则朝廷听言可谓审慎议论虽多言者何罪且台諫以言为职今若明出诏令戒使勿言则是予之官而夺其职为小人之所脾脱轻诮必不能自立相率引去然则言路塞絶谁复以利害之计上闻此又臣所未喻也臣思虑累画夜其事甚易见不知为陛

下建此计者谁乎臣愿陛下深思臣言无忽速赐寝罢降诏之议以安士论若本无此议臣闻之误妄罪当万死臣不胜拳拳取进止

三论降诏疏

臣近两具状奏乞寝罢降诏指挥未知圣意赐与不赐省察朝士大夫亿度风旨转相传诵不无非议臣谓降诏本欲安人情而诏令未下事已宣露反使人情疑惑则利害固已可见甚非陛下镇静中外之意臣备员言路此而不论臣则有罪是以不避烦紊愿毕其说臣谨按齐桓公与管仲谋伐莒谋未发而闻于国人国人曰君子善谋小人善意臣下窃意之也故朝廷之人不为则已苟有所为虽秘谋密计人且意而知之况陛下以修政事清人物遂欲阔略细故含垢匿瑕示天下以宽大诚大惠也但此意一定何患人之不知若更施于行事一二则中外谕意坦然洞达矣何必空言喋喋过自分辨急于取信无乃害国家大体哉诏书大意不过以谓罪恶者已治欲使其余改行自新恭惟先皇帝养育人材布满内外其中邪慝不能无之今已行惩劝则是乃所以成就先帝之意若必形于诏书示荡涤之惠使之自新则似分别前日政事亏损治道无大于此然则人情安与不安乃在陛下立意行事其实何如耳不在降诏诏下之後事体窒碍其害乃至如此臣愿陛下深赐省照特罢降诏以全大体臣不胜拳拳取进止

论韩琦定策功疏

臣等去月二十六日奏事延和殿论韩琦等定策以立英祖勲烈显着近年为人掩夺其功乞赐明辨方惧僭冒俯听罪诛伏蒙圣慈开纳宣示本末不待臣言而自已晓然见是非之正臣等退而感叹因窃思念自至和以後臣子以国本末建为言者盖不可胜数或泛乞早定储贰或愿择宗室之贤者至于请立谁何有所主名则万一无敢及之者至嘉佑六年琦与欧阳修同司马光疏日日叩请开导引翼天意感悟大议始有主名而英祖皇子之诏遂下矣言之者虽多而为之者琦也忧之者虽衆而任其责者琦也此四海之所共闻天地祖宗之所照鉴而今日莫如太皇太后陛下之所详而知也琦等有社稷之功而不能自保于存没之际王同老为受贪功上其私室所藏之文引中书同列窃议之语乃云至和已有定议神宗以为赏疑从子恩过宁僭于是进官录子所以褒显之者倾动一时而诏旨直谓嘉佑立子之诏但宣至和已定之命而已嗟夫大忠元勲移彼而就此有所与夺矣此公议之所不服而是非之际不可以不辨也循蹟考理皆有证佐臣已列九事具之前疏同老乘琦与同时执政皆亡而慈圣光献皇后上仙之後谓无有知其事者乃出而振之而不虞太皇太后陛下之知之也臣等区区非为琦修等家横冀恩泽亦非欲追革同老等赏典但乞降一诏书辨正定策大功所在布之天下付之实录院以昭信史以伸公论以慰士大夫心为万世忠义之劝伏望早赐指挥取进止

贴黄

前後臣僚乞建嗣者虽多然琦等嘉佑未定策之日止用諫官司马光章疏琦等日持其疏恳

请于前其功业皆相济以成之也伏望于今来诏书中明赐别白褒显以示天下其与元丰旌赏之事自无相妨追讼吕海疏

臣伏以辨大姦而?未萌人臣之先识褒遗忠而发潜德国家之令典臣尝观熙宁之初王安石以道义文学起而辅政先帝举天下听之天下士民亦罔不指期以望太平上下向之无异辞当此之时故谏议大夫吕海为御史中丞独以为不然屡有奏论其略曰安石居庙堂天下必无安静之理又曰误天下苍生必此人海坐是贬官于外未几已歿其後安石与其朋党变乱祖宗法度专以聚敛为事颠倒邪正进退失其当废民之所同欲兴民之所同害欺罔朝廷天下被其患者十七八年其间虽有踵事增虐之人然要之权舆造端实自安石始四海困扰皆如海言海可谓有前知之明矣海名臣之後为人忠信刚正立朝行已有古人之节大臣之风在言路前後三黜皆以击姦邪忤权势最後尤以直道大义为公论所高海之死于散地在熙宁四年官至侍从而朝廷未尝有所赠恤海之妻今在生事微薄有子皆碌碌小官恭惟陛下临御以来惠绥生民修完庶政以成就先帝求治本指昭显于世而开獎言者孜孜听纳凡臣子在前日输忠献直尝有一言于朝者莫不收拾褒用之而海不幸既亡未见遇于今日此天下有志之士所以叹惜而不能已臣不胜愚虑欲望圣慈嘉海之有识敢言言不获用利不得及于世哀其志节特赐褒赠及赐諡以表显之录其诸孤稍赐任使非独以慰幽壤盖亦以劝天下之忠义而愧人臣之为姦谀者非小补也取进止

贴黄

臣不识吕海然实慕其为人其说论直节近世在言路者少及焉而又逆知安石为政之害使其言用岂不有补于天下此朝野之所同知也

请文彦博平章重事疏

臣伏见陛下降诏遣使诏太师文彦博赴阙惟彦博以勲名之重翊亮四朝可谓社稷元臣宜乎陛下思见其人而加礼起之甚盛事也臣窃观自古以来莫不贵德而尚齿然宗工大老遇之必以礼而处之必以道故或尊之以为师保或养之以为三老五更或使之朔望一朝或间趋朝廷平章重事或有大政就而咨决考于前载故事具存今彦博之来在圣谋神虑必有以处之将一见其仪形而已耶又将有所咨访耶将留之朝廷以自辅耶又将任之以政耶今外议但见宰相虚位久未除人皆以谓陛下必将以三省长官命彦博矣虽臣愚意亦不免出于此然臣窃谓诚若议者所料付以三省之政有官则有职有职则有事四海之大万务之繁大小无所不总日夕裁决朝会陟降殆恐非八十余年老臣之聪明筋力所能宜也有职事则不能无得失使任其责则伤恩释而不问则废法又非所以养元勲而尊旧老也彦博虽老矣然忠厚敦大足以慰士大夫之心其气略足以弹压强悍其威望足以镇服外裔诚宜今日优游佐佑以为朝廷重古之人以老成有过于典型盖为是也臣欲望圣慈诏彦博以本官朝朔望遇有军国大事特赐宣召询以筹策不须以官政婴之夫以三师之尊独承天子清问献纳以决大议而不劳以事此陛下之所以尊礼旧德者至矣不亲于权以进勉君道不疲于职以休养老臣而无累于出处之际此亦君子之可以处而安也恩协义称无以易此伏望决自圣心

使天下无异辞臣不胜区区取进止

论太学狱奏

臣先准朝旨看详诉理熙宁以来罪犯并元丰後來探报断遣公事涉冤抑情可矜悯并许上闻数内一件制勘太学公事龚原等二十二人已具看详事理奏听指挥去讫伏缘事有未尽须至论列臣谨按太学公事本因学生虞蕃就试不中狂妄躁忿上书告论学官陰事自此起狱又因勘官何正臣迎合傳会将赦前及状元于法不该推治之事奏乞皆行推治亲画特旨依奏自此狱遂大炽上自朝廷侍从下及州县举子远至闽吴皆被追逮根株证佐无虑数百千人无罪之人例遭箠楚号呼之声外皆股栗臣闻论者谓近年惨辱冤滥无如此狱其所坐贓大率师弟子摯见之礼茶药纸笔好用之物皆从来学校常事虽经有司立法而人情踵故未能遽革尽以监临枉法当之终身放废可谓已甚其间虽有赏负罪犯之人终以下讦其上事发不正狱官希合拷虐太过故虽得其罪论者犹不以为直又况学士大夫不堪困辱类多引虚自诬并坐重责深可嗟悯臣所看详缘止是据按考事而狱吏等从来锻链文案惟恐平反故首尾牢密曲直莫辨况此狱出于正臣希功用意尤极巧诋今虽已具案内事状奏闻然在于实情天下之所知者有所未尽若不旷然加惠一切昭洗止用有司看详之文诚恐冤抑不伸不足上副圣仁矜恤之意臣愚不胜拳拳欲望陛下特出睿断将太学制勘命官举人等优赐恩旨等第除落罪名取进止

贴黄

现今看详诉理所若于公案内见得冤抑或可矜事状即本所自可陈奏其虽有冤抑可悯之情衆所共知而案内文致完密非看详所能见之如此狱者若有司不以事实上闻则冤者无由可伸臣待罪言路义不可以避嫌自默惟陛下酌情制事毋拘常法特与优加除雪以示宽大仍乞作特旨施行

乞重修太学条制疏

臣窃以学校之制主于教育人材非行法之地也羣居衆聚帅而齐之则诚不可以无法然而法之为学校设者宜有礼义存焉何也比岁太学屡起大狱其事一出于诬枉于是有司缘此造为法禁烦苛凝密士之学其间者转身举足辄蹈宪网束湿愈于治狱条目多于防盗上下疑贰求于苟免先王之意礼义科旨逝已尽矣法有大可怪者博士诸生禁不相见教谕无所施质问无所从但博士月巡所隶之斋而已谓如此则请问者封衆足以为证佐以防私请以杜贿赂嗟夫学之政令岂不大缪先王意哉私请贿赂如是真可以絶之乎而又斋数不一不可以随经分隶也故使之兼巡如周易博士或巡治礼之斋礼学博士复巡治诗之舍往往所至备礼请问相与揖诺至或不交一言而退昔之设学校教养之法师生问对愤悱开发相与曲折反复谆谆善诱盖其意不如是之疎也其道不如是之轂也先王之于天下遇人以长者君子之道则下必有长者君子之行而报乎上者斯有礼也遇人以小人犬豕之道则彼将以小人犬豕自为而报乎上者不能有义也况夫学校之间哉太学自置三舍之法寥寥至今未

尝应令成就一人岂真无人也主司惩前日之祸畏罪辟谤士虽有豪杰拔萃之才谁敢品题以人物自任而置之上第哉则是先帝有兴贤造士之美意而有司以法害之也臣愚欲望圣慈详酌罢博士诸生不许相见之禁教诲请益聽其在学往还即私有干求馈受自依律敕仍乞先次施行外应太学现行条制委本监长贰与其属看详省其烦密太甚取其可行便于今者有所增损着为科条上礼部再行详定上之三省以听圣断

论取士并乞复贤良科疏

今有建明贡举条制谨具下项臣伏见国朝以来取士设科循用唐制进士所试诗赋论策行之百余岁号为得人熙宁初神宗皇帝崇尚儒术训发义理以新人才谓章句破碎大道乃罢诗赋试以经义士儒一变皆至于道夫劝士以经可谓知本然古人治经无慕乎外故其所自得者内足以美己而外足以为政今之治经以应科举则与古异矣以陰阳性命为之说以泛滥荒诞为之辞专诵熙宁所颁新经字说而佐以庄列佛氏之书不可诘之论争相夸高場屋之间虽羣輩百千而混用一律主司临之珉玉朱紫困于眩惑其中虽有真知圣人本指该通先儒旧说苟不合于所谓新经字说之学者一切皆在所弃之列而已至于蹈袭他人剽窃旧作主司猝然亦莫可辨盖其无所统纪无所櫟括非若诗赋之有声律法度其是非工拙一披卷而尽得之也诗赋命题杂出于六经诸子历代史记故重复者寡经义之题出于所治一经一经之中可为题者举子皆能类聚裒括其类豫为义说左右逢之才十余年数榜之间所在命题往往相犯然则文章之体贡举之法于此其敝极矣诗赋之与经义要之其实皆曰取人以言而已也人之贤与不肖正之与邪终不在诗赋经义之异取于诗赋不害其为贤取于经义不害其为邪自唐以来至于今日名臣鉅人致君安人功业轩天地者磊落相望不可一二数而皆出于诗赋则诗赋亦何负于天下或取以诗赋或取以经义无异道也但有司考言之法有难有易有难易故有利害有利害故去取或失其实而所系者大矣然则法不可以不改也臣愚欲乞试复诗赋与经义兼用之进士第一场试经义第二场试诗赋第三场试论第四场试策经义以观其学诗赋以观其文论以观其识策以观其材前二场为去留後二場为名次其解经应于通用先儒传注或己之说而禁不得引用字解及释典庶可以救文章之敝而适乎用革贡举之敝而得其人亦使学者兼通他书稍至博洽一臣伏见汉唐之制因天见灾异或政有阙失则诏郡国及在位举贤良文学之士天子亲策以求其言至于国朝沿袭故事于是设为贤良茂材科目随贡举召试其于得人视古为盛近时之制遂罢此科臣窃以为国之道得士欲广故取之非一涂谓常选不足以致异人故设制科以收超絶之才而每举中等不过一二人而已今夫官人之法入流门户日益增多未有澄汰而于三年取一二非常之人则废其科不用此何谓也臣愚欲乞复置贤良方正及茂材异等科目每遇贡举诏近臣仍依旧制举试所以广言路求人材继祖宗之制也一臣伏见近制明法律举人试以律令刑统大义及断案谓之新科吏部将司法员阙先次差注在进士及第人上臣窃以先王之治天下以礼义为本而刑法所以助之者也惟君子用法必先之以经术法之所以治理之所在也故恶有所惩而常不失忠恕之道旧制明法最为下科然其所试必有兼经虽不知其义止于诵数而先王之意犹在也今新科罢其兼经专于刑书则意若止欲得浅陋刻害之人固滞深险之士而已又所取之数比旧猥多调拟之法失其次序臣以谓宜有更张欲乞新科明法并加论语孝经大义登科之额裁减其半及注官之日并依科目资次所贵从事于法者稍不远义而

士之流品不失其分右谨条件如前伏望圣慈裁酌如赐开允即乞今年降诏并自元佑五年秋试为始

忠肃集卷四

卷五

钦定四库全书

忠肃集卷五

宋 刘摯 撰

奏议

论役法疏

臣窃以圣人之治虽一道无敝而道之寓于刑名法数者必有偏而不起眊而不行者圣人因时而变之变则通通则久以尽天下之利此五帝所以异制而三王之所以不同礼也国家承唐末五代熟烂之後祖宗创制造法趋时之宜顺事之变虽圣圣相继而其法令日增岁损或举或废未尝同也至于宁民适治所谓道之无敝者则未尝异也神宗以仁智之虑达因革之数凡政令制度急弦慢轸大解而更张之故天下蒙其利然至于今殆二十年所谓偏而不起眊而不行者盖复有之矣其事则非一而其大者则役法是也于役法之敝相为首尾而牵连当更者则坊场吏禄是也始者以繇役不得其平农民劳费故命有司议所以均弛之有司不深惟其故乃一剗祖宗差役旧敕为官自雇人之法率户赋钱以充雇直曰助役又曰免役自上户至于下户等从来无预差役之家一槩歛之盖于赋税科调百色买纳求取之外又生此重歛岁岁输纳无有穷期古人有言平地无铜鑛农家无钱鑪今所输必用钱而土所出惟是丝帛谷粟幸岁丰收成而州县逼迫不免贱价售之无以养其私若岁凶则破易资产或以倍称之息举债于兼并以应期限更无减放之法州县上户常少中下之户常多自法行以来簿籍不正务欲敷配钱数故所在临时肆意升补下户入中中户入上今天下往往中上户多而下等户少富县大乡上户所纳役钱岁有至数百缗者又有至千缗者每岁输纳无已至贫竭而後有裁减之期旧来乡县差役循环相代上大役至速者十余年而一及之若下役则动役三二十年乃复一差虽有劳费比之今日岁被重斂之害孰为多少也今天下钱日益重货日益轻民日益困矣若之何坐视而不恤也哉然则前日有司立法非有意于宽役利民正在聚斂刻剥损下益上为国取谤大失朝廷惠绥生灵本意臣窃见繇役昔者有至于破产而民憚为之者惟衙前一役尔今天下坊场官司收入自行出卖岁得缗钱无虑数百万以为衙前雇募支酬之直计一岁之入为一岁之出盖优有余裕则衙前一重役无所事于农民农民既除此一重役外惟有散从承符弓手手力耆户长壮丁之类此役无大劳费宜并用祖宗差法自第一等而下通任之比于旧制繇役轻矣治于人者事人古今之通义则安用给钱为哉坊场之法旧制朴户相承皆有定额不许增擡价数辄有剗夺祖宗非不知增价之为公家之利也所以不许者知其悦目前之利必有後日之害故也新法乃使实封投状许价高者射取之于是小人徼一时之幸争越旧额至有三两倍者旧百缗今有至千缗者交相囊橐虚自抵本课额既大理难敷办于是百弊随起决至亏欠州县劳于督责惠及保任监锢系累终无偿纳

官司护惜课额不为减价则谁人复肯承买今天下坊场如此者十五六矣故实封增价之所得与败阙之所失殆不相补也盖财利可以通之而已不可尽也少捐分数与民共之则公私相济其利长久臣欲乞罢实封投状之法应天下坊场委逐路转运提举司将现今买名净利额数与新法以前旧额相对比量及地望紧慢取酌中之数立为永额一用旧法召人承应庶朴者无破败之患而官入之利有常而无失也吏禄之法天下吏人旧制诸路及州县法各不同有乡户差充者有投名者有乡差投名杂用者入仕之後既以案司之优重迭相出入以为酬折又积累岁月有出职之望行之久远人自以为便此时有司见礼经有庶人在官之禄遂假其说资以掊民殊不知三代已远其事不可行于今日者多矣夫庶人在官之禄虽有其文而其法与数不可见其详乃凿空造端槩敛民钱给为吏禄不重之则不足以募不轻之则不足以给今内外之吏除重法人外其他每月所给无几于吏固未足以有济而官给所积天下盖已不貲无故竭民财而为此费诚何为哉至于所谓重禄以行赅法尤非义理夫一钱以上以徒坐之谓之严刑可也遂以谓吏惧而不受赅则臣不敢知也今主义者曰禁既严则吏必畏故令下以来犯者少臣以谓非犯者少败者少也非败者少正其罪者少也网之密则与者取者藏声匿迹亦将避之去也故曰败者少也一钱坐徒谁则忍之谁敢易之故苟有败者若稍涉疑晦及自非有告人当赏则官司往往迁就平反释重入轻若外路则虽使者亦或谕意州县使之如此亦人之情也故曰正其罪者少也借使犯者皆败败者皆正其罪固先王制刑之所无而圣人所当矜慎之也吏受贿于律自有刑名而曲法者一足以上至徒则刑亦不为轻矣今变先王之刑而重之又多赋吏禄以买法之行无谓也臣愚欲乞除熙宁以前旧法有禄公人并依旧外应新法所创及增给吏禄并行减罢臣愚诚不知忌讳今衙前之役则待之以坊场价钱弓手等役则均之以祖宗差法吏禄非旧法所给则皆罢去应役人糜费私役之类则禁之以熙宁新法苟如是也则所谓免役钱者于是可以一切蠲除矣或谓免役钱籍于常平固非独以待募役也县官他费多有赖乎此则未可以利害论也臣以谓役钱领于司农非有特敕未尝以给常费今罢去无损于国用况祖宗以来至于役法未改役钱未敛以前百余年间不知何以为国也亦曰用之有节则取之有道矣今天下百姓疲筋骨忍饥寒冒鞭笞终岁急急为公家纳钱尔不幸有连年灾荒之变实恐穷苦之人流亡转徙为沟中瘠而强梁者除死忍命不得为陛下之良民矣然则役钱乃生民性命天下安危之所系奈何欲以为不刊之令哉古者富藏于民诚令百姓赋税之外有以自养则其赢余乃国之外府缓急取之而已无事之时坐困竭之非计也臣故以谓役钱宜一切罢之役钱罢则提举常平官司亦可罢去以现存职事付之转运司足矣天下既减罢监司数十人则州县稍得从容上下省事非小补也虽然此大法也顾臣之言盖其略耳至于法之纤悉或参差抵牾宜有画一之论欲乞于两制臣僚选差明于治体深于民事者三两员置局讲议裁立条格于三省执政官预领之以待圣断施行

乞置局议役法疏

臣伏覩今月七日敕节文天下免役钱一切并罢诸色役人依熙宁元年以前旧制委州县定差者命令既下中外人情鼓舞欢喜皆谓此一事为害最大从来百姓日夕延望今陛下一旦行之救其困苦天下幸甚臣窃闻令下之後奸邪之人论说纷纷造作浮言意欲摇动其事不知陛下察其然乎盖今日庙堂之上侍从之间其人多以新法而进至于外之监司亦皆由新

法而选今法既更改则其心皆非所欲故诽议荧惑欲幸其失而不能成尔敕命内固有小节与旧法异同及措置未尽之事缘已命下指挥许州县监司申明利害擘画自可候到日修正立法今来改免役为差役乃是大体也大害已革譬如疾患之人病根已去其他气体未和当徐徐调养之而已臣恐上下观望之人指小小未圆事件张皇鼓扇伏望皇帝陛下太皇太后陛下坚持此意力行无疑勿为异论所动候臣僚及诸路论列到未尽未便事理乞付三省类聚参详为法内如有合先次施行者即乞随事先赐处分

乞罢百姓实封言役法疏

伏覩今月四日敕节文在京差官详定役法奉圣旨诸路且依二月六日敕定差仍俟近来指挥到日县与州及提举转运司各遽限两月体访役法的确利害保明闻奏仍令逐州县出榜许旧纳免役钱今来差役人户各具利害实封自陈县申州州缴奏臣窃以免役钱之为天下害也久矣陛下一旦罢去复用祖宗差法中外罔不欣快臣曾奏乞坚守差法大意力行毋疑勿为异论所动其有条目未完措置未尽之事外则已于前敕许州县监司申明内则已蒙选官置局详定今来敕命若止于展限则可也而其间命令有未安者臣于是疑陛下于此法之意似已为异论所摇矣且命令之出要在必行岂可却云且行则天下奉承者岂不疑惑怀私之人岂不观望又令旧纳钱今被差者皆具论列缘四海百姓向来无不纳钱则是竭天下之人使之实封议法则求言无乃太广乎实封之状州县必须疲于递送其达于朝廷者计须山积则考閱何时可徧而所谓差役之法何年可见其成也不知谁建此论者盖欲为迁延之谋动摇之术不意朝廷从而行之甚哉邪说之可以移主听也改免役为差役利害明若观火易见也参差不齐在所修立者其大不过十余条目而已今已选建官局但宜趣具画一宣布行下夫法既先定如州县奉行委有未便方听依限申请然後随事修完则岂不简直易行而何用此纷纷以遂沮害之计召天下之疑哉伏望速赐契勘如已颁行即乞于敕内自仍令逐州县出榜以下三十三字更不施行

贴黄

先王顺人情以立政故政令之行自合于人情今设官建局以议大法但思所以便安于人可也何至徧问天下使人为之说此古今所无也天下百姓实封之议杂然而至将如何去取哉此止欲稽滞以生变不可不察

请定役法条制疏

臣伏见天下役人已复差法自置局以来未见修立画一条制昨者虽有指挥令依熙宁元年以前旧法施行缘熙宁以前敕条其间亦有不可行者兼近降二月四日敕命自有与熙宁以前条贯抵牾相妨如役人正身不愿者今来兼许雇人而嘉佑旧制耆户长弓手之类并须正身充役臣不知现今州县如何施行且繇役大者无如衙前始者改法一槩乡差既而复以坊场等钱雇募未几又改雇募为招募三两月间命令屡变臣恐天下循用或有疑误而异意之人有以窥伺臣窃料朝廷欲候诸路申请然後立法如此止是一路事件臣欲乞指挥先立通

用役法条贯将近降累次敕命大意为主画一立法先次颁行若诸路有未尽未便方听申明随事别降指挥所贵天下先有大法可守不至乖戾取进止

乞令苏轼依旧详定役法奏

臣闻中书舍人苏轼辞免详定役法有旨不许又具辞免者窃以差役之法最合重事陛下欲使利害曲尽置局讲求此甚盛德然自置局以来为日寢久未见就绪而议法之官颇已屡易今闻轼以议有异同力欲辞避人人如此则法度之成何时可冀乎臣闻五味不同而适于口者味相足也五声不同而悦于耳者声相备也一可一否一是一非杂然并作此议之所以同归于尽一人曰可皆曰可一人是曰皆曰是信如此又何以议为哉议有异同正宜反复曲折相足相备以趋至当而遽为避就非独议法难成使奸人乘之投隙伺衅摇撼法意非国之计也臣愿深诏执事者毋矜能毋愎衆毋以小利妨大体使利害曲尽以称朝廷之意所有苏轼且令依旧详定仍乞催促成就以时布宣取进止

贴黄

吕大防范纯仁韩维皆为执政事无不领虽离去本局其责尚存轼若陈乞获免则不复干预非大防等比

论陕西河东储糴奏

臣窃见陕西河东昨以军兴之际调发猝遽所在仓廩支用耗竭今边隙始开未为无事其所以备守之计食为先务两路今年夏麦度越常时经画储峙时不可失伏乞速降指挥逐路转运司广作计置乘时贮糴然诸州军昨经烦费帑藏萧然若俟移用转易恐成稽缓欲令除交钞及本司调度应副外将诸色封桩钱物并听逐急支用渐令收簇拨还其逐路转运使副近日数有迁意往往未到本任兼又疮痍之後经制事务不少可以权时添差提举糴便官一两员使专其事庶几可以办集缓急不误边计取进止

乞体量成都漕司折科税米奏

臣准去年十月十八日圣旨指挥节文诏令屡下寬均民力近闻官吏不切奉行如尚有违戾委御史台觉察闻奏臣风闻成都路转运司将百姓税米科折绢帛折之者轻取之者重每米一石二斗折纳绢一疋民间米每斗六七十文而绢价每疋一贯七八百文当壅并限逼之际有至二贯文者又有送纳退拣诸色糜费以此一路倍有伤困远方之人无所赴愬甚非仁政惠绥万方意伏乞指挥下别司体量指实施行

论川蜀茶法疏

臣伏覩陛下即位听政以来嘉与天下休息于安治凡法令之弗便于民者疏通损益之官吏

之弗良于政者罢免放黜之中外欣戴人人如被大赉然事犹有在远方重地为害尤甚者则河北江湖之盐法福建川蜀之茶禁是也数路之害同而河北江湖福建已蒙朝廷遣使廉治独蜀之茶害未闻诏旨臣窃尝博访于知其事者槩得其说曰蜀地陋而茶之所出不过十数州而已始时人赖以生今茶司尽?而市之大约园户有茶一本而官市之额已至数十斤矣官所给钱及以糜耗于公者名色不一如预借息钱验引钱头子钱村角钱税钱之类费去常已过半每岁春官司预以券给借钱粮必以牙侖保任之及输入之日引验交称又牙侖主之故其费于牙侖者又不知几何则是官于园户名为平市而实夺之也园户有逃以免者有杀死以免者已而其害犹及邻伍欲伐茶则有禁欲增植则如市故其俗谓地非生茶也地实生祸也茶场司以茶为息始者息一出于茶也其後市之价愈下取之息愈多园户不胜为之也故作茶日少裁足以应官额而已于是主茶息者议不独赖茶而又为博易以充之也博易之事他货百物贸贩苛刻锥刀琐屑无不为者依茶为名通曰茶息商税务坐视漏失岁课而不敢有所论也至于商贾请算者平时便私散之州郡茶地今则一集于成都之都场高其估以与之又总计平时所之州郡远近道里之费入之故都场之取息又如此此商旅之所以难行也官吏以息为功以功第赏既进官减年矣又以息额之余钱使与胥吏牙侖分取入己日用市易法也市易赏之固非法也然其取息犹曰与民和市而茶之取息一用严刑重禁网罗致之亦为暴矣奈何均用一法赏之也今一任有分钱少者不数千缗而减年磨勘至有三十余年者此何理哉法亦可谓敝矣而朝廷遣使未之及者岂非以蜀之茶法与熙河兰会之经制相为用者欤蜀茶之利以给熙河兰会者天下十之三熙河兰会之费不止而蜀茶之害未可息也然熙河兰会之费今昔宜有不同昔者事边之外前有王韶後有李宪提兵革财用之大权朝廷捐金帛市租莫知纪极听其自用不领于有司无所会计非徒私二家也于是依倚苟合之人罔功兴事以利相市之徒公取公予莫见其迹则熙河兰会大费外又有以泄之者如此也今既制之于有司无二人者之横蠹若又于边计外凡冗名滥费一切大为之节约则蜀之茶可以弛其禁而所谓十之三者殆必可损矣伏望圣慈选使指考茶法之弊欺者会计缘茶公家所费与实息之数大减岁市之额稍增斤直之价削纳茶无引之钱以完养园户裁官吏之员牙侖之数省冗给罢息赏之滥分钱之弊以革欺幸而以其事与转运司通治之如此则蜀民之困苦庶乎可以苏也臣待罪言路既有得于人之言敢不亟请也苟以谓有助于用而不废则何事不可为哉亦有道而已矣宋用臣未建此策以前不闻国用阙此二十万缗也譬夫为人之子曰攘窃于人取财以养其亲为之亲者知其如此也顾利以奉养而听其为盗则可乎伏望圣慈早赐出自睿断罢水磨茶场以通商贾以养细民以完州县税额以免农民永害而上以副仁圣惠绥天下之意取进止

乞复钱禁疏

先王之制钱币也所以御万物通有无而调虚盈人主之所操天下之利势也鼓铸之权一制于公上而下不得私之其发散交易流布运用虽积于公或藏于民转徙出入之不常而要皆为县官之物使不出于中国用尔是以销毁之姦散泄之弊不可以无禁也天下诸路监冶所铸入于王府岁亡忧数十百万缗自国朝以来积而至此其数几何谓宜公私沛然有余裕矣然今都内之藏既不闻于贯朽而民间乏匮时或谓之钱荒此何谓也其故大者在泄之于四夷而已曩时着令铜钱出中国界者数及一贯其罪抵死立重赏以告捕而居停资给与夫官

吏之失檢察者皆罪有差今熙寧制刪去此條而徒聞沿邊有每貫稅之之令利之所在民不憚于犯法前日殺之猶莫能制況遂弛其令哉使四夷不勞而獲中國之利以為利三邊之所漏海舶之所運日積一日臣恐竭吾貨財窮吾工力不足以給之而區區之算稅權其得失何啻相萬哉夫錢以銅為本銅之必禁前世固已有禍福之論今朝廷方增置錢冶而刪去銅令官之所積日益發散民間得以買賣肆為器用以牟厚利蓋非獨失銅而已也而又至于銷毀法錢蓋緣錢者私煉之已精其工費尤簡變而成器又有數倍之利然則既泄之又壞之欲錢之充溢不可校如古之盛理宜無有也故臣愚乞欲申嚴邊制以塞流散之路復立銅禁以蕃鼓鑄之本而息銷毀之患取進止

忠肅集卷五

卷六

钦定四库全书

忠肃集卷六

宋 刘摯 撰

奏议

论保甲奏

伏覩近制保甲罢团教朝廷所以惠绥疲氓恩施甚厚民得去其所苦就其所安远近承风莫不鼓舞然臣窃有私忧过计者夫乡野之民其性易于转习臣往见农人或被差役一为弓手手力耆壮之类及罢满而归则拱手闲惰已不复能反业于农盖出入公门游集市井有所诱导之使然也今之保甲则又甚焉者衣必华细食必酒肉固已变其向者布麻麤粝之习矣羣聚而笑喧奋臂而矜勇固已移其向者椎鲁劳苦之性矣其家质田卖屋出钱以济其所用官司岁时教试与之金帛宠之名目以养其欲故凡保甲之父母兄弟妻子一家憔悴终岁困扰而身为保甲者未必不自喜以为乐也今既岁教止于一月罢其团集省其监督去其羈縻劳费之患则保甲之父母兄弟妻子欣欢休息复有生理而身为保甲又未必不自失以为戚也彼有自失之意而欲使人俛首甘心尽如平日肯复从事于耕势盖难矣恶少而失其欲悍强以成其性又挟素所教弓刀刺击之技以为之资臣惧其非独不能于耕而已也亦恐其得为陛下之良民者少也臣愚以谓有法以斂制之盖保甲之技艺强弱高下州县皆有等籍今按取优等之人召其情愿列以为本州正军若旧系正长等名色则比类军中之阶级随其等差对换补之自余中下艺等亦召愿充公人者依近制募为弓手手力耆户长之役所贵在军者既团隶部督束之有法又使得伸其素习之技能其在役者既不失服职于公家比之召雇浮浪乃得熟事乡民必赖其用为多伏望详酌保甲既有换充军者若本保阶级阙人或一有阙数即乞遇冬教日推择排连填补则不损保甲之额若换充他役则自不废教习馭进止

论盗贼疏

臣窃以天下虽有极治之政而不能使民不为盗也然要能禁其为盗而已历世以来法严则盗衰法宽则盗炽国朝自近岁差役用募法而官弛捕盗之禁保甲行教法而民滋为盗之心前来滑州之单安商州之王冲以村野之人逃亡之卒一有呼啸遂能横行蹂践乡县杀害官吏以至烦遣兵将重为骚扰大劳大费仅能散扑皆由防禁宽纵赏罚不明而寒饥猖狂之人附之者衆故也近日制旨既薄斂轻赋稍还其衣食之路又复置弓手及县尉巡检而捕察赏罚并从旧典所以防备姦恶安养善良之意可谓甚厚然访□州县不甚究心召募弓手至今殊未就绪巡检兵级多未差填现今河北陕西京东京西所在常有盗贼攘劫抄窃殆无虚日

乡野间井人颇不安盖自来保甲巡检指使既有更不管指挥则其意固已不在于捕盗而新复官吏又未就职此盗之所以乘间而作累岁以来民间丰稔今尚如此自去冬大旱二麦失望积谷之家观望不发人已艰食臣虑将来寇盗更有甚于今日欲乞指挥逐路监司为备盗之计督促州县速招弓手及差拨巡检兵级严责近限早令数足以时训齐准备缓急及再乞指挥吏部所差注巡检县尉略加选择催遣赴任近制新复弓手所用器甲营房令所属应副臣伏见诸处巡检自更改後来其廨舍营房往往阙少或止于乡县寺舍安泊欲乞一就下所属移挪营葺仍委转运提刑司候招募弓手差填兵级及应副事件了毕节次具数足及已了月日申奏若州县明有稽违乖方便仰提刑司取勘闻奏臣近论役法乞除衙前依熙宁法用坊场钱招募外其余弓手等役人并乞用祖宗差法今来雇召又须候七分方行勾抽窃虑妨阙伏乞检详前奏早赐指挥

论捕盗奏

臣伏见去年京西路贼人王冲作过出入商虢数州伤害官吏杀掳军民今王冲虽死余党犹在而成俊者为之首自近日于杜管镇刼略啸聚渐盛讨扑愈难臣访闻商虢等州旧有禁军一指挥自置将以来将逐州禁军隶延州治下蕃出戍以致逐处守御之人反怠缓捕贼时欲乞将逐州禁军权免延州勾抽且令在本处防守及准备出入所在就粮土人可用使之捕盗易得其力仍乞指挥明立信赏购募务令早得捕获取进止

贴黄

访闻京畿近日盗贼不少欲乞指挥开封府及府界提点司严切督责应令捕盗官吏仍检点诸县弓手及巡检兵级差填足与未足

论捕盗法奏

臣伏见旧制贼盗地方应职在捕察之人皆给百日以为三限每限不获抵罪有差盖使身任其责必有所畏然後肯出方略张耳目求贼以自免自募役法既行捕盗不获者虽亦有罪然乃将两限科较听各罚钱以充

捕赏其次仍许收赎及保甲之法行则保内被盗止出赏钱更无认限决罚之法小人之情不以刑惧而势驱之使有不得已者则何事肯为公家索贼耶比年以来盗寇稍多者殆有此养之耳近日敕命已复差役诸色役人并依 宁以前指挥则捕盗之法自当皆依旧制然臣访闻诸路役人虽以差定其应缘差役条件尚多疑惑方听候详定役法所画一指挥如捕盗之法亦其一事也今所在时有盗贼欲乞圣旨下详定所将捕盗立限科较等旧法先次申明施行取进止

论贼赏稽违疏

臣窃以圣人之运天下也其政事大要在于赏罚赏罚之令坚于金石信如四时使有功者不逾时而蒙赏失职者不旋日而被罚故天下凡待赏罚而後劝沮者莫不奔走从事趋上之令此天下所以治也然则赏罚之施于天下不可以不信而臣以谓施于捕盗者尤不可以缓也方民之被盗也田里闾巷昼夜惴恐县官惻然开告捕之科不爱厚赏提官爵抱金帛恨不得有功者付之幸而贼得矣而有司不能推奉诏旨乃苛以文法敕诰稽留使人不得亟蒙有劳之利臣窃以为後日忧也伏见元丰七年澶滑之间保甲有为刼盗者其首曰单安曰王乞驴又曰张谢留等合出入凡数十人往来二州间擄掠平民焚荡村落杀人取财以至伤害官吏屠杀军兵又尝入卫州界一方不安朝廷督责捕盗官司至于自京遣使募衆而州郡调发将兵及降专赏指挥是年逐贼皆于澶滑次第掩获各正其罪而推赏之典至今逐司不为报明首尾二年矣夫奋不顾死冒矢石以与亡命者格虽莫不有职然要之趋赏之意多也今失信而後时诚恐缓急不足以率厉此其为患不可胜言伏乞指挥根究住滞官司时赐详酌重行黜责以明赏罚以戒违慢臣勘会下项一元降指挥单安等令河北东路提刑吕仲应得功人疾速保明闻奏一元丰七年九月指挥令开封府界提举贼盗范元取索捉杀到韦城县刼贼王乞驴等巡检下兵级报明闻奏前降保明指挥更不施行一元丰八年五月奉圣旨令河北东路京西北路提点刑狱官限半年同共根究得功人具指实报明闻奏前降范元报明指挥更不施行一元丰八年七月京西北路提刑司根究得本路杀获单安合该酬赏人所得自及专赏关牒河北东路提刑司修写以凭同书申发去讫一河北东路提刑司十月申吏称元勘获贼公案累牒范元封取内有澶州元勘张谢留净案其范皇城称去年送到在本司房内失去依限来该不见去年十一月公案称已累牒检寻臣看详范元于元丰七年九月承准朝旨报明至八年五月首尾九个月日并不结絶报明卻将取到公案恣纵吏人失去缘赏典至重当时甚有争功害能之人纵是吏人别受情弊毁匿或致窃取事理重害其河北东路提刑司亦至去年五月承准朝旨元限半月报明至今将一年并不专心疾速定夺兼范元既称失去公案限满不见亦合别作擘画既见京西北路提刑司根究本路单安功赏自合先次报明申奏卻因范元失去张谢留公案遂将别案事一连住滞致朝廷赏典稽迟无以取信于天下皆范元及河北东路提点刑狱官弛慢不职被受圣旨公然不以为事经隔岁月不务结絶欲乞详酌重行黜责

乞选监司澄汰州县疏

臣准尚书省劄子准十月十八日圣旨指挥节文比者诏令屡下以寬民力便安公私官或致废格自今州县悉心奉行监司点检御史台觉察弹奏者臣有以见陛下诚心爱民慎重政令天下幸甚臣窃谓州县之政废举得失其责宜在监司夫监司之任亦重矣人有一贤不肖则环地数千里休戚系之曩时朝廷大更法度选建推行之人故不以资任务得果健强銳森厉风生之才盖规以就事倚办于一时及法行事立矣而其後用人犹复因袭未曾权量时宜有所张弛之也是以至今使者之政刻核褊迫相师成风郡县承望亦莫敢不然使民不见德与义而惟刑是覲惟利是闻者盖亦久矣斯岂政令之本意然哉奉宣繆戾积习至此故也比蒙圣明哀念元元取监司罪恶已甚者既去之矣然其余人材颇尚駁杂情志未一各怀所私盖其陰有观望者则必习常而慢令以致惠泽之壅其浅中觊利者则又将矫枉而过正或废其所宜治之事二者不可不察也惟得其人庶惩此患臣欲望圣慈详酌河北河东陕西索号郡

向来所用使者出于暴进多非更历民事人微望轻虽自过为威刻而下终不服今宜稍复祖宗故事于三路各置都转运使用两制臣僚充职以重其任自余诸路亦望推择资任稍高练达民政识治体近中道之人分补监司之任明授之以教令使忠厚安民而不失之宽弛肃给应务而不失之浅薄部使者诚如此州县之政随之则先朝之仁政陛下之恩德庶几下究而与民休息无难矣考察现任之无状者一切澄汰罢之被罢之人苟非有显过宜还其资考别为任使要令不至于失职无聊而已方今先务恐实在此伏望详酌施行

论监司奏

臣自待罪风宪屡曾以天下监司为言乞澄汰选择诚以朝廷政令使监司得其人则推行布宣可以谕上指而究惠泽苟非其人则所谓徒善而已终于民不得被其利夫上之所好下必有甚朝廷以名实为事行总核之政而下乃为刻急浅迫之行朝廷以教化为意行宽厚之政而下乃为舒缓苟简之事皆习俗怀利迎意而作故所谓近似而非上之意本然也今虽因革之政有殊而观望之俗故在但所迎之意有不同耳其为患一也昨差役之法初行监司已有迎合争先不量可否不度利害一?定差骚动一路者朝廷察其意固已罪之矣推此以观人情大约类此且天下之事散在诸州总制于监司其大者治财赋察官吏平狱讼考疾病为使者皆务为和缓宽纵苟於安静则事之委靡不振法之受敝不胜言也向来黜责数人者皆以其非法掊歛意在市进害民甚者亦非欲使之慢然不省其职废所宜治之事谓之宽厚也昧者不达故矫枉或过其正臣谓此俗不可滋长要须大为之禁伏乞圣慈诏执事申立监司考绩之制以常赋之登耗郡县之勤惰刑狱之当否民俗之休戚为之殿最每岁终以诏诛赏仍自今岁始焉庶几有所隳括裁制之使循良者不及于弛肃给者不入于薄然後上副圣明治用中之意夫察时之宽猛缓急观俗之过与不及而张弛其政正今日事也取进止

论政令奏

臣闻之衿策不调虽造父不能善御法令不一虽有虞不能善治故曰慎乃出令言慎始也又曰令出惟行弗惟反言慎终也圣人制法造令于堂奥之上熟复兢慎若不得已者故其出也天下信之以命则行以禁则止所谓信如四时坚如金石若始之不慎既出而反之则何以示信出而勿反则又将受其敝者由此言之始既不慎虽欲慎终不可得矣恭惟陛下即位逾年加惠海宇修完政事大要专以便人天下幸甚然累月以来法令寡信议者窃有疑焉夫法非不善而施行之际使议者致疑此亦不可不察臣谨条列一二以?见其余乃者朝廷患免役之弊下诏改复差法天下知之久矣置局设官以议施行之政天下望之又久矣造法不慎其始施之仓猝故改而立雇募之议继又为招募之法而法至今不能成也朝廷患常平之敝并用旧制施行曾未累月复变为青苗之法其後又下诏切责首议之臣而歛散之事至今行之如初此二事大事也四方倾耳拭目以观盛德之举而反覆二三虽近侍谋议之巨曾不敢必知法将安出尚何以使天下信之挟铜之禁行之未几复限以五斤勿禁一开其端则轻重多寡谁复可辩官司固未易家至而数之禁而不能止与不禁同大河职事河北转运司言之则属转运司都水言之则归都水夫二者必有一得则亦必有一失矣此其小事然推此类言之则议者之论安可不察且改之易之诚是耶君子犹以为反令况改易而未必是徒以暴过举

于天下则曷若慎之于始乎今朝廷建一事命一官令已行矣议者必曰此未也且将改之曾未淹久而议者之言果信臣愚未识朝廷知其不可而姑为之以待改耶不知而偶为之耶始议既粗行之必有抵牾拾遗补过之臣以言为职知而不言则为废职言而易之则为反令故臣愿陛下深诏执政大臣远虑熟计慎重出令其始既慎度可以必行而後行之则至其终也不可反矣惟陛下加惠留神思之母忽上以严政令下以示信四方又以杜塞异议使无所幸其失今日之治宜莫先此臣不胜拳拳取进止

乞修敕令疏

臣窃以法者天下之大命也先王制法其意使人易避而难犯故至简至直而以足尽天下之理後世制法惟恐有罪者之或失也故多张纲目而民于是无所措手足矣世轻世重惟圣人为能变通之祖宗之初法令至约而行之可久其後大较不过十年一变法岂天下之大民物之衆事日益滋则法不可以不密欤臣窃以谓非事多而後法密也殆法繁而後姦生也祖宗皇帝達因革之妙慎重宪禁元丰中命有司编修敕令凡旧载于敕者多移之于令盖违敕之法重违令之罪轻此足以见神宗皇帝仁厚之德哀矜万方欲寬斯人之所犯恩施甚大也而所司不能究宣主德推广其间乃增多条目?析旧制用一言之偏而立一法因一事之变而生一条其意烦苛其文晦隐不足以该万物之理達天下之情行之几时盖以屡变今所谓续降者每半年一颁每次不减数帙矣夫法者天下之至公也造之而不能通故行之而不能久其理然也又续降多不显言其所以冲改故官司州县承用从事参差抵牾本末不应非所谓讲明画一通天下之志者也臣愚以谓宜有所加损润泽之去其繁密合其?散要在简易明白使民有所避而知所谓迁善远罪之意伏望圣慈酌时之宜究法之用选择儒臣一二有经术明于治体练達民政者将庆历嘉佑以来旧敕与新敕参照去取略行删正以成一代之典施之无穷取进止

贴黄

常平差役法及罪人就配法今已更改于敕内关涉不少以此须至删修正刺史以上致仕于嘉佑録令料钱衣物依分司官吏现任官例支給至熙宁四年五月圣旨指挥致仕正任给金吾卫大将军俸则是已冲改嘉佑録令今来元丰敕郤依嘉佑録令即不知熙宁七年及元丰六年编敕日因何漏落熙宁四年续降指挥访闻在京支正官致仕俸料并依熙宁四年指挥其外路多依嘉佑令支給内外法令如此不同虑其间更有此类不可不行修完

乞留杜紘编敕奏

伏闻详定敕令格式刑部郎中杜紘已降敕命同黄廉相度茶法臣等窃见自来编修官差移不定难得成书盖前官虽已尽心後官岂敢凭信郤须尽究本末使若创行编修兼所见异同屡有移易不惟岁月淹久亦致议论难合今来重修元丰敕令格式方始置局杜紘职在详定朝廷许令权罢刑部签书盖是欲其专一忽差远使秦蜀臣等深所未谕况紘晓习法令同辈少比如或改差必难得如紘称职臣等欲乞朝廷别差官相度茶法令紘得尽详定之效庶几

编敕早见成书

荐人才疏

臣今月四日奏事延和殿因论人才伏蒙圣语询问臣即具奏自待罪言路亦尝求访内外人物但助职非荐举未敢奏上又蒙圣慈嘉纳许令具姓名进入臣退而自念久蒙陛下拔擢之恩思竭尽愚力图报万一凡下有所见必欲上闻况今人才尤为急务虽荐士之路自有常法然既荷陛下至诚大信降问不疑岂敢更为形迹避嫌自外若无有所补获罪无限谨具所知姓名并其才之所宜如左梁焘德性方正顾临长于谋议范育深有器略盛陶文行纯粹孔文仲学识高远上五人可充两制侍从之任丁骈恬正守道顔复学问该洽刘载文行兼茂吴安诗气识深静赵挺之博学有守上五人可充台谏之任林旦风力强明何琬才识疏通胡宗炎详练吏事温致敦厚明敏罗适公直勤廉上五人可充卿监省曹监繁之任杨国宝刘朱彦刘安世孙谔上五人皆文学优长士论所推可备馆阁之任右谨件如前伏望圣慈赦臣僭逾特赐考察稍加采録庶几少助听政得人之阙取进止

荐本州儒士周希孟奏

右件人耽乐坟素栖迟丘园检身足法于人为学每先于礼屡贫不易其节讲解以养其亲本州两次近臣论荐再蒙朝廷束帛之赐臣自庆历中知福州至今十五年备悉希孟履行去年曾讲周易座下尝及三五百人委实经义精通文词深厚今来年及强仕迹齿编氓至宝遐遗衆所共惜伏乞朝廷嘉其退静优与收録以劝学者臣不胜勤勤之至谨具状奏闻伏候敕旨

论禁中修造奏

臣窃闻禁中计料修饰福宁殿彩绘制度极于藻丽惟人主之奉以文为称而一殿一饰亦无大费然而敦朴素者所以为天下先卑宫室者前圣人之盛德方今生灵靡敝财用耗竭居养服用僭擬无节陛下正宜躬率俭德以淳风俗示之弥文下必有甚伏念艺祖遗训宫中止用赤白为饰仁宗故事栏楯彻去朱緑之采陛下纂服所宜守之又闻慈寿长乐二宫殿宇华侈金碧朱丹穷人力之巧岂非诚心孝德尊事两宫故极所以奉养之观然逾礼过制不可以训今外论籍籍以谓左右谀说之人进谀陛下指二宫以为法使论出于臆度不过臣为妄言万有一实则于圣德不为有益臣所以先事为言伏冀寛其狂瞽而采其诚时赐寢罢以解天下之疑取进止

论备契丹奏

臣窃以北敌之为中国患自诗书以来世常有之方今之势虽効顺惇睦服威德而利金币然其骄贪之情常能窥伺中国动静一见间隙则造端兴谋起事以撼我昔者宝元康定问国家问西夏之罪而遣使肆嫚有非理之侮中外忧恐至倍增岁币而後已臣愚不足以论事势然窃有私忧过计以玩日之故有可以动骄贪之窥伺者臣谨言之昨者某州用师连三岁皆由

议臣失计理曲而无名契丹之于西夏自以为甥舅之国此一事也今高丽遣使朝贡将至阙下高丽自天圣中尝以事请于朝廷朝廷不从遂附庸契丹自是方贡不入王府者数十年矣夫既已臣属于彼而一旦面内中国则恐彼不能无疑此二事也臣以谓此二者彼皆足以藉口而为请于朝廷者也伏念大河之北自戊申以来地大震水大溢民大失业乡内徙空虚塞下至于今三年而地震未已此何祥也今岁漳河春役财力并竭中路夏旱二麦不登灾变因仍人不宁处夫彼既有以为藉口又乘民心皇皇公私疾匮御备百废朝廷厌闻边患之时臣恐契丹见利投隙而区区之盟誓岂足以保其心而恃以为安乎彼固不至敢有狂谋假令遣一使持尺书援二事以请朝廷其用何辞以杜其口臣恐劳人以缮城郭倍估以储庾廩更易将帅轻用名器张皇扰扰大劳大费而已尔康定宝元之事盖可以鉴也又议者籍籍皆谓高丽之至有徼幸希功之人诱而召之者使无此理也不过臣为妄言使诚如议者之论则衅自我始西兵之祸覆车未远安得不先事而言哉伏乞陛下密诏二府大臣使日夜谋画以求防微杜变之理而伐其心且河北重地天下安危之势愿陛下寝食以为念而无忘北顾常务劳来其人民安辑其田里薄征歛之数省烦急之令恤其凋惫足其衣食使乐守生涯而维持其心凡所谓边备军政调度之数皆宜因事稍稍经画藏其用而隐其迹兵法所谓恃吾有以待之者惟陛下留神毋忽以消连年地震之异夫无事而言其言若狂而人皆易之有事而言其言虽足以取信而事已无补臣宁以狂得罪不敢後事而为无益之言以负陛下耳目之任

论应西夏奏

臣伏见元丰中出兵西界增创城垒议者讲求利害久矣臣亦尝具三策上于朝今夏所遣使者已到邸累日其势必有邀请虽庙议默定而区区不能自己谨复条一二补前奏之未备以待采择议者之论臣尝询访本末备得其说为弃地之议者曰往年兴师本以吊民伐罪既取地自利其势必争伤财害民以争非其地其势不得不弃困而後弃不如一捐空城予之以示恩惠此言是也然难者谓予地所以息争若虎狼亡厌争求不已得地险益扰近郡其能保不为患乎为守地之议者曰顿储设阻增募土兵远斥近援何地不守且先皇帝之所得而以予人非是此言亦是也然难者谓夏人不得地兵难不解日引月长边衅益大其能保终守此地乎故议者之论非不曲尽事理至于弭未然之患如难者所忧则虽好谋之人莫敢任责窃料朝廷深计远虑未欲遽决亦必以此臣愚不佞独谓用兵以终守其地诚难保也弃地而使不为患臣虽老矣愿保没齿不见边境之忧惟陛下赦其愚使行其说臣闻向所得地在熙河为兰州在鄜延为五寨兰州本西蕃故地而五寨本西夏所有也其地道里迂直产利厚薄所须守兵多寡转饷劳逸皆朝廷所热究臣不复道而自夏人视之为必争之地彼将以誓约为请而固不予彼将兽困而鬪借兵契丹以逞其忿朝廷且有西顾之忧使我师每战每胜臣犹以为非国之利又况杀伤相当成败未可知皇帝陛下谅阴之际太皇太后垂帘称制正思与民休息而顾欲戮力血战以争尺寸无用之地所谓以隋侯之珠弹千仞之雀由此言之终守其地是臣之所以不敢保也国朝自祖宗以来岁捐金币数十万遣使修约而二方稽首顺命数十百年矣其好争无厌固天性也然且如此则思深利厚足以羈縻其心故也今乘先帝讨击之威因其屈服之势旷然推惠归侵地复岁赐丁宁戒敕分弃前患复谨旧约彼虽有杰黠睚眦之意既一杜塞其欲无所复发则亦感激退听复如前日何苦必欲动衆犯顺以自鱼肉其民虽彼之国宁独利乎古之养虎者时其饥饱适其怒心虎或可养而况人乎由此言之弭患

息争非独臣以死保之自祖宗以来驭二敌者用此道也臣愿采议者之论观异日之势而断以此意大计既决其论措置悉施行次第在朝廷裁之而已虽然臣有拳拳之愚不敢不尽今夫请地在彼予地在我是以主制客以逸待劳之势也为彼计则不得不急为我计则正宜从容闲暇镇以无事臣窃怪近日议者皇皇汲汲视此地如金城汤池惟恐不守不然如附赘悬疣惟速去之为快异议纷起先自惑乱又何其迫遽无大体也今使者虽在邸臣愿且毋遽许以地而厚礼答之善词遣之或先复岁赐而微示以不爱地之意度其効顺坚决至于再至于三然後以岁月予之所谓敌人不一而足夫岂晚乎臣愚不知大计惟陛下裁择

忠肃集卷六

卷七

钦定四库全书

忠肃集卷七

宋 刘摯 撰

奏议

劾程昉开漳河

臣伏见内臣程昉大理寺丞李宜之于河北开修漳河功力浩大凡九万夫所用物料本不豫备需索仓猝迫于非时官私应急劳费百倍除转运司供应秆草梢桩之外又有差官采漳堤榆柳及监牧司地内柳株共十余万皆是逐州自管津搬河北难得薪柴村农惟以麦?等烧用而昉等妄奏民间已料一万余工差本司土兵散就州县民田内自行收刈所役人夫莫非虐用往往逼使夜役蹂践田苗发掘坟墓践坏桑柘不知其数愁怨之声流播道路传至京师而昉等妄奏民间乐于工役无不悦喜民夫既散役兵尚衆本路厢军剗刷都尽诸处不阙事而昉等奏陈不已驱迫州县凌侮官吏仍乞于洺州调起急夫又欲令役兵不分番次其急功扰攘至于如此本路监司畏昉之势不敢言其非而上下以目臣不知昉之为是役其利安在或闻欲泄邢州大名等处积水今使此水如昉之意通行而北缘下流狭无所容受不免泛滥乃是移此就彼易地为患今来朝廷既令权罢则利害姑置之如闻昉为现罢役忿恚偃蹇有休退之请朝旨又令总领淤田司事臣谨按程昉李宜之将命兴事初不以事之可否实闻于朝贪功幸进扰民残物前後奏报事皆欺罔而昉又敢邀君肆慢在于典宪可诛无赦若尚令昉以都水丞领事河工伏恐生事兴患未有穷已伏乞明布罪状重行贬窜以慰一方残敝之民使天下皆知此役之害非朝廷意且以戒徼幸希赏罔上贼民之人谨具弹劾以闻

劾河北漕臣论河事反覆

臣窃以天下至广非朝廷视聽之所能及故分建监司以寄耳目凡一方利害休戚惟监司之言是聽也使监司皆忠慎不欺则其言可信一有诞谩轻易邀功徇私之论则朝廷将受其罔而下将有受其祸者矣伏见河北转运司昨者妄建河议欲为迎阳故道之役以夺大吴新河之势乞许一面经画谓如此则新河下流数十州县尽免水患叙述果敢其言藹如也及闻朝廷遣使按视而本司遽复变而为孙村之说欲便施工今春可毕既而使者到部情见理得于是李南公范子奇翻然又尽以前所议为非其略曰故道堤岸尽已折去灵平颍岸深占河身上下扼束必为大患又曰迎阳下瞰京师孙村水势不顺两处回河事节委实不便臣按南公等正月十八日状称今来躬亲相视乃是前此累作奏请之时都未尝亲至河上而遽以非常之利害不费之劳费辄尔上闻欲以侥幸有成设使万一朝廷以监司之言为可信而过聽其

计岂不悞大事欤夫臣子之分建策进说苟其志在陈献利便则後遂有当否固无足深咎者然如南公等身任职司其言为朝廷所信今日河事又在所部咫尺之近固宜考见底里然後为言而乃惯习欺罔妄图功利及见朝廷选遣近臣知其必究事实自以前议卤莽恐得罪咎故不待使者同行阅视之毕本司已自奏陈公然反覆轻侮君父转大议是非如反掌视一方安危如儿戏夫事上之道惟恭与诚故书不足信故人有忧其谴死上书不实敕律明坐以大罪南公等前之言乃出于轻发妄作非恭慎也後之奏乃欲以姦计求免非忠实也不有显绌何以申明典宪少戒欺谩反覆姦伪之人伏望指挥正南公等罪状特赐窜谪庶协羣议谨具弹劾以闻伏候敕旨

贴黄

自顷岁以来天下宦吏习为姦欺以图功赏如淤田水利濬川回河及边鄙之事皆罔上希进虽试之无效虚为劳费残民害物然终不曾坐罪故南公等尚习故态无所忌憚欲起不可为之大役于疮痍之地而复自为反覆侮玩朝廷不可以不正其罪庶几有所惩也

劾赵子几

臣伏见五月中有开封府东明县人户就宰臣私第或随马披告助法不便并升起户等诣御史台陈诉臣寻曾具状及上殿劄子奏陈利害陛下令府界提点司体量升降等第因依令窃见赵子几别举发到知县贾蕃在任日代借官钱与手力因同天节沽市村酒创置部夫席屋等事朝廷以其将下本司取勘者臣窃以为过矣朝廷变更役法意欲均民民苟以为有利害也安可禁其所欲言者且畿内人户幸以居近輦毂故可以自陈以近推远以一求万则天下之情可知也然四方之人限在遐远上虽有州县而安敢言之又有监司提举司之隔阂其欲赴愬势固难矣今又因畿民有诉而悍刻之人反怒县官意谓不能禁遏故攬摭他事期冀于法不意朝廷不辨付之施行臣恐四远人情必疑朝廷以谓欲钳天下之口而职在生民者必皆视蕃以为戒争务拘民而禁其言然则天下休戚陛下无时而知矣臣伏见编敕节文按察之司所部官属有犯不得于官属离任後始行发摘虽实不复受理若犯赃私虽离任有人论告或因事彰露即依法施行方子几之体量于其县也审已得替离任矣子几初求其事于僚佐又诱而钩之于吏史借令蕃有贓私耶则亦不得谓之论告与因事明矣法之所不当理而子几肆志敢为者子几方以谄伪怙宠用事务在力行司农新政而不复顾陛下之法与陛下之民但驱使就令冀自以收功恐因民不服挠动其事是故作威以警衆违法以按吏欲使畿内他邑与天下官吏畏罪避祸闭遏其人民使不得有言以闻于朝廷尔如蕃以司农牒内桩定人户数使出助钱遂将县籍下等次第升起者凡一千户以就足牒内之数此其为罪固不赦是以前日圣旨指挥令体量此事臣愿陛下治蕃此罪而已自余替後所按乞依条不问盖借蕃今日所以解四方人情之疑使知陛下不禁民言之意臣所以区区论之冀少补治体非为蕃计也如子几领按察之任已久当平日不闻举摘蕃事乃令挟情违戾敕禁原心考察可见险薄伏请付吏施行

劾范岫免应奉山陵

臣近准尚书省劄子节文据户部状为府界提点司合应副山陵用度本司官范岫前後申奏异同奉圣旨令御史根?曲直寻据取会文案看详并系提点司虚妄理曲已具状奏闻去讫臣恭惟山陵兴作朝廷之大事中外臣庶莫不愿穷心毕力以效万一况今灵驾经历七顿皆岫所部正其职事而本司明有应奉慈圣光献山陵故事未远岫乃辄敢推免妄引治平年赋额领于三司之事以为辞省司数数移问索以旧例匿而不言巧文饰说一出欺诬及情见理屈方称备员畿内不避狂僭乞行管认意以为非己之事由为朝廷承乏云耳偃蹇自肆反覆不情忘先帝拔用不次之恩为不义慢陛下崇奉大事之令为不忠臣子之分岫敢如此伏望详酌量行黜责以厉在位

劾蔡确不入宿

臣伏见今月六日神宗皇帝灵驾进发准敕前一日五使三省执政官宿于两省及幕次窃闻宰臣蔡确独不曾入宿中外莫不疑骇伏以山陵国之大事迁坐发引葬之大节故前夕羣臣宿于内者以陛下是夜躬行祭奠之礼臣子之心同于攀慕不得安寝于其私也下逮执事奔走之衆谁敢不?奉期会以共厥事而确位冠百辟身充山陵使正当典领一行职务而乃于是夜独不赴宿慢废典礼有不恭之心谨具弹劾以闻伏望圣断特赐详酌施行

贴黄

确如曾到禁门遇已锁闭亦合立具因依奏入别禀处分不当公然便以不入宿为是

劾论蔡确十罪

臣近具状乞罢宰臣蔡确至今未蒙施行缘臣备员御史以触邪指佞为职今宰臣奸险有犯公议臣若失职谁敢言者伏见祖宗以来所用相臣考慎选择必取天下有德有望之人故内则庙社安外则夷夏畏下则衆庶服其功名事业昭于天下至今称之未尝有法狱之吏聚斂之臣诡譎之才陰贼之行天下所嫉而使在相位如确者也臣所以不避再三干冒天聽确之当去其罪非一公违陛下敕命不赴神宗发引内宿为大不恭其当去一也山陵使回明有历代及国朝故事而略不引罢废礼贪位其当去者二也皇帝陛下之立乃天人之所助而大皇太后之德也确辄自称定策贪天之功其当去者三也在中书二年不将差除与三省合奏及身迁门下陰使言者申请招权营私其当去者四也其弟犯法蹇周辅承勘两次皆灭裂平治其事故今日周辅父子有罪言路累有弹奏而力主之不罢其职任屈公法报私恩其当去者五也执政臣僚已经覃恩迁转无故又进一官妄引嘉佑治平不可用之故事欺谩圣聽不顾廉耻其当去者六也与章惇死党相结一柔一刚一合一离欲以销磨同列牵制善政中外皆知其术其当去者七也自去年十月至今并无雨雪骄阳肆虐天下大旱民情惶惶实由确奸邪所召况位居上相正任其责其当去者八也确在熙宁元丰间锻链冤狱排逐善良引荐奸伪变更祖宗政令以诛求民财确在言路在司农在执政首尾身任其事见法令未便何尝闻有一言论列裨补惟是阿諛护持以谋进用及至今日自见其非乃稍稍语于人曰在当时岂敢言也此确之意欲于今日固其名位故反将归曲先帝是可谓大不忠矣朝廷以高爵重祿

尊养辅臣欲何用哉岂有可言而不言也假如言之而不聽当以死继之假如畏惧而不敢言则当辞事而去乃臣子之常分也当时诡随及时移事故方为自全之计可卖过归咎是可谓大不忠矣于先帝不忠则安肯尽忠于陛下也哉此其罪恶尤大其当去者九也近者奉使山陵回随行属官故事自皆推恩而确乃特荐高遵惠张璠韩宗文乞从优恩上欲以悦圣意旁欲以饵同列赖陛下至圣至公照其狡计而议遂不行中外闻之莫不欣快陛下观此用心则确之邪正不难知也此一事尤喧物论而罪尤大者其当去者十也确之罪恶如此羣议沸腾臣愚区区之言略已自竭而圣度包容一切不以为意在圣慈不失恩于确则可也其如朝廷之轻重天下之安危生民之祸福人情之去就在确之罢不罢尔则所系岂不大也今忠臣义士当盛明之时人人皆愿自效而确犹在位谁敢明目张胆尽心于朝廷哉正人不得立则陛下之善政不得行天下之敝法不得改今大旱累月燥风惨日自冬入春宿麦已槁疾疫将作内外之情惊惶不安皆由大奸在朝廷天示谴告伏望圣慈深察事势以天下为念早发圣断罢确职任使之外补以答天变以召和气以慰公议以新改元之政天下幸甚

再劾蔡确

臣闻周书君陈曰尔有嘉谋嘉猷入告尔后于内尔乃顺之于外曰斯谋斯猷惟我后之德此言人臣之义有善则称其君虽谋出于己亦必曰吾君之德者上下相成忠厚之至也伏见宰臣蔡确辞位求退其所上表无引咎之意有论功之言自陛下临御以来美政盛事民所歌颂者确皆铺列条叙以为己功中外传之靡不怪笑夫收拔耆旧之臣置诸左右乃陛下至明独见以天下公望用之而确乃以为己之所引罢去有司渔利剥下苛细之法而黜逐污吏乃陛下仁心惠德以苏疲民而确又以为己之所请至于申戒边场不使生事分遣使者求民疾苦修法令以完先朝之政包同异以行大公之道此中外皆知出于陛下圣谋睿虑实新政之甚善者而确乃一切任之掠为己事贪天之功欺示天下其意谓此数者陛下不能知之因己请而知之陛下不能行之因己请而行之其于轻慢君父欺罔臣庶违道干誉至于如此凡确之所引数事者确果曾有所建请乎盖不可知也确在言路为执政前後已久不言之于先朝而言之于今日此何意也果有建请固大臣职尔如君陈之归美于上可也而叙于求退之表又何意也夫不言之于先帝此不忠之罪也言之于今日此取容之计也叙之于表谓我有功则是阳为求去实欲陛下疑以为功而留之因欲求免于公议此持上罔下之谋也古之人进言于上退则削其藁不欲使人知善之出于己所以推远权焰避掠美千名之议不如此则何足以为大臣乎确无礼不?朋邪怀贰无廉耻之节昧进退之义又自去冬大旱至今确为上相身任其责其罪恶之着无补朝廷今既逼于公论不得已而求去正当痛自咎责蹶蹶伛偻为恳切必退之词乃大臣去就之体今确夸功扬己露行行不平之气为臣如此不谓之大奸大邪则可乎伏望以确表并臣此章付之三省议确之恶重之窜逐以正典宪使天下为人臣者知事上之道

劾章惇

臣窃以传曰有德进则朝廷尊又曰仁者宜在高位不仁而在高位是播其恶于衆也伏见知枢密院事章惇资性佻薄素无行检庙堂议政无大臣之体专以骄强轻肆作俳谑之语以凌

侮同列夸示左右其语播于都下散及四远传以为笑比来圣旨增捐政令之未完善者惇则必出异意沮持其事方宋用臣骄横不法惇在政府与之厚善纳其所遗酒醪虽更恩宥臣以为大臣不廉犯大义之责不当如小臣论赦令前後也谨按惇夤缘遭遇幸得备位近辅不深惟朝廷高爵厚禄稍自矜重以忠义图报而凌轹谐戏不可谓德闭善害政不可谓仁而交非其人又从而以货取之可谓无廉隅矣可谓播其恶于衆矣方且扬扬高位人皆指而议之殆非所以尊朝廷厉羣下也伏请圣断罢惇政事以允公论

劾贾昌衡

臣伏见勅令差两浙转运副使贾昌衡权三司户部副使臣窃以昨者杭州守臣不公相继犯纪犯法昌衡以转运使至养二州之恶不能按举朝廷削其一官降以为副使以示愆责夤缘发运使以均输留之于今未及一年遽此召用中外有疑若以资任则夺官降差遣日月未久苦以均输为有功则昨者漕入都下之物如糯米等至今滞积出易不行若以选擢人才不以次序则奉使弛职理财失计如昌衡才盖可知矣所有今降差命伏请依昌衡所乞特行寝罢

劾沈希顔非法聚斂

臣伏见京西转运副使沈希顔昨于本路妄有兴作非法聚斂已蒙圣旨委官究实事皆有状未闻施行谨按希顔起于常调委以使指前日以不君命坐废未几先帝记擢复其任职不深惟补报大义乃欲专以利事国违法欺罔诛求琐屑无所不至冒昧祈进老饕无耻孤负任使所宜放黜以戒他路臣窃虑朝廷尚以所按事状下吏勘劾虚为烦扰伏乞即赐指挥

贴黄

希顔于本路为权盐之术徒变旧法而食盐之人与商贾皆被其害于公家殊无所利至于果蔬日用之物例增征算虽屠贩之事皆不屑为之中外具知伏乞速赐施行

劾吕惠卿

臣窃以国家之患莫大于发政行令而无人敢违人臣之罪莫大於邀功罔上而为国生事记曰不从令者死于律擅兴千人者诛盖自古失御臣之道使其凌上召乱而後患有不胜言者多必由此然则法令不可不严而主上不可不察也臣伏覩去年三月六日陛下登极赦书节文应缘边州郡仰长吏巡检使臣钤辖兵士及边上人户不得侵扰外界静守疆场勿令搔扰命令既下边境之上风尘顿息蕃夷之情感服内面当此之时知太原府吕惠卿辄于四月中旬被受赦勅之後连遣部将折克行訾虎相次数万人入西界讨荡荡所得首级皆退浅边老弱虚夸以为功而官军人骑死伤甚衆未几西人复仇以五月犯塞疆臣战没士卒陷亡臣以为劳师动衆奏功不实以至购怨于夏犹皆未足论也而其公违诏敕擅出师徒实无人臣之礼则其罪不可以不治臣谨按惠卿遭遇暴起初不以道幸尝备位执政不深惟大义报国乃

欲造非常之功图再进用且边陲本自无事又陛下新即位衎恤慎始故上循祖宗以来践阼故事加惠边鄙禁相侵扰丁宁戒谕所以体息军民慰安夷夏诏号宣布明若日月可谓至恩盛德人情孰不欣戴而惠卿以前两府居帅守之任所宜与国家同休戚将顺至意以镇方面乃敢用贪功幸进之志为此乱阶夫违弃制诏亏臣子之道其罪一也当陛下谅阴之中谋动干戈其罪二也受神宗遗诏未逾月而忘哀疚之情觊幸功赏为大不忠其罪三也致新天子命令失信于四夷其罪四也开外域之隙至今警备未得安靖其罪五也夫惠卿天下知其为奸人也方命擅兵天下之大恶臣恐防微杜渐朝廷不当涵养而不虑也昔汉之王恢欲徼一时之幸于匈奴故建马邑之役孝武许之是恢奉诏以从事也然终以谋出于恢故下恢吏不赦使自杀冯奉世使外域以便宜系莎车立功万里终以擅命不侯盖古之御人慎兵法义如此若惠卿则非如恢之请命也又非如奉世之止于擅命也被新诏後敕禁约甚用而废格不顾是叛命者也方陛下嗣政之始以威福恩义怀宁天下之时而第一命令为强悍之臣叛逆而不从若朝廷无所诛诘上下不敢谁何臣知陛下异日有大政号将不足以令天下而信四夷奸臣之逆命心轻国宪者将接迹而动矣臣位中执法职在纠治奸慝伏请以臣章付外议正惠卿罪状考古之义依律处分以申大公之法为奸确之戒谨具弹劾以闻伏候敕旨

劾韩缜

窃以圣人于天下有一物不安其性命之分则然伤之以谓已使然也一物失所犹引以自任况夫民命之重哉是故先之以仁後之以政彼其有罪而入吾法犹哀矜惻怛不得已而刑之夫以人君之势其重爱天下犹若此况人臣分忧共治而敢有专杀者哉祖宗仁爱万方官吏之入人罪者皆法而故入者特深焉夫意虽有故然犹假文法以致之也而已为祖宗之所不容又况专杀无辜者哉臣谨按前知秦州韩缜因饮宴至中夜而罢指挥使傅勅持烛侍缜入于门缜见之怒明日杖勅背一百三日而死其家持血衣以诉于朝廷始者下本路按劾而缜辄自有论述然其大要虽过为词说亦不能文杀人之罪其後但闻朝廷数数有体量之旨至于今数月矣臣窃以缜之与勅虽贵贱有间要之分职共事陛下之臣也勅有罪耶则有陛下之法在当寘有司闕实而毙之今乃肆一时怒忿摔首鞭背非理踰法杖至一百而死之方太平之世内外莫不畏法令踰绳检而缜以帅守快私乘恚蔑侮典宪暴杀官吏意轻朝廷不识朝廷尚何所疑而体量委曲如此徐徐耶议者以缜家世其亲戚交游多在势贵根株表里谁不为力使孤子单平无援助者敢杀一无罪必不优游迟久至於如此将使延及明堂之宥也臣又闻王韶之来颇声缜冤韶昨以边地欺朝廷坐降一官而缜乃保蔽以实其事故韶极力游说以惑朝廷奸利相市意在报缜若朝廷万有一信则恐死冤不伸国法不正非陛下为人父母之意况缜所至暴疾肆为不法残人害物前後非一今边隅未靖不重缜责不伸勅枉恐无以感士心而得其死力伏望速赐施行

劾黄隐

臣伏以国之教化出于学校学之废兴盖由师长故圣人既建庠序必立之官苟非博通经术而有德行者则不能使学士诚服而心悦之祖宗以来莫不慎其选任而仁宗庆历中最号得人如胡瑗孙复石介实为之首育材之效後世有考焉神宗崇儒重道大建学制训发经典以

幸多士恩施甚厚今在学学者衆多与古争盛而师儒之位岂可以非其人伏见国子司业黄隐学不足以教人行不足以服衆于学之政令惟考校课试迁补职掌最系劝奨不可不公而隐违法徇私事皆有状以致大喧物论多于生员试卷之末出立词说榜以示衆变弃义理疑惑学者陰附权要奨进浮薄故使学衆不伏怨猜??至有腾为嘲谤之词又议者谓近时学官之肆为私枉无若隐之甚者按隐本无术业使在此官非其所长恐不足以表率士类奉宣教法无以称陛下首善造士之意伏请罢隐职任除一外官以安学者取进止

贴黄

故相王安石经训经旨视诸家议说得先儒之意亦多故先帝以其书立之于学以啓迪多士而安石晚年溺于字说说典是以近制禁学者毋习此二者而已至其所颁经义盖与先儒之说并行而兼存未尝禁也隐猥见安石政事乖谬为衆诋斥遽尔迎合附会思欲尽废安石之学每见生员试卷引用隐辄排斥其说此学者所以疑惑而怨之深也夫安石相业虽有间然至于经术学谊有天下公论在岂隐之所能知也朝廷既立其书又禁学者之习此何理哉伏望速赐罢隐以允清议以一风俗

乞不候结案行遣吴居厚

臣伏见前京东转运使吴居厚吕孝廉昨于本路科歛掊刻违法害民朝廷罢逐其职任按正其事及今半年尚未结絶风闻勘司方于本路州县遍行取索居厚等到任以来逐件缘事在累年案牘及事情不一检讨齎送重为烦扰谨按居厚孝廉奉使无状不为陛下爱惜百姓专以朘削为事剥下罔上意在徼幸市进民不堪命愁怨以目自圣明照知二人去任一方始有更生之意其罪恶亦已暴着四方莫不知戾今覆治节次方为此徐徐使外疑惑诚恐所司有所顾望欲乞速赐指挥不须更候完结徒为追扰?已体量到罪状重行窜黜以明典宪以谢疲氓以戒晓诸路使知二人不法聚斂非朝廷本意

乞罢蹇周辅及其子序辰

伏见刑部侍郎蹇周辅及其子员外郎序辰昨日以盐事奉使江西湖南而相继创增卖额州县畏惧承奉皆出配抑使人?罪破产数路愁怨朝廷已遣使按正其事今闻周辅无所忌惮复自论列以饰非文过而父子方雍容侍从出入朝省此岂待罪者之所宜衆人莫不指议臣诚恐周辅等怀患失之意或致别为经营以图幸免有失公议伏请罢周辅序辰现任职事各令补外详察治到事状别聽旨

殿前副都指挥使建武军节度使贾逵諡武恪諡议

贾逵少以气略雄毅闻及服事边圉周旋兵间料敌致命尝为士卒先故所至数有功皇佑中智高扰南鄙狄青表逵从行归仁之战青命于军曰有辄动者斩及前将孙节覆于贼逵度贼必将乘胜薄我而视地形有便利可据者即不待令引所部疾趋之甫成列贼果至因得乘高

鼓躁大呼驰击逐之遂溃其衆夷衆以遁方此之时非達应机达变不以全軀保私为计则胜负殆未可决也至于筑堡河外以居蕃户使免西人之所驱掠置军壁于鄜延以蔽二城杜絶寇兵临瞰之患在秦州及并代多提轻兵游察境上地虽险絶人空至者亦必深造之或召羌族与之较射艺执其酋领使还所掠得边民数千人释而归之以故戎人慑服疆场以安大抵其所施为出于忠义果敢奋决虽有浮言流议一不以自恤其周卫王室典治禁旅严而不苛寬而不弛使军士怀上而长己之持法出入二十年无纤毫过失宠?倚任克有始终夫諡者所以公善恶之实也按達之居边也遇事辄奋果于有为时或脱弃拘挛务以建立事功至在近卫则恂恂谨密举蹈绳检外内异迹若非一人所为者盖亦可谓之胜任矣諡之灋有奋其威勇曰武谨居官次曰恪节惠考行伏请諡武恪

张康节諡议

公德厚而政易简业隆而心?慎不匮于惠下不亢于履高夫惟简也所以为不匮慎也所以为不亢公之治郡若县凡十有一寬而信敏而靖与民之所同欲而去民之所同害所至有政民爱之若父母密州绩用尤大较着遭岁凶僅哺活流饿二十余万在朝廷侃侃正色其所建明多国之大事如诫宠幸击姦权申诬罔者其危言正论今落落具在也仁宗未嗣立公力启自为御史丞杂以及大位盖三请之卒至天子感悟定策受遗遂预有功焉凡皆志立而後发虑定而後蹈以忠报为守不恤身利害故多得其言至于周旋二府不为势焰門无苞苴客无私谒不以富贵异廉俭之旧不以宠利婴清方之介脱荣名享眉寿其于成物行己终始出处可以为无愧者矣諡灋安乐抚民曰康能固所守曰节以公之行合之灋而参之公议于是为称请諡曰康节

忠肃集卷七

卷八

[集部,别集类,北宋建隆至靖康,忠肃集]

钦定四库全书

忠肃集卷八

宋 刘摯 撰

啓

谢免省啓

比年课艺幸据上游今日程文复叨优等爰充名于桂籍行待问于枫庭得非所宜愧不能称窃以先王育材于学本以取人君子修善于身固将从政惟所用出于所教故能言必其能行诗书所称岂有异志公卿之选悉由此途凡其一时出长入治之庶官固莫非六卿时书季考之多士待以积久取之尽公斯民所以直道而行在昔称为至治之极降及後世溺于末流以六艺为繁文谓上庠非急务太常受业徒详平日之空言列郡应书尽出临时之私意上之所求几于无用下之所学亦非可行不知操縵之为安乌有画饼之可食旷矣千载循乎一涂此衰世之轨所以相寻而圣人之道未知能复恭惟国家承百年之积弊恢列圣之大猷泛观古今洞见根本谓两汉而下所以失由观人以一日之长而三代之治所由兴盖入学者中年之考乃辟黄舍以来俊英增弟子之千员颁新书之万卷春诵夏弦而经以师授月书季考而士由舍升既考之于寻常复试之于仓猝且环桥者亿万不已多乎及扬觶之再三仅有存者故自元丰之肇造迄乎绍圣之纘承虽有求者累年于兹而所得者数人而已宜获异材之间出以彰新法之大成如某者智不适时学方为已徒以双亲孝养未忘干禄之心三舍序升式重兴贤之礼俛首百试旅身七年几成上考之功犹属中变之法顷造公选再程斐文言实工于前时名亦玷于异等知其非幸许以从新方虞再鼓而衰甘为殿後不谓适矢复沓优入彀中退慙毁瓦之无功进喜望云之有日蹟其所自敢不知归兹盖伏遇某官顷膺明命两董学宫幸升夫子之堂获就诸生之列参乎未遑方求一道之归偃也何如或许片言之是待以殊等出于衆人虽华涂寢进于台司而雅意不忘于璧水龙门益峻犹许再登弩马方疲幸叨一顾系余光之下庇使朽质以生荣故于选抡误备收録力探圣贤之阃域誓穷师友之渊源

谢荐啓二首

过赐宠嘉特形外举自反而视内媿以兢惟本朝任官之公得君子举类之法然取之颇泛滥而不审故进者亦至而丛来铨选困于平衡真伪揉于一律今之议论举患才能之不多考其源流岂非法制之甚弊是故近岁之讲计增损旧令而改为内之贵仕凡文武之人悉止其

岁贡外之使者与守相之荐均杀其常员向举以亲民者且俾之从军近所谓监郡者皆不得应令虽未足大清乎多士亦庶几少制其末流顾进退之尤艰亦知人之岂易伏况刺数千里之部察十二州之官人人飭修家家廉茂就而求者当以褻然某昏愚之人孤子以仕讲学不足以濒道德之畛为文不足以望述作之藩曩常有志于斯民今已无异于羣衆日思投効以自去虑烦汰砾之不容伏遇某官以经术谟明尝尽心于御史以忠恕简重今握节于外台如陵善养而材无不包下车未几而聽有所过喜为李君御帐龙门之未登请从郭隗先虽马骨而犹市是为不德之德应干无求之求敢不迪忠清之大方安性命之常分穷不失义进无尸官庶期终身无辱高谊

向者误采孱愚特形慰荐惕然自视愧以无容某支离之人孤子以仕学问不足以立己才智不足以合人比遭休明尝备任使器非大受进曷补于涓埃恩劝後來退犹逃于鈇质省非无益窃食更优会诸公之有容垂三岁以自庇深惟过幸常已厚颜敢谓某官以清通简重之政而绥安一方以公明乐易之德而镇慰羣下乃兹不肖上辱一言举不使知仰古风之犹在恩无所谢愧士礼之已隳敢不云云

谢馆职啓

禁林课试辱奏等之不遗册府备员荷诏恩之均备名浮其实宠至为忧窃惟古今建邦率以经籍求治盖君臣父子之大本而礼乐教化之所兴故建府以宝藏且命官而典正汉之石渠天禄别夫中经唐之丽正崇文校夫四部国家之盛宗祖以来大辟儒馆而聚蒐艺文乐养人材而增置员品上繇番直下底校讎小言之则订正国籍文字之异同大言之则预闻朝廷政事之论议虽清流之可贵亦任责之岂轻故国之用人非以荣之而将以考其实士而居职非以慕之而求以称其官某也寒生出于下国读书薄闻乎大道修辞有媿于古人性愚不能以颡颥材樗不可以镌刻出慕斗粟盖有为贫其犹双鳧曾无所补两河试邑北楚从军顾常怀功名之心颇亦究义命之说踽踽自守无意于舍龟依何从仅同夫即鹿恭惟治平之特诏并命四辅之大臣俾类求于能儒将器养于文馆顾惟一介之在远乃辱诸公之为言神圣嗣天都俞继志所举二十人者无一遐遗不越四三年间以次召进惟时江湖之贱起预鸾鸿之游鰲禁景长玉堂春晚地近清切方尘观之坐惊事非故常忽天题之拜赐求之以农桑为政之论策之以治乱历代之原刘蕡忠嘉虽不避诛夷于斧钺仲舒浅陋而不能别白于文章仅足成言曷副垂聽闻一知十良谢于该通书等入三误膺于题品奏篇待罪画可湛恩几汰砾之不容偶续貂之有取深惟孤进何补斯文虽俗吏服劳一纪始书于六考然选人入馆本朝不过于数公足为幸荣良有前地斯盖某官登翊圣治吁求俊心高谊有加士以为权监一言所掖国以为蓍龟如荐清庙而杂用庶羞如成大裘而毕收衆腋致兹辱细曲冒宠灵敢不迪忠清之大方安性命之常分退不失义进无尸官仰酬覆焘之私次答陶钧之施

谢文太师张宫保韩大资范相公啓

奉备制书延登宰席循墙以避虽极于深辞反汗为难终成于虚授此盖某官至仁成物盛德宪朝服膺善人之心能举其类推轂天下之士先为之容常自爱其弗忘俾驯致于此地据非

所称凜不自安师仰高风庶立懦夫之志瞻驰材馆莫陪下客之游徒感愧之在诚欲名言而莫得

谢转官啓

祇应宠命积愧恩荣伏念某诸生陋儒四海孤进学徒知于适道才不足以趋时试邑冀方曾微善状从军楚北益乏能名漫浪逾夫十年日月累夫六考仰繫造化获保寒微比投铨考之书以就叙迁之课中缘诏试擢预俊游书林未久乎对黜吏部为言其功状特蠲常制就錫宠名佐述史于兰台仍校经于儒观皆所谓文章之选夫岂宜踈野之人此盖某官弼成治猷敷引士类绳墨一正材各入于轮辕雨露所施物不遗于萧艾致兹愚品冒进官联敢不益修厥身仰奉高谊

滑州到任谢政府啓

比承诏札猥赐守符驱马过家怀章入部以才能之素薄当责任之匪轻惟感与忧俾夜继日伏念某降才不腆赋命多奇每遭选抡祗速罪戾免官归里满岁奉朝岂谓圣主推置瑕之仁诸公笃念旧之义属补郡之多故使假守以备员当残废不完之余况事工方造之始大非守拙所克堪承此盖某官因能任才为国造士不遗一介之贱兼聽百官之成儒者迟缓养名愿以为戒古人造次集事敢不自强庶酬已知且避官谤

辞免右丞上政府啓

非常之恩内省而惧窃以庙堂之任世所具瞻丞辖之官今为执政擢寘此位詎容匪才某学不高明识惟浅闇幸遭盛治稍玷近班虽殫千虑之愚无有万分之补日虞汰斥敢意超踰名忽假人惊如坠谷方嗣圣之求助适诸公之在朝聚精会神同德协志固已副仰成而治矣奚取于不肖而参之屡贡恳辞未闻可报伏遇某官朝家之柱石国论之蓍龟愿借一言仰達天高之聽庶回误宠使逃器满之倾

除右丞谢政府啓

比者误被制检进丞中台名器假人循墙而莫避负乘致寇反已以为忧矧惟省辖之官实预政机之论用人当否系国重轻而某所稟寻常逢辰教育帐古人之不作慕直道之可行漫历年何裨任使执法宪府愧绳愆纠缪之风侍经帝闈无引古讽今之益方期汰斥乃此超踰斯盖伏遇某官谋谟信于朝廷德义明于天下蚤尝借论乐于成人顾弩马而一言以倍其价器蟠木于万乘先为之容遂致孱愚叨尘光宠愧感之厚岂易布宣

除左丞答谢外路啓

蒙被恩书进迁位序辞不获命方深非据之忧德在成人特枉相先之庆内惟凉琐仰识谦隆

媿荷之怀敷陈莫罄

除中书侍郎答谢外路啓

左纲承乏方俟于黜幽右省跻荣复叨于迁次惕以自视愧无所容此盖某官有德以成于人引重而为之地致兹懦品玷冒宠光方具私书遽诒荣问感慙不敏紬绎莫穷

除门下侍郎答谢外路啓

发政西省无补于毫分出令东台复迁于位叙辞不获命荣以为忧此盖某官引类惟公成人以德务匿瑕而借论常推轂以为容致此衰孱益叨进宠方裁诚以通悃蒙贻问之见先愧惧之深敷叙难罄

除尚书右仆射回谢外路啓

奉膺制命延寘宰司恭极循墙虽自量而恳避令难反汗终虚授而冒居愧不遑安凜无所措此盖某官至诚与善盛德成人左右以容器轮囷于有用吹扬维力致糠粃之居前上何以塞厚恩重责之所加下无以慰多士大夫之所望深惟兢愧啓处不遑

郢州到任谢政府啓

祇膺中诏许锡左符寬尸素之大呵释颠危之重负开职禁殿相居便藩乔木故存未觉去家之久先楸所在更谐上塚之私获此叨荣过于自择实二圣矜怜而善贷亦诸公辅道而曲成遵职之初抚心增感重念疎愚之迹方依陶冶之私属岁序之沍寒望门阡而日远仰祈保卫少副愿言

答文太师乞政啓

荐上囊封恳还公绂方睿眷之增厚宜中怀之莫伸雅诏弗俞羣言允協某官文武具德庙朝宗工风烈瞻乎华夷勲劳光于旗鼎方雍容师席以镇天下之望而逍遥达观以慕圣人之清盖唐室尊贤裴令常为之轻重姬王贵老周公不去于朝廷愿回遗荣知止之心少副尚齿尊贤之愿敢期谦德过赐函书徒敬服于高风念难施于末议感慙之臆敷叙莫穷

上欧阳观文啓

一间门墉屡环岁筦泰阶辅政徒望于昭回大钧运和陰烦于造化未尝辄通于恳款盖虞自犯于僭踰?审被命制函均劳方国仰旌车之甫舍宅福祉以日蕃某官学茹古今才张幽渺当今名世孟氏自推于天以道觉民伊尹素为之任泰紫阔步虹蜺飞光先诸老以告猷倡斯文而还古忧勤许国之志慷慨得君之忠公府勲劳歌咏于四海贤人事业效见于三朝注意方

安露章恳谢秩文昌之正位职秘殿之隆名偃息南邦行奉袞衣之赐归来东土永谐霖雨之求某赋职遐方瞻风前屏春余气润淮服地清更冀云云

贺富丞相啓

奉被制书冠居台席圣志先定发于大明天下倾心仰夫旧德休命所及欢诵举同某官国家宗工文武元老赞襄而陈九德皐陶夙惠于帝谟以道而觉斯民伊尹素为之已任望镇四裔而不敢侮黜载二府而皆可歌缉熙百工康保万物向偃藩而得谢比均佚以弥年曰咨多故之时爰即来朝之诏袞衣既袞有光东土之归岩石所瞻尊据上公之宰宗庙增重泰阶以平致君尧舜而赓载乎明良如古房杜而无媿乎礼乐旗常有纪天地无穷某自惟寒微久在陶冶【案此下原本缺】

答北京韩相公乞致政啓

荐上囊封恳还公绂属眷怀之方厚宜冲志之莫伸雅诏弗俞公言允協某官出处安乎一德勲劳被于四海正期袞绣之还亟有轩裳之厌虽心知止足欲退慕圣人之清而国有典型其孰如天下之老愿回逵人遗荣之尚以副明主贪贤之勤特辱亟书备形谦德虽高明之是仰愧未议之何施

贺郢州李太尉啓

拜恩阙北易地东藩戎旃十乘之容甫闻弭节铃阁数人之卫已乐轻裘宠简上心欢符士论缅惟镇抚之裕休有福祥之归某官刚厚稟中辉光烛外旗常有纪功懋于姬庭亲贤并隆德毗于汉室均佚劳于右辅统连帅于东方清照兼资长城是倚珣戈金钺方重专征之权淑旗绥章行光入覲之锡某里族单陋材性?疎惟是乡楸之微实居台曜之庇眷言天幸获陶沐于至仁尚以州符阻趋承于前屏更祈上为庙社下庇兵民

答北京冯太尉啓

赐节东吴偃藩全魏已下车而涓日初开府以临民溽暑方烦福基增厚某官粹和清敏惇大靖深辅政三阶休烈铭于宗庙宣劳四国膏泽下于生民为时重轻以道出处乃眷北门之镇曰咨旧德之贤上将用儒盛斋坛之尊宠离宫有守付留钥之谨严国倚长城人瞻岩石伫被绣裳之锡弗容煖席之休方具庆仪首承荣问感仰之素布叙莫穷

答冯太尉免新命啓

荐上囊封恳辞帅节方眷怀之所注宜冲尚之莫伸某官学深天人德备文武出处不渝乎一节勲劳先被于四朝惟皇思贤乃眷图旧倚以北门之留钥建以南国之将旄诏号有孚师言已穆愿回持谦难进之志少副注意分忧之咨乃枉珍函过垂敦谕惟高风之是仰念轻议之

何施感服之心敷叙安究

答北京冯太尉啓

报成美政孚号大廷就更西镇之旄仍付北宫之钥上恩協称欢议率同某官德在四朝功高羣辟人思袞绣期政路之调元国倚翰垣尚玺书之增秩忽貽荣教具示冲怀愿亟拜于恩辉庶仰符于眷委感仰之素敷叙莫殫

答郭太傅谢宫观啓

恳上左符荣膺中诏宸宫列将莫若上卫之崇琳观奉真莫重养贤之地某官学深文武功在庙堂夷夏相闻其高风出处不违乎大义殊庭谒款聊适于旷怀召节走趋伫光于图旧岂其谦厚特枉緘封感愧之怀叙陈莫悉

贺胡少师啓

恳还公绂得谢帝庭升拜宫师之崇荣尊国老之重清风迪古贤人究出处之归全德镇浮天下无始终之议仰大臣之達观均四海之载驩某官统槃蹈中灵襟秉哲诚穷人物之尽学富古今之储当天圣之开符览德辉而荐祉泰紫濶步虹蜺飞光正议鸿词倡斯文于禁掖嘉猷亮节运大政于天枢勲烈被于三朝忠劳笃乎四纪烂焉乡锦仕孰乐于过家确乎囊封礼弗容于赐几冲和天爵镇拂世风固将安车驷马以游乎亲宾清泉嘉木以适乎啸咏逍遥贤者之乐拱揖圣人之清宪而不烦方典型之所在浩然善养宜壽祉之无穷某材稟下中世亲幸会昔者先子识宝气于星津其後诸孤联荣名于庆阀迨兹勉强以就仕屡辱荐延之大恩贤哉叹嗟固已倍都人之庆形于歌颂又将酬国士之知

贺王参政啓

奉被诏恩进陪政论大臣重国畀自圣人之明贤者得君慰夫天下之望陶钧所迨歌诵同辞某官业履大醇辉光外烛非今儒者寻常之学有古君子久大之储言行弗渝求圣贤而允蹈进退有裕适义命之所安禁中甫告于嘉猷天子颇嗟夫见晚故进处四辅而非有左右之助度越诸老而不闻先後之言昔之为国者尝患贤之不同时士欲致主者或嗟才之不见用深惟求治之日复此逢辰之亨明良一时社稷盛福某预闻休命属在远方莫遂龙门之登愿为燕厦之贺

问候河阳李资政啓

恳谢繁机均劳近屏瞻言旌旆怅远于风徽畏是简书阻伸于郊饯倾依之恋絀绎难穷

上政府啓

食浮之久曾何补于涓埃材散而蟠徒陰烦于造化去违台屏淹革岁筭伏惟平运万机赞襄九德天相炎历日拥太和某官诚格天机德符坤厚驯二府之注意迪宗工之大猷称百官而镇四夷平三阶而遂万姓发忠定策国倚泰山之安熙载亮工民陶元气之运忧劳逾乎二纪功业被于三朝盟府藏勲方茂皇天之业中书有考永光岩石之瞻某材非敏明志已衰竭弩马十驾知致远之已难鷁鷁一枝祈庇身之有地

迎中书侍郎啓

祇事西陵言旋北阙适冒风霜之候宜多车马之劳即遂瞻承预深欣慰

上中书吕侍郎奉安神御啓

恭扈威神往临原庙谨輿仗侍承之职御风霜偃薄之劳仰冀保颐以符瞻系

问候中书侍郎啓

奉轩后之威容即汉陵之别庙扈从于迈夙夜载勤方冬序之始严惟福基之增厚盖祈保卫以副瞻驰

贺吕枢密啓

祇膺抡检进贰几廷圣贤同时朝野胥庆某官元精毓粹名世应期挺特千载之英危压四方之隼自结明主雅意本朝镇靖西州眷倚长城之固经纶北省仰资大计之烦上方纂绪先猷急图极治顾军师之重柄系宗社之大谋权出几微地居宥密参议乃事诚难其人惟公勲阍之高为国老成之选注意所在具瞻已归行传丙魏之声即庆韦平之拜

贺宋舍人啓

奉膺诏制荣步掖垣贤能进升远近钦悦国家号令上应于五星朝廷文章远同于三代王言至重国论所关奉之以媲夫丝纶施之以示乎威福誓敕军旅而齐其勇诰命四方而等其功总为赞书其任乃古之内史观诸上象其文犹天之紫微职重而清地高而近精求文学之老能达训词之深发挥帝谟如开日月之照鼓舞神化以肃雷霆之威惟今得人与古同盛某官言高坛宇道濬渊源研摩六艺之归博极九流之要校文册府克家素重于刘歆视草禁涂继世雅同于贾至实圣贤之盛际增台省之荣光典贍应机宜有五王之册清修素履早探二酉之醇钦闻宠章曷胜欢诵

答韩左丞免新命啓

伏承诏綍进总台纲四辅得人多士相庆某官高才应世一节承家论议有经推丙侯之寬大

险阻不挠抱胡公之中庸亶世德之逢辰伟圣朝之求辅遂膺帝简入秉国成顾枉海音具形冲尚愿亟承于涣渥庶仰俯于虚怀感颂之深敷宣罔悉

答苏左丞免新命啓

侧承明诏登用旧儒四辅得人多士交庆某官治行高妙谊蕴粹深蚤以继世兼人之能蔚有先生长者之望白首一节清明四朝士心所居上简攸在玉堂典诰极将明之功帟幄待经多道义之益肆畴贤誉来秉国成顾枉海音具形冲尚愿即承于涣泽庸仰副于虚怀

答胡右丞免新命啓

光被诏纶入司台辖宠章诞布欢议率同某官学足以洞先王之微知足以经当世之务心两忘于出处节一致乎险夷时然後言天下服其忠谅义形于色朝廷为之尊严果奉眷图进承几政士相为庆民用具瞻惟圣主得贤方侧聽诸生之颂而君子难进尚未承三揖之求特辱海音具形冲尚愿亟膺于涣渥庶上副于虚怀

答王右丞免新命啓

丕承帝简参秉国均成命式颁輿情交庆某官德业致位方正立朝文为儒者之宗望出廷臣之右周旋国器扬历禁途京兆考功德威凤着文昌典政绩用有成果膺纶綍之音入拜丞疑之任至公所属枚卜已从伫观久业之施以副具瞻之意岂期冲旨特示巽词愿即拜于宠章庶上符于睿眷其于感服紬绎奚殫

答陈州傅待制啓

拜职延阁请符近藩亦既下车云初开府某官谊蕴闳博德名光华弗渝之诚贯于金石後凋之操见于雪霜以奥学侍经帟以大节专宪席国所倚以立邪正之辨士所赖以识是非之归凜然清明无所吐茹出处有道佚劳斯均即被安车之还岂容坐席之煖敢期谦眷特枉海函

答河北都运顾待制啓

陞华延阁杖节北陲涓日之刚下车云始方暑序之烦郁惟福基之靖康某官学谊本经文华贯道险夷一致义无愧于神明出处两忘节不渝于风雨辍东台之献纳付朔部之澄清行以节趋岂容席煖方斯诚恳遽辱贻书感仰之怀敷叙安究

答永兴李待制啓

被宠制书陞华延阁兼提请诏就帅全秦某官学通古今材适正变名实高于士论术业着于吏师以从官之严尽护诸将以元戎之重外总十连坐收静胜之功行被节趋之召下车云始

滕翰见谄庆仰之深布宣难悉

答江宁蔡待制到任启

更赐左符徙临近屏涓辰受事视履介祥某官望重士林学优圣域禁涂陟降日告于嘉猷南国蕃宣勤敷于惠政兹惟易地益便均劳恐席煖之未遑以节趋而来起岂图谦德远贶书音
庆感之深布叙奚究

忠肃集卷八

卷九

钦定四库全书

忠肃集卷九

宋 刘摯 撰

啓

回郑学士啓

试可荣庭进明儒馆伏惟庆慰某官乐道深造修辞大醇览皇德之光辉收士科之高妙儒雅政事羽仪朝闺惟蓬莱幽秘之庐盖贤杰萃升之地尚书给劄独善於奏篇广内校文宠跻於华贯盛兹得士实系斯文雅意不遗嘉音为颺顾驰诚之独後荷推礼以见先云云

回孙学士啓

赐命帝庭升华册府邮音远布士列荣观某官识贯天元才为国器文章纯简雅得圣贤之归议论深阔能通古今之变洪惟上德崇右道真垂精艺文留意儒馆专赏不靳乎金币遗编具积於邱山尝谓久於宝藏虑或残于鱼蠹以简编之脱烂则义理不属以文字之重复则句读可疑务得人而删修将垂世於永久登用豪杰整齐缺讹铅槧功施是非坚定刘歆经术总七略以谕人班固史才别九流而原道宠迁广内位正清涂逖闻休命之行增喜贤才之进

贺郑内翰啓

拜命黼轩跻荣螯禁仰圣贤之盛际发中外之欢言某官性德渊灵文章英发当今名世孟子自信於天以道觉民伊尹素为之任忱明足以御万变恬靖可以敦薄夫气庄而仁有古大臣之体节安乎义非今进者之心仰圣旦之右文辟玉堂而宅俊职备顾问地亲禁严陟降夙夜以奉乎清光言语学术以谋乎密命惟时授受系国重轻亶惟天下之才增大朝廷之任五直一曝方视草於奎扉泰阶六符期亮工於天秩斯文所主於道大光某椎然贱生晚出门下菁莪长育常费阿陵之仁大厦穹隆不无燕雀之贺坐縻吏状迹远台廷

答计内翰啓

被恩宸检入直禁林朝盛得贤士相爲庆某官谊蕴通博文章秀醇出处有古人之风勤劳得多士之誉簪笔持橐岂惟求论思夙夜之功论道经邦遂将副左右弼谐之托无缘庆謁特辱海函感颂之私敷叙难罄

回赵内翰啓

荣趋使节召直禁林进德则朝廷尊大孚於士议承家以儒学显尤重於世官某官文章秀醇
谊蕴浩博立朝方格得多士之望以道出处有古人之风润色论思岂独求语言之妙弼谐左
右遂将膺公辅之图枉飞盖以见临辱緘牋而申祝宠绥无似感佩难名

贺崔直讲啓

已奉恩书入趋召命得人之盛有光朝廷逢辰之亨下劝士类某官敏识好古纯履蹈中学谊
造夫经纶文章底乎述作绰然广誉之弗愿而有大臣之为言幕府宾筵阶荣於贤路广文师
席传畅乎道真出处是宜名宠相得不遗遐外见枉緘膝佩风谊之相先极懦衷而增愧

上扬州王密谏啓

近赴山城获趋藩府籍龙门出入之旧拜台曜荧煌之文未遗疎愚见遇优厚尝枉事而临宠
继加豆以从容衔德重深以心铭镂竭来敝邑?承簿领之初托在下风有意光休之被矧敝封
之密迓系帅节之统总炎序方蒸福基增厚某官杰然望实华於盛明文章天下之宗道德禁
中之老十连有帅聊故国以均劳四辅爲邻竚嘉猷之入告更冀为国自重副人所望

贺马谏议啓

被恩宸诏进职谏廷宠简上心欢符士论某官清通迪哲儒雅蹈方览盛德之光辉进由直道
奋大贤之事业见於四方惟时谏诤之员上系国家之体樊侯将明於周德望之謇谔於汉廷
人物之难古今为重惟高谊之甚盛協宠明之所归臣有七人宁久外台之寄召以三节竚陪
近辅之邻方具私书先承教幅云云

问候长沙燕谏议啓

越去台垣洊更岁筦琐然羈贱困南北之无归仰止光尘徒昭回之在望比审辍班汉省分节
楚都下车逾时已洽宣於治效卧阁缓带惟日拥於天祥某官质方而清乐易以正善行足以
帅世恬节可以镇浮山甫将明内裨於袞职望之謇谔世补於郡条国优宗工士望元老南邦
是式虽乐於均劳小愆有求方隆於旧德行趋召节入辅大猷某早以无庸获出门下方贱官
之有守叩前屏以无阶伏冀云云

问候唐殿中丞啓

辍从宪台分符藩治下车周月视事協辰获藉余光之依实深私恳之附惟始夏之清暑仰休
履之考祥某官奋览德辉出华王国以富文典学习仪於朝闈以纯?大忠擢倚於御史论议聳
闻於天下刚方能世其家风故事避亲聊贰方州之治清衷思治行膺召节之还某椎然孤生

且出门下虽登龙之愿未获贱私而贺厦之心幸依邻庇

答西京留守啓

申画郊圻地隆於京邑保厘宫钥礼重於居留某官勲绩着於本朝威声懔乎殊俗贤辅继世克有扶阳之风德化同时复居大冯之後使节戾止民谣蔼然行且咏袞衣之归於以增岩石之重方修庆牋首祝华緘荷德意之相先抚愚衷而增忭

答西京留守到任啓

奉被中检保厘西郊涓辰之刚视政兹始伏惟庆慰某官功施宗庙泽被生民方注意於太平俄均劳於近辅上眷东洛地严别都守桥寝之山川谨汉宫之筦钥非夫勲德之重曷称居留之崇方厚顾怀行膺召拜倾颂之悬布叙难周

答外州前宰执啓

拜恩中检移节名邦亦既下车云初开府方暑时之蒸郁惟福履之清嘉某官德被华夷功施庙社上之泰阶平而六气正下之万物遂而四民康比偃息以均劳继盘桓而易地恩隆於义周公之过亲亲时止而安孟子之心绰绰日仁袞裳之眷来还钧轴之尊永绥斯人益究远业方裁诚而修问蒙过顾而贻书感仰之怀敷陈难喻

答永兴安府啓二首

分阃偃藩下车开府周以上公分陕外率十连唐以宰相临戎总护诸将某官变通而裁以义刚厚而本乎仁贤业着於三阶膏泽加於四海出处以道逸劳是均金钺专征聊寛於西顾绣裳入署即处於东归益峻具瞻永绥全盛方裁愚讷首枉海函感仰之深叙陈莫尽论本朝屏翰之势莫重关中推元帅统驭之才谁出公右某官厚德世矩高文国华勲劳昔着於秉均风烈今高於分阃撰辰开府闔境向风虽上无西顾之忧而人有东归之咏方图修问首沐观音佩荷之诚布宣难究

回运使赵司业啓

辍自成均按临东夏凡居庇赖孰不欣瞻某官风节着於南台名实高於东观虞庠教育乐於得才汉节观风慨然揽辔皇华在望黎庶倾瞻欣忭之私叙陈莫尽

贺吴省副啓

奉膺恩检荣贰计廷伏惟庆慰某官业蕴端闳风微敏裕唐学士之清选望重士林汉使者之观风才高课等惟时司会之府实制中邦之财调度盈虚聊烦於鈎画弼谐侍从行赖於谟明

庆颂方深音封首及良荷相先之顾第增不敏之慙

问候宣州宋少卿啓

报政中宸解符大国秉圭入覲趋节还台久叨邻庇之余深极欢诚之附某官民物先觉国家宗工忱明之才素高於吏表清重之德雅镇於世浮三年小谢之邦双阙子牟之志治有异等既奏於计书入补三公行光於故事某限兹云云

开封府迎国信使啓

奉将聘节来会庆辰涉春夏之清和勤川涂之跋涉历茂惟嘉祉休有善祥圣德开诚时纪露囊之节宝邻修睦岁瞻轺传之华首夏在辰修途久御伏承飞盖已次近畿深惟徒御之勤小展饬羞之劳伏审庆礼迄成归轅载御居官有守出祖无从已具菲仪庶伸饯礼

上张安道啓

过听庸虚特有论荐褒辞浮实媿汗溢顔某官文武宗工庙朝大老谋犹本正深简於清衷出处惟时不渝於直道生民所望以惠绥而康保君子所恃以宗主而依归系时安危同上心德夫人而立於世也其重如此则士之出其门者将谁为宜如某性资滞冥学术浅陋不爲枉尺虽缅慕於古人未可与权故难谐於世用比从谪籍复被恩书俾脱迹於荒遐获备员於左右区区自効愿竭於斗筲泛泛无裨终同於鳬鴈矧以忧患孤危之迹立於得失利害之途非由藏垢之深安得庇身之久永惟过幸已不自胜敢谓高明而有容忠恕以行道察其所履未至於小人之归疑有可收遽屈以国士之遇欲使孤进辱借一言马骨本弩顾眄以倍其价钟声既哑调审以发其音敢不迪忠清之方慎义理之向退不矢志进无尸官

上苏子容啓

某罪戾之迹沈废已甘误蒙国恩既还其职任又得门下以爲之依归内自省循曷胜感幸某性学中下材资阔疎早游书林旋备宪府不佞薄闻於大道窃思有补於斯民无益圣辰自投谪籍官趋三楚地近五谿冒险风波几於万里庇身筦库及此四年敢兴去国之嗟但积素餐之愧岂期需宥不遂弃遗某官道德深造文章大醇非今儒者寻常之爲有古君子远大之识周旋独立义无愧于神明出处两忘节不渝於风雨辍承明之近直保留钥之别都泰然忘劳恬以卧治念昔龙门之峻盖尝许登於今燕厦之成敢无自贺

上王潭啓

一睽门坂几易岁元奉緘滕之私旷时而礼不讲怀通德之重愈久而心益勤律中春阳气暄泽国茂惟福履之相休有天祺之繁某官明敏中和渊忱庄厚善政师乎当世高行镇夫未流颍水再来有次公之寛惠南邦是式如申伯之蕃宣久矣佚劳之均隐然中外之望某忝恩中

检贰计外台望大国之匪賒冀余光之可托良深幸会尚远参依

书

谢举荐书

伏蒙知听之误辱赐慰荐自视愚陋感媿曷已某闻古圣人如尧者以知人爲难当二帝时其民淳以直机僞不作其内外厌然如一以尧之圣哲而其民且若是宜若易知也然其犹曰难者岂尧不以知人自任欤世降三代士尚名誉乃始矫性徇物申僞情立奇节以求闻於天下浸淫习俗靡然以至今今天下教化益不行士生不知礼义荣辱之大分日益惕迫於外物而失其性命之守作於外者或不可求之於其中见於顷者或不可覆之於其久出彼入此以奇合正欲左而右求白问黑伛偻而希合似和拒闭而为我似介默然而无能似德皎然而属物似才风俗世变君子日少世之职在进退士者颇不敢以风鉴自任时时援尧以藉其口而国家之意亦不以圣人所难者求人於必能故官人保任之法无大赏罚惟受赇者同坐舍是一切不恤呜呼人遂不可知欤夫大人君子能养诸己故有以待於外明吾之性以观人充吾之诚以知类物来而应情至而格以一迎万以虚观动如监烛物如机释括守之以至信继之以无吝真僞千百杂然前陈将自我而变化乌有有难知者耶孔子曰听其言而信其行孟子亦曰吾善於知言某不肖贫无以生勉强而仕其性顽懦不可镌刻顾自知已审矣而无所望於当世明公下车遽收齿於门下之録岂疑其有可取而取之欤是特矜其孤立察其所爲不至爲小人之行遂欲挈而使之有以自振欤推圣人不求备之心故不深责以吏效知易象失前禽之吝故不显比於所应若兹无誉之地或当雅意之取敢不守忠信之大节安性命之大分进无媿於禄穷不失乎义某之所欲无辱於门下以爲报者在此记

杨氏乐养轩记

巴陵杨君总公元尉江陵之石首治东轩於其廨中以奉二亲而名之曰乐养杨君修身力学爲名进士起而中科选其禄虽约盖无欲然於义者斯固足以爲亲之喜由邑以望其乡闾才百里而远伯仲六人皆服儒其已仕者又皆在夫左州右邑之近安否之问日交至於庭闈而君方以勤毖外服於公家以恬正事其上以和信得其朋友无一可爲亲忧者入於闺门怡声妥节先意以候亲之所向而?顺之至妇子侍御化君诚孝相与以给其力故凡以供气体而逊心志者非有三牲八珍撞钟列鼎之富与夫金玉文绣之丽而後然也隐冠靚服慈顔寿发轩堂之上对几而居俚杖而游其色辞笑貌油然而顺适祺然而夷豫以安飡乎子职之奉呜呼养之道不在乎物惟尽诚以得其亲斯天下之深乐虽富贵遂其欲有不能以致之而君子所自得也人知杨氏之庆而不知君之乐於心知君之乐矣或不知君之所以致其乐君於是以属府从事刘某曰愿有述乃推其心之所以然而序之既又歌之以诗曰孟轲有至乐父母兄弟间曾参称能养岂谓口体然二者在君家寓意名东轩啜菽尽於道彩服承慈顔泼泼水中鱼采采江上兰诚至物则腆君子得亲欢

南岳御书阁记

南岳释文政於其所居胜业寺建大阁置太宗皇帝御书其上请文爲之记窃尝读国史?惟太宗皇帝以神武圣谋嗣太祖开基拨乱之後薊洗四方残余之孽曾不数年天地清明兵革偃而法度修嘉与天下同休息乎无事文武二者思有以张弛之於是向用儒学尊尚经术观书稽古多所述作於其闲暇则又玩意於翰墨之间凡所谓退朝之乐皆不以易此至真宗始聚其书诏儒臣章别次第着定爲一百二十卷刻之金石副在有司又以分藏於天下之名山凡道官佛寺往往得被其赐每岁推恩度其守藏之学者一人至於今且八十年矣尝得即其书而观之盖其所自论着爲世谏训者固皆原於道德之意而其余书帖亦多杂取六经诸子之要言正论至或选摘衆流异传佛老之说虽不同要皆有益於修身治心为天下国家者以是私尝推求圣人之意於道德教化其心盖未尝须臾离也故虽当闲宴犹从容发见於挥毫之际然则又知其所以勤勤於文墨者岂独以爲娱乐而已哉自书之颁布其藏之者或以旁庖庫室礼事不谨徒知蒙被其泽而不知尊安振显之甚非所以报盛德之赐扬万世之休间有知此者矣或未知圣人之爲是书其心之所存盖如此於是既嘉文政能有所建立以致臣子之奉又尝与之论是书之所以然故书其本末俾刻石於阁下熙宁七年二月太子中允监衡州盐仓臣刘某记

临湘县閱武亭记

秘书丞卫君塾字文叔治岳州临湘之二年以书谓余曰使天下不如古吾知其有人焉谋已而偷者固漫不省利害及夸而高言又曰吾方志远大彼细务琐瑣焉足爲是二人者相与从事积微寢着天下頽政何可胜数吾则不敢吾之邑右带长江东南地大倚山民剽猾轻爲盜既慙古人不能使民不为盜又不能禁其已然尚曰爲政耶县所赖以索盜有所谓弓手者今在吾籍八十人前时聽其便私散居?闻呼调不一难以应猝及去而扰平民今吾能不取官与民作区屋以萃之凡若干统以大亭榜曰閱武以时临视其艺衆既团隶有地稍稍就律其材渐若可用而无里巷譁竞犯法之患此县令小事非以爲功然愿有记告来者使勿废而已呜呼余知君不好小事名也虽然罔忽诸小然後可以任夫大俾天下得县令皆用心如此循而望古有路矣即以其所以谓余者书之亭上

寿州学记

今上临御四年诏有司始以经义取士增太学郡国学官设三舍既十年闵学者之未大成法虽立而教养之意未尽宣乃慨然更新之自大学始其法损益可论定者着之书曰敕曰令曰式选建官推之其弗可者使辄言上天下之士於是益晓识上指至者辄奏视旧所增盖以千数方是时胶西韩君晋卿守寿州一年矣君材强敏至州閱月视州之学叹其庳隘无以承明诏乃得转运判官废廨请於朝廷焉日与通判州事新昌石君麟之躬自临治经地度材新故相参公无调费人不知力凡为屋百一十楹孔子庙居其中师堂生舍列其旁宾有次射有圃楼庖庖漏罔不具邦人既享学之成皆大说喜君曰未也爲具道天子所以养士意劝掖率厉使及时进於学又请建官爲之师遂以其事属余记之盖吏不得良法而行法立而浅闻弗能究宣皆甚所悼也以上所建立且十年而太学犹以故未就绪郡国尤阔不闻问私尝疑其说今太学更令幸亲睹其始而寿州之请亦适至故乐道其实记二君首能不失职以告凡吏之

忽此者尝闻之天下之事有甚盛极利特以施設蠲其本而效不着者可以条数而其一学校是也学之论曰置生欲多赋廩欲丰课业欲勤纠禁欲严如是以爲盛此言可尔尚所谓见其末而忘其本也恭惟上之教士始於一好恶明是非向经术俾士知所趋而後申法令以辅焉其法之详又使论者无不厌此所谓末与本称本末具而犹曰效不着则尚谁任其咎是惟吏不奉宣故也抑闻之道可言而不尽可言也故六经而下转载不可尽则古人固以待後世之自得也今士以经进哀然待举闻其言矣卓然有得乎古人之所待者岂尝有人乎而未之见也夫本所求者士志於道而不加力乎所自得则虽侈庙学严法令坐圣贤而师之犹爲观美而已岂上所望者耶然则咎非特在吏而学者其可以不思是故并以告焉元丰三年十月记

家庙记

元佑六年议者谓河间刘公歿於衡州橐葬僧寺因以其地所在其後汶上之葬招魂而已此议既兴闻者无以明其不然或以问其孤某某曰此事未尝有也然此言必有所起以今观之实状可按验者四事理可察见者三而议论所从起者一昔公以秘书丞治道之江华子男某未冠而公夫人之季弟进士陈孝若实同行踰年公鞠狱於衡得疾不起讵闻孝若走衡与郡所委官吏敢於花药山僧舍事毕孝若返江华挈其孤而夫人陈氏前亡权厝在县至是议以其丧北归经由取道复俱至衡会公伯兄乡贡学究允?率其子乡贡进士延年自乡里亦奔讵而至衆与其孤定议火化爲两函致其丧使孝若延年扶护陆走而允?买舟载其孤以归允?父子与孝若今虽死其妻若子若孙若族属皆在悉见其事实状可按验者一也允?与其孤既至汶上而外氏秘书监陈公希古尚无恙遂留诸孤鞠养於家而延年独护丧陆抵永静安厝於僧寺经藏院其主僧曰某僧判官曰永善小师曰文昌及其徒甚衆某岁时自乡而往展省祭祀凡永静之亲属故旧无不见之者自康定戊寅至熙宁庚戌凡三十余年岁月久远不容僞爲实状可按验者二也熙宁庚戌既卜葬於郛某躬至永静迎公与夫人之丧抵郛权厝於僧寺四禅院僧崇贤及其徒亦甚衆今多存者实状可按验者三也熙宁辛亥八月某举葬公与夫人之丧於郛之须城县大谷山之原亲族故旧乡人送葬者先後凡数百人改造棺槨增易衣衾与凡送之事人人爲助初无招魂之事借令人有不幸旅櫟亡失则招魂变礼亦古今所有不必迁就以讳其事自须明设招魂之仪顾岂能隱於乡间亲族故旧之间若一有此意人谁不知者凡今汶上之人皆可诘问实状可验者四也实状如此然闻之者难使人人往按其事则又有事理灼然可以一言而虚实立见者初公之亡在宝元二年八月上旬若闻讵而至复走江华犹在是月某及乡里亲属皆会於衡在是年冬孝若以数日之间权敢僧舍以待复来其势安肯遽然卜地殡葬遂为久远之计某与亲属既至三数月间又安得遽已失其地之所在况郡委官吏实预其事理可察见者一也熙宁辛亥七月某由御史谪官衡州八月赐告於朝许葬讵之官明年二月到贬所诚如议者之言谓心知留殡於彼而未获则得官於衡正访求之时也岂有身将往而不少俟先爲招魂虚僞之计既葬而又往返访求参之人情殊无此理事理可察见者二也某与伯父从兄舅氏之在衡也夫人之丧先自江华焚化扶护而至岂有夫人之丧则扶护以行而公独留殡於经由羈旅之地谓贫不能举丧而归则卜地殡葬与举丧而化之其费孰多谓皆留殡则江华何独无夫人之殡且陆走两丧何自而得之事理可察见者三也虽然议论如此必有所因而起某之官於衡凡州郡召宴於花药寺常以

旧经敢厝辞不敢往或曰位次非一惟所敢之舍则宜避一槩避之非也故尝究寻敢舍之所在衆曰敢寓之日不多而岁月经已远莫能记矣访求之议其殆起於此乎知之审者谓所以访求之意如此知之略者与展转相传而知者遂皆以为访求殡葬之地而不获也然某在衡三年有余以及元佑几二十年初不闻有此言逮蒙恩任使责望既重始有藉此言而至者元佑五年有僧某至京师自云花药僧也山前近得一坟林木甚盛指以爲刘公所葬愿得奏赐紫衣始闻之骇然徐令询问考其证验本末皆无所有知其爲误妄明白矣欲延见之则其言无实欲言於有司治之则干求希望之情类此者非一因使人谕以本末谢遣之愧怍而去其後不复见之然人遂多传其事者或信或不信大抵皆自寺僧发之此议论所从起者一也某不孝所以显扬其亲者不着而使此言在人某之罪大矣不可以有加矣虽然言在人而欲人人晓之力不能也存其实以待察则可得而勉焉故私载其事蹟本末与公及夫人之志铭并藏於庙元佑六年十二月嗣子观文殿学士大中大夫知郢州充京东西路安抚使某谨记

郢州赐书阁记

元佑七年正月乙未臣某言臣所治郢州有学学有师生廩食而经籍弗具非所以训道德厉人材愿下有司颁焉诏可州乃选於学遣二生听命粤十月甲申得书二千七百卷至自京师州人学子顿首幸甚请纪其事某昔者结髮就师从先生长老姜潜刘述龚鼎臣辈治经艺习文辞上下凡十余年实在是学於时少长向劝程课甚密而书籍殊尚缺然至尝外假谷梁春秋传范蔚宗汉书手写读之其後出入仕宦又余三十年假守复来览观庙学虽舍宇有更徙而风致宛然如故学生三倍於昔振振焉洋洋焉甚可观也顾太守老矣无益学者又不能劝驾隐约之士显之朝廷徒幸遭遇天子崇儒右文加惠学校又以某常待罪左右素怜其愚所请或不忍辄报闻罢以是故能爲诸生获此赐书事虽适然而上之所假宠有在乎是且学兴於景佑戊寅实在庆历立学诏令前历年最久盛冠东方而未有是赐如有待者是诚不可以不纪乃即学之中构爲层楼栖书其上而经传百家篇帙之名数与典领禁戒之法皆揭之使以时考之若夫身与诸生从事讲诵识其大者母爲书羞则有学官在而探讨勤怠有得无得则又在诸生自爲之某也尚欲何言欤夫阁之工费细故皆置弗论独叙其本末以告凡在学之士与後之人使勤守焉八年正月癸巳观文殿学士大中大夫知郢州事刘莘老记

忠肃集卷九

卷十

钦定四库全书

忠肃集卷十

宋 刘摯 撰

序

荆南府图序

江陵府于禹贡为荆州于分野为鹑首于辰为巳于春秋属楚为郢都文王自丹阳徙之于秦为昭王所拔徙置南郡于汉为荆州武帝置刺史治于此于魏其地为吴蜀所分而荆州之名南北两立魏治南阳吴治江陵晋以荆州治南郡梁湘东王绎承号建都寻为元魏所陷隋大业为南郡唐平萧铣为荆乾元元年置节度使上元中为南都天复中以高季兴为留後梁祖授以节钺寻通吴蜀筑城垒为僭窃计後唐庄宗封南平王季兴卒子从诲嗣海卒传子保融融卒传弟保勳勳传融子继冲五世通五十七年而皇朝一天下建隆四年冲纳土趋覲阙下移鎮徐州府境东西五百五十里南北七百五十里领江陵公安监利建宁石首松滋枝江潜江八县主客户总五万四千夏秋赋租通四十二万三千贯斤石束匹两府县官六十四员牙吏若干屯兵三十五指挥外城周十八里二百一十六步濠深一丈二尺阔二十五丈子城周四里三百一十五步仓库场务内外五十八左右厢八坊巷五十四桥梁内外六十六江湖四十七祠庙七十一宫观二十七寺院五百五十汉地志曰楚有江汉川泽山林之饶民食鱼稻以渔猎山水为业隋志称荆人劲悍决烈盖天性也然地据上流故三国争之而民苦于兵自唐至德以後中原多故邓襄之民与两都衣冠多趋荆楚故人物始盛乾符以来遂为战巢高氏于兵火疮痍之余招徕抚集数十年间逮为王民历太平者又逾百年教化涵养安佚而富庶凡浮江下于黔蜀与夫陆驿自二广湖湘以往来京师者此为咽喉又两蜀之人出而宦游者多家于此是以今最盛为西南一都会其游观独龙山渚宫号称胜地民间不务畜聚不幸小遇乾溢往往转徙而瘠其人尚鬼病者先巫後药其亦习俗所安欤暇日绘府为图因题其概治平甲辰观察推官刘某序

文莹师集序

文莹喜读书才思清拔博知世故久以诗闻于人而不知其始何为落于方袍中也夫万物受材分于天者必皆有职若莹者失其职矣予以嘉佑三年识莹于荆州後八年治平之丙午也予入荆州幕而莹亦在既别去又三年熙宁之壬子予南甯复遇于长沙是岁遂访予于衡阳盖相与周旋二十年之间其诗每见而每精嗟夫莹老矣以其平生之所学与其高明之才既皆无所用于世而一措于诗宜其所得如此岂所谓诗待穷而後工者欤虽然其辞气象尤

不觉其为穷人老夫之所作是可喜也自翰林郑毅夫为其集叙而其後至于访余也又出若干篇以为後集曰为我题之而其作犹未已也昔沧浪苏子美尝称其作曰篇篇清雄有古作者气态而郑公之叙曰不类浮屠师所作以为往往似杜紫微二公之言如此为天下取信余尚何辞哉独书其所以与之离合之故致余意焉癸丑夏五月题杂着

兴龙节疏

律旋大吕气应二阳圣运超期适契千年之命梵筵申颂庶凭诸佛之慈恭惟皇帝陛下合德乾坤绍休祖考圣孝能飨昭格三灵之欢玃衡当天光符七政之叙会开祥于虹渚度修会于只园旅集净徒绎宣密义凭大觉能仁之果效华封献祝之心伏愿衆圣储休诸天融祉明堂之受神策长佑宝图天保之歌南山永绥寿历

寿圣节疏

元春首祚灵月生明天地开阳肇发流虹之命圣祥膺运光符绕电之期纪是庆辰着为甲令书文所底动植交欢躬诣祇园前陈梵席香花惟洁钟呗以时演龙藏之秘言极人天之幽赞庶凭妙果恭协圣期伏愿睿算无疆常保天行之健炎符炜耀更同地久之昌

坤成节疏

岁德在金长躔逾望笃生元圣符五鹿之开祥尊御东朝协千秋之纪节湛恩下逮欢颂举同爰集秘章恭陈告祝伏愿太皇太后陛下凭无边之力建不拔之基益隆文母之尊永垂圣孙之养德无前比非徒嗣太任之音治与古侔庶几享三皇之寿

春赛诸庙文

诸侯祭其境内古之制也惟神以聪明正直庇佑一方所谓有功于民而应礼之祀春阳仲序岁事有祈祇承旧章以承祝施

秋赛文

稼穡之事民力固勤乃此有成实神之赐春祈秋报祭有旧章粢醴洁 丰敬用昭告

滑洲祀神文

国家以正月某甲子推恩四方凡载祀典俾所在致礼焉惟神降依此方应是诏享粢盛牢醴既洁既丰庶几钦承降福王室尚有报祀神惟歆哉

祀诸庙文

惟神盛德在人休功及物并应典祀庙食此邦国家寅天爱民需宥区宇俾秩时祀奉承灵休
谨以诏书从事肆仪备物伏惟尚飨

荊州祈雨文

荊州田品居下而人不务畜聚使常得善岁犹汲汲不能裕公私之充矧天不雨至于五月陂
泽饶赤一种未入比者谷价已翔民骇然以相顾守土者惕然自省以为忧心虽忧之而雨不
可以力致也雨神之所能为也今油然屡云而膏屯不施或者重其德待其有请而後与之耶
岂特民一岁之望至于为牲牢粢酒所以承事于神者亦有系焉

应诏祈雨文

谨以清酌之奠奉宣天子之意而致之于高山圣贤之神曰京师畿辅天下根本乃去年冬迨
今暮春不雨不雪民心焦然天子仁圣咨顾悯恻并走羣望日傒罔应尚念神之主山川者有
山川之守食其境内者有境内之责疑其有此分职而不可以夺之故又诏天下求神之未秩
于祀典出处可以自得灵施休应民所依信如人抱道德畜膏泽不在其位需时见求然後一
纾非常之功以为国家补者俾以礼祀之今府吏民于是咸以神为言若夫驱移风云飘忽变
化朝夕万里而转灾为祥此神之所以不测而震灵乘会以赴功之时也

谢雨文

比以旱暵为灾有祷灵宇会未终日神意顾歆油然兴云霏然霑雨苗将稿而茂遂物既瘁而
昭苏敢言克诚能速休应实神之德相佑斯民谨涓刚辰躬具菲礼有祈有报祭之义也惟尚
终始以底有年

祈雨文

年谷既粒螽孽未殄实由秋阳沴气之所容养也又八月艺麦之候而行泽失时如炎如焚民
骇相顾惟神食于此土不能听其吁嗟为兴云雨洒濯之则吏与民敢怠昭事之报

青州祈雨文

维青丘带山为地气深土渴艺植之事天泽是赖者视他方为亟岁春将穷而时雨未霑宿麦
既苗将厄其长盛阳骄燥疾沴且兴守土之吏不能率衆戚以吁于神吏则失职惟神操纵阴
阳用赞化育降食此土休戚与同若乃时其雨阳相厥岁事则神之职又何失欤

建坛祈雨文

旱暵为灾至于此极羣祀徧走膏泽尚屯今将求龙啓坛此地惟神矜恻农事鉴此至诚母或

厄龙不俾顾享苟获多应神预有功

请龙神文

伏以元阳之沴粤自仲夏至于九月岁旱不免而此太甚夙夜以惧咎不胜执谨稽用古法以诏书从事绘图灵象封牲奠酒只伏坛次倾吐至诚盖行天召云飘忽变化一振甘润以拯焦灼此龙之一戏足以不劳而神者其幸赐之敢忘昭报

祈晴文二首

春夏旱乾岁已无麦民恃为命惟指有秋稼谷芄芃度越常岁乃复淫雨将害其成率吁羣咨洁诚有请神食此土可无意乎

曰雨曰阳万物之命苟不适节沴其生成今泽气乘春淫雨降雪害我穡事以及粢盛养民事神一岁何赖率呼衆戚乞灵于神

谢晴文二首

属以雨溢害于农功郎神以祈蒙被灵应天清日润陰辟阳舒擎敛顺成物得其性耘登播种人遂厥功惟神之庇佑此邦而爰是守土者其德可谓终始厚矣敢忘恭报以侈神休

比以春霖为害并走灵祠神意顾歆辟除陰沴阳功纾发日以烜之粒我来牟以及禾麦深惟长民守土何力其间犹能以粢酒牲牢仰答神贶有祈有报祭之义也

祈雪文二首

惟州之土壤白坟广泻水泉易消今岁日穷矣润泽不至风霾书冥积燥所乘滥炎屡起守土者惟夕惕负咎然岁恶民病祭祀不能修则神亦将预受其辱敢固有请惟转祸为福呼吸致功神实能之亦惟时哉

方冬盛陰用事而寒气不至时雪不降宿麦在野既无润泽之养春气相乘将有疾病之变长人守土惕然忧心心既忧伤何所致力念民休戚惟神是赖爰走灵宇沥恳有祈羣心嗷嗷曰傒嘉应

祭土牛文

粤若自古为国事莫重于农耕有功于民礼具存于祀典土膏奋动天驷南躔爰考旧章用祈纯嘏惟神佑此耘获屏其札瘥俾迓有年之祥以永事神之报

忠肃集卷十

卷十一

钦定四库全书

忠肃集卷十一

宋 刘摯 撰

神道碑

毕文简神道碑

故丞相文简毕公既以景德三年葬郑州管城马亭卢村之原而隧道之碑未果立後八十余年公诸曾孙从周仲达等乃相与经治纪刻而使仲游抵书叙其故以铭见属某视公之时良已远然考其事蹟有门生故吏之状幽宫之铭太常有议国史有传家有谱集又杂见于他书传记与夫章章在士大夫者类非一事参验可信皆合不诬于是独掇大要而论次之惟毕氏出于姬姓周文王之子高封国于毕後以为氏後汉兖州别驾谡之五世孙曰衆庆为宋兖州中正又五世曰憬仕唐至许州刺史憬二子构为户部尚书諡景公栩为鄴王府司马栩曾孙誠相懿宗构五世孙稹为振武天德营田判官稹生宗昱是为公之曾王父为代州云中令王父球本州别驾考又琳澶州观城令及公贵褒赠云中而下三世为太子太保太傅太师追封曾祖妣吴氏邓国祖妣史氏韩国妣乐氏代国祝氏郑国并太夫人上世始居云中太师既终祝夫人谓公曰学必求良师友乃相与如宋又如郑得杨丕刘锡杨璞使公与游而卜居焉今为郑州人公讳士安字仁叟以学行为名进士乾德四年王晋公佑知贡举第公甲科辟邠宁募府开宝三年为济州推官太祖皇帝召对廷授兖州管内观察推官太平兴国初改太理寺丞领三门发运事吴越钱俶入朝选知台州既至言钱氏上图籍有司皆张侈赋数今湖海新民始得天子命吏宜有安辑且州县文书具在愿一用旧籍以示惠泽诏从之明年以治最迁太子右赞善大夫徙饶州改殿中丞归朝为监察御史知乾州以便亲改监汝州稻田务雍熙中诸王出合召为左拾遗冀王府记室参军太宗皇帝延见劳问蕃锡迁尚书考功员外郎端拱中诏王府官各上所为文帝问近臣曰文吾既知之其行孰优皆以公对帝喜曰是也以本官知制诰淳化二年召为翰林学士大臣以张洎言帝曰洎视毕某词艺践历固不减但履行远在下遂为学士于时宋兴四十年中外几乎文学政事言语侍从之臣辐辏朝廷至论德行则常以公为称首明年知贡举转主客郎中以疾请外改谏议大夫知颍州真宗皇帝以寿王尹开封也召充府判官为皇太子以兼右庶子迁给事中及帝践阼即日拜枢密直学士工部侍郎权知开封府以严正称凡官府常从授庭职而补外任者必遣至公所受戒饬时近臣有怙势为不法强买民家定昏子者公请对白其横夺还之而公亦以礼部侍郎罢府还为翰林学士兼秘书监时契丹谋入寇公首疏五事应诏陈选将饷兵理财之策甚备多常纳用于是中书阙宰相乃进公吏部侍郎参知政事入谢帝曰未也行且相公顿首辞谢帝曰朕倚卿以辅相岂特今日然方多事求与卿同进者谁其可公复顿首谢曰宰相者必有其器乃可居其

位臣弩朽实不足以胜任寇准兼资忠义善断大事此宰相才也帝曰闻其刚使气对曰准资方正慷慨有大节忘身殉国秉道疾邪此其素所蓄积朝臣罕出其右者第不为流俗所喜今天下之民虽蒙休德涵养安佚而西北跳梁为边境患正若准者所宜用也帝曰然当藉卿宿德镇之不阅月拜公本官平章事寇公实并命而以公监修国史位在上既而契丹益犯边北州皆警二公始合议请帝幸澶渊时景德元年九月也契丹统军顺国王挾览引兵分掠威挟顺安北平侵保州攻定武数为官军所郤益东驻阳城淀遂攻高阳不得逞转窥贝冀天雄兵号二十万帝坐便殿问策安出公与寇公条所以御备状且言澶渊之行当在仲冬寇公谓当亟往不可缓卒用公议初咸平六年云州观察使王继忠战陷敌中至是为敌人奏议请和大臣莫敢如何其事独公以为可信乃赞帝当羁縻不絕渐许其成帝谓契丹凶悍如此恐不可保公曰臣尝得降人言今虽深入屡挫不甚得志阴欲引去而耻无名且彼宁不畏人乘虚覆其穴此请殆不妄继忠之奏臣请任之帝喜乃手诏继忠许其请和时已诏巡幸而议者犹闕闕二三大臣有进金陵及成都图者公亟同寇公请对力陈其故坚定前计帝乃幸澶渊军数十万契丹大震然猖狂乘衆犹掠德清至澶渊北鄙会官军伏弩发射挾览死衆溃遁去而曹利用使还亦具得要领与其使者姚东之俱来讲和之计遂定呜呼朝廷惟无大事也事一动利害系其中而人蔽所见甲曰如此乙曰如彼方是时非沈几达识以定其是真忠大器以任其决一反乎为全躯保妻子计则成败之机亦曰殆哉观景德之事所以威灵抗于上和好成于下者公本精于策画排纷决疑力引寇公故也初帝严兵将行太白昼见流星出上台北贯斗魁或言兵未宜北或言大臣应之公适卧疾移书寇公曰屡请昇疾从行而手诏固不许今大计已定惟在君勉之某将以身当星变而就国事所愿也已而少间追至澶渊见于行在及从还兵罢乃按边要选良守将易置之雄州以李允则定州马知节镇州孙全照保州杨延明他所择用各得其任令塞上境得外牛马类者悉还之以示信遂通互市除铁禁招流亡广储蓄未几夏州赵德明亦款塞内附二方既定中外略安量时制法次第施行如榷酤毋得增额平反已决死罪録为劳讼不干已者坐以重至今不易复置贤良方正直言极谏等科以广取士每对必为帝言崇俭息民近忠直远谀佞是为政要故未几天下无事号为至治公素羸多疾岁中求去位章至七八皆不许二年十月十二日将朝至崇政殿庠得疾诏问络绎帝不俟辇步至公所敕太医及近侍随获肩舆还第而薨年六十八帝即日临奠哭之恻赠太师中书令废朝五日制服发哀以皇城使爱州刺史卫绍钦治葬有司给卤簿大鸿臚持节护葬謚曰文简公资端重伟仪观少以名节自厉贯于夷险白首不易平生无一语过差虽贵奉养无异平素未常殖产为子孙计故天下称其清而其亡也帝谓寇公曰毕某君子人也事朕南府东宫以至辅相饬躬慎行有古人之风晚年益观书所藏经史字皆方寸手自讐正其文章典雅以古为法集为三十卷平生慎交游无党援惟王晋公吕公端见引重王文正公寇莱公杨文公亿相友善王翰林禹偁陈彭年皆门人也公既引寇公同政而寇公守正疾恶小人多不便日思所以倾之者布衣申宗古告其交通安王元杰寇公惶恐莫知所自明公力辨其诬下宗古吏具得奸罔斩之寇公乃安禹偁济州白屋子尝以事至公官舍阴识其非常童留之教以学海育奨进学业日显後遂登科进用更在公前及公继知制诰其命乃禹偁辞也公去潞州州事连禹偁亦谪黄州公犹厚资其行人称公知人为有终始者後王文正公为相尝面奏曰皆下前称毕某清慎如古人在位闻之感叹仕至辅相而四载无田园居第没未终丧家用已屈今其妻有贷于臣家者其清可见真不负陛下所知然使其家假贷为生宜有以周之者窃谓当出恩上非臣敢为私惠时也帝闻叹息赐白金五千两公娶骆氏封陈国夫人二子曰世

长公薨时为太子中舍终于卫尉卿曰庆长时为大理寺丞终于太府卿孙九人从善光禄寺卿从古驾部郎中从厚从海检校水部员外郎从兰惠州博罗令从道殿中丞从范山南西道节度推官从益太常寺太祝并亡从周今为朝散郎知洋州曾孙仲达而下若干人官多至郎大夫入文馆省寺或出为郡守使者世以为盛公以雅望耆德被遇三圣出入禁省庄靖慎密及在大位知贤能荐谋虑国事惟几惟深辅政虽才逾年而克有勲烈中外又安郡国丰登刑罰衰減忠清之德有始有卒天下至今称为名相铭曰真宗允文考慎相臣孰以德进毕公其人帝曰毕公文考之锡尹正于京予曰羽翼束左闱右忠孝余廸景德之始旄头腾芒戎马空国尘我北方东来相予赏罰纪纲公拜稽首臣朽不胜有大忠义以茹斯征協于一德引宫应商图上吴蜀彼谁弗臧两公谔谔驾言观兵六飞絕河于桥之陰威既远加乃锡之平帝还曰咨厘我庶治材鉅守方审政张弛惠经中国底定四裔公在相位时无几何有事有劳有成可歌逝也胡亟帝恻而嗟三师正令綏賻有加溱洧之右既葬既久立碑墓旁龟趺螭首铺张清风以诏不朽孰究孰营公有孙曾清白之祉百世之承

唐质肃神道碑

公韩介字子方姓唐氏惟唐氏世谱其始远矣至汉初厉从高祖起丰为斥邱候後十七世彬仕晋封上庸候又二世辉为前凉临江将军始居晋昌稍分徙太原京兆北海北海之後瑾仕周开府仪同三司临淄公临为唐礼部尚书天宝之乱子孙又散去有为唐山令曰熊者居余杭生子曰希颜天复中以明经为建威军推官是为公之高祖曾祖仁恭为吴越盐铁巡官尚书水部员外郎祖渭仕皇朝至尚书职方郎中始自余杭家江陵遂为江陵人考拱左班殿直公既贵贈曾祖太子太保追封妣盛氏英国太夫人祖太子太傅妣夏氏嘉国太夫人考太子太师妣两崔氏崇国光国太夫人公十三岁丁太师丧于漳州家故贫州人賻之者泣谢不受侍母夫人护丧归江陵养亲终服无违于礼天圣八年第进士为鼎州武陵尉郡掾鞫狱实既决猥曰验死不明乃尉之罪私请曰验罪轻鞫罪重公怜其言为受罰调岳州沅江令县民龙氏上书讼分田不均坐不实徙以死其子陈冤更数令不得直公躬至田所按图契是非立辨遂均其田州民李氏以高贖为上下所渔扰或者不厌因告其祠鬼用人守喜击断则速系其家百口极狱之惨情不得奏公治有能名专属之公考閱实非杀人者守又奏以为未尽诏殿中侍御史方偕移劾于澧州卒用公所具狱不能变以武康军节度推官知夔州奉节县宝元二年转运使应诏举充三路知县迁秘书省着作佐郎知鄭州任邱县县当信使驿往返诛索繁急其下因缘为奸利异时俛首趣事莫敢有辨公为作区画预居其物每使至亲坐驿门给之一以法令从事应复还而毀失者移文取其偿故过者皆戢上下便之塘水岁浸邑田十一村而塘实中人主之州县畏其势无以拒公募民自高阳起堤亘鄭十余里蔽之其患遂息丁光国太夫人忧服除知相州安阳县事改秘书丞皇佑初河决其所监司举公通判德州二年改太常博士徙通判广信军未至召为监察御史里行转尚书主客员外郎殿中侍御史里行宗室请买官地公言可予则赐之不可者勿听而使输直非也内侍督作龙凤车于啓圣院公言此太宗神御所在为後宫輿服故喧黩其中又车饰金玉过制皆非是诏罢之张尧佐以恩泽一日除宣徽节度景灵羣牧四使公言不可因引唐天宝所以致祸敗者既累疏乃与諫官等七人极论殿上又白御史中丞留百官班将廷议卒夺其景灵宣徽两使明年赐五品服未几尧佐复为宣徽使知河阳或谓补外不足论公曰宣徽次二府不分内外独力争之仁宗皇

帝谕曰除拟初出中书公言是当责执政退请全台对不许自请罪又不许章十数上遂劾宰相附会尧佐谏官朋比事及宫掖因请采公议别择用大臣其言坚直帝亟召二府示以疏公面质宰相曰自惟有是事乎君前礼毋得隐者枢密副使麾公下殿犹争益切遂贬春州别驾明日改英州遣内侍随之制出人情惊愕于是敕朝堂告谕百官又明日罢宰相黜谏官公怡然南去絶口不为人道当此之时天下士大夫识与不识闻风叹慕耸然有立志往往作为文章以颂咏其美自是言事官以畏嘿为耻而大臣亦知所鉴戒云四年检校水部员外郎全州团练副使监彬州税稍复秘书丞又复主客员外郎通判潭州五年复殿中侍御史知复州未至召充言事御史帝遣中使齎告身就赐乘驿赴朝盖皆异礼也入见帝曰知卿守节谪官以来无私书至公卿间公顿首谢退就职言事无所避如故假工部员外郎直集贤院开封府判官至和元年知扬州辞曰帝复谕曰卿孤立不移所守今虽在外无忘规补赐服三品俄徙江南东路转运使嘉佑元年侍御史吴中复请还官言路时潞国文公再当国亦言唐某顷为御史所言皆中臣病而责太重愿如中复言召之迁工部员外郎河东转运使戎人侵耕河西经略使令筑堡限之麟州守将轻出按视贼奄至与战而没朝廷罢易帅臣公摄事即绝其互市盛兵境上戎人惧乃来请议事平多如公策三年徙淮南江浙荆湖都大制置发运使入为三司度支副使四年以本官拜天章阁待制知谏院同提举万寿观帝自至和後御朝渊嘿公言君臣如天地以交泰为治愿时延访羣下发德音可否政事以幸天下又言赏罚不可以贵贱轻重如孙沔吕溱侈纵宜深责必行则衆信矣论宫禁干丐恩泽其命不由中书此古所谓斜封非盛朝所宜有请裁放後宫冗数罢祈禳斋醮之不经者诸路走马承受使臣凌扰郡县可罢勿遣以权归监司天下配军至死无救与古律意异宜令有司差其重轻有所纵遣仍着为法又言士节不立愿委大臣进敦朴忠厚之士稍抑聚敛文法吏以销刻薄浮竞之风国朝祖陵在保州自杨怀敏广塘水稍稍侵近议赐钱改卜公言迁久安之神以其地与水非尊祖之道兗国公主夜开皇城门入禁中请重责守者以严宫省是年充北朝生辰国信使五年转礼部郎中权发开封府事时御史中丞劾宰相未报乃自去官号不出宰相亦待罪公与谏官御史连请辨其曲直于是罢御史中丞公亦求外补得知荆南而门下封还制书谓公不宜处外乃留复知谏院言新除枢密副使与内侍通姻不可大任屡疏卒罢之而公亦去知洪州翰林学士胡宿等七人上书恳留不报七年拜龙图阁直学士河北都转运使明年英宗皇帝即位迁吏部郎中除枢密直学士高阳关路安抚使知瀛州治平元年召为御史中丞首言先帝在位四十余年天下乐利惟仁治而已愿恢圣度广恩德则为善继四海蒙福矣帝重其语公前後三在言职名鲠切无所回忌明年拜龙图阁学士知太原府河东经略使至则首戒边将毋生事初代州岢岚军西夏数扰边公遣兵撤其所筑境上堡栅又移文谕以利害严守以待之遂不复敢动其後寇大顺城环庆路帅移檄出兵牵制公曰守边之策莫如自重柰何以小侵故使邻道劳费非至计也以事上闻诏以谕西帅公虽居外意未尝不在朝廷于是濮王园庙之议起言者多得罪公忧形于色密疏请还台谏官之谪者四年神宗皇帝即位迁给事中召拜三司使有司议增官屋僦直公以谓京师狃于恩不喜扰唐税间架可以为鉴恐所得不当所损奏卒罢之请出汴河运船于江湖转东南之粟中外为便 宁元年正月拜参知政事公自以进由直道感慨知遇益致所以事君之义纯诚尽公多所献替用人明言其才否不立恩不避怨与同列论政事反复再三终不屈祖宗法有所更近臣有所进退尤极其慎虽在帝前必究切辨析要是非之归未尝反顾帝以是益敬信之而天下翕然想望其风采二年三月告疾帝遣高医相属内侍入问状驿召其子淑问于复州归侍四月帝幸其第临问出涕久之某

日薨于寝车驾临奠哭之恸明日遣中使以禁中旧所画公像付其家传之辍视朝二日赙恤有加赠礼部尚书官其子孙及外姓通九人丧归所过治道发卒护送太常议以公正而不阿刚而能断諡曰质肃以四年二月某日葬于江陵府江陵县龙山乡太师之莹次公端劲之质出于天资立朝风格凛然遇事立断初无留思而邃于学问待人恂恂有礼自奉简约未尝问事有无将终属其子以修身持门户而已辅政裁逾年年止六十不得究施其志此天下所以叹恨也有文集若干卷奏议二十卷边防利害五卷娶杨氏谏议大夫生之宗女诰封魏郡夫人子五男淑问朝奉大夫尝为御史有直声能世其家风义问某官待问早亡嘉问宣义郎之问承事郎二女长适宝文阁直学士通议大夫谢景温次承议郎王某孙十七人今上元佑八年将建碑墓上来请文乃论次其实而系之以铭曰

謇謇唐公媚于三宗好是正直有言有庸公之于言刚不违义伏奏殿榻面劾大吏引而质之在列汗愧不貶不明瘴荒万里人于祸福有择而言则迎则嘿久酣为安 然大声震彼惛惛皇思其忠士庆其返乃践中外乃都休显公长宪府人无邪譟公总财省民饱而裘乃登辅弼弥论政猷祖宗典则惟帝之求国惟其仁母变以利物惟其常母凿以智有或出此予曷敢同以勵以守惟理予从斯道之恃隐然在公天畀公厚胡缺者寿帝咨不慙士民永疚龙山之藏有铭诏之神隧之表次诗在碑百世无斁正直之思

墓志铭

天章阁待制郭公墓志铭

郭公讳申锡字延之太名人天圣八年以进士起家释褐瀛州河间县主簿丁父丧服除调苏州长洲主簿以亲嫌易常州晋陵尉邑民告贼杀其弟公案之其哭不衰而色惧械付狱果自杀之民夸为神明移永宁军博野县令用荐者改秘书省著作佐郎知深州束鹿县通判雄州会河决商胡故相贾魏公荐知博州垫溺之後岁饥盗起获系填狱公曰良民失职至此请以轻典从事诏许之因招集拊循流亡来归妖人王则反贝州调发佐军为诸郡最璽书褒谕贼平民犹以习妖告讐公谓污俗未革尔多从末減有卒戍谋乱取其首恶刑之余置不问仁宗閱奏谓大臣曰小官行事能若此嘉叹久之以尚书屯田员外郎为御史台推官尝数上疏论事大臣或不便之会庆州有滞狱遣公就鞠既还复以非职而言戒敕之由是显名盗发濮州张郭镇执通判并渊以公知濮州赐五品服至未逾月灭贼徙遂州未行召为侍御史会灵容议复作公上疏曰古者兆四望于四郊山川丘陵各因其方坎坛而无位貌今袞方岳之神庙食京师非典礼殆天废之宜勿复未几充言事御史依智高寇广南帅臣欲藉兵交趾公言小丑窃发不时荡扑更不须后四夷轻中国心不可听迁刑部知杂事判大理寺吏部流内铨贵妃张氏薨赠后议礼如嫡公言位号尊卑死犹生也不容僭渎请下议者去其非礼由是多所裁正论狄青除枢密副使赐第官二子恩过优曹彬平江南无此赏且智高尚在边境未宁宜慎赏以励有功宰相妾张氏杀其婢开封府鞠治阔略公请移别狱上优大臣弗许争不已因劾开封挠法宰相竟去位府官吏多罢者翰林学士欧阳修韩绛以论斥时政求补外公曰二人名臣官在左右为重得俱见留至和中契丹欲遣泛使议事公言河朔财匱民困吏苟简旷职军旅不练甚非所以建威消萌上嘉之赐三品服明日命为河北体量安抚传至部閱吏甚

无状者黜数人事所废置不一归条备边大务十余章多见纳用拜三司盐铁副使迁右司充契丹国信使嘉佑二年塞六塔河与河北转运使李参典其事初皇佑中议开六塔河使东行公言其非是後果不成东北被其患至是议塞而参意异诏罢参公因疏参他过坐知濠州丁母丧服除知滑州拜直史馆知江宁府转礼部郎中知沧州英宗即位迁户部未几复召为三司盐铁副使入覲首言沧州北近边东循海至青州殆千里无障塞之阻节制之统谓宜以州建帅府分河之东六郡隶之为一路下其议识者是之拜天章阁待制知邓州兼京西南路安抚使今上即位迁左司军士赏赉或以不足欲贷之民公发封桩钱益给之僚佐以文为言公言有责守臣任之省符至如公画从河中府召还同纠察在京刑狱判太常寺兼礼仪事知滑州请补北京留司御史台改左谏议大夫就判二年连请老遂拜给事中以待制致仕熙宁七年五月八日终于私第享年七十七累陞朝散大夫勲柱国爵文水郡侯食邑一千二百户公资安和而内刚不苟自奋苦有志于当世喜待士推挽廉峻人不可干以私自奉平约虽贵显不易其度守九郡政明而下肃人不见其所以为者狱之隐微于谈笑间得之累官言路自以遭人主眷纳遇事必尽言虑远而力强无所回忌有大体嘉佑中霪雨诏求直言公言陛下享国久皇嗣未立人望无所属天下事宁复有大于此者乎愿推大公早于宗子有所择以定国本一雨沴未足以为忧上与论政有焦劳愿治意公曰股肱得其人则陛下处于无所为可也愿止以择宰相为事上高其说尝谕之曰人臣为小吏时多喜奋击论事至稍用则緘默是资言以进尔朕所弗取若卿可谓终始不二者公顿首谢雅喜论兵尝着边鄙守御策叙边外山川风俗为详种谔取绥州公以谓贪尺寸地使国隳大信边患将自此始及谅祚死又请捐前故许其子袭爵以示怀柔尝对上曰二寇赖岁赐金币以为国数渝盟非其所利必有以致之但得重将守塞不要功生事则无寇患矣即退休与宾客语及边事慷慨喟叹忘其身之老也曾祖简祖?父悦赠工部尚书母李氏封仁寿县太君娶李氏陈氏吴氏封江夏颍川濮阳郡君子三男仁约大理评事义方太常寺奉礼郎早世礼立守将作监主簿五女专州博平县令贾行先陵州仁寿主簿李奎永州祁阳县尉巩固湖南转运副使太常丞直集贤院蔡奕兴国军永兴主簿宋文虎其壻也孙男三人志经试将作监主簿秉德慎行女二人明年十一月二日葬公于大名府元城县孝义乡感义里之先茔三夫人祔铭曰

远矣郭氏出周姬宗武封诸弟虢叔有功德入于郑至于平王邑以阳曲继絶存亡转虢曰郭後所以氏支微????迁大家于魏煌煌代公相唐元勲惟文水侯实其後人侯有志学善养而用惟精惟深罔择弗中谏官御史前无强权善善恶恶皇惟其言谓仕不显论思左右谓志達乎泽未下究进退直道不辱其身有善有施在其子孙有思在民有誉在土兹谓不朽昭于千祀

卷十二

[集部,别集类,北宋建隆至靖康,忠肃集]

钦定四库全书

忠肃集卷十二

宋 刘摯 撰

墓志铭

东上合门使康州团练使陶公墓志铭

公讳弼字商翁少孤慷慨有气节仪干伟然刻苦好学经传无所不读尤喜兵家书从诸生科举不能投世俗所好去而安贫事母以经术教授乡里若无意于世者庆历中莫徭诸唐寇略州县提点刑狱杨略被诏督捕以礼奉币致公幕下公喜幡然以起为尽谋画俄率所募士破贼于桃油平以功补衡州司户参军又破太平峒调桂州阳朔主簿皇佑中徙柳州司理参军岁饥多盗系者满狱公谓良民失职至此多以傅生议依智高反诏略安抚复辟公参军谋公自曲江下会诸将议救广州贼既解围而西公至太平场会蒋偕军覆于贼余衆溃走山林公虑其与贼合亟以便宜取白旗数面大书曰招安散遣人持徇悉收千余人所在贷粮以食之送帅司略大喜以公为知权略还朝语人曰吾平贼湖外所得者一陶某而已用举者移阳朔令为治有本用号循良劝民植木夹道以庇暑喝使者下其法他邑桂之灵渠水自秦开导下達江湖岁久堙废不通公因摄兴安抵书安抚使萧固请加浚治转给边食可无劳民固不省後转运使李师中用其言果大利熙宁安南之役移粟百万实由此渠嘉佑初改大理寺丞监潭州粮料院六年师中时为提点刑狱荐公知宾州未几诏换崇仪副使以本路安抚都监知容州明年改六宅副使知钦州数以母长沙县张夫人太君年老乞归养不许八年遂丁丧乞解官终服又不许治平元年英宗即位迁内藏库副使明年拜崇仪使知邕州熙宁元年神宗即位转六宅使招纳训利等六州蛮獠万余口抚定广源会千余衆之内附者加右骢使再任邕自经皇佑兵火守将数易百纲颓紊一以苟简从事公至罅者苴补之窒者疏剔之磨以岁月遂为治府左右江州峒五十余酋率强虐渔利其下苦之公为作约束晓以祸福违者一绳以法莫不帖然畏服岁满以请知鼎州初熙宁初广源贼酋刘纪请太平寨置和市使华夷贸易公测纪言盖交人之谋将出入省地窥虚实屡郤不听至是安抚司不深惟利害辄上其事公亟为书数千言驰告于枢密院曰邕有土人十数类无他材干造边事为市至右职犹赖诸守土者尝斥远之未尝听其言故疆境幸按堵者凡七年今闻桂管惑纪奸谋实由此曹助成之决非所以安边将产患无疑既而和市议行无几何交人以刘彝沈起战舰阵图事为辞寇欽廉宜三州人服公精识六年朝廷遣察访使处置南江诸蛮举公知辰州且言公恬不上吏课者二十年特迁皇城使奉诏措置北江北江溪州彭师晏桀黠难制公用间使其党为仇

相攻师晏因以衆数千来降羈首领十有九人致阙下取其地建五城堡诏加忠州刺史王师问罪安南以康州团练使知邕州于时邕人之不死于贼者往往逃匿山谷人情恟恟不敢进单骑先入左江峒民间公再至欣然次第来归乃籍丁壮得二万七千分隶诸将凡大军所谓蹋白开道及致輜重皆峒丁济之方此时元帅大兵压贼境以公兵精銳忌专有功乃使之殿然军中事举以咨访其礼遇之隆他将不敢辈也富良之役贼请降以款我师元帅召公计之公曰明公来时陛受圣算云何而弃垂成乎元帅不之对然竟纳降诸将入贺公拂衣去坐帐中拊髀叹曰三州之民无辜屠死者数万今举士马十万衆则己在手而纵不取以遂贼使国威灵不畅三州冤不复沮一方之心有可痛无可贺者声气奋厉闻者感动师至宵还既无前令中军先一夜引去衆大扰相蹈藉贼夹对垒陰伺我隙公居後安坐下令休士迟明整衆按行贼不敢动元帅于是请城刘纪所弃广源地为顺州以藉口择守者皆憚行乃以属公公无难色未几贼取我桃榔县意图广源然其民怀公恩信贼一动静必以告公故每先事遏其萌贼终无能为者乃躬督板筑上冒氛疔下涉榛莽抚士卒疾苦恤其死亡閱岁顺州之城成而公亦病矣犹日飭将校以守御计诏加东上合门使因辞之一夕大星陨于庭公曰吾死于职得其所矣无一语及其私遂卒实元丰元年十一月十二日也享年六十四公资性庄重笃学能文尤长于诗年三十起从军善御士与同甘苦得其死力处仓猝若无事守边务简静谨斥堠最不喜疆吏生事徼功赏故所至蛮落畏怀无敢侵窃者忠义亮直白首一节贤士大夫皆誉之谓古名将无以加然公以习知岭粤情伪人安之故每满岁辄增秩见留曾不得内徙呜呼如公之志业使得驰骋西北援服鞭笞必有轩然可观者而终老于一方瘴疠之域材不得尽其用此议者之所惜也有文集十八卷卒後十年十月葬于零陵金釜山之原惟陶氏世家浔阳靖节先生之後有避地湖湘者公之高祖矩至祁阳乐其山水而居之今为永州人曾祖鐸祖钧赠殿中丞父岳以儒学有名仕为尚书职方员外郎累赠刑部侍郎初丁晋公一见公器赏之妻以先兄之子封钱塘县君生一子通早世取兄之孙同为通後为临桂县尉又卒六女子其二人亡其次适邵通裴彦英吴括邓良臣朝廷以公勤劳南方恩録其遗皆以异等四人并补三班奉职後数年又以同之子世延为借职所以褒劝有功于是亡铭曰

暨暨陶公将以儒术方严而仁敦大而栗公在军旅谋定其微出奇制胜释括于机公在边圉罇俎谈笑民嬉于生土劲而饱蛮戴父母恩信则然有政九郡邕至七年始时边人取功以啗公不可欺缩手谁作释贼富良亦何贺为落落奇语人今诵之惟公之才兼具文武施之四夷霍卫方虎云何弗契一生炎荒瘴谿险徼摧此堂堂天命在上人为在下灵喜烟阁彼独何者公也不朽有誉有功有诗千篇厥声无穷

直龙图阁蔡君墓志铭

君讳奕字如晦蔡氏宋人也曾大父陟仕为国子博士赠太子太保大父希言军事推官赠太师父挺由枢密副使拜资政殿学士判南京留司御史台赠工部尚书諡敏肃母王氏追封汝南郡夫人君幼端重与常儿异世父故吏部侍郎抗心奇之以之为子补太庙斋郎进士及第除常州无锡县主簿以侍亲岭外不赴丁母张氏夫人忧服除守将作监主簿罢签书成德军判官侍亲知秦州上即位迁大理评事通判乾州服侍郎丧终制勾当在京步军粮料院熙宁三年诏置审官院主簿君以荐补东院西院吏列房曰关陞曰磨勘曰差遣一官考拟房相参

互而案牘首尾离异稽留坠散至缘为奸君乃各析为三房随官品分属之人大便建言门?初调试诗不若试经若律义为有补于政诸路荐举宜裁限员数资序所谓亲民者必历知县议皆施行四年青苗助役法出选建诸路使者推行之曰提举常平仓兼农田水利差役事君得湖南既对语当上指迁太子中允改转运判官领其事是时所置遣多不深惟法意奉宣或缪螯君能亲行州县视其人物地宜度出而赋之入公私曰便明年賫其书来朝上滋喜使议司农无以易君者迁转运副使赐五品服颇采其议可通行者下他路潭邵间所谓上下梅山其地千里马氏以来獠人据之号莫獠国朝有厉禁制其耕垦出入然岁久公然冒法又稍招萃流浪君曰省地养此後日为大患今变獠为汉无难也开其酋以祸福使为土民口授其田略为贷助使业其生建邑置吏使知有政如此而已于是面敷其说及区画之序上嘉纳其策会今门下侍郎章公惇察访本路即付其事同君经之檄入其境果大欢从授冠带画田亩分保伍列乡里筑二邑隶之籍其田以亩计者二十四万增赋数十万遂招怀邵之武冈峒蛮三百余族户数万岁输米以万计纳其所畜兵仗以其地建二寨六年五月上遣使者劳君赐名邑曰新化安化寨曰武阳关峡迁君太常丞直集贤院敏肃时在政府辞其命手诏不许又抚纳邵徽诚等州鎮蛮族之归附者皆以补吏因言治新民法宜有张弛愿假臣便宜诏可长沙诸邑负茶租田税积为缗钱四万请如赦蠲除议全州不可废乞行保甲法以防盗置钱冶衡州以权物轻泉重之敝皆从之敏肃以疾去位乞还君君亦以侍郎後有二子矣数自言遂归其宗八年再任十二月交趾入寇徙广南西路转运副使权桂州经略安抚司事时贼已?钦廉邕三州内地城皆昼阖吏民多逃散君至开门日会宾僚棊酒鎮以暇豫人恃以安去者来归简料丁壮戒期自将击贼贼闻不敢内窥引去乃请蠲复三州完其伤痍老弱皆有所养更军制之不便者除械峙粮以待王师问罪遂城邕州凿井三十师至无需不充时九年九月也已而随军南行方广西财力乏而转饷流衍出境所支尚足数月十一月军驻思明寨闻母濉阳王夫人丧去官其後四十日班师于富良江而主将以纵贼无功猥曰粮乏坐是夺君太常丞直集贤院未几忠愍公徐禧来会军费上君状实于是朝廷知君爲有劳无罪也元丰二年犹监曹州仓米赴军丁敏肃丧服除换通直郎兵出西鄙河东饷运不继使者皆得罪上特起君管河东转运判官事径如鄜延会王师治运事还部条前运七失遂上因粮摺运法运夫皆以亲民官亲督故无遁散分屯军还或扇摇以再出稍避匿至聚为盗亟出榜开谕以道安定之城石州二寨具舟通道紆阻以济议河外五堡小而密徒分形势有警不足守可留平时戍望而已遂大省储馈转运使陈安石入对上曰事一委蔡某耶因屡称獎五年十一月以本官直龙图阁权发遣秦州兼都总管经略司事储威积粟休养民力治纲领简节目而肃于军政严于治盗阶州及甘谷城蕃部间出没窥抄君授方略诸将使以奇捕逐皆惧遁去声实隐然完重一面州南河汇他水岁败北堤久受其患君增筑大堤民不闻役後雨大水安居无虞秦人德之六年闰六月二十二日晨出黄堂坐僚属奄忽感疾遂卒中外之人言人才者莫不失声痛叹为朝廷惜之君天资沈明而强于自修多识事变有父之风烈尝言天下事无不可为者遭上识拔感发奋厉于其造为省而後释物迎所投节开理解无迁其间当烦溃艰剧跋谿莽冒暑瘴皆夙夜祗力以身临之招携开拓未尝张皇劳费而妥妥就功享年止四十四自少慕亲侧又四服大丧计其在事职裁数年而其所立如此外庄峻若不可即而中寛容与下论事曲折往返能聽其尽事亲至孝与朋友有义与族姻有爱教育侍郎二子所以成就之者曲有恩意内外皆与之俱为秦州奏其长潜管勾机宜文字初登科与兄昕天申同年敏肃位枢密时君使湖南又与兄滕天申分领三路漕事及秦州实继侍郎之治士大夫夸荣之其配郭氏女

封寿昌县君子二男曰蕃曰芝皆承务郎一女嫁蔡州西平县令赵伯通孙女一人文集十卷明年十月七日葬于应天府宋城县七里村先莹太傅之兆某视君实从母妹之婿而又女归其子蕃故为之铭曰

远矣蔡宗肇侯自周以国为氏着于陈留君七世祖稍从宋邱遂有显人以衍厥流肃肃秦州克绍世绪适时之逢涵蕴弗茹天子曰材济予时汝有畴必咨罔择夷阻方盗跳南辄使自楚本根西师往率秦府士饱千幟羌摄吾圉中以诬斥恬无一语亦既昭之天子之明以右以陟肆底其成车流马舞方驾而倾槩乎善恶不在死生刻诗竈石以慰诸冥

右司郎中李公墓志铭

宋忠义忧国之臣李公在仁皇帝时天下平治人习靖佚公固已慨然论事书屡奏及由小吏至大官所历见四方利弊辄条上经画大计与他有司议率常公所议可最以国储未建为虑天下君子小人不辨为忧其言恳至而未始以安危计其身朝廷一时知公为有经世才逮神皇帝擢士以不次超迁从官更帅西北遇事益发愤顾卒以上书论高坐废嗟夫公之才无不可尤长于应变其于治道自以为晓然遭世用事未大振显而落落不偶至老且死岂非命欤初公为世父龙图阁直学士紘所爱遗奏以官而推与其孤弟其孤弟诣阙上书下宰相问状复官之又不受既再辞官益刻厉好学中进士第历官十八迁所至必见称述在洛川县原乡教大意条着为令属民读之民叹曰前时令治我以法耳今令乃幸教我相戒以无违安抚使调诸郡税输边已而返之盛冬大雪劳费不能返者贱直于兼并家公曰他州亦吾民也令过邑愿输者聽躬坐庾门执契以待数日得粟万石使者下其法他县在延州夏人以岁次金帛後时移文愿毋逾岁暮诏边吏牒报从之公笔改曰如故事因奏言许西夏者不一而足今聽之启侥幸伤威重或劾擅改制书公曰郡牒非制也朝廷是公议而犹坐赎在三司会河数决公上河策百余事异时州郡类以河清卒应他役岁更调夫若客军代从事以不习亡溺者叵计公请增募河清立穴占法遂以不扰平民请缮治曹村堤防谓河必决此後不二年果决如公言在广南侬智高特纳款而邕守将萧注玩寇要赏不以时抚定公檄注诣府诘责注自诡以功赎罪会蛮人申绍泰并边追亡者而巡检使宋士尧击之反遇害注遂为骇奏以闻天子旰食遣使公驰奏无足忧愿一属臣因条上边计宜施行十二事劾注奉使亡状当斩注坐再贬官颇采汉李固议上宜柳州土丁法因及他州自是得胜兵数万以时练习戍卒大减蛮贾入乘舟贸易多抵钦廉等州公陰察疑有奸戒所在善伺之公去未几交人寇边果以舟入自钦廉兴安有灵渠自秦以来通漕岁久石积浅隘设斗门十八里至三十六所命焚石凿之才留十门舟楫以通邕州置马军五百马不能夏多死刍秣不给又折取税米他部公以地皆险阻无所事骑奏罢之建复置和市场以怀远人实边廩募民垦旷土薅草蒯疏瘴疠之气掇官差选虑法吏肆为奸公第其名使待除于家母辄诣台人大便之方经略府飡士谍言寇至公饮自若中起更衣自草为六膀驰揭境上已而饮如初民吏始器恐窜匿羣不逞陰汹汹公鎮以无事遂定贼见膀亦以公且得其情逡巡莫敢动即日遣贡方物请命使者至公弗见为草恶具俾将吏接之且谕前害士尧罪未治也绍泰闻之大恐委巢穴远去初智高平其子宗旦及党聚保有火峒或出入省地尚猥衆无所属前将规讨击幸赏贼遂固守公揣其情移书谕祸福皆泣即遣其子曰新率拏族三百并酋长六十九人以地内属其後安平州古万等峒争

効顺公因请以恩拊纳使受命为国扞蔽在陕西诏以班超传赐之而公亦雅慕李牧马援为将故持重总大体前此重兵尽屯极塞寇至与战则当其盛銳胜未易决不战则内无重势以遏其入公谓本末失其应且兵惟战守而已乃以善守者列塞上要害悉废诸小堡而料善战者顿内地为援增缮伏羌城令曰寇至守兵深沟高垒勿与鬪寇去战兵裹粮袭击之军中熟公约束常以取胜威望隐然建言弓箭手虽土着而惰于耕宜仿古屯田法率百人为屯聚一堡颇立勤惰赏罚之格使人人加厉自好则视公战为私鬪计莫此便王韶既以招怀边羌为事而其族叛攻渭川堡射伤守吏公责韶失计因进兵掩破之尝奉手诏列攻守方略十余事其後朝廷所施多公计策太凡公之行事章章在人耳目者如此至其遇事明達灼见理间危疑繁潰沛然迎解无有留处退而察公声气怡怡如不能人莫测也公貌不逾中人志尚高甚前後所上奏及间召见顾问多陈天人之际君臣大节阔略细故稽古自汉以下不道请以进贤退不肖为宰相考课法谓古者有命然後为士故士贵今人自为士故士贱宜仿古先命士而後命官在官不遗罚务以信服人至明而恕尝言曰为帅有体立功有时慎重当如泰山见几不俟终日其将边大指如此去官百姓遮泣不得行如施予趋人之急甚已事买田数千亩刊名为表给宗族贫乏者至今号义庄与广南转运判官刘牧友善牧死後公论边事尽以功归之求官其後又以女妻其幼子称荐山东儒者王建中姜潜以身下之皆至召用杜正献公范文正公富文忠公同时荐公有王佐才退治居汝阳园池松竹萧然有胜槩日与宾友饮酒赋诗其文章落落忧思深远尤喜章奏世多传诵之盖晚节虽屡黜而志不以故少衰辄忘朝廷将终犹语客以大河宋塞为忧士大夫识不识皆咨嗟感慨以不究用公为朝廷恨呜呼然则所谓命在天者又奚道哉公讳师中字诚之上世赵人唐丞相吉甫有孙煜为宋州城令遂家楚邱自煜七世为楚邱人至公徙郢为郢人曾祖寿太子中舍致仕妣鹿氏继妣张氏福昌清河两县太君祖某赠吏部尚书妣朱氏金城郡太君考某赠户部尚书妣何氏继妣张氏嘉兴清河两县太君公閤閱自并州推官以庞丞相荐知鄜州洛川县事又荐除太子中允知延州鄜政兴元府褒城两县改管干鄜延路经略机宜事由太常丞迁博士通判澶州继丁内外艰除丧知临江军为三司渠司干当公事拜尚书屯田员外郎提点广南西路刑狱权经略事就除转运使转度支丐使郡知济州英宗即位迁司封祠部郎中辞疾提举兗州仙源县灵宫太极观遂知州事神宗即位转度支直史馆知凤翔府拜天章阁待制河东郡转运使改秦凤路经略安抚使知秦州迁右司郎中坐与韶意异夺职降度支知舒州复右司历知洪登齐三州复待制天章高阳关路安抚使知瀛州应诏上书贬和州团练副使本州安置稍徙单州复右司郎中分司南京再提举仙源宫观遂以疾终实元丰元年四月七日享年六十六夫人王氏乐安县君四男修登封县尉卒价左班殿直偁济州推官伉将作监主簿三女长嫁供奉官宋玠次许嫁进士刘泽次幼孙男几人公文集三十卷奏议二十卷以某年某月日葬于郢州须城县某乡某里铭曰

李实显姓肇祥自聃牧君武安膺尹河南太尉相唐德修有子八世至公文武是似仁祖烝哉感格以言神考烝哉顾倚于藩公蓄不穷仕也孔构而以才屈于是归咎汝山巘巘其水洋洋委蛻在是公则不亡

宫苑使合门通事舍人王公墓志铭

公讳易字悌卿姓王氏开封人曾祖知绪赠左武卫上将军祖继凝皇佑骐驎使宜州刺史赠左监门卫上将军皇父元庆内殿崇班赠左武卫大将军公乾兴初以祖任为三班借职十五迁官至宫苑使其四以泛恩一以功拜初巡雍邱襄邑河秦州催纲已有能名为麟州兵马监押塞上无事官吏多宴集公每闲起登楼堞省防备或以为过公曰并边其敢亡警戒乎康定初召试策艺以本官授阁门祗候为郑州原武三县巡检河中府八州都巡检使未行改泾州驻泊康定中夏人来寇与官军遇于好水川公逆策成败谓宜持重主者不省迫使出战公以二千人当万衆而伏兵起其後臂面交中流矢俄休其衆据小山身先趣战横戟疾呼人竞致死敌骑遂郤多所斩获是时大将失律故公之功不复明宣抚使忠献韩公言之除仪州制胜寨主知乾宁军庆历末岁大饥河决商胡军当下流前无堤防水暴猥至环垒几没公亲慰恤其人与同休戚昼夜督吏卒防塞约以军法既免垫溺遂奏发粟以哺困饿济活甚衆因起大堤城南至今赖之使者言状迁西头供奉官再任俄充契丹国信副使以益利路兵马都监知利州皇佑初广源依獠初平逸其酋智高或言转刼云南将寇两川人大惊譁公泰如平时绥辑慰劳两路恃以安而密飭所部严缮守御未几文州蕃部王仰东掠边地以备素具民不知警贼诛就移河东沿边安抚契丹侵争失地公询耆俗按图记得其实移文核明之契丹词屈服奏弛府州酒禁用安抚使故相庞公荐除合门通事舍人改河北沿边安抚前时疆臣类喜生事得细故辄张之徼幸以市功敌出巨舟数十往来界河欲造端争产公但授方略将吏使谨备之徐遣人谕以利害逡巡皆引去以高阳关路钤辖知冀州会英庙登极大蒐兵伍故事三司用未足率假民以应卒旁郡有立威将诛豪右以竭私藏公能第次其力随所羨入之冀人尤德公以此也岁满归高阳又知广信军俄选为益利路兵马钤辖特迁皇城使以母长寿太君郭氏高年并辞之改定州路坐前任狱失移滑州钤辖未几改知赵州丁长寿丧解官卜居衡州服除遂不复出仕元丰四年十月四日以疾卒于河南澠池县令其子冒之官舍享年七十八公笃于忠义而恬和简重居官明以烛理寛以尽下志在宁人利物而已不乐为皎然近名者故所至人安乐之尤审知人凡荐者三百余员间闻流言而耻自讼竟未尝有为累者诸公前後荐其才者数十百人博知书史尤喜庄老能用其说以自治至于吐纳导引得养生之妙晚节间居益淡泊不屑世故十余年间萧散闾里自适以享寿考临终恬然无怛化之变呜呼公之所自得者岂少哉其可以无憾矣公娶刘氏封仁和安吉县君先公亡一子冒也孙男女七人遂以卒之明年正月乙酉葬于卫州共城县处贤乡之原公之爲冀州某其属邑令也于是前葬冒来请铭爲之铭曰或于功名啗取以奇公在疆场人无忧危历政有惠所去辄思不累乎物廉靖粹夷保和贵真以正寿命後将求公斯文有订

卷十三

钦定四库全书

忠肃集卷十三

宋 刘摯 撰

墓志铭

赠谏议大夫西门公墓志铭

公讳某字某姓西门氏其先魏令豹有善政于邳历战国秦汉子孙迁散其谱不叙公六代祖自邯郸以其家避唐乱于沧州之无棣稍徙棣州之厌次今为厌次人曾祖某祖某隐居乡里父某以经行为乡人所尊公皇朝景德中明法起家莱州司法参军再迁仪州华亭尉丁父丧服除以劳迁商州商洛县令瀛州景城县令丁母丧服除为冀州南宫县令以疾去官明道元年某月某日卒於家享年七十三公以法进而寛平母害莱守苛深尝有强盗欲寘之死使高贙估公閱案请估依犯时持议甚坚会使者在郡守语先入交以责公公益不屈二囚遂不死华亭极塞蕃汉杂居多盗公部督追胥教以捕法赏募恶少使与出入致其情虽剧盗必得之终公去邑人无警商洛有兄弟讼财引其父为左公戚曰所贵乎人者为其有恩也今何以自别于异类虽然岂天性本然哉利蔽亡之耳姑归推吾言思之于是相与泣于庭曰某曹小人今而後知利心不足以移亲爱实自长官赐之拜而去一邑感动前日之父子异居若亲在别产者于是皆合渭水经邑可溉而民不知用公亲相地形率并水居人为圩堰沟塍使之殖稻教以灌引蓄泄之法刻其法于石田岁增溉皆为沃野民赖以无饥景城地平而素无水防天圣初大霖雨公曰前幸河安流今偶有一决吾民其为鱼乃白州预为堤上下諠曰无故劳民非是公曰请三思遂调夫二万横起大堤二甫半水已大至躬昼夜趣成之邑赖以免南宫既疾或劝以致事可得叙官于朝公曰病不能事又意于利是欺也亟移告以归公资淳茂其利人之事出于诚心故所至有惠政人爱之及更代往往遮马久而得去仕三十年当官行已不问人之知不知所谓通塞未尝以经意徘徊小官无不足色其行事虽古所称循良吏者不过如此以子故赠左谏议大夫初娶王氏再娶高氏封渤海县太君後公十年卒子长男傲次介累官尚书屯田郎中及二女并亡孙曾男女若干人公没後若干年诸孙葬公于某所为之铭曰

有以爱人有以直已诚故能化忠故弗诡世所观慕虽不熠炜有政积善施于孙子刻诗幽宫令闻曷已

正议大夫致仕龚公墓志铭

公讳鼎臣字辅之姓龚氏世为淄州高苑人至公改葬其先于郓今为郓州须城人曾祖伦祖凝皆潜晦不出考诱衷鼎州武陵县令累赠特进妣罗氏穆氏赠淄川千乘两郡太君公实穆夫人出幼孤自立擢景佑元年进士第为郓州平陰县主簿始至决田讼之久不决者疏泄淄水得良田数百千顷调孟州司法参军以举为泰寧军节度掌书记故相梁庄肃公杜正献公继为州事皆大爱重荐之迁秘书省著作佐郎知莱芜县兼治事前时赋民车运铁人大劳费公至罢之正献尝语江休复曰龚莱芜气和而直宜深交之徙彭州蒙阳县转秘书丞丁母忧服除知密州安邱县转太常博士赐五品服知渠州拜尚书屯田员外郎州故僻陋无学者公请于朝建庙学躬率邑子为生以时释奠退而讲说立课肄之法人大劝化始有登科者郡人绘像事公召还编校史馆书籍转都官始在莱芜大臣荐试馆职以善石介不召及安邱秩满上策二十篇以贤良方正召试秘阁又以不合报闻议者大为公恨然朝廷寢知公遂擢起居舍人知諫院公亦感遇自奋以言任责搢绅翕然推重论奏中人邓保信罪状言苏安静年未五十不可为押班董淑妃赐諡非是三司开封请法外断狱率直可之愿先付执政参审稟画凡大礼赦请准太平兴国诏书前期下禁约後有犯不原以杜指赦为姦者宜着为令充国公主与驸马都尉李玮忿争玮坐谪外仁宗临朝不适公引睽上九义劝上少镇安之待其疑亡则志适矣已而杲复和如故上喜曰如卿所言尝请遣亲信近侍以君臣父子大义趣谕皇子入侍寻兼管国子监判登闻检院详定宽恤民力奏议淮南灾以公体量安抚蠲逋振贷全活甚衆除北朝正旦使公奏昔契丹犯淄青祖父母兄姊皆见略义不忍往许之诏後子孙并免焉俄拜户部员外郎兼侍御史知杂事赐三品服转吏部礼部郎中论宗室宜岁试补外官请汰滥官销冗兵蓄财用禁奢靡连劾薛向姦暴鬻盐市马皆罔上谓昭陵宜俭葬景灵神御殿不宜增侈以称先帝意屡请英宗延访臣下亲决政事上疏劝皇太后卷帘还政是皆人所难言者盖公前後在言路濶略细故至大事无顾忌必言之其言优游不亟不缓平心?理务使人主易听而已耻为表表买直近名退亦未尝以语人故其事多施行而世颇不知自公发也改集贤殿修撰知应天府兼南京留守徙江宁府转户部召还判太常寺兼礼仪事判吏部流内銓选人得官待班谢辞率留滞公奏易为门谢辞至今便之其後议明堂配享及王丞相荆公坐讲事益不合求补外以知兗州是时遣使方田其法物色土宜为十等以均地税而使者所辟置意幸功赏田既不得其实而概取税之虚名诡额及常所蠲者加入旧籍刼制州县上下骚然公曰岁有重轻均固可尔今增之非朝廷本指也独不肯增人危公公卒以州籍常数均定兗人至今德公或论公八年不迁官特改吏部又求闲地提举西京崇福宫魏国公忠献韩公曰端良之人皆喜静处龚君心不营禄禄亦不及秩满再判太常寺再留守南京转太常少卿陞辞神宗顾语移时喜甚曰人言卿惫而精明如此行用卿矣公顿首谢时河决曹村流民无所属殍死道路公劳来赈拊归者不可计使者奏状拜諫议大夫京东东路安抚使知青州又遭北方岁饥活流饿视南京滋多官制行改大中大夫请老提举亳州太清宫今上即位转通议大夫遂以正议大夫致仕公道学文义内外絶美事上应物一以不欺及退居里舍着书讲诵澹然自乐门生弟子造请质问从容相对日以为常乡人有善孜孜称述惟恐不闻其有不善则召而告之矜戚见于顔色其人至感泣自新以是乡里无贵贱少长归心焉公好学出于天性既以经行显名朝廷虽有任用泄剧烦亦未尝辄废书至老学益深行益粹可谓一德有始卒者元佑元年十二月二十七日以壽终享年七十七两夫人李氏都官郎中之女追封赞皇郡君某氏光祿卿希仲女长乐郡君子十一人男祥权濰州昌邑县令先亡羣开封府考城县主簿羲林州録事参军女嫁宣义郎张仲适殿直张景山余早卒孙男女十五人公有东

原集五十卷谏草三卷周易补注三卷中说注十卷编年官制图各一卷某少以诸生从公学又以应天府官在公幕下公之见知甚厚而诸孤出公遗命来请铭将以二年三月二十一日葬公须城之登贤乡特进公之兆次义其可以辞乎为之铭曰

侃侃龚公令德之世光禄耆老水衡循吏公言正直皇则好之纠?左右是是非非以天行止疇尼吾志归善一乡士知法义鲁两先生徂徠泰山门人達者公得其传惟深斯水惟厚斯冈凡我乡人敬公之藏

朝奉大夫致仕梁公墓志铭

君讳师孟字醇之菑川人曾大父昭懿大父邈试秘书省校书郎父肃大理寺丞赠中大夫有惠政于闽人思之至今生儿有以梁为名者君方童时吴文肃公一见奇其秀穎使为诗顷刻辄成大异之年十八冠乡举名声籍甚诸老先生喜为推引嘉佑二年擢进士第调沂州费县主簿迁邢州龙冈县令丁母忧起为相州汤陰令文肃荐其才擢国子监直讲熙宁二年改秘书省著作佐郎太学策诸生有对语病新法在高第者大臣怒尽出学官补外君签书淮南节度判官事转秘书丞太常博士元丰改官制换承议郎通判隰州赐绯服转朝奉郎今上即位恩迁朝散郎遂致仕以子登朝经两郊恩为朝奉大夫阶护军元佑六年十月十八日以疾终壽七十二君强毅笃实少刻励于学老不辄废博知古今论议以忠义为主其文词雄深有气乐善疾恶出其天资视世事有弗可于意者戚嗟痛叹至或流涕不能浮湛俯仰故与世齟齬而世亦卒不得君用虽有穷塞耻以一毫近人居京师七年未尝造请初天下转运司辟置管勾文字官河北以君名闻于格不应诏特从之而当路者亦颇欲因是近君君不愿也其後中执法有闻君之名欲一见之荐以为属者朋友更劝往见君曰士而自鬻何义也卒不往方时天子慨然求治更造法令拔蒐人才宰相大进退天下士士皆奋待同争前恐後君独顾虑逡巡依流队牒碌碌以老暨二圣在御振用淹滞而知君者六七要人皆同时在显处争欲荐用之或抵书勉其出人亦谓君且得志无疑而君笑曰吾与世不谐老矣此而进是持平生为今日资也亟谢事而去时年六十四于是识者知君非苟为异以取高当世者晚节居乡里自号般阳居士观书赋诗萧散自得乡人亲敬之前夫人李氏窈氏故尚书都官郎中丁职方司员外郎緘之女追封真定中都县君今夫人仙源县君王氏比部员外郎孝和之女子三男先朝奉郎兗青州临淄县尉?举进士二女嫁隰州永和主簿董昱沂州司理参军李翔孙男女六人文集二十卷卒之明年十一月十七日葬于万年乡零召村之原二夫人祔予故善君也先于是来请铭为之铭曰

呜呼梁君学无所不知也行无所不修也谓无心于世乎服膺降色其见善也揆手齟齿其闻恶也谓有心于仕乎不撓乎上未老而归也呜呼士之于世合则从不合则去进退之正也然是犹为在人者也乃若时可以行而自止招之以道而不来非在我者重盖不能也呜呼梁君刚不屈者也能行其志者也

侍御史黄君墓志铭

君讳照字晦甫曾祖余庆祖深皆不仕考祔赠尚书职方员外郎黄氏世家长沙益阳县其後徙江陵今为郡人君登庆历六年进士第除归州司理参军移岳州华容县令至之日遭岁大饥亟谕富人出米继发官廩以哺流饿盖活人以万计邑西有田数千百顷皆腴田也而夏燥秋潦民弃不耕君筑堤置闸以时启闭之遂常为丰岁楚俗死者焚而委其骨于野君为访谕使收瘞至辍俸以济之小吏敏秀可教者授以经业多至成士民之输赋于府者有洞庭之阻回险淹费君请受之于县于是上疑下诽而君亦自信不易其後遂以着令改着佐郎知道州江华县事静民成物益用恺悌以秘书丞通判桂州迁太常博士嘉佑六年诏遣使人分行天下以宽民力而君当使广南受命明日即行奏蠲伪刘以来丁米民始不以多男为患父子始不以避重就轻相去广州增外城人惊不宁君疏曰无故起大役非所以绥边且城议有三臣请诘之其欲依海者海旁之地不能尺则及泉矣欲撤室庐者城本以保衆而顾可先毁其居欲即于城东刘氏故城者其地荒陋多瘴气岂便民之意皆非是诏为罢其役朝廷第使者之状君为诸路最英宗即位拜尚书员外郎故唐质肃公辟从太原机宜府改都管福建转运判官治平三年用今参知政事王公珪冯公京致政范公镇故侍郎彭公思永前後荐召以为侍御史行次衢州五月二十六日以疾终享年五十四君性端敏治身立事皎皎不妄以才遭时其小者略已有试而已能如此其大者朝廷方将闻之世方待其有轩然可观者而君既亡矣岂非所谓命欤疾革犹扶力占疏以极论当世事呜呼斯可以见其志焉尔仕二十年不为私计嫖族人之孤寡不能嫁娶者十余人好文嗜诗类数百篇曰漫为集初娶陆氏再娶王氏封德安县君子六男友端友闻友顔友益友谅友直皆举进士一女归殿直柳棨某先人尝从政于江华後二十年而君至事经先人所画者一皆循用吏民莫不以便安德君而至今歌思之有前刘後黄之语今上熙宁四年友端使来乞铭遂以七月十二月初九日葬君江陵县龙山乡水青里铭曰

士难者才时或不以二物之会十百一尔亦既有之亦又遽止方驱而颠胡自不俟呜呼艰哉谁诘斯理刻诗幽宫以慰干祀

职方员外郎李君墓志铭

君讳枢字应机咸平四年进士及第除蜀州推官逾年丁父忧服除再为【案原本缺】州推官真宗东封君督治道视他州为谨办车驾过有褒言因诏使扈从及还京师特改大理寺丞又五迁为尚书职方员外郎历知越州萧山县滑州韦城县用举者监在京百万仓坐不谨火禁谪监真定府酒税通判郢州知雅州以天圣五年十二月十七日卒于官享年三十八祥符景德间四方争奏瑞物被赏萧山芝生县庭吏民讙夸愿以闻君曰吾方嫉世之因缘伪欺以徼幸者顾忍自为哉因谢止之方是时宰相晋国丁公权倾天下雅知君尝荐君才数欲提之皆逡巡以故引避其後所附者多得罪遣呜呼临义利视祸福不以动其心而不失其所择非明识信道畴克卓立有是哉君之配张氏封清河县君郑氏荥阳县君六男子曰察曰宇曰桀曰寘曰实曰寅察舒州望江令寘举进士授河南府助教四子皆服儒五女嫁士人其六子亡者五人矣君卒後五十九年当元佑之丙寅寘始克葬君于郢州须城县登庸乡之原实闰二月十有四日壬寅也李氏上世为赵郡着姓考其谱绪盖赵之广武君後也仕唐末为殿中丞曰稹者于君为曾祖殿中生廷璠任石州刺史石州生君之考曰戡赠尚书刑部侍郎自五代

之乱迁徙居郢今为郢人铭曰仕不显志则强壽虽嗇名不亡归矣新阡万世之藏

兵部员外郎直史馆梁公墓志铭

公讳旧字梦符姓梁氏其先襄阳人曾祖讳处厚以高赀雄乡里好义致客贤士大夫多宾友之祖讳湛并州録事参军考讳锡巴州军事推官赠职方郎中妣沈氏仙源县太君公天圣五年以名进士起为博州军事推官守贪政不善公告以理又告以福祸皆不用後守果败再调鼎州团练推官江上夜覆舟提家人投舍民家明日主人出百金为公装卒不取至自裂衫裹赤儿怀去缘牒旁州还偶重狱将决覆之有疑亟白州为上其状得不死与司理参军雍规考同满皆缺一荐者使者荐公公曰规同年进士而其母老愿先规以故复为武胜军节度推官秩满改著作佐郎知河南府长水县取豪猾一人抵法邑大安治庆历中契丹每入边以选通判雍州事守者欲大新城櫓赋之民公曰乃先扰吾民乎持不可未几契丹泛使至用故事以通判护其行素狂嫚难肃以公体制严重皆帖帖进止无辄敢譁已而徐示以恩因尽得敌所以遣使指飞奏之接伴者既交使是夕其衆遂大肆从有司需索百端郡邑困之皆服公以为不可及敌使入朝进其国书仁宗顾宰相曰一如梁某言使愕并开所欲言不敢发徐曰小臣妄刺臣国事于是言者以雄州用通判非是而接伴使後不戢敌患公形已亦曰不当先入其私所问朝廷规安其心乃徙其守沧州公德州改秘书丞居数月通判大名府程文简公琳方居尹与转运使张公昱之以气权相睨不安以公张所辟疑陰为其用公以诚心事二人无所左右循事议理是非必尽久之通其所阅二人卒相欢以公为长者骑士缺马久或匿名以书告反状文简惊莫能如何公曰是不足虑小人意在马尔退如平时稍因事籍马尽补之果无事用安抚转运使荐知深州迁太常博士知杂事御史言公才堪御史上曰是尝接萧阶者吾知之矣阶前曰契丹使者即召为监察御史中外以为得人俄出使制狱以疾力请补外知磁州是时兵临贝州调发声援每先期会优诏褒之前此在大名转运使以冀州妖人李生狱属公李生既前死独刑其余有差号称详平至是李氏怒怨生父覃妄言生不死有中人故仇转运使颇居中诤其事遂付御史狱钩按虽力卒不能变然皆以吏议挂之宰相画时旨夺官同列奏留以为太重中丞翰林亦更为论辨犹贬秩秘书丞监衡州税未赴改唐州顷之复为博士通判汝州移襄州皇佑祀明堂恩拜尚书屯田员外郎复以殿中侍御史召时议开六塔以行大河公言骚民逆水非徒无益且有後患卒如公言奏罢张尧佐宣徽等使唐质肃公介以言事贬岭南随以中使公言陛下爱介故遣护之不幸介以疾死天下後世能无以杀疑乎上曰诚不思此亟为还中使改三司度支判官又判开折司出为京东转运使前时类进美羸蒙迁以故东方财屈公言民困敝不可浚愿戒诸路毋得进美财凡三司横有取辄还其檄因蝗灾请以米募人凿取其种地中对以斗斛其孽既易殄而方冬春艰食又可以补民其後遂着为令州郡所馈一切不取转侍御史还台请裁任子令谓当自宰相始俄乞解言责改刑部员外郎直史馆知襄州赐三品服改邢州转兵部嘉佑四年五月十三日以疾卒于州之正寝享年七十公性孝悌数岁失母职方公再室赵氏柴氏公事之皆以谨慎闻而两夫人尤笃爱公凡亲疾无昼夜侍侧医虽远必徒步自致之後继居丧哀疾毁棘有以过人学问本六经于文章喜司马迁班固其落笔必雍容浑灏有作者风致为名辈所推居官以锄强梗养善良为政其敏发以静下不见其所以为而吏莫得动故所至民惜其去遮哭不得行去久犹思之更御史三院弹劾无所顾望紆权歛惧朝廷为尊严其言顺不迎上直不媚世皆出天下公议尤喜

论人物每对从容指别善恶所当用不用未尝以小是非名目士大夫故其言多见行而世或未有深知者也夫人刘氏鲁人封寿安县君勤俭仁爱治家有礼法与公同寒苦至进显无愠喜色後公二年十二月一日年六十六以终六男子煮殿中丞集贤校理余早世五女子适巩堂张景真范遵道张伯卿席延年孙男女若干初公爱郢将徙居之于是煮卜熙宁十年举公夫人之丧以八月某日葬于须城县某乡之原铭曰

梁公侃侃常厥德践取幽眇如今昔有韡其文烂雕织有邕其鸣表羣翼克施有政审则释物物迎刃莫吾逆蒐拔良禾善使殖济明以恕民不亟仪曹御史治百辟有或援侧毅以堅臧谋良言帝嘉得缓而不迂切不迫视大义利正趋择进斯有礼退以色妥妥陞级循寸尺终民莫得被大泽孝子作龟没之北泉深壤厚惟墨食公燕顺祥兆幽宅诗以诏之罔穷极

屯田员外郎蔡君墓志铭

君讳天球字粹夫世为宋人曾祖赠太子太保讳陟祖赠尚书祠部员外郎讳希顔考尚书屯田员外郎赠都官郎中讳极妣万年县君季氏君庆历六年进士及第为宿州观察推官会岁荒民饥诏所在选官赈哺君所活数十万人以功补近地为澶州节度推官数以义理鬬正其上官无大小不直不已有能名丁父丧服除调亳州观察推官时陈恭公罢宰相判州事严险少所与独善君荐其才可用又请越常次改官许之矣俄丁母丧服除改秘书省著作佐郎监杭州楼店务英宗即位迁省丞知蒙州不鄙其民为立学校开以教化人人向劝转太常博士今上即位拜尚书屯田员外郎通判乾州转都官熙宁二年九月二十日以疾卒享年五十五夫人张氏故天章阁待制显之之子封长安县君九男子皆先君夭一女嫁横海军节度推官凌浩始君学于徂徕先生石介年虽幼已卓卓有闻于吏治敏以達在蒙州躬考核版籍得隐税积钱至百万监司言状请赏君君曰是固不足言功诚因此得推法天下庶乎为有补尔代还又上书言二广荒遐州县盖有不足置者劳敝远民而公私亡所利议者方爱虚名甘实患非是未几诏诸路并废州县以寬役省费而三司亦置帐司立赏罚以专钧会矣由是以观君足以知其欲有所为而其智能宜可以为今日用方天下兴治以因任为事君之从父既以勲业进枢府或在侍从诸子弟又与士大夫争奋其材以赴功名人乐道其盛而君于是时独不少待嗟夫其命之不相谋也初仲弟析产君不取以与其兄之孤以故贫而父兄犹在殯每日廉约营积调度方将及葬而亡亡且无子嗟夫君志之不就多矣其可哀也于是以十年五月二十三日并举君葬于末城县三陵村先茔之北实其夫人经治之所着易论十卷孝经二卷杂文诗百余铭曰

有辉其实亦厚我期坦坦以御孰僨其驰不在其身或以承之云胡善泽斩焉莫诒万世共尽夫亦奚悲冥冥可作慰以铭诗

刑部详覆官朱君墓志铭

君讳述字传道姓朱氏其谱曰七世祖端生鄂岳巡官颐颐生尚书户部郎中起起生比部郎中秘秘生君曾祖江陵府当阳尉葆光赠兵部郎中当阳生翰林学士昂仕真宗为名臣赠吏

部尚书翰林生虞部郎中正謩赠兵部侍郎君虞部第四子也初以廕补太庙斋郎皇佑元年举进士中甲科除荆南节度推官避亲嫌换鄂州观察推官丁母夫人骆氏丧服除调并州推官安抚使故相庞公辟掌机密文书後徙定州以疾免复用大臣辟为大名府推官俄召为刑部详覆官治平二年五月十四日年三十五卒于京师君九岁即丧其父哀慕如成人家故大族君虽幼而于属尊每时节当诸侄庆拜能各为礼意以接之有年长数倍者立其前不敢懈性高明疏達仪貌秀揚笃志于学好论议读书不从世入蹊径务求其精微至于自得之而後已故其疾革神夺矣犹能诵其书累日至有终篇无差者与人交有情文而不失于正视世故若不足以经意察其事至而应之者每当其理尚气节临利义知所择族人买婢有携稚子求并售者君疑以诘至再四曰实药氏华亭尉高陟妻子也夫亡无以朝夕忍此以苟生君戚曰陟虽不识而吾同年得科名者也亟命留之为具归贐家人发空橐笑示君君曰有竭吾力而已至质其带鐙得银数两及褫家人服物既而今参知政事冯公故翰林学士沈公皆同年相与义之助以钱遂济其行庞公去定州代者武人不善君故谢病以归僚友更諫之不肯留或谓数日考满当改官君曰以此易吾心是谓屈身以徇物岂所谓义哉既去贫久困甚而处之自如其配王氏故相沂国公之从孙有贤行生一子修平熙宁七年君兄之子提点湖南刑狱太常博士集贤校理初平谓某曰吾少孤所以教之学视以为休戚而终始成就之者实吾叔父之德常惧无以报称将以今九月某日葬于龙山乡某里之原子其为之铭某尝游赵魏间又从事江陵得君始末士于生死盖不足道独悲君质良材完所以修为厉饰之又如是天生之宜若有意者然不少寬其年使有见于世而死之速何谓也当然而不然不然而或然古圣贤以为命也朱氏上世有仕唐为治书御史者家京兆之万年昭宗末避乱其族南徙自翰林显于本朝而卒葬江陵今为江陵人君能诗清丽有思致集贤君搜类之得百余篇行于世铭曰

学明志杰才揭揭兮薿薿其秀褒以发兮不畀以实遇孰嗇兮诗遗于後慰幽穴兮

赠朝请郎杨君墓志铭

京东转运副使左朝请郎杨君康国状其先君平生持以来请曰杨氏魏人世澹泊隐居大父以行义教其五子乡党皆称为善士尝语人曰吾之业所成就孰与金赀多哉先人实中子事父母接兄弟以孝友闻既孤捐其家所有以委兄弟一毫无取出读三坟书得所谓养生治病之学精通而善用之喜曰此古圣贤事也乐以其术济人多有功性仁好施侈于賙人而嗇于自奉有贷取弗偿辄折券不问乡人益以为长者敬而赖之以大父所以教子者教诸子而康国遂得由进士窃禄以奉荣养熙宁十年天子亲郊以恩封大理评事致仕其後侍奉卫州以壽终于康国官舍实元丰七年七月十七日也享年七十三康国既免丧奉母氏寿安县太君吕夫人复出就禄追惟先人后手足之时语诸子曰乡里今并河可虞吾于卫也甚乐其土风瞑目後其归我此地康国奉治命卜卫之共城县杨吕馆某乡之原将以元佑八年四月日奉大事康国由贫贱辍耕读书岂自致及此实先人种德所诒惟先人之德弗显于生矣冀不泯于後者顾不在君子之言以铭其藏乎敢以请嗟夫士之立于朝廷者类得以天子之爵归荣其亲非特以慰其为子之心而天下之为父母者劝矣惟君力于为善陰德所储虽弗振耀于世然教子之功卒获其报而身享之晦之有显兹孰加焉今其子由御史諫官出奉使指议论

政事为朝廷闻人孙曾蕃衍以学为业嶷嶷有立则杨氏之显可以劝者滋未艾也于是可以不铭君讳整累赠左朝请郎父讳怀德康国君仲子康元康民与幼皆亡孙男十六人挺三班借职余举进士女六人曾孙六男十二女铭曰

共山淇水土厚俗?人择其生我择其死志则无违惟是有子善非期报要母怠止

承务郎李君墓志铭

天章阁待制李公有高才大志仕先帝时尝显矣晚坐言事再夺职死谪中吾志其墓曰公才无不可尤长于应变其于治道自谓晓然所以深哀其既遭世而不合以死者也没後十年其子上书阙下追讼其忠章至十数朝廷矜之诏复以待制告第其子即君也君名伉字常武见其父志不就退废则竭力家事疏园沼植花木究所以为亲娱者母王夫人抱沈疾服勤侍药衣不解者历年前後持丧尽礼母违君既以名臣子笃于忠孝而所上书文义怛惻益知名矣然澹于荣利雅无仕进意幼以父任得官逾四十岁家日贫乃始起调单州监酒从辟改郢州再岁以疾卒元佑八年五月三日也年四十六妻孙氏二子举进士曰周南登科为鱼台县主簿曰召南一女一孙尚幼君好学博记诵于书通大原不从举子畦径生不见喜愠接人无厚薄中所识判然风韶闲远嗜好古雅学鼓琴书字精于隶有法尤工为诗取?骚陶谢古体师之有集十卷先进长老及其父时宾客咸与之交女兄嫁宋玠玠战死家寓鄜州躬往力致之归朝廷録玠後及异姓玠家以周南列奏中推恩既下君辞不受也兄偁死官太原又疾驰护丧归葬哀感道路治家妥妥有法善于兄弟严事寡嫂嫁妹及兄之子数人喜賙贫厄即以八月一日葬于郢州平陰之先原初吾临其丧二子伏曰先人受知厚愿得铭诗以终赐哭甚哀无以辞也惟君尝有言曰为善行已士之道当然也世之有作以近名惟恐不皎然者窃尝恶之然则凡今所书在君志皆为不足道念不书无以示後而慰其子也余所当详见天章公墓刻云铭曰缺然如不能其德之成颓乎其无竞其中之明畀之以完覆之以倾胡悟诸冥付壮子从先人惟永宁

清海军推官吕君墓志铭

治平中予从事江陵僚友吕君者君子人也日羣居幕府人以君寡言不表饰多易君君退然坐自如独予察君非苟然者居久之与人益有意事不譁而治使抱文书次至君则摘閱及覆小漫必得之府无失政多君是赖人乃大亲服而与予相好至三年先後考满盖无异初相从事也後十八年君之子仲敏抵书于予言先人捐馆贫不克葬今始卜葬惟圻中之文敢敬以请昔者雅多君行义今嘉其子之能大事乃论次其终始按君讳昌辰字伯熙起居郎龟图之曾孙宰相蒙正之孙光禄少卿务简之子以世父廕调和州历阳汉州雒县两主簿徙江宁建宁令父丧不之官服除调莱州推官以举者死不得磨勘迁荆南推官又补商州坐州将累免以山南东道推官知金州石泉县改清海军推官知桂州修仁县某年某月日以疾卒年六十一君生长贵家而廉约刻苦甚寒士性静慎好学无竞其中善之恶之不可欺而公谨?墨不为皎皎吏民宜之上官应谒则往谒不肯问见无意于人之知不知家极贫不以一毫取人人亦不可干以私死也至无以歛盖其节如此夫人刘氏继卒于男六人仲敏今为通直郎知郢州

阳谷县仲履仲棐举进士第余早死女一人以某年月日葬某所铭曰

不知而愠以得为贤人无异趣君独不然以节自终遗子清白君子无憾归此安宅

忠肃集卷十三

卷十四

钦定四库全书

忠肃集卷十四

宋 刘摯 撰

墓志铭

潜山黄先生墓志铭

先生讳孝绰字公裕姓黄氏上世为建之浦城人自其考徙居于舒州之太湖今为太湖人舒之望曰潜山其下号丹霞府盖养仙之所栖幽人有道之所潜先生游而乐焉因自号潜山叟而舒人尊之曰先生先生者道德之号也先生于孝弟有至性事父母竭力至诚而时察其色辞以为忧喜能如古人所谓养志者侍疾居丧皆有以过人家贫口衆而制之必均养嫁诸孤女过己之子周人之穷不计有无往往衣不兼食不属而先生处之自如居乡与人子言必以孝与人弟言必以顺所居人用化之至相诏语曰毋或作非使黄先生知也其子莘居官每归省必问今日治事何如使条其状闻其当于义理则欢然为之饮酒尝谓曰吾所以不仕者为有子仕足以行吾志汝视义利是非可不慎所蹈欤先生少举进士两至礼部遂不应其後天子推恩当特奏名而先生亦不复起也士之不仕盖有之矣或厌浊以远引或异学以?世或求焉而不得既去而徜徉恣嗟超脱礼法诵诞宕之言以为归如先生皆不然仕之志以其子行之仕之道以其身行之恭顺于父母兄弟行谊信于乡党朋友以为是足以尽吾职而恂恂于名教不知仕不仕之异非孔子所谓孝乎惟孝友于兄弟是亦为政者欤呜呼先生可谓纯厚知德君子也熙宁三年二月十日卒享年七十四曾祖郾祖元吉尝仕江南李氏非其好去之有诗名後赠大理丞考觉任殿中丞仕以清直闻诗益有名翰林杨文公刘子仪章郇公宋宣献公皆称之多与之唱和先生遂世其家尤善书其法本二王顔柳其配裴氏屯田员外郎求己之女有贤行後二年亦卒子五男莘着作佐郎勳艺苟蘧皆服儒能如先生教一女归国子博士张慎言早卒六年着作君以书谓予曰黄氏世以仕贫自莘祖不克归闽而葬太湖今莘又以仕来北方川路险远不孝不敢以柩行于是卜之地得郢州须城望山而日得十二月之壬申吉将合葬焉幸畀之铭某久与着作君游而未及见先生也然观其子之贤则先生可知也已于是论次而为之铭曰

孝哉先生德成诸身施于其家及其乡人所性在是进退两忘以至于命曰寿而康汶水北原安此新宫刻诗幽石以昭无穷

朝奉郎致仕黄君墓志铭

君讳莘字任道姓黄氏自少奇穎有器识以文行知名一时皇佑五年登进士第为揚州天长主簿徙恩州清河令前时黄河在州境而县并河岁输刍茭後河去犹赋之至是积逋十四万于数十贫户都水督责鞭笞不已六年无可入君条列于朝悉蠲之时遣使宽恤民力欲一切罢河北驿传之须于民者君言骚民故当禁而事系国信往来者亦何得废独可具民所劳费以其数当税朝廷行之至今公私为便使者吏卒过境少有夤缘为扰必按以法岁饥部使者不肯賑遂发宁化镇仓人赖以活秩满改秘书省着作佐郎知曹州济陰县事神宗即位迁秘书丞广济河决势戚乃询邑人议破南堤以分水水去病邻邑君曰此于法甚重其可以累他人亟自劾韩魏忠献公吴正宪公暨御史台吏有论掇知冤句县事张复礼至请纳官以赎之朝廷亦嘉君意止夺一官免邑人绘君事之魏公留守北都荐教授国子监丁内外艰服除复前官直进奏院召对上犹以济陰事獎劳之除提举河北常平仓改东路转运判官徙西路水沱穀贵奏罢市易司增价以籴免民艰食继又賑之遂无转流迁陕西提点刑狱驾部员外郎汲逢坐市易事系秦州诏狱逮三百人久未决主者幸有功惨核巧诋先给移逢病于州君方摄事亟遣医得逢无恙状乃檄问所以为不实者主者情见趣竟狱不敢少出入逢得无冤坐径诣君位谢曰获更生实君赐也官制行换阶奉议郎召入尚书省为职方员外郎转承议赐绯衣银鱼久之求补外知汝州元丰八年今上嗣位迁朝奉郎以足疾请致仕十二月四日卒于州舍享年六十五前娶皇甫氏追封永安县君後章氏封武宁县君子三材婺源主簿枢睦州司法参军杞兴化主簿女二长适朝奉郎王续次进士蔡居厚君事亲至孝友爱诸弟与人交有终始性谅直勇于为义而廉于进退临事不惑所谓祸福利害不以动其心闻人善喜切切称道其不善亦不能隐必面告之使改常谓天下大分惟是非黑白尔要不可使淆见小不明则咄嗟愤叹其为治仿此故所至大有声而亦或以不得于人政事本于仁厚爱民为监司不事边幅未尝置人于法布衣时闻舒州望江令丰有孚能吏以孚系狱即驰见转运使王素白其冤素立释之君故不识有孚有孚亦不知也晚年亦喜论事忧深思远过于在位者尝上疏论免後钱不当及下户大臣不禁宾謁与人语简雅有风致文章豪健洁齐源远而气正自集四十卷藏于家曾祖元吉仕江南祖觉仕皇朝为殿中丞父孝绰号潜山先生以君仕于朝赠朝奉郎元佑八年十月辛酉葬君于郢州须城之望山其父墓次某识君三十余年潜山之葬实铭之于是诸子复以为请乃作铭曰

黄氏着姓江夏其初有避唐乱闽浦城居逮君皇祖爰徙于舒既没而窆遂葬大湖潜山子仕奉亲北方终养又卜汶山之阳神灵安之迁徙何常有美惟君志大气刚学以泽之蔚有辞章力善狗义其身可忘谓逢文明腾凌颀颀谁斯所储屯闷弗张间出一二已韡其光老以一郡止于散郎才之不契由古则然有城有室附于潜山刻诗譔实以诒後传

太常博士彭君墓志铭

君讳慥字公谨世为潭之湘陰人祖晃考□皆以轻财乐施称于乡里君第皇佑元年进士除复州景陵尉丁母丧服除调复州司里举为江州彭泽令丁父丧服除入秘书省为着作佐郎知澧州石门县今上即位恩迁省丞移知南仪州事改太常博士熙宁四年七月十三日以疾卒于官享年四十六君庄重而可亲乐易而有守心无曲思面无徇笑居乡有行义仕宦二十年有清槩未尝问其家有无至和中辰州起事蛮溪调诸州兵议所以穷讨君献策任事者以

谓中国能使边夷服者为有恩信尔险穴葬谷其民类禽兽不可使而其土不可耕使吾得志正所谓石田者何事以为我劳今独宜有以绥怀之而已方是时喜事功名者皆以为击之是已而师老财困朝廷屡遣使者卒如君策彭泽有修山观唐狄梁公买田千亩与之于是观有堂以祠公大吏欲移其田他观君请留半奉公祠屡争不得至以其议闻于朝卒从之石门得民伪为印者法可以死情可以生死则得之者免远官君戚曰杀人以自利欬遂傅生议交趾岁贡所过郡皆以乡兵护送民病其骚独君南仪罢之君平生不乐为皎然者而历宦多在偏州荒邑无事处故逡巡不大振作而其因物有作间见而时出之者盖如此嗟夫君之不得其寿也君升朝赠其考大理评事妣许氏孝感县太君娶戴氏封永安县君子男二子民子中皆举进士二女末嫁以六年二月甲申葬君于归政乡永宁里土塘之原子民尝从予游于荆州也于是来请铭廼为之铭曰

有幽斯宫 崇阜兮万古一化孰夭寿兮不瑕其德义不疚兮斯于博士为不朽兮

范圣涂墓志铭

君范氏讳遵道圣涂其字也士仕而不知其道也久矣苟焉者固漫不省可否惟利之故及狷者又颇亢激以轻去就为事如圣涂幼已得官不肯轻进方且博学深养有以自得而後起既仕矣有所不合终不谄随从容洁身以去夫必欲自信其所养吾知其非无志于仕者也不枉已以合人吾知其非有求于仕者也进不为苟得去不为矫亢岂不贤矣哉虽然抱其所有不少见于功用又不得寿而亡此古之人于天道报施所以致疑呜呼是可哀也圣涂康宣二年用从叔祖秘书监讽廕补郊社斋郎岁十一而孤二兄故已夭独端飭自立事母李氏以孝谨闻养孀姑于家而与其子游出处友爱人不見其为外兄弟也聚书延师友以名教为乐调人之急亲朋多赖以济嘉佑二年始调郢州须城尉随改徐州司户参军未赴丁母丧服除调青州千乘县主簿令之政多不善君以忠道之又劘以理又争以义皆不听州察其然因从君刺令事君谢不知退而笑曰此岂我事而我亦安能徇物乎有去而已因鎖其廨举进士遂不复出乡里益治所居阙圉圃筑室庐水上超然孤往临流坐石吟啸其间世故一不以挂齿熙宁三年十二月十四日以疾终享年三十八君性宽厚静重寡言精识旷度有过人者读书不为蹊径务致其极为文章严简有趣尝两试礼部喜事多学至星历气数皆通其术笃于朋友忠信乐易久而不渝而与予相好也故其卒也姜先生潜自鲁来与其姑之子张君褒经治其丧而使来趣铭君之先自高平徙河南後有官东平者今为东平人此部员外郎讳正顔者君曾祖也君娶故兵部员外郎直史馆梁公旧之女生二男德方于是始十岁德恭三岁二女长许归姜氏次幼遂以明年二月甲申葬君于郢州平陰县安乐乡樊山原先莹之左铭曰大车六轡载鸞载旂不可以径宁柅而留往既艰矣又薪其輶嗟惟圣涂谁司诸幽北山礪固君卜先邱圣涂归哉閔此千秋

刘子中墓志铭

君讳常字子中嘉佑八年进士及第补祁州司理参军治平改元君上书言天下平治由先朝临御久德泽法度所以驯致之以遗今日今命元之意非是宜于本功所自来慎始昭孝若曰

承之而已时黠其说治狱明以恕多所平宥数与上官相可否事未尝屈二年七月十七日享年三十八以疾卒君幼喜读书长益自刻苦沈酣出入非若世俗口诵而肤取之者于寝食造次不辄废书以为天下之至乐在是而世所谓乐无以易其发为辞章清拔有思尤长于引古以视今性和静而疏逵与人交忠信不渝乡人有过误者辄不较居官闲则与士子讲学所以教诱之甚厚人大向之以名节痛自砥砺欲求天下之善以身蹈之冀有见于世而志不就蚤死其不可悲也哉刘氏滨州渤海人曾祖讳应图祖讳为潍州昌邑主簿父讳庚河中永乐主簿世贫业儒至永乐滋贫流寓四方时为名公大人邀客之博学多识善教诸子而君弟蒙有文行故门内讲习自相为师友其後蒙被召试校书郎知唐州湖阳县以不合投劾去君既没十二年永乐及母夫人相继以逝又一年并蒙亦亡呜呼其不重可悲也哉自永乐徙河阳之温县于是君季弟颐复晋与君之配李氏及其孤弼直遂举诸丧并葬于王屋县玉阳乡之北原实元丰二年七月七日也君所着文三百篇一女前亡矣铭曰

嗟惟刘君其士之良涵茹探履学敏以强騤騤天骥志腾八方跼足跬步孰有而亡将槩诸理君乎何伤

国博陈几道墓志铭

公讳修古字几道姓陈氏自太丘徙东平曾祖某祖咸卿考肃赠吏部侍郎公少尝举进士以兄任为郊社斋郎调瀛州乐寿县主簿改润州司理参军丁母丧服除举监大名府酒迁定武军节度推官治平中用荐者改大理寺丞知?州安远县以亲嫌自陈徙监海州税今上登极恩迁太子中舍赐五品服监开封考城县酒转殿中丞知博州聊城县事未几罢又知劔州尤溪县事不行转国子博士榘在京常平米坐法免归居七年以元丰四年六月十二日卒享年七十一公性孝谨少孤事母夫人无违及执丧乡人称之精敏善治事在乐壽民大饥州委公赈之活者十九在大名课溢缗钱三十万在武定鞫正疑狱之久不决者自聊城罢县人遮道久不得去前後当路争荐之晚节失官退处里舍和易寛静以酒自娱亲戚故旧相对怡然无不足色虽老精力强壮絶过人临终授治命其子如无疾者呜呼公尚何所慊哉初娶梁氏封仙居县君生子二人男丙服儒女嫁国子博士聂伯坚而亡再娶何氏封福昌县君遂以其年七月十一日葬于郛州须城县南留村先莹之西某祖妣仙源夫人实公兄秘书监讳希古之子以是知公之详无若某者丙前葬又以状来谨序次而为之铭曰

物有得丧人用笑嘻彼自来去胡转而随公以是故失也安之既康既寿世考所诒

国博陈长孺墓志铭

公讳孝标字长孺姓陈氏曾祖讳咸卿祖讳肃赠吏部侍郎考讳希古赠秘书监公以廕补太庙斋郎调保州保塞县主簿光州司法以处州龙泉县令举监汾州永利西盐得眼疾所谓内障者求医以归又二年致其事除太子中舍英宗即位改殿中丞赐绯衣银鱼今上即位进国子博士熙宁五年六月五日以疾卒享年五十有九公性至孝幼失母实鞠于祖母永安太君方氏及长而秘书公分务南都退居东平其所以奉亲自养礼宾友内外晏然无所不乐而忘

其身之疾者由公于子职尽也于是凡十余年既居丧而方夫人犹在寝及事二季父益以谨顺闻与诸弟友爱相与以安贫服礼为事岁时慎祀飧自始事迨卒祭朝服以俟酌酒馈食有数有序每献再拜兴俯屏息于几筵如亲其声容而有所受命者至妇子侍御率以祗恪无敢跛倚与朋友久而不渝和易以爱人虽贱夫遇之有礼自秘书公之亡于是三十年乡里之亟盛亟替朝誉而暮毁者凡几家至论清白有常能持其门户则人必指陈氏而称公曰吉德君子也虽然临之以义利盖有不可动者保塞上官或属以私公谨对曰不可僚友诮之曰以是居卑非身谋也公曰士穷达得失不有命乎而道固若是议法有守不可挠而本之以恕疑者必傅轻多所平宥汾洲课增衍于格当赏矣俄以疾废而至于亡乡人莫不咨嗟以善人不得报为惜公少举进士有声名善作诗晚读佛老书信事颇笃夫人李氏故崇仪使荣州刺史纬之女生四男昭早世熙煦默皆服儒一女归郑儒继室夫人之妹封金华县君先三年亡生一女不育十年四月二十四日葬公于郢州须城县卢泉乡鄱上里先茔之甲穴公某长舅也方不幸幼孤实公字之又教之以俾成人于葬也其可以不铭铭曰

洵惟博士孝悌有仪惟蓄不施惟善不耆惟其命之是以顺之惟德不疵何公之悲

陈仲明墓志铭

君讳孝尝字仲明某生十年而考妣弃其孤实鞠于外祖父赠秘书监陈公是时公以疾退居东平里第将没以刘氏孤属其五子某当时窃自惟念亲既不得而见之终乃幸得诸舅从之其庶矣乎其後长立窃食乎仕出处二十年间舅氏之相次亡者四人独君一人者在而以风痺卧家虽然每以事若告假过乡里时得拜其左右瞻候其安否语言相问讯尚足以自慰其念母罔极之意而今又亡矣当时之所从吾母之同气于是遂尽呜呼其不可悲也哉君秘书公第二子性谨孝侍疾执丧能尽其志与兄弟相友爱交人有信义少时读书作文辞尤刻苦为诗旁治医药陰阳之学将葬患葬师多拘因自究其书有所去取以从事无违于礼尤喜佛书通性宗盖有自悟者其论虽禅学老师往往为屈故恬夷安分无慕乎外初秘书公为尚书屯田郎中年六十得疾求致仕以恩任君君曰大人小疾轻去而为其子计某未安也公遂分司南都曾祖讳咸卿祖讳肃赠尚书吏部侍郎秘书公讳希古君娶冯氏庞氏子男五人曰浩曰湜曰冲曰淳曰洵皆举进士浩冲尝举计偕七女子二女嫁四幼亡一在室君之亡实元丰五年七月三日享年六十八遂以其年九月二十八日葬于郢之须城县卢泉乡先茔之原合以冯氏铭曰

呜呼陈氏远有德祉中尝振显报施未侈逮君之世寢微弗兴而以孝弟乡里滋称学行恂恂视其诸子德後必昌庶将在此

陈行先墓志铭

君讳孝若字行先姓陈氏东平人曾祖咸卿祖肃赠吏部侍郎考希古赠秘书监君资夷谨持重有志识秘书公仕有清节为尚书郎以疾分务南都居里舍教诸子以学君尝读书自刻励矣已而幡然曰亲疾而养不足吾于子职将择其力易而功近者迺独以治产自任服勤劳躬

纤嗇始于至微粟储而缕积之辟田桑以植本又有所懋居以化有无盖其性仁故知所取予智故知所变通信故能交约故能持居久之遂以富称乡里自秘书公捐馆久其叔若兄仕不達两兄以病卧家食口滋衆缓急皆赖君以济鞠养叔兄孤女以礼嫁仕族举大丧六七葬之人有所谒随事周给至于自奉养简俭不易儒素晚年薄滋味嗜好益澹泊向有所营殖者皆寝不复为故尝观君之于财其所以生所以用与所以守者其道盖出于此则与夫诈力贪刻贱义放欲亡厌以为富者甚异矣喜读佛书谈性命疾革不乱自制棺图像遗其子而卒元丰三年四月十日也年六十娶杨氏尚书比部员外郎归一之孙子三人长男女皆亡幼曰慥孙曰诩说其年七月十一日葬于郢州须城县南留村先茔之西某妣陈夫人实秘书公长子方先君官湖南秘书公为遣君从行逾年先君夫人继弃其孤其孤既幼丧事皆君治之及某依外氏为学至长立得官所以成之者君之德居多于是前葬慥来请铭铭曰积惟仁用惟义殮惟吾之力又自居其薄曰毋浮吾德呜呼尚哉昭之幽刻

宋宗室慈州防御使宗博故夫人普宁郡君郭氏墓志铭

夫人郭氏曾祖暉贈太子少师祖守文贈尚书令譙王父崇仁贈安国军节度使夫人幼失怙恃养于寡嫂王氏逮成人奉其嫂如所生年十八归于皇叔慈州防御使宗博夫人性仁惠端静奉姑舅以孝接宗婣以礼抚羣下以恩辅赞君子休有令德累封普宁郡君熙宁三年十一月二十五日感疾殁于寝年四十一一男一女皆早世讣闻上震悼恤礼加等宝慈宫嗟惜为之出涕遣内司宾中贵人庀事殡于京南奉先之佛含明年七月十四日葬河南永安县之茔有诏词林为之铭曰展彼夫人柔温静嘉蒿魂奄忽戚里齎嗟西原弥迤行楸蘿靡勒铭幽堂淑闻不已

寿安许夫人墓志铭

壽安县太君许氏贈諫议大夫黄公讳珙之夫人熙宁七年十二月二十一日以寿终明年春其子太常少卿师道泣以谓某曰吾少时被夫人教曰黄氏世积德善将必有发岂不在我之世尔曹其可以不学即佐先子教训颇力其後吾仲弟师说早世独与季弟师旦以进士同时得科名起家就仕获以禄养师旦既以都官员外郎终吾日惧衰薄无以奉夫人今不孝夫人既亡将葬矣惟是幽宫之铭以累子其母辞方是时某譙官衡州且三年因详得夫人之行夫人世衡阳人其父胜好施有远识衆以长者尊之天人为女善事其父母为妇又善事其舅姑睦其族姻内外无间言諫议公喜宾客食饮其门者无虚日皆夫人身自供具内治不奇上下安之二子寢贵显殮封受祉更仙源仁寿长寿三县君以及今封晚年不乐出乡里太常公为请近郡又两监南岳祠遂居里舍以便奉养晨夕省视竭力致诚察其顔辞以为休戚岁时率妇子孙曾奉觴执膳为夫人寿夫人顾之喜每合燕亲族笑语酬酢终日无倦间里于是咨嗟叹慕凡语门户之庆者莫不指黄氏以夫人为有备福而称太常公曰孝德君子也夫人性慈仁尤喜佛事诵其书凡十八万卷有奇平生少疾将终神明如常时言语不乱召族属持其手各有所嘱安然以逝呜呼人之所慕而难至者寿既寿矣或眊昏疾若淹淹不支不然嗇其子孙幸而有之不克肖似若夫人享年八十八身终康宁有子甚贤一女归士人孙曾男女至三十人而补仕者五人皆材良自立呜呼夫人可以无憾矣是年某月某日葬于某乡某里諫议

之莹铭曰女妇惟孝母也惟仁惟睦惟则以昌其门福施厥德天畀之年有子惟卿由教则然定省左右彩服华颠及其三世洗洗在前岂无智達或累死生临此大故夫人不惊呜呼贤哉世考斯铭

仁寿赵夫人墓志铭

知恩州事尚书比部郎中王君讳?龙之夫人仁寿县君赵氏上世洺州人自曾祖羽徙博之聊城祖韜父继永皆不仕伯父继昌事太宗祇候合门任事北边有威名夫人幼善事父母既嫁其姑路氏有贤行而严正少可惟夫人能得其意及将终语人曰始吾儿早孤求配常危虑无以成王事者今得吾妇死瞑矣後比部君寢显夫人益以礼自约每临居养之华美者未尝不戚然兴言念其姑之不待殮而已乃有此也爱诸子均一人不觉其有异出者比部当任子欲先诸从子夫人欣然成之养孤族子数人于家恩意无所间盖妇人之行于是为甚难而夫人优为之平居寡笑语御家有法事至虽烦而徐应之必中理日诵佛书以为常性寛而正故人或可以欺而不能以妄说之也嫁三十七年年六十一元丰二年十一月三日以疾卒于其夫官舍初封孝义後更今封生三男子长岩叟河阳节度推官监晋州炼矾务好学有节行次滨叟尧叟六女嫁者四人其二与次男皆早亡孙男女七人明年三月日葬于济陰广武原之先莹铭曰

孝至于不忘其亲爱至于不独其子厥家日兴不享禄祉是惟令德而寿此止贵孰共之欲养不俟夫哀子慕呜呼曷已

吴郡君墓志铭

濮阳郡君吴氏世家抚州之崇仁县赠太常少卿讳锴之孙故都官郎中讳有邻之子故给事中天章阁待制致仕郭公讳申锡之夫人郭公始娶陈氏实为我妣之妹既蚤亡而再室夫人某以陈夫人故数出入拜夫人今诸子举公夫人之葬而以铭见属谊不可辞乃爲铭曰

懋惟吴宗笃生夫人其字道卿其名嗣真幼不戏嬉独近文字性敏以勤有诵辄记至凡女工不学而能事亲克孝善养善承父母以是贤之笃爱好逮亦多慎择厥配二十八岁乃始有家不逮事舅姑寿则遐承顔顺辞始终不替药剂膳羞必躬乃馈陈氏有子六人皆幼夫人抚之已子不後陈氏兄弟间至犹昨夫人遇之已族不薄给事立朝侃侃言路不以家恤夫人之助谪官濠梁不以忧戚姑尤安之以时分力居姑之丧哀毁不胜庐居墓下又以孝称自其为女为妇为母动止有节言语不苟持循家法不以智更诸子自教卒俾有成内外睦婣法度妥妥尤喜事佛晚益不惰治平五年从夫河中九月十八日感疾以终寿五十一弗克永年行岂不淑而报乃愆有男礼立主将作簿女亦一人嫁宋文虎居仁和县郡封濮阳既歿七年给事亦亡熙宁八年仲冬一日遂合陈氏从夫幽室呜呼夫人始卒不亏宜诗厥美以永孝思

李夫人墓志铭

夫人李氏东光人赠职方员外郎昭度之孙故崇义使荥州刺史纬之子故秘书监陈公希古之冢妇故国子博士孝标之妻而某之舅母也荥州本以儒者进尝钤辖广东守北边更数州皆有声绩始与秘书公相友善夫人数岁尝使出拜而约之?年十八乃归焉既不逮事姑而秘书公以疾退居里舍者十年凡其食歛夫人非自烹飪药非亲调皆不以进疾甚则出其奩中物以有所祈请无不至及居丧哀毁过人方是时祖姑永安太君方氏在寝秘书公二弟博士之弟四人族属蕃大而门内之治夫人实主之上事旁接各得其欢心御下虽严而人爱之博士于祭祀特兢慎夫人克相成之既恭孔时性聪明晓音乐略知书翰事佛甚谨皇佑五年七月十三日以疾卒于光州其夫之官舍年三十八子男女五人博士既贤夫人而未尝忘李氏也故以其妹继室而仲妇又取其弟之子夫人既葬八年当熙宁五年博士亦亡其子熙以七年某月日合葬而取铭于某某幼孤盖依夫人以生者也是宜铭铭曰

循法度共祭祀惟夫人克有是德不愆寿不侈葬从其夫永安此

赠刑部侍郎孙公墓表

公讳成象字乾曜姓孙氏世家长沙五代末马氏?有湖南将吏皆其所自补公之曾祖全以材武为潭州醴陵县镇遏使庇忧扞患当危乱中衆恃以休戚实有德于一方生匡替始仕皇朝为扬州广陵主簿以清白着名生隼隐曜潜行治居郡城南轻财乐施教子有方里人以为长者而湖湘衣冠论凡治家可法者至今指城南孙氏是为公考生子五人而公次居长性笃孝事亲能竭其诚力而友其弟以爱居父丧致哀谨礼乡里称之好学问为文章长于歌诗善书有法有名场屋间闻善见义笃好而力行之娶夫人李氏家多赀尝析其屋同门壻以女分每将有诉公曰婚姻以利末俗事也而又以讼乎是非士人之所为因谢絶之後以事出旁郡而母夫人以疾亡既还伏棺悲摧累日不能饮食忽抚其子曰吾不为无後死当免于圣人乎其从先君游无所恨语已号顿而终年三十三天圣元年三月二十七日也夫人後公二十四年卒二子颀今为朝议大夫荆湖北路转运使顒守桂州灵川县令一女适进士丁咸孙男四人曾孙男六人朝议君以才显于世自其升朝每国家有事劾庙推恩其子以及其亲于是累赠刑部侍郎呜呼公虽无所飨于其生也而歿也被名爵燕世绪子荣而孙承之则为善必有报顾迟疾异焉耳公既歿二年十月二十三日葬于郭下乡露仙里又五十三年当元丰四年三月二十七日开封府推官奉议郎充秘阁校理刘某以文表于墓夫人李氏万年旌德县太君自有志铭呜呼公之死可谓过于厚者也古之人制中以为常然亦曰丧过乎哀虽过而不可议者厚故也公视其子足以立知其不为无後而死则公之志可哀也而不可议也夫厚其亲而死人莫得以议斯可以无憾矣而犹有可哀焉诚在公有高于人者未及施而止独施之其身而已此其命也夫此其可哀也夫

祭文

滑州祭邹国公文

自夫子没邪说肆行历岁百余而孟子出以身徇道于是夫子之道明人到今师之历世邇邇

弗知所报国家选讲师设科目以其书继五经後又诏封邹国公配享夫子庙位兗国公之次
学士大夫顿首幸甚以谓是夫子之心也州以诏令从事将择日置像位焉敢具昭告

祭丞相韩仪公文

维大观三年岁次己丑十月壬申朔初二日癸酉奉议郎武骑尉彭城县开国男食邑三百户
赐紫金鱼袋刘某谨以清酌庶羞之奠祭于故丞相仪国韩公之灵惟公气间堪輿秀鍾岳渎
来辅昌运协兴盛福自结明主孰云梦卜高阳开府初叨采録及长天枢复备僚属饮食教诲
始终乐育卒议?好不遗寒族逮予南迁仲妇昼哭虽反于室公睠弥笃瘴岭蛮陬问遗以续高
谊仁心迴出流俗疑丞得谢脱屣宠辱乐道恬养淡然自足天下具瞻日俟还复袞衣龙节匪
暮伊夙天难谌斯云何不淑哲人已萎百身寧赎常水之阳西山之麓郁郁佳城吁嗟埋玉
辞告哀曷展心曲

祭沈太常文

惟君之生冥孰宰持才高而莫致蓄大而不施世之人徒爱其外之英华兮曾未见其中之礪
砢好之者虽衆莫能以力兮恶之者亦足以颠挤惟古人之莫不尔兮亦惟君之所自知

祭赵元考文

维某年月日某官某致祭于故翰林赵公元考亲家之灵惟公德行之稟兮清淳而精粹学问
之积兮该通而博备自文字以来兮前言之与故事虽幽渺诡秘兮罔散殊之弗记其中无不
有兮人名之曰武库与物未尝竞兮世推之为国器系灵源之休兮克承厥世览皇德之光兮
亦华于仕外若可以亲疎兮内挺然其志兹俄铄翼而南飞兮亟輿疾乎泮之涘曾未云更晦
朔兮遽大故之及止惟死生固自有命兮公已久明乎此理曰忧患为伤其生兮是世以进退
为休戚之言者尔呜呼哀哉予与公交兮以澹而成三十余年兮事予以兄馆阁各途有并游
之乐兮?姻晚契締深好之情骇书音之来讣兮浩哀涕之如倾胡善人之不淑兮傥所谓天道
之谁与明溯沅江兮緬緬望楚雨兮冥冥兰芷兮香歇猿鸟兮悲鸣慨予方系迹于兰溪之滨
兮不得祖飞旄之东征聊寓情于斯文兮代望门之歌声敬致薄奠兮以荐斯诚

祭丁上杭文

维元佑八年岁次癸酉二月戊申朔某日某甲子具位刘某奉故友上杭府君公明丁君之丧
葬于郛之北原谨遣随行指使三班借职王穆致肴醴之品而祭之以文曰呜呼公明曩时盛
年气狭云路顾语富贵可以指取千金尽散以交雄豪志愿力命不相为谋烂漫醉吟清新竒
妙天葩宝玗霏落谈笑造次居养不啻于穷服必华洁食必珍丰荐进吹扬岂非知己至其得
失谁使谁尼晚假贵侯以紆青纶万里逾岁亟闻匱还今我东来燕乐故里魁壘轩昂独不见
子想象生平綢繆话言磅礴之气得于遗编呜呼公明纷纷古人才不尽偶惟有所传恃以不
朽独念子世寢微寢艰客骨地上垂三十年为子买田北原龟食土水深厚佳城吉宅以子之

考及二妣丧刘氏朱氏庚穴之藏子及室邢竊于申位左右相望冥岂不慰不易旧歛周以重棺日时协良归哉惟安呜呼公明谁语皎皎没而无知来歆罇酒副此悲思

熙宁九年祭先莹文

维年月日孝孙男某谨遣新妇任氏长男跂躬诣先莹之次用某日具清酌庶羞致享于三代考妣之灵惟某幼而孤流落四方弗克践先王恭信哀三礼得罪于上帝神明不敢追乃天实悔祸保佑先人绪余弗俾失坠以活其嗣人犹伤于贫三十年于兹始克大事如是其在某之身何有惟心以率力守视洒埽恪恭于墓次终以报称先人则曰岂敢如以自竭其愚则曰庶几哉然方有罪于朝为世大戮志弗克遂又五年于兹虽日哀疚继之以夜其心惻然而官禁有诛祈天天高亦罔克有济盖蚤夜惟念古之人有礼祭祀钦承妇子是赖用敢祇承礼意命之从事以代不肖之身明德加惠尚愿歆兹乃若敬念所愿则忠心如是终身如是曷云敢忘曷云敢违

祭蹈文

祭于亡男奉议二郎之灵惟汝孝于父母善于弟兄行已应物一以至诚横逆不校忧乐不惊少自刻苦以取科名安其所傕克有厥声士林同词期以公卿呜呼哀哉德吉气静此寿之理吾谓异时必将赖尔天胡夺之遽先吾逝白头衰年哭尔壮子事之颠左有至于此呜呼哀哉书来报疾汝批纸尾凡数十言常时无异云偶大病十去八矣医言无他数日可起本不驰告念非得已地远思亲愿遣一弟意绪昭昭有叙有纪但怪所书多不成字中心闷默忧恍如醉亟遣医先翊日卜至呜呼哀哉天之赋汝亦既粹美反嗇其生使不少俟冥谁宰持必有所以岂曰偶然自生自死殆吾不修衅恶积累罚锺汝身汝则何罪闻汝临终妻孥守视汝父汝母汝兄弟妹无一在傍四顾歔歔若有所属索笔与纸手不能持强语其子曰幸千万可独写此呜呼哀哉又闻前年赴官边鄙出门旁徨密语二季曰此行役忽不自意安得休哉同此庭侍祝勿告吾惧诒亲累岂汝自有所知魄兆已至使吾蚤闻必留汝止而不吾告何所牵制呜呼哀哉又闻初疾风寒为厉头目痛昏火壮躯体付之庸医语为脚气诸所毒药连投大剂一昼夜中数十下利阳脱陰轆外浮中痞寢以滑泄上益呕哕才十余口摧此魁壘至于大故不乱医乎不仁杀人何易数虽有定岂无冤者呜呼哀哉人之有生会归于无浩浩万古瞬息须臾其间长短何较锱铢古之達观宜此万殊祸福同户彭殤一区忘情齐物与天为徒吾视斯人岂无愧欤情累纏着若有根株八月庚申见汝丧车惨惨仪象累累纒纒声恻亲友叹闻道途天高神幽吾哀莫呼江尽海竭吾泪有余髣髴面目嗟何及乎惟有尽心抚汝诸孤松楸之下一室山隅以候岁月归汝先墟

忠肃集卷十四

卷十五

[集部,别集类,北宋建隆至靖康,忠肃集]

钦定四库全书

忠肃集卷十五

宋 刘摯 撰

五言古诗

读书

西风入梧桐白露下云汉洒洒晚秋色清凉复神观岁月不我与料理前日慢念此平生心所乐在黄卷太羹与玄酒梨膾及俎?滋味要足口更复恨未见灯火夜可亲巾箱字甚憚纷纷事是非碌碌世治乱千古守糟粕未免斲轮叹圣贤有堂奥大道堪夷坦是为名教乐足以了衰晏惜日营珠金投身鬻歌管彼志各自言难以一理贯

老子画像

敝周僂于文老子谈大道仁义已末流体法固行潦虚无抱玄珠清静为至宝掊斗息羣竞死圣止大盗谓可愚斯民狂澜复既倒不知世大变万伪火就燥欲以区区言反俗入羲昊浑沦五千言道德何浩浩汉尝求其说施用未深造衣食已有滋烦苛以能埽惜哉衰世士学术失探讨流而为刑名惨礪极枯槁但见多申韩举皆罪黄老圣人无常师有善取輿阜问礼固有然谁谓孔徒小遗貌知是非君无论丑好

杂诗六首

四序若转毂万物变秋风萧骚檐边月赫赤江上枫寒鷗坐晴屋陰虫凄暮丛灵凤杳何许寂寂朝阳桐咬咬笼中鸟食饱勤好音谁怀主人意岂不思上林出处谬前算老大故谿心秋衾耿寒梦玉露晓如淋古人有高志妙与天地通读骚饮美酒挥弦送飞鸿杖藜步梧竹闭户闲仆僮祸福有倚伏念当守蒿蓬我思彭江州行已有风绩与善忘畛畦靡邪立崖壁堂堂生民望奄奄斯道寂何时持鷄酒就子坟上沥播州迁刘郎夜郎放太白秀木风所仇人情有欣戚严霆无终朝斯文岂遂厄我愿苏与黄壽命等金石至人有神游坐凌八荒邈一息如鹏图万里御羊角蒿莱彼频频晨夕自喔喔仙人乔与松谁云不可学

西斋观雨

长庚谢余炎大火躔西极开轩对朝雨拭目看秋色云空相晦明风缕乍斜直声繁自飘萧势急勿淙激方塘潜浪潮万瓦乱珠射巢燕倦翩翩庭芜长纷籍闲花洗幽素秀木舞凉碧清气醒筋骸余爽入几席迹希蒋诩径兴高陶令宅绕郭听懽声登秋饱丰泽良辰感孤宦念我久行客穷年不自乐心迹雨何益功名羞诡奇岁月易类斥圣人堂有奥大道坦可适胡为世俗间区区较寻尺

县斋秋日雨後寄李圣和

置闰岁八月祝融冒秋权当代不肯归滞暑歛以延金行奋刚义天令惩骄愆一雨恶气死百物疲瘵痊陰阳战既定灏气苏天渊 斂物得性丰给民有年小轩占幽寂危坐凉飕然身如赦炮烙蓬山弄飞泉冷风啸梧竹清响摇碧鲜净几少喧蝇高檐除嘒蝉烦心爽已蜕尘观清疑仙于兹飭前懈图书猎陈编晤言隔朋类披卷盟圣贤乐此怀高风北望心悁悁

县北马上

五月暑雨过缓轡来城陰朝晖粲林莽凉风弄衣襟敢辞鞭策劳邂逅得幽寻斯人勤岁事乐此膏泽深芃芃黍稷塋蔼蔼桑柘林田翁可指食蚕妇期织紵捆储与衣褐卒岁无崎嶇陶民帝有力养物天之心忘言乐其乐此意良自谌紓为马上句比和击壤吟

答黄莘任道代书见寄

吾生本放浪自比林壑人谬此继官组试邑漳水滨疆田占洿卤户俗籍羸贫驿涂搔左臂河流啮西濬役者动沦产居者无储糗科求困府调期会严吏文儒生仕学古志在膏斯民慨叹适于此蹉跎徒自勤亦尝紓厚斂粗自穷褐温【原注南宮夏税折色视他郡最重前岁特为申请乞随市直估折不用诸色得旨蠲三分之二】劳心米盐屑秉笔朱墨纷尚赖厥俗古椎然犹朴淳因时罕讼诉得以亲旧闻瞻言君子治百里相依瀕厨传候使介南北交欢忻议和六十年中国劳勩耘脂膏瘠黔首岁月如转轮寸金比寸土石晋真自焚祖宗赫大业此愿尝经纶遗愤郁未泄壮士常云云天运无盛衰吾民系康屯远御在廊庙勿惮躬觞殮小官惠不耻委吏孔所伸【原注君为清河令当信使驿路时有供馈送迎劳困之叹故云】我亦走除道折腰边马尘缘兹有境会每得言笑亲代去各匪远木落秋风辰知倦黎侯寓来卜子騫邻【原注君始寓卫州今见询欲谋居汶上】东平我客久蕃阜诚罕伦齐鲁儒学地遗风今尚存礼让行比屋弦诵传里门玉京輶路近霏烟望氤氲梁岑耸秀概回源号通津炊玉北陂稻鱸霜南浦鳞名园富夏果冬山下寒薪滋味闽越足物色吴楚宾人物盛着録衣冠若云屯交朋三数子英英鸾鹤羣文章与言行玉洁芝兰薰方舟洞庭雨载酒乐郊春羨君此谋吉不必龟筮询我马固已秣君车亦宜巾瑶音枉嘉问凌纸天葩芬聊兹缔里社愧匪金玉珍

中秋招赵滉

浩然天地秋凉风日萧索宪也固非病回焉不改乐公秬已堪酿兵厨有近约以此邀子车主

礼岂云薄

送赵湜游边

风霜日夜肃关寒塞草白之子倦蓬蒿结束远行役尺劒有壮怀短褐无寒色礼台多黄金义橐富白璧河山数千里赵魏繚遗迹大事今在边为我尽览历威怀用表饵是非入奇策岂如茱阳秀出以屡空迫

白鹭亭

危亭跨城巔因洲名白鹭开轩二水上寓目万景赴风涛豢鱼龙烟云变汀渚孤禽点锺山片席下吴浦闲人得闲愁凭栏叹今古脉脉临长江寒潮自来去

过彭泽

孤舟倚彭泽高节怀渊明餠粟曾几许忽归无留情士生于内外贵识所重轻山高暮寒耸江阔春风平弦歌絶遗响秫田今谁耕我方事奔走呜呼愧先生

庾信宅

南都号多士庾信乃辞客承家富缣緌摛文烂组织应教来春坊日坐学士席翩翩宫体谣江左变风格巨盗掀台城狂飈铄孤翮南飞江陵宫杖策赴王细经纶投中兴感愤补天隙大厦岂一士终此阳九厄陆机趋洛阳夷吾入齐国濯足聊委蛇怀邦已悲恻惜哉不遭时湮没无伟绩王室与身世沦离两何益暮齿哀江南聊将赋心迹楚郡故城陰或云此遗宅寥寥旧山川莽莽新黍稷是非不可求秋风暮烟白

马融绛帐台

东京尚经术人皆挟师才惜乎章句间门户各异开马融号耆旧太守南郡来横经坐绛帐自处何崔嵬帐前列徒弟帐後歌弦陪书生贫贱志遽以声色回于今数百年岿然但高台旧址半倾圯栏槛生莓苔溪光贮襟袂南风熏樽罍高檐日向暮燕雀亦徘徊

题公安知县柳应辰屯田默庵

语默本无常此道知者寡君子默诸心志气纳陶冶至神所安潜可使万物化精微与道契密不见纤罅世俗默在口铃若偶人者至其中所鹜逐逐散万马我来观默庵虚白非外假天地冥毫芒今古一昼夜物至纷无穷酬酢甚闲暇清静老?烛寂寞扬氏驾养此将有行性命妙天下相对坐终日心愜如嚼炙赋诗尚何言聊为默庵谢

寄题柳郎中留客斋

主人真爱客留客彻归路清溪环醉堂客起惊四顾人生异智愚所急随所慕仆仆声利徒昼夜无息虑虽有此不乐身留意已骛惟同主人心乃知此中趣主人韵潇洒恬不役世故对物心有忘简言理自悟清风元紫芝令德黄叔度即之久益亲不知变朝暮况复樽有酒琴奕左右布鱼鸟驯不惊孰与醉妖嬈主人意于客可谓甚无负速应架溪流坦坦堂下步客至不须留听客自来去

次韵王潜江见索近诗

与子一睽索俄经百朝昏尘劳触新累病懒荒旧闻强之旋放失殆若沟洫源新吟妙思致天葩发灵根澹然体大雅理惬如忘言鼓旗缔友社壮志压仅存譬以赵魏弱仰关支秦军君无疑敝橐薏苡非珠琨

送邹泽民还沔阳

人生寡会合世路多弃机吾得二三友老钝谐所依泽民气闷侈词笔如戈挥狂鸷但思击生马不可鞿彦修韵寒苦独以经史肥捩眼鄙俗调攘臂谈圣微直夫名流子学性无愆违冰玉莹表里芝兰自芳菲嗟吾实款段骐驎安可希清樽写江海日获从西圻吟锋互矜轧醉笑相嘲讥方怀青蒿愧忽见黄鹄飞明哲慎所蹈勿与矰缴几秋风病池榭苦雨沾裳衣行矣岁华晏重感人事非玉音傥无斲时有北鸿归

次韵晋陵吴秀才传见贶

予本疎野人出处心已果孔患四未能嵇慵二不可长年足忧劳中怀幸安妥风痾卧疲躯手足困挛跛思君淳乎淳处俗我为我玉轸黄金徽手开万古锁天地自然声听者不敢惰君有元气舟微风以为拖我亦薄外机庶不撓世祸傥伴荆州行春江醉轻舸

荆门军惠泉呈李使君舜卿

苍山抱西城蒙泉发山麓一泓养虚净大石坼岩澳源脉漈漈来星珠沸相续何人瀦方池不使声瀑瀑四围叠琳琅百丈?云木波底金莲花万叶绿绮缟畏清无鱼虾因亦远鸥鹄俯视洞五脏安敢濯两足循池隅西南渐见泄泉湔怒声始可听势如脱桎梏涎沫卷飞练濺鸣射碎玉曲折谿路长幽响远连属安得朱丝弦为写沧浪曲派泽山下田岁常稔甿谷憧憧负甍盎清入郡人腹惠名由此坎图牒曾不录崔碣鑱文章无数不暇读亦欲有佳句恐为惠泉辱使君心自清館宫泉上宿一勺蛻尘轩岂比樽酒渌磅礴壮士气常为山水伏天下几林泉无金买卜筑空兹嚼屠门野人真碌碌

煎茶

飯後開都籃旋烹今歲茶
雙龍碾圓餅一槍磨新芽
石鼎沸蟹眼玉甌浮乳花
詩思一坐爽睡魔千里遐
茂陵病解渴頓覺肺氣嘉
玉川風腋興直欲凌烟霞
論功着為經宜得鴻漸夸
膏粱麴糵土此物無與賒

石生煎茶

石生蘭溪來手提溪泉餅
謂言長官政如此泉水清
歡然展北焙小鼎親煎烹
一杯酌官壽云腴浮乳英
慙非百壺錢真意不自輕
澗沼苹藻細王公享其誠
冠蓋豈不至紛紛空涕橫
珍重石子者端有古人情

游白雲山

西山矜霽色林嶺遡晨光
万象露榮秀熙然數盛陽
扶筇喜暄暖更得春日長
回阡互亏蔽丛薄紛青黃
溪橋覺飛動漲水起連航
杳杳岩壑步條條松桂香
道人誦所聞坐使身世忘
誰我共出處閑人澹徊翔
風鈴有妙想天樂浮圖傍
非徒愛石壁行將營草堂
彼哉楚人子記恨擷幽芳

馬當山

馬當天險崔嵬大江邊
翠碧倚千丈峭立萬仞淵
其背領羣岫其麓匯飛漩
鬱葱岩間桂窮冬華葉鮮
豈無神仙人縹緲居其巔
猿猱肆健捷攀躋到雲烟
揚帆過其下瞥若飛鳥然
仰觀動精魄但見青天吾
生媿仁智而于山水便終
日叩舷坐無暇窺塵編有
嗜固為累觸險不自憐

湖溪道中

夜雨聲緜緜朝雨勢未歇
行役良間關炎歊暫祛遏
苹藻香幽幽陂池水活活
咫尺迷見聞淋漓衣褐坎
泥甚膠凝陸路無尺闊
飢僮與羸驂十步九顛蹙
敲鞍髀欲僵風蓋手屢脫
驚目不暇瞬危魂亦已怛
處險貴能安欲速或未達
聖禹嘗輶行文公尚胡拔
彼勤事業大吾勞簿書未
香城到長堤軒眉解蹙頰
大道吾所歸寧為險途奪

久雨次路韻

江國多陰霖雲氣所儲積
貫月仍彌旬窮朝復竟夕
太陽暗經天莫見黃道迹
風霏淋牀帷檐溜穴砌石
春澤農之瑞太甚豈其益
人言雨有數四時合均適
前多後將少物理固明白
我居苦湫陋安得爽垲易
棟梁生菌苔書藥漬汗液
塞漏除泥涂紛紛課奴获
凌虛逃重隄頗思兩鳧舄
坐觀久溟蒙風伯豈無責
慰彼望歲人私我窮居客
茲事但置之一觴聊自釋

富池口

顺风虽宜帆颠暴亦难用浪拥江逆流云狂日昏雾天公容飞廉橐籥大开弄蛟鲸快乘时骧首出洪洞舟楫多深藏湾浦投缺空我行斯可时要当审静动况复舟弊钝羸师困僵冻时止圣所藏欲速祸或中坐期天清明连檣欣所纵且倾渌酒樽慰此清夜梦

泛舟

湖光漾碧霄飘然一方舟绿 屡还复檀桨双夷犹雨色芰荷晚风香苹藻秋鳧鸥解相信随桡过前洲落落二三子载酒相与游清言惬素尚大笑忘幽忧洞庭醉渊明剡溪浮子猷人生似飘瓦所愿非所求濯缨渔父达佩兰骚人愁不须吴姬婉莲间听淫讴鄙哉遁功业方为五湖游吾曹诗酒中此乐为最优

忆山

昔者气少锐狂走登泰山东峰候海日危磴跻天关上考秦汉事遗文大碑顽南浮九江会庐阜几往还双林到如家瀑布声潺潺扁舟上湘水南衡若屏环巍阁坐杳霭祝融费跻攀幽寻恣所适曾不虞辛艰其余林壑趣可数皆班班逮今岁十改志气日已孱前时两河吏风埃走青纶荆州乃泽国自昔登临慳佳山到郢尽平地千里闲尘耳忆猿啸屐齿生苔斑安得苍翠姿下落樽酒间平生林丘志未去心如瘵去就不勇决将见移文讪

送吴雍平凉令

洞庭叶微脱衡阳鴈未归秋云招客思偏向陇头飞风霜过商郢飘泊游子衣行迈岂不远在彼渭水沂早寒关草白九月边马肥西州风俗厚长官民政稀洪河缭势胜大山四蟠围登临赋今古壮志相发挥宦游子诚乐孤陋予何依念此性疎朴动辄触世机相逢幸烛理义愜不谓非扶持失其直曲逢嗟愿为朋友日已削道义谁与几离骚默自慰但寄黄金徽

寄颍州顾子敦

念君去南州岁月忽已扫岂无肺腑言难为音书道客来自汝陰尽说太守好黄堂曰无事仁政浹稚老承颜奉亲欢甘旨富鱼稻时时过西湖樽酒媚花鸟儿童争拍手共笑玉山倒都城亦何为风尘惊昏晓投身非所谋养气安能浩思君便便腹中无价宝昔者定交分我已愧枯槁岂知鸿鹄飞翩然异鷁鴒人生出处间得失不在早君看松与桂俱有岁寒操何时临清觞为子倾怀抱

送僧常?

吾师来曲江落落伟丈夫灵标峙松雪清韵辉水壶谈高文字间欲趋仁义途飘然迹无累青天白云孤振衣下怀楚遂欲游京都京都贵人多骈门耀金朱仁义卜知己谁不顾子庐况子兼外学妙达性命枢言随祸福应名利惟所呼一出玩世故应忆旧山隅

庖婢病跂自临鼎俎有诗

塘头买鲜鳞戢戢杨柳贯不忧一日饥遂可支两膳北方贵 鱼岂异此中 但求杯盃充焉
问名实眩笔之姜芥蔬杂以紫蓴綫虽非梁肉豪乡思已过半甘芳渍蒙茸软熟分片段佐我
新炊秬珠琲光粲粲春羹远无慙枯鯨不足美吾于饕餮衰安此软煖燕昔人意不佳多缘噉
脯面圣贤亲鼎俎毋庸厌烹饌

夜发白碑

画行苦炎蒸秣马戒夜发清梦失归路微风弄纤葛星疎天无云独有亭午月太空生白烟浩
荡万里阔细碎草木香淋漓露气滑戚戚寒虫声逐马不暂歇我行何区区无乃害慵拙传闻
猛虎多宵路时出没四顾林莽中精灵动毛髮求全得忧虞祸每乘所忽君子审重轻无劳避
途喝

冬日游蔡氏园次孙元忠韵

偶来梁宋游得子共闲冷杖藜古城陰邂逅尘外境怳思闐闐中喧卑真坎井晴霜蔽陰崖朝
晖润阳岭田翁醉年丰晓夕不知醒园迳迎幽寻林屋到深静冻禽时自惊古木坐移影忆雪
指寒茭占春验枯梗求田计良难旅食饱已幸暂得酒中趣讎难求酩酊短景忽催归何时後
期请

次韵吴户曹师道秋雨

西风日已肃凉雨霏层陰丰泽饱岁事徂节惊壮心寒虫搅夜思沧浪梦秋衾欲谢茂陵病谁
怜庄舄吟

题句龙纬职方海棠轩

使君西州客惯见海棠红影纓出故里扬马来汉宫醉当坐乖隔年年梦春风荆州蜀门户脉
脉风气通此花何从来根本移化工使君有新第幽寓如山中小轩面城麓交柯植双丛年光
锦官远顏色故园同想当春苞丽无日樽酒空繁艳烧醉眼顾眄增冶容地胜不在大意适物
易充双轮粲两朱行将指炎封

寄题定州杨君园亭

隐不在山壑名园抱南城梧竹有远韵泉石非世声林花品莫数野鸟驯不惊主人堂其间对
境心已清举遗笑录录放言独冥冥新诗写闲逸其声自和平吾尝考风俗燕赵义而诚自古
志慷慨其人尚功名苟非胜絶地乌可夺其行士于内与外罕能权重轻主人不待识定无俗
世情

御史台柏下有丛竹久荒杂殿中刘中叟洗之监察孙君孚有诗知杂事刘某次韵

老柏寒昂藏丛筱下纷列未须论晦明均敢犯霜雪尘埃深蔽埋芜蔓困笼结槁悴屈子容饥
癯伯夷节殿中秉高义利刃勇分别病谷除蒿粮蚀月救吞啮还君岁寒姿清风自交彻念昔
绕荒栏三叹生慕悦重来十五年笑我壮心折幽怀耿相对欲语不得说

观音院钱送章子平出守郑州探得近字

大梁三尺雪冰泥变尘盆千驺国西门俨若钟在簏使君御之行往殿股肱郡玉符佩祥麟车
旗舞飞隼去国虽所怀而在百里近朝方背象魏暮已跨封畛荥阳介两京左右事控引咽?半
天下客车日交轸闭关非人情饰传古所哂使君锦幪仙才业苦清敏故人毁誉忘要使仁义
尽昔贤此为政遗爱浹微隐国人赋缁衣千载声亦泯二者在君兴无嗟设施窘

送文与可同出守湖州

东蜀老儒者吴兴新使君前更四州守风政超古人归来天禄阁袖手随衆羣一毫不染指世
味从甘辛谓柔未易招谓刚可以亲浑然镇冒器承以縑率文词章谢剡剡天葩出灵根冥冥
古咸池衆听所卧闻外物了无累独爱霜中筠应怜岁寒节落笔收天真七贤与六逸林下仍
溪滨对之浪狂醉顾岂知此君比年不多写造化怪至珍而我得二纸毫素余清芬留当雪霜
展可慰思慕勤煌煌钟鼎具未许刊名勲聊复咏黄鹄南国垂朱轮拔足出埃壒投身当水云
人与境相得长鲸卧天津冰壶地千里云屏山四邻醉月若下酒笔羹沼渚蓴仕宦子虽适孤
陋予何伸曲蓬谁与直坐远兰蕙熏临风写高兴愿寄江南春

天苏酒成次路韵

粤岭酒万户醖者无刑章以兹于酿事家家致其祥羈人亦随喜聊自慰空觞颇收诸家法曹
高及张王不复使邻舍更笑瓮下狂软熟秋糯洁芬烈吴秬香垆头沸珠螳螂面灯玉浆人情
喜自誉谓可官法当方时见初菊熠燿浮冷黄颓然此中趣不觉乡路长格高气淳圣何至肠
腐伤区区美芹意欲以酌后皇余醺到郡郭恨无嘉宾将增酿更加数从今百忧忘

食鱠

知几张季鹰归怀托江鱠鲈鱼今不数未若魴鲫最橙虀捣椒兰芦菰碎珠贝盈盘玉叶铺千
缕红云碎佐以晚菘羹玉饭香藹藹饱行慙素餐扞腹放衣带昨来溪夏乾市空无可奈徒有
弹铗吟何能饱幼艾安得东海鲸不憚生物害挥刀满金盘对列酒池外

植菊

春花悦时人赏玩纷纷南园一夜风地上红盈掬我似鹿皮翁祇爱晚秋菊团团緑玉丛移

趁烟雨斷愿言早芬敷重阳日已促煌煌想金葩况此风露足岂止插满头服之明两目滋养
溉清泉围护编翠竹多开万铃奇勿变桃花俗酒熟落?天不作牛山曲

菱角

洪池富水物擘波收紫菱春华杂青黄夏蔓相牵仍迨彼风露足芒角秋实登刚銛事利觜扶
挟如有朋双锋尚可噉四出尤足憎昌歜固有嗜蒺莉非所凭外观乏婉软中质韜玉冰取物
取诸内惟彼识者能

朱李

珍果繁西园登盘得朱李白雪凋春花缥丸结夏子肉理浆包寒肤衣粉凝紫细碎轻菱苳甘
软异瓜柿不须论投报聊复冰寒水伯阳指仙宗房陵诧遗美钻核乃独善王氏亦已鄙味苦
吾所幸道旁岂云耻君看齐物人无用乃天理

行药

行年将七十衰病乃其时矧兹地气沴州在大泽陂忆昨度炎暑林莽居舍卑山色不到眼地
无清泉滋晴阳则鑪冶陰浊则蒸炊气腕疲呕泄躯骸醉支离节气近寒露生意稍可支故人在
秦晋知我穷至斯衮封衆药品皆自州土宜形味紫团宝苗 西岳奇灵如雪山草秀比商
岭芝是身本无有疾病何用治自爱聊尔尔道人母我蚩丸膏或?咀何复求良医策杖行东圃
运动疎通之收复我冲粹驱散彼邪疵养生固有道一溉非难为千年鲍昭後复有城东诗

焚香

清泉鑿石饼南海宝洲香下帘隐几坐烟霏散央央春云乍凝聚玉穗忽纤长瑞鸭戏歆吐双
卧不肯翔佛国宝芬郁仙圃花气芳真灵格杳冥邪厉毆幽荒安得逍遥人肯顾来此堂说我
无上道德音斯不忘

虎枕

耒阳得奇枕状比猛兽姿呀吻目睛转中有机纽施持须世所戒羊质还可嗤莫作邯鄲想曲
肱吾所师

忠肃集卷十五

卷十六

钦定四库全书

忠肃集卷十六

宋 刘摯 撰

七言古诗

汶上送黄任道游吴

屑霜飞空木叶脱长河波光碧玉滑江南仙客厌尘埃归梦寥寥向吴越故溪时到春未还正是梅花弄香雪太湖寺下吟新诗姑苏台边醉寒月江橙甘熟霜夜酣吴酎香醇冻醅拨辽东归鹤悲是非钟阜晓猿惊契阔嗟予不得从之行兀若孤鹰叹羸继东南山水游子多航深历险无时絶去非贾道百不一寂无风咏十常八君提吟笔寻乡邦词源浩若天潢决形容物象空鳌峯搜摛秘怪穷禹穴人生难足惟胜游意适何劳计穷達峥嵘岁律南浦寒早晚归艍櫓声轧不独孤陋勤所思双白应须念亲髮

秋收

农家之富秋始见十色田利皆丰登担羸车载上场圃环舍隐积如高陵园蔬林果不足数山雉野兔霜未增连村箫鼓谢神祝穀黍换酒无斗升田家之乐岂不好胡为不归邀我朋榜舟梁泽家汶北咄哉反此如羸鹰社日陪祀渚宫退作长句呈圣邻屯田

楚乡地薄气不密寒燠开闭无春冬盛阳不効二月尾日夜霰雪雨以风社坛污潦害展祀奠献蕝席移渚宫层台大厦礼少变饩羊不去精享通须臾已事云解駁象纬落天曈矐起凭危欄久顾望肃然羽翼开愁胸恍疑身世此何地蓬瀛岌岌三山宫平湖无波万籁息但见桥影僵双虹岂无林花与嘉木荡摇摧折今一空枝头尖纤卷寒緑水面狼藉浮残红荆州独此号胜地经年未始来其中夤缘陪祀幸一至岂期端值青春穷嗟吾老去少懽绪况乃人事多忽忽与君却作避暑约解衣岸帻看云峯携壶挟策无不可此乐岂特春游同送客渚宫归至学舍览君佩独登城楼诗次韵奉和

渊明田荒犹未归胡为簿领甘沈迷乐时选胜岂无意政值一春风雨凄但宜夜几守黄卷酸寒拥鼻灯火低盛阳充发破陰沴几日天气回惨凄朝来送客过楚渚平湖绿净凝玻瓈乍惊物象豁尘眼亦有亭榭堪攀跻草光浮浮古岸北花气霭霭层台西盃盘共坐荫清樾歌笑起行循大堤皃雏鹭子漾浅曲絶胜乳燕巢深闺幽寻踽踽不自觉城阴步滑犹春泥心闲漫随流水远境静却憎幽鸟啼何时短艇弄明月安得巨笔凌长霓归来学舍坐搔首外物何足干

天倪阔疎但愧事业浅刚徧分与时俗睽如君年少喜学问青云万里端可梯城头新篇真自得岂假朋友相招携我亦林泉偶寻胜因君成咏初无题登高能赋子之职敢以城阙讥挑兮

承牒荆门呈诸友

方城道中诗墨新【原注泽民近沿牒方城有诗】荆门山下有行人同盟还来无髣髴傍马欲去尚逡巡荆门西行一百里玉泉之境天下闻诸君不能伴康乐请赋黄鹄飞秋云

次韵王潜江马上长句因招之

双凫飞下王乔县别後绪言谈未遍君能有意齐是非吾久无心耻贫贱青袍尘满高情倦急索归鞭重增眷陶家池榭虽所怀楚渚林亭应未见

题致政朱郎中适园林

南宫仙郎緑髮翁归来甲第荆城中翁家祖世有名德至今孙子传清风园亭继继事营治增华到此穷智工铺张百物各有职峥嵘一界疑壶宫清明过去春事老林丛暗緑阴相通朱栏曲檻巧晖映晓风夜露香溟蒙溪鱼野鸟乐晴昊碧萝怪石依长松方城清泚虽可濯主人纓上尘久空年年三日纵士女观游思与乡人同及时娱乐日月迈肯使蟋蟀悲晋公阁书深藏一万轴牙籤锦带严编封脱巾解屣游览倦燕坐自有黄卷功三年羈客偶幸至归来搔首嗟蒿蓬生涯适意最难事安用勲业铭鼎钟乡人勿笑翁不出门外势利方憧憧

贈穆道士

离石道士心迹间学行已老犹少年昔游京师友豪贵声名成就来淮山恬然颇已厌俗累靖馆严密谐新安朝真香火俨昼殿步虚声谣铿夜坛六甲星辰逆祸福一鑪龙虎谁神仙北州有客性疎野误为世网相拘牵时来与子款谭晤闲心慰愜愁病蠲曾将出处大计说闻吾至论颌曰然东风满江春潋灩孤帆晓挂荆州船他年会合未可约访子应在蓬莱颠

次韵晋陵吴秀才传见贶

道卿诗思清如水披衣霜夜吟寒星意深调苦悲万古平明寄与鍾子听北牕病客爽心骨若饮甘露枯肠盈嗟夫世故玩形器智者营役奔风霆区畛大小各尔志不可慕者鸿冥冥吾于世珍粗有觉未逢烛理瘡不鸣短篇讲好聊写意弱赵安敢当秦兵

小孤山

万山逶迤起彭泽齐驱拥立江东隅水西平地旷千里惟此一峯高且孤气严势峭鬱独立意不与彼为朋徒夹水对峙寡当衆衆色媿惨惊顽麤天公结融若有意以此壮我淮甸无青天

长剑倚千丈碧玉大笋巍一株古今画工昧好恶峨眉鴈荡争为图方言讹传楚俗鬼立庙更以孤为姑我行不暇谕父老正是北风吹舳舻

自福严至後洞记柳书弥陀碑

一盂僧粥三鸣鸡渐望天角生晴曦积阴凝霭不得肆荡滉破散争纷披清明物象各有职如再开辟平艰危游人襟韵廓以喜晓指後洞都忘疲小楚亭北望明灭宛宛一径微如丝问云般舟道场路从此亭背无险巘寺久荒寂无足往念有子厚弥陀碑独趋一里转岩腹剥粉败赤逢门楣村童门关语嘲???似云乞米僧未归亭亭故碑立青玉覆以老屋疎且敝常嗟古人不可见尚喜书法存于斯世言书字出心画体制类彼人所为子厚少年颇疎隽字合飘逸狂不羈胡为气质反端厚至今观者多有疑或云彼以窜逐久气志软熟非前时又云高才尚薄世故独立法无所师吾嗟世俗日无理好恶不正论苦畀臆决万事岂独此此书何媿人不知碑阴三百四十字疎瘦劲丽何精奇九十三人姓名具陈纘宝历元年题云此柳书一碑者元和三年刊厥辞至是二月始建立都其事者杨与倪尘蒙壁碍世未见自我访寻初爱之嗟物晦显似有数恨不从事毡与槌巉岩西山邃无数行及二寺方晨炊东南谿磴斗孤絶下及平壑如悬梯南朝佛子谓慧海卜庵于此存遗基鬼神馈食以车运石崖辙迹如在泥智不足以尽万物敢决真伪论是非老僧夜语亦有理明发策杖犹迟迟

代书寄文莹道人

白云孤起飞杳冥光如片玉轻如冰出山归山两何意行止偶然无滞凝故人浮舟数百里得得访我湘江棱二十年间四相遇童颠疎鬓霜各增寒斋笑语极微妙共以身世均鷗鹏瞥然去矣不我告振锡忽借南风乘聊一徘徊驻衡岳遂能放意穷临登崔嵬老骸不知倦软輿蜡屐勤跻升穷岩险谷访秘怪往往清啸猿鸟惊长泉落石响寒玉故意写在朱丝绳仰挥云烟敛羽翼俯听誉毁真蚊蝇书来所说谓如此而惜携手无友朋又云吾庐已堪睡况彼城市尤足憎意若欺我在迁谪故以胜事用夸矜嗟如予者安足道进退大计两未能平生雅志在林壑误落世纷亲缴赠悲吟黄鹄慕越客谢病高居思茂陵羨子徜徉类云鹤顾我拘窘如羈鹰故应题诗遍崖壁曷若寄我勤緘滕山童痴立索书去写此安足倾愁膺

春日述怀

祥风灵雨过二月陈根新种苗争抽早蚕生齐渐如蚁温饱指此无岁忧春酒未尽社已过节物又近清明头茜裙纈袖事来往方盘小榼相饷酬田家之乐世皆慕贵仕难去贱易谋行矣请谢茂陵病一廛一耒归先畴

崔仲岳鹤舟

绿髯满颌光且修紫石双眼寒鋌浮茫然襟韵自轩豁见于声貌非懦柔昔随羣衆退礼部归来便作沧浪游笑买渔艇出巧思饰以丹白名鹤舟长须赤脚分相与鲈鱼美酒他何求高吟

清风洞庭晚一笛明月吴江秋白云无心伴疎散丹经有诀穷秘幽志非谤国慕处士性欲避俗追浮丘不山不渊隐无迹时时飞棹来皇州保康桥前舫清梦戟冠烂醉都城楼胸中有物齐出处天下无方随去留太平取士有阶陞几人年少能公侯公侯未有君所乐一时外物为赘疣束之簪绅岂其性轧以利害仍相矛盾嫵粳稻粱効鸡鹜驰逐羶粃争虬蟬相逢感慨慕黄鹄嗟我方以斗禄囚贱官绶蓝谁不尔应书随俗卑可羞鹤舟之乐慎勿弃劝君起者非良谋【原注诸公诗劝君弃鹤舟以就举故云云】

虞城早起道中寄公秉幕府诸友

屋角一夜羣枯号晓来旷野风如刀峩峩残雪路摧马格格寒气冰生袍四支僵痺非我有况彼鞭鞅难持操天东朝日冻应涩亦恋阳谷犹深韬居常谁不事行役我行适此时令遭因思都府盛僚友人物一一皆贤豪想今酣寝梦方足初离密幄惊寒朝左承右侍各以职气语兰臭顏如桃奉持巾匝事盥栉傳唇泽面供香膏不容发绿一点变亟以宝镊争除薶炎炉却坐日当卯进酒为寿倾葡萄捋须束带欲出户问讯分付犹怵怵体舒意适自稳暖洋然盛气虹霓高此时岂复念寒旅嗟我劳佚何相辽入趋留守退幕府坐据大案临诸曹曹司进若鱼在贯文书盈抱纷牛毛争前鬪敏请莅职研磨浓墨挥长毫左手铃前右摘尾落纸叶叶如翻涛逢姓书字且不给何暇可否知根巢坐中耳目已烦困庭下敲扑仍喧嚣伏膺胝手腕疑脱退食笔砚方能囊乘除赖有此事在庶几可以均吾劳人生误落世网内区区系累安足逃要之虚中日自静不使内外相鈎胶无穷来物彼千万坐任变化无吾骚峥嵘年华已迺暮不日春意生兰蒿一樽相与莫相放天下万事从滔滔

还郭祥正诗卷

李杜酒死诗不作风雅三百年来穷世儒未必甘汨没才不迨志终无功汾阳有人字功甫歛然声价来江东当时未冠人已识知音第一惟梅翁翁主诗盟世少可一见旗鼓欣相逢当友不敢当师礼呼以谪仙名甚隆【原注圣俞以君为李白後身故诸公皆以谪仙称之】君亦自谓太白出世姓虽异精灵同姑苏江水莹寒监江上碧玉排羣峯壮吟豪醉售佳境日题百纸倾千鍾折腰蓝绶岂所乐养亲斗粟曾未充蓬萊幽梦挂寒月青山归思随飞鸿书来寄我三巨轴华絨开破溪云封駭然按剑览珠璧悸若赤手勑蛟龙长吟千言短数百造语险怪神为工四明贺老忽去世伯牙悲怆闲焦桐嗟予逢子衆人後今其所得何最丰前日过我北池上正是清露沾高松凉轩坐听哆宏辨瀑布千丈悬秋风谪仙有此愿自重世俗酣尚惟纤穠彼其耳目不自信滔滔谁乐闻鼓钟太上雅意兴礼乐一日鉴赏期至公煌煌帝业子当颂勿叹憔悴空山中

送蔡景繁赴淮南运使

新堤洛水东风峭下入长淮春浩渺淮南使者蓬萊仙叠鼓鸣铙画船晓旦时契阔慕声名晚岁绸繆亲紵縞磨铅并直登瀛州对案同厅佐京兆青蒿长松慙异质流水高山喜同调虽当倥偬喧嚣中不废罇罍与吟啸岁月扑面来纷纷冠盖送客声扰扰北园去岁赋红梅南浦今

春歌碧草黄金龙节使光华白面书生才缥缈世高台阁与省府偏历从容誉清劭投虚余刃
无足为澄清百城付谈笑时行有命又有义所遇何多亦何少未应刻意怀轩裳知有高情在
鱼鸟黄鹄千岁凌长风奈此沙边老鶺鴒朝廷羽仪重人物行闻追锋赐严召玉音寄我其无
忘时有归鸿下云表

酬寄

赵郎趁我弛担初为寄肘後杨炎书盈编专备瘴岭病仁及来世功谁如城南老庐有别舍我
来埽榻成燕居坐忘不复一念起寸田自治何须鉏养生防患不知此从事方药亦已疎飞鸢
未妨随溪水黄茅正使侵庭除玄膺晨漱已可饱脯膳况复余米鱼聊将此书一过读寄语庶
不忧乡间

跋览前此唱和诗卷有诗次其韵

穷不废诗真技痒笔研风云日相向圣贤发愤乃有作三千余篇自古上荒城谁我同此声惟
有哀猿啸青嶂穷人所作诚已难平淡丰腴乃嘉唱横槊壮气虽萧萧击鉢争先犹行行敢怀
修门成怨骚亦防饭颗嘲苦相江湖千里山千重朝夕供吟纷万状闲适非以娱时人可口甘
酸劳醞酿【案後诗韵此处缺两句】大儿归不开卷轴喜我穷通心已忘种瓜颇欲学东陵
醉尉亦从呵故将古人能轻万户侯为有千篇相等量

再作

何事劳心四愁望侧身泰山日东向君子九夷犹可居已谋筑室金溪上距江蓝輿才两舍遶
郭屏风列千嶂门中翰墨传风流自为师友相赓唱曹氏声名父子间谢家文章弟兄行古人
至乐盖在斯得意未肯博公相顿挫万象归毫端雕刻丹青尽名状古风严重周庙鼎小律软
美楚人酿居人惻惻盈锦囊游子篇篇出惊浪苦心颇恨语不工故实仍嗟老多忘惫休矍铄
空据鞍銳勇终输少年将主盟定霸益勉旃少陵勲名何可量

长句送跂之官蕲水

前年东秦夏六月望日拜恩初赐袂降秩削职迁黄州仓皇束装三日发故国东平不入城北
山一夜辞松栝亲朋问讯若梦寐骨肉分留作胡越论罪岂合有民社抵牾正欲加鉞钺仇家
之议不尽用天地寬仁日月察才令分司置之蕲上表谢恩秋已末以御魑魅乃其分欲居蛮
夷圣犹屑蕲也虽僻自善地回环山溪富林樾平生雅志在江湖颇与蕲人相缔结收拾孥属
已团聚南北无心更分别白鱼煮玉杭炊珠佐以秋菰与春蕨筑室求田虽未就典衣卖装略
无阙大谬不然心已忘笑人非工已愈拙人生端若梦栩栩事去何庸书咄咄大儿调邑换江
南要虽分房无远别地劣两舍不宿春晨起为书午可達邑四万户号难治民杂江闽吏贪猾
锄强洗恶勿着意鱼逃至清人忌洁化以诚心磨以久教而後刑不怨杀得闻无毀亦无誉以
慰萧萧双白髮

易元吉画猿

榭林秋叶青玉繁枝间倒挂秋山猿古面睢盱露瘦月氎毛匀膩舒玄云老猿顾子稍留滞小猿引臂劳攀援坐疑跳踯避人去彷彿悲嘯生壁间巴山楚峡几千里寒岩数丈移秋轩渺然独起林壑志平生愿得与彼羣吾知画者古有说神鬼为易犬马难物之有象衆所识难以伪笔淆其真传闻易生近已死此笔遂絶无几存安得千金买遗纸真伪常与识者论【案此诗据声画集补入】五言律诗

秋日县斋

节物秋将半疎慵日益加不为投効去徒有折腰嗟味酒怀江鳊乘风忆海槎东篱满凉露已约伴黄花

九日再招赵湜

夜露感庭鹤秋风吹海槎相思悲岁月寂坐望云霞终夕孤蟾魄重阳近落花君无鄙贫令金糝徧陶家

和移居二首

作邑风流在新居卜筑完清懽橐书入小隐奉亲安日淡城楼晓霜深囿树寒吏涂何所得试向静中看境物生新趣蒿榛失旧墟避尘深户牖待月广阶除醉梦飞鸿外吟怀晚雪余相思岁将晏谁叩草玄居

登徐州城楼

彭城楼上望旷然今古怀山形东负岱河势下通淮白鸟孤云并荒烟万木排吾观兹有得兴欲拍洪厓

山口

古渡倚双棹萧萧秋色残山川南去远风雨北来寒极望销魂易清吟得句难依稀故园梦千里下云端

送曾绎松滋令

粹行完圭璞谭经得圣真青袍尚腰折素蘊喜民亲友益予孤陋官闲子隐沦风骚应赋古亭下蜀江春

次韵耒阳邹明府庸

初作南冠至随闻墨绶来犹怜百里远时见两凫回江日披梅雪春阳动琯灰论文须太白还忆一樽开

泊汉口

大别山前晚维舟望古津孤烟汉川树长笛武昌人珠曲今何地兰洲欲暮春文王尝美化无复见遗民

舟次胡陵中秋不见月

舟泊古城下重云埋桂宫旧期今夕负清赏一年空远浦依微笛阴崖断续虫篷牕强樽酒聊更约秋风

秋泊

寂寞将军港船头撞岸芦寒涛能灌口幽鸟劝提壶水涨江鱼绝秋深野菜无如何晋张翰归思为蓴鲈

梁泽雨中

点细波鳞浅声繁客袂凉山烟藏晚翠水荇濯秋香帆桨无聊国蓑轮自在乡风骚已多感更欲上潇湘

次韵杨郎中洙早春

病客疎慵甚江城节物新东风惊柳思暖雪鬪梅春老信来双鬓闲愁着一身贱贫非士耻漉酒有陶巾

次韵吕书记堤上见梅花

多病逢多事穷年负物华探春输野客骑马看新花南国稀江信东风恨笛家琼枝心愿见行亦下堤沙潭州湘阴县万氏积庆堂【原注堂在茝旁以岁时祀享】

庆自前人积堂因孝子成惟时传有後于此事如生乔木风烟老佳城气象明谢庭兰玉盛知不负家声

送永州黄判官并寄丁郎中

零陵古佳郡山水楚南奇太守逢康乐佳宾得杲之翩翩渐高陆逐逐就新羈别子东归去长
沙风雨时

唐诵甥二首

唐生四方志投笔慕前人此日免鱼腹异时观虎臣茅柴酒亦美玉缕鱠应珍莫恨衣都典归
来是早春因滞江州久谓为千里遐欣曾逢漂母几欲卖朱家痴坐瞻双櫓东行负九华归须
谈旅琐勿作胜游夸

次韵圣和秋夜对月

绿桂西风老金波玉气明清霜酣夜色羣籁息秋声毛骨无遗照关河共远情十年吟塞曲画
角厌悲鸣

病起酬圣和

安佚失于恃病邪乘所虚遂婴漳浦卧便忆茂陵居幸尔筋骸立颓然鬓髮疎烦君山柏句慰
此不材樗

留符离待乡信未至

先陇封楸後羈臣赐玦时放舟初草草去国合迟迟珠滑新粳粒金酣早蟹脂南迁真不负屈
子独何知

丰齐道中

路远程难计人慵马自迟草蛛横布网桑螵乱垂丝村落黄梁饭墙篱紫菊枝时丰物皆好客
思在青旗

送王子正寺祥断

君仕本儒雅故宜京国游官趋廷尉府心异法家流白草侵寒驿清霜拂晓裘行行句应好云
日望神州

小驷送钱中道

老马久劳力主人真寡情知非换妾去颇作恋轩鸣楚豆不为薄江刍无限生诚能怀旧德时
借尔山行

次韵王仲達龙图

常慕诗之学今逢将者才
讽吟真嘅炙畏默若衔枚
天地秋风老江湖醉梦回
韶英方合奏难使击辕陪

早行寄田七

鞍马三更梦江湖万里心
辨途听犬吠占晓望横参
浩露濡衰鬓微风动醉襟
输君正酣寝鼾鼻沸雷音
【原注君善鼾】

简定国【原注时以目疾在告】

原子贫非病张生心不肯
兴随缘自足嬾与拙相成
竹叶疑无分金徽尚有声
幽怀谁晤语空此望东城

送席汝明

得子固已晚嗟予材滞顽
义合乃朋友不在疎密间
江阔东风冷梅披腊雪慳
扁舟共春色相约到淮山

送计希顔

翩翩远游子驱马乱山岑
丹穴飞鸣处高堂日夜心
春风巴峡晓昼雾楚城阴
家世文章事仙台紫桂林

题贵池亭次蹈韵二首

一夜山南雪清寒江上州
年华随水去客兴为鱼留
闻鴈思湖表看梅寄陇头
檣乌风信好紉鼓洞庭舟
鱼味年年美何须问旧池
江山清不改陵谷变难知
节物惊冬至萧条使客悲
谪仙游赏地空有白猿诗

丙子元旦三首

瑞历开三朔祥风验八方
年华恨催老节物喜随乡
郁垒须时设屠苏独後尝
佳辰谁与醉梦绕故溪傍
爆竹惊山鬼雕幡戴楚冠
祝延千岁酒练气五辛盘
江冷东风外天回北斗端
羌城霖雨甚从此看春寒
遥想千冠佩朝元太极天
鸣鞘开殿户索扇起鑪烟
庆事通祥表和声入乐悬
江湖祝尧意仁寿万斯年

和吴端甫书怀

旧学惊心在穷居惜鬓华诗书凭净几水竹抱邻家霜雪巴西梦风波楚北嗟知君厌留滞我亦正尘沙

二月二日

江乡春值闰二月似深冬雪湿妨挑菜雷寒未起龙鸡虫闲得失蛰触小交攻稍觉云天霁西山翠峯

送僧怀善

独鹤翩无累孤云晚倦飞羣山带江处一锡背尘归妙学穷神秘高怀熟世机漳滨多病客空此望岩扉

过桑八墓

夫子能诗者寒吟四十年于今传好句无处访遗编古意哀东野穷愁死玉川惟余北山塚松柏锁秋烟

寄长吉孙二首

别尔忽经岁言归欣好音神清率更瘦学苦郑玄心竹径依山远沙溪过雨深世科思汝父即已御祥琴赏罢卢溪菊来寻楚泽春兰舟逾百日椒酒值佳辰勉尔青箱学宽吾白髮人小园游息地松竹更相亲

次长庚孙自汶寄诗韵

近就陶家舍扶疎草木周颇移兰就水已计竹为楼饮食随宜足光阴任自流尔曹来伴老日问下江舟

挽慈圣光献皇后二首

四纪坤仪正三宫册号尊蚤还明辟子坐见太平孙治诰遗神几廌衣出寝门如何天下养难驻白云轩圣孝心崇报宫庭诏屡颁丧期逾易月陵兆改因山已想天人乐犹晞药使还蟠桃旧亭上时节寿觞间

挽濮安懿王任夫人二首

自昔商任贵于金庆裔光来嫔周季历有子汉宣皇桺玉辉幽竈车云拥画裳哀荣无所憾新庙五陵旁鹵簿三川晚佳城一品尊翟衣新褕命神寝旧王园凄断风铃远青苍雾盖昏从今

知圣作大义称私思

挽大行太皇太后三首

四裔柔怀外羣生惠泽中帘闱九年政覆载一心公马邓徒闻俭姜任讵有功风云黄道静杲日上天东典礼辞先后恩私杜外门虚心延衆正损上益羣元仙路山川近徽音四諡尊宾天去何恨圣孝托神孙夕月沈金殿秋风冷玉衣临当复明辟忽自厌繁机药使来何暮嵩呼数已非孤臣恩未报泣望国西畿

挽中书侍郎懿献傅公二首

里閤推前辈臣邻接近班深心语默外大节险夷间付托龟趺字哀荣马鬣山遥知济源第风月草堂闲公昨初移疾予方丐一麾寻闻升屋告适是出关时零落孤龙友【原注公与予及故孙莘老最善约为三友】绸缪记凤池白头怀抱事西望不胜悲

挽右光禄大夫知枢密院事赠开府仪同三司孙公二首

岑令神情竭裴公柱石衰国贫黄髮旧身负赤松期人也将安仰天乎不慙遗延和听诏语深见两宫悲枢极元丰议人犹记话言载来筹庙幄遂见偃戎轩一品哀仪重三司锡命尊绸缪承晚契挥涕望西原

挽司空文定张公二首

德业文章事公乎取数多虽惊坏梁梦会有望门歌人赎心徒尔舟移古奈何青编如可托後世看巍巍澹泊环中妙超遥物外仙百年从委蜕一匱戢弥天晚契承知己遗风在象贤东桥松柏路不得望新阡

挽司空赠太师申国吕公四首

元佑飞龙日淮南卓马归周人瞻赤舄郑国赋缁衣旷度销羣异清言析万微方依泰山重俛仰失巍巍衡镜公多士蓍龟信两宫羣生遂耕织四海戢戈弓夺去天何速藏深壑已空潭潭新府第东阁闭春风玉輦躬临奠金钱诏治丧綈宫周尚父世爵汉扶阳位席虚羣望松阡竈旧藏门中兰玉盛有以慰思皇岁有悬车表新闻曳杖嗟风云四朝仕公相百年家故国山川近西郊鼓吹譟旗常难尽记膏泽徧幽遐

哀鲁国宣靖曾公三首

柱石三朝重轩裳五纪荣忠勲等张霍善庆似韦平光气收辰象仪型失老成易名宣合靖千古诏幽明鼎铉调元久貂冠就第闲朝廷方宪老梦寐忽颓山白日佳城启东园秘器颁深宫

那可见桃李在人间不愁天何理云亡国所嗟还应骑列宿但说去流沙清庙陪烝享鸿枢见世家悲风溱洧路哀咽满箫笳

哀光禄王卿二首

天骥腾长坂秋鸿御顺风俄从绛衣使不待黑头公志蕴留家集光华掩竊宫惟余善人报流庆在无穷义直中能恕才高气不矜衆人疑白璧吾道信朱绳勲业无天命文章有子兴冥冥何可诘万古一丘陵

哀太尉惠穆公三首

弈世承圭袞三朝侍冕旒临边晋羊佑坐幄汉留侯乐易门多士几深庙有谋那知天不憖俛仰一山丘四塞宣皇武殊庭远世机如何梁木梦不待袞衣归门户传兰玉忠勲载鼎旗空余殿楹字鸾凤五云飞望履鸿枢府熙宁始识公容无高位气语有大臣风感慨方山仰惊悲已壑空緇衣国人意转入薤歌中

哀应真李先生三首

名教心为乐逍遥志自求遂成君子隐初异道家流风月闲三楚巾裳付一丘空余清泰院云薜旧岩秋节行幽人正林泉隐者居忽歌东鲁梦未上茂陵书世变还舟壑门宏待駟车衆哀无以致为托挽声纾生死心先達康宁寿亦遐令威成白鹤老子去流沙妙意传琴祖微言补易家试观余庆後簪绂已光华

挽秦国夫人三首【原注安厚卿母】

久被三宫眷谁知五福纯脂田天府国彩服斗枢人枕梦华堂晚仙期碧海春寻常居养地悄悄绣帘尘罽毼来中禁箫笳去国门素冠空列鼎白髮但歌盆彤管音徽盛甘泉像貌尊所传天下劝岂独慰儿孙夫荣子方贵全庆独乖离昼静兰羞歇秋高薤曲悲晴云紫壽陇霜日照铭旗无复升堂拜空余执紼词忠肃集卷十六

卷十七

钦定四库全书

忠肃集卷十七

宋 刘摯 撰

五言长律

县斋岁晚寄莱芜田同年【原注数字直儒】

西北东南邑相望叹索居音尘路千里契阔岁三除薄宦随羣衆平生媿拙疎茂陵将谢病中散不便书燕泽归鸿尽东山晚雪余江湖劳梦寐风土污簪裾尘卷吾成癖囊诗子富储孤怀吟剑铎旧迹梦崑墟今古看毫髮功名賸贅疽何时拂衣去相与醉鲈鱼

渚宫

坤腹疏灵境蓬宫抱故城清风百年内芳草几番平树色埋危屋湖光泛彩楹真游三岛近仙界一壶清外虑随尘隔虚怀敌水明松筠烟翠老台榭緑苔生敲枕巫云近披襟楚吹轻舟横疎柳静桥卧晚波晴事往空歌啸人闲自醉醒我来真漫兴鱼鸟莫多情

梁宣明二帝陵【原注宣明二帝萧警萧岿也初湘东王绎平侯景之乱即位江陵改元承圣三年兄之子岳阳王警引西魏兵攻绎害之寻臣于魏而称帝于江陵传子岿岿传子琮通三十年为隋所灭】

侯景沦江左湘东复有梁经纶鍾厄会祸乱发诸王忍死瞻姑熟寻戈起岳阳车书千里蹙符数百洲亡二主非神武开基挟北强中兴乖晋睿慙德肖吴光历闰天余气蛙鸣井底乡快心真噬腊覆手已牵羊臣妾随三纪圭裘隘一方故都终契阔宗祀各悲凉双塚留衰楚遗孙盛有唐神灵依古刹云木抱回冈野火穹碑断秋风蔓草黄樵童雍门叹總帳魏台荒天地双车轂兴亡一酒觴冥然无足吊幽思漫徜徉

送李秘监代还

天圣旁求盛明公射策贤三朝推国器一节到华颠卵翼千余士冰霜四十年至诚忘畛域端已笑韦弦政爱偏东土民讴戴两川旄飘外台节贯朽大农钱松柏风霜後蓍龟祸福前求开建封幕又泛马融船士望儒林丈官仪秘府仙仁能化鵩泮明不浚鱼渊蔽芾人人颂京坻岁岁田吟春西渚殿醉月北楼天卓马周侯覲三公汉守迂蜀江飞大旆魏阙望非烟贱子何为

者名途祗偶然世高刘表幕才媿杲之莲愿借今难及遗恩久自传邻哉拱尧舜天下俟陶甄

秋雨用唐诵韵

大雨余炎洗清秋爽气回人情醒委顿物象救低徊牕岫滋乾翠田禾起早栽云空明复晦风
缕密还开草合门三径蛩缘壁四隈药奩烘润幙书几拂阴霾蓑底渔情乐沙边客意催帘帟
晨气湿蕉竹夜声来想见天开月行期菊满杯端居聊可喜不用拂莓苔

六月六日避暑山寺次蹈韵

楚国元卑湿炎天更郁蒸风吟同倦虎霄望剧愁鹰渴肺尘将岔流肤汗不胜嗜肌纷暗螭遶
鬢鬬飞蝇六月常难雨三湘不识冰炉烘一天地火药万川陵气候金初伏襟怀水未澄高明
寻偶得林麓远同登此地聊幽遁危亭更上层泉声悬嵒嶂松影转觚棱汲井沈圆李缘池摘
翠菱凉清生洞壑秀绿动沟塍佳气西频望乡栏北屡凭有期羣野鹿无法问山僧云石逢如
旧巾裾见若憎聊堪优卒岁不愧俯扪膺

和路秋怀三十韵

天地炎氛退江湖颢气凉西风来沆砀久客兴徜徉夜匝鸟南树心惊鴈北方乍因鲈感慨肯
为鵬忧伤纵步青筇杖投诗古锦囊精荧篱下蓓狼籍沼中香妙理曦庄達衰歌笑楚狂是非
来衮衮光景去堂堂别浦丹枫老闲园碧草芳林颠蝉嘒急霄路鸟飞长晓露清饶月晴云暖
护霜琴中知水意楼上得山光桂长金波外槎沿玉汉傍江天晚摇落泽国少凶荒竭作趋川
塋欢言治圃场神祠鼓逦响社瓮酒初尝自昔悲时节闲愁满肺肠宋生辞辨屈甯子意歌商
代谢惟寒暑平均彼昊苍放情羣鹿豕度德负簪裳致主深慙尹汪陂又愧黄无功可铭鼎有
学不鍼盲赋兴须潘子诗怀勸谢郎虽欣去酷吏更忆舞商羊不解葵倾日宁忘鹤返乡锦封
西泽鲤珠剖北山梁塞马难前虑江鸥肯下翔无为泽边悴更卖橐中装朝野多闲暇洪纤遂
乐康何时放归櫓大艗水中央

次韵跂蹈登护法院澄心亭

昔泊铜陵县重来迹可寻洞岩一指顾花谷记登临岁月回秋棹江湖入醉襟鱼篮腥邑市俚
语杂山禽紫笋抽姜圃朱丸缀柿林长官夸乐岁游子足悲吟眺望春思曩疎慵老叹今篷牕
把书卧空此望澄心

题和州云荫轩

古木无年岁新亭托隐栖交涂寒纛整垂荫乱云低明暗苍烟合深沈緑幄齐雨回阴径外日
隔画檐西凉露缘虚滴珍禽占密啼仙家青桂洞隐士碧萝谿覆冒均松盖妖穢笑李蹊坐疑
秋色早境与世尘睽地惜开轩晚名因寓意题还当推大荫天下一民黎

城北庭

边草连沙白燕云拥汉青将军眠塞垒使者拜王庭金帛三千乘和亲七十龄豺狼甘血肉骐驎老林垧秋色榆将落书生涕但零边尘何日靖愿一震皇灵

次韵谿氏东亭书事四首

寄隐无怀土为文倦解嘲地闲从草徧门静絶人敲螳伏寻蝉捕莺斜趁蝶捎楚冠谁问事越鸟自知巢罇酒欣常满邻书得借钞援琴意流水弹剑恨空庖兰径深添菊蔬畦净拔茅殷勤谢老圃善恶不相殽

幽怀乐所遇且任北山嘲世事棊秤变年光石火敲松筠阴自冷萝葛蔓相捎草密蛇横径檐低燕露巢楚醪无再设蕲纸不重钞旋买杭留客亲科笋付庖灵山瞻二祖归路近三茅塞上藏忧喜人心浪自殽

朝夕此疎傲东亭无我嘲并城田鼓作邻寺食鱼敲树密日先暝竹长云可捎远书惟鴈足小隐是鸛巢茶忆新团碾琴繙旧谱钞恁时常笑屈投间实慙庖霜雪期松柏风云富草茅周郎晚菰近有以代嘉殽

自有逃虚乐徒兴尚白嘲晚槐嘶意急蠹木啄声敲犬傍青篱卧童寻赤枣捎微茫枕间梦安稳睫边巢困忆石泉弄渴思冰蜜钞袭香兰入佩益气芑充庖疏洗王家竹诛鉏宋宅茅东亭真可乐万事付纷殽

寄长芦福禅师

境与人相得长鲸宅海宫香花六时会心迹万缘空地恐诸天接江从九泽通潮喷寺门冷霞拂殿檐红暮鴈来淮北朝帆下浙东千重苍桂雾万顷碧芦风衲拥山云暖餅函水月融当年约莲社何日谢尘笼

七言律诗

离冀州马上示赵湜

马蹄轻滑背城闌广陌朝晖健醉魂暑气泛清怜小雨木阴环翠美名园宦游淹薄风尘熟时事侵袭耳目昏独有空愁慵病客肯来吟啸伴南辕

纪南道中望荆渚

地经三国鬪龙蛇江势天形控蜀巴藏雨鸟归荒冢树采金人聚浅壕沙子囊城废今秋草高

氏宫遗昔井蛙倦客诗情真劫刼得于鞏马似曹家

双桥

危桥相向翼高堂步步行空跨石缸汉外夜惊灵?度雨中秋卧彩虹双烟开从此瞻瀛岛路远
何时过楚江记得扁舟緑杨岸画栏朱柱对篷牕

将至监利先寄王令

屈指中秋六晓昏大堤丛竹见霜筠【原注夏中奉有堤竹成丛之句】未乾醉月题牋墨随
蹶还家走马尘抚景敢嗟经历倦轩眉频喜笑言亲明年各是东归客羊酪蓴羹万里人

监利泛化丘湖遂至北洲寺

淼淼平湖阔楚江方舟两桨破秋光罨风钓月嘉鱼国飞雨翹烟白鹭乡故老昔能悲岸谷骚
人今但爱沧浪北州更有忘归处寺压苹花千里香

马上和王监利见寄兼简邹泽民

忆昨西归春未穷重来堤竹已成丛川塍足水稻齐插霖雨涨江河欲通一马久期均物理双
鳧安得快仙风故人况有潇湘约应喜樽前笑语同【原注二君江南故人而泽民亦见约会
于邑中】

高唐孟延年明府见招

公干方吟簿领迷浩然诗句慰相思壮怀已有潘毛叹陈迹犹怀汉佩奇塞下书音稀鴈足江
南秋味忆蓴丝祝君多种官田秫欲趁渊明酿酒期【原注来诗有鬢丝之句及道昔年金明
胜游】

招邹泽民

日借西园放客愁忘机鱼鸟分相投水深碧沼前时雨风满高台六月秋蝉嘒已惊移节物鸥
羣何事亦沈浮烦君试拔尘埃足来伴元生漫浪游

次韵邹泽民感事

河湟虬虱玩天恩饷馈驱驰不足论陛下至神收庙算诸公何术偃戎轩凯歌计日登宗祀归
将惊秋望故园贱士江湖真碌碌狂吟无以谢乾坤

清明日至潜江马上先寄王炳之陈子正

桃花飘泊万红英独佩诗囊傍水行二月东风撩霰雪峭寒天气作清明病怀敢有贤劳叹壮志徒因节物惊罇酒喜亲陶靖节经帙仍近董先生【原注子正说春秋】

五月十日发俞潭先寄王潜江

雨过长风吹野塘水深川路白泱泱人如泽畔穷吟客天似江南八月凉陂下卧轮车乍歇田间鸣鼓稻齐秧长官应为斯民喜准备新诗赋万箱

戏呈诗会诸友

郢楼吟倡近萧疎椽笔贪抄未见书【原注泽民近多传书】拙客懒同嵇叔夜【原注谓也】少年文爱马相如【原注彦修直夫颇闻会赋】夜凉灯火心亲古秋老江湖兴起予欲整羸师寻战地清风无使旧坛虚

月夜即席次韵

天帐空虚碧玉寒露华应满汉宫?十分月上星光掩四坐诗成醉语阑楚渚鴈归惊客恨庾楼风静足清懽一年惟有中秋赏银阙鳌山夜未残

次韵直夫喜与炳之会

莫悲人事转秋蓬但使樽中酒不空尺蠖屈身今我倦南鹏飞化昔君同【原注炳之余同年】天曦残雨偏宜晚堂压寒溪賸占风合继回源书讌籍楚山坚石尽堪砻

次韵炳之河亭

风拂蓝溪舞翠绡庾郎池树旋诛茅春萃初见香生叶夏果重来子满梢渌酒不空期霰雪清谈为乐敌弦匏尘埃久负江湖志徙倚朱栏只自嘲

寄邹泽民秘校

去年樽酒共论文一别西园迹已陈终日城头忆王粲清吟泽畔似灵均懒书已负交朋责满秩初湔耳目尘万里江风秋思近归心聊复借鲈蓴

送杨秘校

大檣双橹换巴船美满西风水接天苏子意飞黄鹄外梁公心在白云边蟹肥采石秋霜足酒

滑湓江夜月圆彩服拜亲无限乐几多幽思入新篇

别田延年王潜江

才非王粲入荆州淹簿三年已倦游疎世自甘时不与论交有得子相求学知所乐轻文绣言至无瑕絶悔尤大舜箫韶方九奏伫看灵凤出丹丘

次李秬新秋韵二首

雨晴凉意日相亲物物秋容絶点尘沧海谁期泛槎客西风先傍忆鲈人收还志业围棋局分付光阴漉酒巾欲约一罇清夜话月中凉露满松筠

风惊梧叶觉秋还万丈归心到北山已许生平江海上坐求功业簿书间颇闻都护刊铜柱更喜将军入玉关朝野清明无一事相从那使酒罇闲

次韵李中舍秬秋雨

三伏方中火欲流阴霖匝月气争秋坐愁屋底须持盖闻说田间可漾舟狂草满庭泛戢戢湿虫侵户听啾啾独于水部添诗思坐滴空堦兴未休

次韵酬李秬

公干长迷簿领书渥言那似阮元瑜闇投子有夜光璧次报吾无明月珠急景壮怀悲剑铗西风高兴梦蓬壶勉强岂使今慙古元白邹枚亦此都

出都二首

两桨东飞下大梁樽罍漂泊过重阳江湖常恨连年隔羈旅寧为万里伤淮寺月寒芦扬白楚林霜早菊迎黄篋中谏纸余多少尽写新诗入锦囊

重入修门甫岁余又携琴剑反江湖乾坤浩浩何由报犬马区区正自愚缘熟且为莲社客伴来喜对草堂图西箱屋了吾真足高枕看云一事无

初发梁泽

蒲侧荷翻小雨收鲈蓴高兴满扁舟云稀树色偏宜晚天借湖光賸占秋孤鹭落霞闲上下红莲白鹭各风流此行说与同樽酒南国江山尽旧游

金陵

月满扁舟久客怀石头城下暮潮回霸王基业从吴始人物风流自晋来大抵险深输道德于
今榛莽蔽楼台吟毫千百年间事賸写江南庾信哀

南喜寺

天监禅僧此结庐石头高士有遗居楼飞缥缈岩腰峻庵静峥嵘阁道虚雪後桂花香涧谷春
寒松雾滴巾裾山中物色吟虽苦尽是诗翁掇拾余

灵岩寺

先望岩端金碧明久穿葱蒨踏峥嵘山疑图画曾经见地喜生平所未行随处石泉春渴解上
方云屋夜寒生主人着意开佳境无负千年四絶名

连年往返水陆万余里今自乡中挈家南来已至江州行彻险阻喜而作诗寄之

亥宫驿马岁翩翩又作离乡路数千拔宅今为大去国出灾休算小行年访寻前日停舟地催
迫穷阴舞雪天屈指还家已无事便应调拂武城弦

舟次再寄

小孤风顺水安流湓浦欣闻已系舟几日亭中折奇树从今江上解离忧客心岁晚惊催櫓雪
意天寒入倚楼东圃梅开酒更美团圆无复越乡愁

岸次见梅花不果折

武昌江口见江梅紫萼瑶芳取次开穷腊雪寒新霁後满枝春色为谁来坐嗟陇首无人寄莫
使城楼有角哀犹喜东风慰岑寂暗香时许度蒿莱

自衡岳至福严寺二首

晓指禅关入翠屏烟岚金碧旋疎明旁看阴壑溟蒙失斗上云梯伛偻行漫兴独于元子愜诗
怀容与谢公评区区出处劳分别朝市山林各有情

俯仰岩谿万仞临恨输飞鸟极高深青云平地人难到流水残花路可寻稍觉衣裾侵小雨渐
闻钟磬下遥岑丈人不厌频来往欲作香山得二林

福严寺呈贯之少卿并诸禅老

眼熟林峦认旧缘耆关峯北入霏烟云房直上三千尺蜡屐重来十五年山奥坐能朝万象地

灵深自接诸天暂游久住均如梦社客何须约白莲

至福严寺得邹耒阳书因寄

尽室攀萝入五峰峰前金碧寺飞空山当星鸟离方镇地辟天龙海上宫喜我徜徉泉石外忆君辛苦簿书中登临樽酒无因共半夜题诗寄北风

欲登祝融峰阻雨呈少卿

雾雨阴冥万壑蒸五峰当面失云层愁如药使迷蓬岛路似仙溪隔武陵已认神灵憎俗客欲将魔障问岩僧劳公为我祈昭圣暂借扶桑白日升

赠南岳董少卿二首【原注师道贯之管南岳庙再任】

身在南山非隐沦闲中官贵异风尘清泉白日预何事华髮彩衣今几人虚室图书忘岁月寿筵香火祝君亲朝廷不以忠移孝又说恩函拜命新

世人行止两忽忽公独荣亲禄隐中清职正同香案吏旷怀都似漆园翁南陵兰茂晨羞洁内鼎丹灵老颊红虽喜论心慰迁客区区安足识冥鸿

赠黄少卿二首

仙翁来自太常班再乞林泉捧诏还养志祇为华髮戏无心宜共白云闲一樽未厌尘中客双屐同跻雨後山为寄东宫舍人语五峰新句两难攀

携筇得得访云关恰值东湖贺监还泉石主人元好事尘埃游子暂偷闲心轻齐组知灵运文满浯溪服次山祇恐东风唤归棹江头杨柳已堪攀

少卿送酒肴至山中

十里传书厚意将珍肴醇醑寄山房定知僧舍餽疏食更欲云岩有酒乡一饭常闻淮上报独醒徒使楚人伤携持明日到峯顶试揖浮丘共此觞

次韵贯之见勉冒雨至後洞

狂电惊雷晓未收春云能护洞天游徘徊已尽剡溪兴秘怪难探禹穴幽强勉更须劳屐齿龙锺何惮过山头从今功德应圆满厚意成人岂易酬

又次韵

已踏云梯上翠岑洞中闻说更幽深夜惊寒雨生潇洒愁起孤猿助啸吟白日昔传仙可学青天今笑梦难寻故应清兴无时尽肯为淹留折此心

登祝融峰题上封寺二首

磴险梯危路忽穷胜游须到祝融峰九千丈外云间寺一万余石上松引手莫高疑触斗临池毋久恐兴龙此山惜与中都远未得君王检玉封

寒风吹脑赤霄边飞鸟犹难到絶巔下见人间又成海恍惊身世此何天岩腰半白春留雪僧面多黔日冒烟我亦淮南宗姓後举家应合到神仙

贯之自岳先还衡阳示诗见别次韵奉和

云壑登临杖屨随狂歌清醉乐忘疲拍肩正赋游仙曲回首还吟陟岵诗春草便惊南浦别寿觞应慰北堂慈区区流水高山意常有孤音托子期

忠肃集卷十七

卷十八

钦定四库全书

忠肃集卷十八

宋 刘摯 撰

七言律诗

春日

小雪峥嵘变晓寒旧年残腊破新年明生月魄初三夜气动春灰五九天蓼甲韭黄随绿酒彩幡罗胜上华颠故园欲告西畴事思我枫林楚木边

游白云山二首

篮輦微风迎晓凉细碎草木无数香千岩云归雨未足几冲水浅禾难秧【原注山中之田每一水所溉谓之一冲如曰一溜也】松下阴森石桥冷竹边曲折溪路长西家又得避暑地翠微亭在山中央

行穷葱蒨坐清凉隐几川原一炷香小雨径从前岭去高禾移就下田秧禽声不见山情悄江影新生客思长政使归期犹远在白云游乐未渠央【原注二月七日与客游白云山二子传行路有诗次韵一首】

次韵跂蹈山行

舟伏盘涡傍浅沙北风寒日气清嘉初从矶口询渔舍渐入云林问酒家万里欲飞愁若絮小炉危坐眼生花筋骸养作衡山力坐拥肩舆听噪譁

二子访酒家不遇次其韵作

青旂不见山云深何以慰此二子心阮修杖头故应在黄公旧垆无处寻求有不得事当戒兴尽必返愁难任仙家竹叶未必美舟尾茅柴还可斟

赏心亭

佳山逶迤抱故国危观突兀凌长波仰凭飞景赤霄近下瞰万木苍烟多三阁繁华芳草在七

朝风物一禽过后人未见兴亡本祇笑陈家玉树歌

涵辉阁

碧波弥漫起春湖草色黄深岸四隅新谢小桃双燕至从南微雨好风俱暂来祇是林泉客长见须凭水墨图无数鳧鸥记相识近人浮泛满青蒲

王母池

阿母宫前阿母池池光清滑浮玻璃岸擎黼座涵佳气影上仙衣润彩霓灵液发源来海谷飞花随泛出桃谿羽车凤盖无消息寒月沈沈宝殿西

次韵王太博关太丞同游石鼓山

礼局仙人两俊流高才相敌异商周北溟风水初登化南楚江山晚并游契阔岁华归大笑留连骚雅入冥搜江边一醉惊离散应有功名约白头

次韵陈秀才胄游石鼓山书院

山头云木郁青苍山下江流净监光亭阁瞰临慙旧句岩溪开筑想前良心甘水石忘羈宦耳冷弦歌叹土乡寂寞先生与丛竹相看孤节几秋霜

元日寄耒阳

元日江湖万里身四方南北等埃尘莫悲天地如行客还喜潇湘见故人渌酒桂盘催献岁小花罗胜写宜春渊明祇向东风醉应笑穷吟浪苦辛

次韵耒阳邹明府庸

梦比光阴一鸟过四年江渚负长哦逢君旧眼青犹在惊我寒须白已多言偃政声方浹洽茂陵归思独蹉跎何时又见挥吟笔快若轻丸下峻坡【原注君诗思敏捷】

承以旧韵示喜霁诗次和

楚雪飘残四望间江山晴气扑衣冠晓余霜日明崑岭清极人家在广寒賸琢琼瑶君句巧相当旗鼓我才难青天寂寞浮云尽最爱春风几鹤盘

简提刑朱仲隐初玉学士

当年蓬馆近储胥红壁东西对直庐
绵蕝同参台曲议芸籤分校御前书
竭来憔悴骚人国随见光华使者车
庄舄有吟皆病思赏音徒欲慰顽疎
【原注君詢索近诗】

次韵朱仲隐寄郑寺丞

猛脱尘劳厌竞驰归来不着楚骚辞
江家有宅能依竹陶令临流祗赋诗
檐北岳云供顾望水西州市隔喧卑
康强八十人难者此外穷通各一时

送吕雅寺丞

玉府文华异俗氓丹山毛羽尽祥珍
伊臯相业光前史王谢家风世有人
好学少年忘贵胄词奇藻敌阳春
如今四海皆桃李曾见槎通万里津

路虞部得代还

东风杨柳认春天轘轳车音向郢山
久客不知游宦乐五年方喜取书还
边兵近日屯湟水汉将何时入玉关
自古诗人多慷慨功名无使壮图间

次韵圣和还自京师途中见寄

郊原新雨静纤埃路下霏烟白玉台
辽鹤应悲里中旧仙鳬今自日边回
云端心望高堂喜马上诗寻故社来
牢落不才疎世者尚贪斗粟变蒿莱

次韵李圣和寒食郊居二首

春郊寒食叹淹留巧映秋千树色柔
杏萼离披翻白雪柳花轻薄聚圆球
风光无赖撩归思节物相逢眷昔游
塞下尘埃侵梦想何时仙袂揖浮丘

林梢黄緑野禽鸣泱泱春阳泛地平
禁火人家甘冷淡浴蚕天气趁清明
谁将马络寻春去独佩诗囊傍水行
稚女弄花田叟醉笑歌真是太平声

次韵李冲圣和秋怀

燕鴈南来久客惊寥寥风色试寒轻
吟残红叶诗无味归识沧洲梦有情
岁晚壮怀同剑冷楼高愁思共云生
渊明无酒重阳近几日东篱绕竹行

圣和受代

枉尺诚非圣贤事守道固与时俗违
难哉仕者行已志况复儒生疎世机
喜闻传告令尹政应

归湔拂尘土衣快君高举叹留滞把酒为歌黄鹄飞

次韵王太傅同陈长史访僧不遇陈君先归

林雨幽深止秀奇中间宁有大颠师漫劳雪客乘舟去却是云僧采药时归兴忽同分岭水余怀谁共一枰棋故应重作春游约已觉东风傍柳枝

谒金銮莹禅师

西城十里入溪林顿觉尘埃脱醉襟浅渚败荷萦白晓淡云疎木抱清阴陶潜但有思归赋韩愈殊无善吏心遗照主人应念我试将秋思写瑶琴【原注进照堂名】

次韵王太傅答周郎中寄酒

子云寂寞岁将回门静因逢载酒开白雪雅歌邮置去红泥仙榼印封来亲闱即日先称寿宾席何人伴倒罍莫作独醒孤远意杜郎亲拨冻胶醅

再酬王太傅

曲台仙客苦能诗思入风云学有师楚国大夫吟泽日江州司马爱山时年华悄悄还杯酒尘事纷纷付奕棋想得怀归心似我越禽常自记南枝

次韵王弱翁借书钱君

钱家书橐盛儒林禹穴时容探万寻嗜好自同皇甫癖写传应慰献王心此于取与无伤义盍以幽奇付赏音犹说冬官未通借览之安得有千金

次韵弱翁早春病起

换骨欣逢九转丹东风迎岁雪梅残玉良试火增虹气鹤老经春怯露寒诗就越声惊恻恻梦回天乐记珊珊故应有德神明相宁事祈禳叩夜坛

次韵弱翁春中久雨

楚雨廉纤无尽时园亭惟有草菲菲桃花泛水飘红去燕子贪泥带湿飞润彻玉琴春气弱声侵罗幕夜寒微东阳病骨疎慵甚留取清樽待霁晖

次韵王弱翁题承天寺萃景亭二首

左右青林抱邃深径随苍蘚上烟岑陵迁渐失三湘事春远闲伤万里心我爱白云亲鸟道谁临沧海较蹄涔北栏曾指鸿归处杳邈乡山不可寻

四临千里一危轩洒脱尘中两耳喧隐几风波随客棹对江金碧露僧门数峯烟老灵妃国三月花残杜宇村不得相从嗟筦库新诗犹喜慰冥昏

次韵孙景修题萃景亭

公游何似拙翁岩【原注公守桂阳开鹿头山名其岩曰拙翁】盘磴先经释子庵视听稍遗尘种种高名聊换府潭潭时驱万象归吟几尽洗丛荒破暝岚更有风华入春望名园都在面东南

又次韵四首

于此登临称谢公湘南奇观欲吟穷天沈暮鸟烟氛外山抱春城雾雨中陂岸放车看宛转寺檐飘铎送玲珑老僧已许炎蒸日为借清风解簟筒

缥缈飞亭倚半空景来酬对不知穷天开云嶂轮环外地蹙林丘尺寸中时有桂花飘馥烈恨无泉玉泻玲珑楚人不识灵均意江上年年费粽筒

背倚丛冈面佛宫登临酸足喜途穷白红花意生洲曲紫翠山姿落酒中寒鹭见鱼行历刺珍禽惊客语玲珑亭前雨足农知岁免卜灵龟灼腐筒

隐几凭虚万景空浯溪能使决山穷于今川陇民歌处曾是干戈霸业中苹末起风香细碎水光浮日影玲珑苟能适意茅檐足何必鸳鸯碧瓦筒

送衡州王仲和郎中代还

铙鼓催船下洞庭几滩冰澁滞双旌峥嵘霰雪暮寒重早晚潇湘春水生君意喜先湖鴈去我怀方共夜乌惊明年奏课趋云陛拜罢当如汉仲卿

寄湖北运使孙景修朝议

曾伴篮舆入翠微杪斋终日醉春晖亲烹林笋班犀大旋脍溪鲂白玉肥岁月几经鸿北去风云应有梦南归犹令猿鹤无惊怨闻说频年见锦衣【原注公虽在北路时以使事过之】

秋日即事

湘城风物向秋新兴入羹蓴与鱠鳞叶舞霁红枫映寺蓓含霜紫菊迎人瞻望河汉乘槎客歌

咏仓箱击壤民欲放幽怀到沧海徘徊黄鹄更伤神

偶吟

平昔名场气吐虹青袍霜鬓老湘东旧交半在云霄上壮志都销水石中楼上买鱼乘酒熟舍边秧稻指年丰清风令德人胥化使乡间号郑公

被旨还阙训答诸公韵三首

楚雪三经橘柚天君恩新许出湘川虽非殿席虚中夜且胜台郎谪九年岁晚病怀孤劔外江寒归思乱云边妻儿莫恨归装薄賸得诸公锦绣篇

湘南窃食汉盐官长记灵烟魏阙端隙过白驹三岁月萍漂沧海一孤寒九重寛宥环初赐万里归心斗欲干常媿主恩深未报慨然真喜脱囚冠

几年南楚听哀猿自昔江湖忆帝阍粉骨何裨天下事赐环难报圣君恩余光久记仁人里引重仍慙长者言安得新官来棹速更随春色到乡园

喜跂蹈登科注官【原注余姚乌程】

祖门俦子又诒孙善庆儒科燕後人雁塔继题三世字桂林仍见两枝春稽山照邑天如画霅水浮州地絶尘我亦浩然归思起明年双棹趁吴尊

倚舟崇福寺寄临湘衡文叔秘丞

相逢相别立湖边几见罇罍换岁年簿领初离仲宣幕政声犹屈武城弦归舟落晚惟荒寺病枕惊秋听早蝉咫尺松风亭下路可怜云雾隔青天【原注县舍有松风亭】

行虞城县早起寄公秉

一夜风声海沸腾束衣寒屋赴晨兴云吹惨澹天西月马踏玲珑雪底冰吏事不堪年老大归怀那复病侵袭遥知宴息庵中梦正在仙门第八层

寄公秉李郎中

二月晴霜冷逼人深红桃萼烂缤纷寒中悄悄春强半湖上悠悠水十分心厌留书期谢病迹疎罇酒忆论文东风留着芳华在何日仙凫下白云

次韵王定国湖上

君来惟有岸蒲青落寞羈怀独此行远浦自迷春草色緑阴初变夏禽声龟毛兔角知何物鵬
海鷗枝各有情且共论文一樽酒吴霜从向鬓间生

和王定国

地远城东得得来正如湖畔共含杯眼中故旧青常在鬓上光阴緑不回归去汴桥三鼓月相
思梁苑一枝梅我闲时欲寻君醉为备芍药更满罍【原注病目君为置芍药酒】

次韵定国约过李氏园池

年来高兴满尊丝寒薄春风骀荡时稍爱燕脂开杏萼已惊香雪烂梅枝老于乐事心犹壮病
得新诗和独迟何日华镳向金谷拟追仙翼到瑶池

次韵答王定国

江州居士赴东城旬月相忘不寄声闭户还来能避谤求田何处欲归耕笔端浩荡词逾壮曾
次崔嵬气未平我有白羊新赐酒浇愁聊可一杯倾

次韵王定国怀南都上元

九陌无尘夜霁天两都风物故依然车驰马逐灯方闇地静人闲月自妍佛馆醉谈怀旧岁斋
宫诗思锁今年传闻公子微行处门外骅骝立绣鞵【原注去年上元南都同李公秉三四辈
游静觉遂饮上生院今年致齐太常闻定国游相国】

同孙推官廸李郎中钧督役河上叙怀三首

时哉风物媚郊原无赖禽声对客喧山色带烟屏依汉春阳凝日浪浮坤河功田利兹为重士
贱民劳岂足论仙老不妨持道气朝餐华景望朝暾

平湖胜势抱南城花气蒙蒙馥近垆黄变柳条归老緑红残桃叶换尖青春乘病後成多感事
向闲中见未形日日携茶唤宾友吴泉烹尽惠山鉶【原注来诗问南湖事】

车马传闻渐欲还河边陈迹弃春湾睽离心恨三秋月积累功成九仞山从事独贤公弗叹散
材无用我宜闲放夫急趁兰洲赏寒食光阴俛仰间

送许敏修使二浙二首

大夫才业帝都俞清洁寒冰在玉壶流马阜财求八使铸龙班节重三吴海门晓日迎飞鷁笠
泽秋风趁鱸鲈亦欲东游闻米贱行台还可庇疎愚

蒹葭曾愧倚瑶琼京兆经年共左厅屡喜足音临病几【原注卧病日久屡蒙访问】独何才力致虚囿【原注君治闻封有能名比以狱空被赏亦及不省】闽山近部荣乡绣越客何人识使星随看锋车下江海归来人物重朝廷

题泰定小雒亭

名花多自洛城传物色春工十指间渐买姚黄并左紫恨无伊水对嵩山主人妥妥多材艺俗客悠悠几往还惟有万竿亭背竹霜青偏解照衰颜

八月十二日同杨诚之马全玉王似之泛舟至旧州塔下作

秋水弥漫山翠微西风恰好坐吹衣浓云将雨东西去白鸟窥人下上飞陵谷是非询野老沧浪怀抱负鱼矶迟留莫听严城鼓待得双桡弄月归

次韵赵伯坚令铄郎中忆南都牡丹兼寄子由

芳丛百朵烂红云曾倚西轩醉两春梦雨一惊巫峡曲佩香常记汉江滨病怀日负杯中物花意今看檐上尘回首东风君自问栏边更有後來人

城北

寒门秋色阵云飞雉堞烟青画角悲河坼波涛含赵魏星分毕昴半华夷太原獬豸当征日瀚海单于欲战时六十万兵闲饱死谁怜山後八州儿

喜王彦祖新居

今见黄州庆有余侍郎门户已容车风流地望乌衣巷潇洒仙人碧落居三亩江家须种竹一区扬子独藏书东平我久犹如客何日菟裘近里闾

北山道中

随马卢泉碧玉流野林春鸟语鉤輶桃飘残萼红堆水麦换新苗绿满畴世味浅深聊尔尔生涯消息强悠悠不如收拾诗千首要似张家万户侯

题所居圆明庵

茅剪幽庐小圃东葛巾藜杖称高风守方固恐形为累内照应知色即空出入有虚还有实辉光无外亦无中世人欲识圆明事盍问名庵隐几翁

还句龙纬化文诗卷

谁识斯文久寂寥
希声杳杳思滔滔
气无外物纤毫累
才有灵光万丈高
误借鼓钟娱海鸟
自堪奴仆命离骚
哑钟亦欲烦君手
能为孤音解郁陶

赠汪汾同年

往岁仙游白玉台
拍肩曾喜得洪厓
高门已觉阴功在
古狱犹嗟宝气埋
风竹夜声清醉枕
雨峯秋色滴吟斋
大夫未老无多叹
会见黜名与愿谐

秘阁曝书画次韵宋次道

帝所图书岁一开
及时冠盖满蓬莱
发函钿轴辉唐府
散帙芸香馥汉台
地富秘真疑海藏
坐倾人物尽仙才
独怜典校来空久
始得今年盛事陪

病起次和何温甫秘丞雪琬中见寄

士誉民讴楚粤间
相逢倾盖问南冠
吟余候馆春风峭
病後湖天霰雪寒
应喜白云瞻望近
【原注君迎亲至此】
独怜沧海去归难
雅歌赠我琅玕意
欲报慙无两玉盘

闻东园诸学生雪饮寄之

大雪填虚翻海波
袁安门户可张罗
寒惊春絮因风早
病觉空花向眼多
梁苑喜开陈桂酒
郢人谁已唱兰歌
少年抚景应须醉
莫学衰翁着睡魔

元日示彭器资御史

天历开祥岁屡登
命元颁号继熙宁
春风寒色犹烧腊
北斗杓端已转星
初退贺班东上阁
郤观郊乐太常厅
便期节物寻樽酒
莫问吴霜换鬓青

再和

大禘新元诏太平
万方承庆日神宁
壽觞别殿称山岳
治象端门灿日星
放伏暂骑归舍马
束衣还就致斋厅
史官不用占风瑞
从此丰年纪汗青

次林御史次中韵

一鶚将从北海飞
岂如穷翼老差池
方嗟簿领迷公干
尚喜琴音得子期
别思俄闻赋南浦
残花犹可醉东篱
留连且此同罇酒
归去鲈鱼未过时
【原注时扬州陈丞相辟君幕府】

再次韵

昔岁相从向此都重来风物变南湖庄生达观尝齐鷄张翰归怀岂为鲈世事不穷劳强勉官期犹远盍踌躇新诗易得皆精好真似元和咳唾珠

次和次中简留守苏子容

濉园文雅久湮沦居守今逢紫禁臣右客游梁似司马主人开阁等平津不才亦预门生旧承乏来趋幕府新共喜风骚坛将在箫韶时许击辕亲

次韵次中喜子容还朝

公归真足慰儒林云日重瞻帝阙金聚散可惊陈迹事行藏谁见古人心春还汉省苔新旧霜逼吴船水浅深坐忆茂陵犹未去悠悠徒有病中吟

次韵次中题双庙

凛凛英风数百龄舍生知与义相形莓苔老涩穹碑暗云木疎寒古殿局自许孤城摧虎兕至今遗事炳丹青二公死所真难处独恨临淮有遁刑

次和次中久雨阻行而闻浙中旱乾

积雨廉纤气已凄暝云凌乱四天低吟怀撼撼声侵竹归思漉漉水拍堤东海可能均霁日北风曾未逆阴霓应须更问淮南米莫厌留连鷁首西

忠肃集卷十八

卷十九

钦定四库全书

忠肃集卷十九

宋 刘摯 撰

七言律诗

正月十一日迎驾大庆殿次曾子固韵

锦绣龙鸾仗卫新
绛袍黄繖拜行宸
天开云日端闈晓
岁謁衣冠别庙春
归輦顺风传鼓吹
广街严蹕静音尘
上元咫尺瞻游豫
更慰都城望幸人

次韵和门下相公从驾幸太学

诏移清蹕下斋房
访道天临舜上庠
正坐横经开凤展
袞袍接武照鵷行
雍宫故事收炎汉
阙里斯文盛素王
宜有诸生知圣作
勉趋贤路起东堂

立春後泰祠东郊呈器资二首

走马东郊春早时
宿云容与澹朝晖
溪边水暖鱼初上
塞北风柔鴈欲归
君赏已夸梅白早
我来仍见柳黄微
年华恰恰催吟醉
从此朝回日典衣

漠漠阴云晓蔽空
稍看疎雾泛冥蒙
郊原脉起新春雨
帘幙寒生半夜风
纵步杳难寻旧苑
习仪聊复望祠宫
霜台监察心宜喜
闻有精诚祷岁丰

奉祀南郊九日马上口占

霜意云情晓欲寒
城南驱马面晴川
路寻红皱黄团舍
兴入丹茱紫菊天
撼撼园林惊晚岁
纷纷场圃见丰年
君恩未报归何日
空使荒芜靖节田

清明日玉津园奉陪赐宴文太师

汉烛青烟下九阍
东风瑶圃燕元臣
诏驰御辇深行酒
露剪宫葩别赐春
不为梦魂闻广乐
许留光景缓严闐
曲江冠盖华林客
未有三师解组人

夜直中书省寄左省子容公

膺门早岁预登龙
俭幕中间托下风
敢谓弹冠烦贡禹
每思移疾避胡公
论文青眼今犹在
报国丹心老更同
夜直沈迷坐东省
斋居清絶望南宫
【案此诗据宋诗纪事补入】

次韵谢师厚斋中有感

一庭春桂与秋兰
元礼龙门笑闭关
不以使台严陞级
盎然和气见声颜
平生怀抱风尘外
终日图书几席间
天下苍生瞻世德
东山宁许乞高闲

殿庑次韵赵元考锦带花

锦花香浸碧琉璃
谁折芳丛下帝闱
横裊正疑豪客?双垂曾见妇人衣
长条卧蘂胜繁李
密叶攢英似紫薇
系取东风留节物
还家犹及醉春晖

次韵钱纯老密学白锦带花

天园节物见芳华
春暮重开白锦葩
鬬叶浅深琼散蘂
封条匀闇雪团花
玉翘无日真仙国
月帔垂栏上帝家
若向阊都论品第
可容沧海碧桃夸

宣徽王公太乙宫使还洛二首

四纪翱翔览太平
三朝出入盛勲名
对敷徽省官仪重
谒款殊庭使事清
桃李春风多惠政
鸾皇云路半门生
少贪嵩洛乡邦好
人望岩岩在老成

位并枢庭今四贵
官升太尉古三公
壽眉仙骨风尘外
琳馆真都禄隐中
治第颇闻齐緑野
放心宁遂伴冥鸿
满怀霖雨功犹未
勉起行看谢傅东

送致政太师归洛

元丰天子赐安车
黄髮翩翩翊圣初
坐省故携灵壽杖
会朝仍驾虎贲舆
平泉花木眷常在
辽水城池鹤自如
身是赤松无一事
乳桐孙竹看扶疎

上洛都文太尉二首

庆历承平已庙堂
三朝勲业徧旗常
昔虽郭令曾忧畏
今比留侯更壽康
赐饌饔人移玉食
宠行天藻烂云章
想公賸觉西都乐
门外逍遥緑野乡

诏书新出未央宫
始识谋深别有功
就第愿陪唐九老
临轩方册汉三公
翩翩雏凤仙山上
两

两阶星祖帐中贵齿尚贤圣朝事可须归兴羡冥鸿

薛景庸太丞昌朝守邠州

风霜乌府不谋身丞掾鸿枢号得人九转已欣丹换骨一麾聊免甑生尘时今关陇烟云静地古岐周气俗淳正恐暂均劳逸去肯容文酒恋朱轮

次韵新陈州太守王彦祖侍郎

得郡同时下帝闥相闻鸡犬再冬春名场步骤元希久官牒推移媿积薪一笑醉余双白髮千驺南去两朱轮劝公少乐淮阳卧来伴林边杖履人

九月十日赵韩王园同舍钱送王微之暂出守汝州即席次其韵二首

左符初作鲁山行便有萧然物外情出入宦游金马旧平生风望玉壶清秋花黄紫罗千本宴豆甘珍聚百名谈笑挥毫得佳句从容聊喜暂班荆

云木疎寒天未霜一尘清不点衣裳白鲈南国归怀壮黄鹄西风去路长揽辔便看红旆转衙盃聊共紫萸香相思肯惜琼瑶寄时有楼边鴈北翔

重送微之二首

瀛州日日聚华绅旧德如公更几人寂寞穷经甘白首风流投老就朱轮光阴不负围棋局谈笑须还漉酒巾朝议虽知弱翁久不如方国慰斯民

曩昔清襟江上开九华山色照樽罍中间世故何胜道晚岁仙都幸一陪康乐又从沧海去次公曾自颍川来春秋坠学应犹在闻说新书胜玉杯

重送文与可

神标人慕紫芝眉襟韵谁量叔度陂相与论心惟有竹未能无意独于诗东风腊尾消冰雪南浦船头转鼓旗想及下车春恰恰汀洲烟雨白苹时【原注君喜画竹作诗】

送益路提刑谢师厚郎中三首

鳌阙崑崙路不賒单车聊复向褒斜东山行止繫民望康乐文章自世家政在冰壶人畏慕诏移金节使光华百城争欲扳遗爱岂独诸生恋帐纱

叱驭灵关万里行爰书丹笔刺祥刑过家旧社瞻卿绣入蜀何人识使星梅福上封推变异望

之雅意在朝廷华阴道过行台路共醉西湖赋鵲鵲【原注公之弟领漕京西今往过之】岁晏风云劒外天故宫形势旧山川地环锦绣三千里兵後歌钟一百年金马已陈公子赋海棠应补少陵篇官私侈忤斯民病可贺于今使者贤

送子容二首

文人家世积清芬二许遗风见子孙学问共推元凯库衣冠争望李膺门西垣润色文还古东土留居政有恩归奉汉皇前席对岂无今士所难言

倾都冠盖拥西圻一节移归四牡驰魏阙云烟天近处隋河冰雪岁穷时行藏粗识贤人志疲拙难当国士知妄欲与公论异日区区何用召棠诗

送次中

肯与衰颓论久要爱君才健气飘飘声名桂苑曾曦翼【原注次中先一榜登科】风节霜台媿续貂分落江湖惊几岁喜同文酒驻双桡天寒不奈隋河浅又使清谈付寂寥

送吕户曹仲敏

文章盈篋几千篇去有山涛吏部贤梅意向人冬至後云阴含雪北风天非今是古俗皆尔叹老嗟卑谁不然知子已能操学谊行藏吾欲看他年

送虞元叟大熙出守当涂

使旗猎猎櫓呀呀斋舫飘如上汉槎待得江南鲈作膾暂从辽海鹤归家清谈挥麈临千里隐几看山过两衙零落谪仙遗迹在为寻荒冢吊云霞

徐程致仕寄之

浩然歌笑脱青纶高调冥冥彩服还智达能遗名迹去英雄宜为泰平闲秋风酒榼携寒野春雨兰芽长旧山养已奉亲心两得世人行止是非间

宿州灵璧张氏园亭舟过始知之

去国身随浊汴倾瞥然双桨若孤鹰不知堤木藏金谷但见渔人说武陵已许生平惟水石坐看名利仅蚊蝇从今所至停舟问诗酒虽衰亦强能

八月十五日宿平原寄跂蹈

去秋今夕舣归船雨湿湓江叹隔年幸此一轮开霁魄卻嗟千里共秋天更为来岁悠悠约安得清光夜夜圆孤馆悄然谁晤语满庭寒露湿苍烟

离汝马上寄乡中亲旧

半月徘徊去鲁迟二年樽酒奉音徽又贪圣宠移金节还使乡人笑锦衣天地中间真远客田园芜没盍来归东州不拟多时住已傍芦溪作钓矶

至金乡先寄田直孺【原注庚戌六月三十日】

京雒尘埃各未湔古城潇洒向秋天今朝屈指终三伏此地衔盃已六年老喜交朋频把臂拙无材力求田君当记得鲈鱼约何日相从上钓船

秋浦寄田同年鰈

三月鹏云接翼飞岁穷飘泊动相思独临谿檻看山处正是江天欲雪时连辔都门君不至【原注约同出都临行君失期】合簪秋浦我来迟明年尚好方舟去醉倒春风有旧期

过任城谒田直孺

古邑东风桃李残故人高卧白云间我知原子贫非病谁识萧生志抱关相遇正逢春事晚已衰难伴醉乡闲卜邻慙愧当年约依旧无钱买北山

寄尹元佐

都城分袂下长淮闻说灵槎犯斗回天上夜蟾千里共江南秋雁尺书来莫悲琴剑犹羈客岂有英雄老俗埃此去玉皇恩泽异龙飞新榜看风雷

寄高阳陈镐

胸中奇蘊入天渊平昔英游梦寐间宝剑早因灵气识卧龙今惜壮图闲匈奴尚敢乘黄屋汉骑新闻戍玉关应共将军话功业酒酣朝夕望燕山

寄长沙王源祖

湘水衡山冠楚西逢君曾与胜游期桥跻危蹬寻僧去月满归舟载酒时岁律别来惊易改琴徽空自寄相思试看湖上梅应老不解东风赠一枝

表海亭

到此翛翛欲羽翰长檐危槛压潺潺高低步障千花磴远近屏风四境山兴为南楼虽不浅倦如飞鸟亦知还偷闲拟上三年计宁愿齐侯五月间

早眷书呈温甫用前韵

春皇消息到人间屈指年华笑侧冠梅蘂暗黄初过雪兰芽浅紫未离寒时哉物逐东风乐老矣心于胜事难惟有林泉随处好可须岩谷隐归盘

登照碧亭次韵燕若水

记着蓬瀛向此开清明帘幕望高台老慙苍鬓亲花萼病负脊风厌酒盃青盖绮罗寻径去画船箫鼓转溪来不知好事楼前客便有嘲吟倚马才

忆灵泉山寄龚辅之谏议丈

不到灵房二十年背依丛岭面平山风吹桧柏周遭雨地蹙冈峦寸尺烟合有高亭临緑筱恨无长磬引清泉携筇占得频来往谁似香山白乐天

次韵余翼赠陈长史绘

变化洪纤付一陶中楹瞻望赭纱袍有才元子名为污失意刘蕡策自高青史异时观壮士黄衣何日调南曹居闲更觉新诗好词力还堪仆命骚

次韵观碁

昼永风闲玉局平机心相轧掌中兵敌家只欲乘虚夺完地何劳用劫成纵使仲宣强记在枉将陶侃寸阴争旁观有诀君须信大抵骄贪悔吝生

盛陶索诗録近作数篇以长句将之

大白谿边思会遇九华峯下共登临高楼一别江南醉几岁同为塞北吟【原注己亥相遇池州同饮于萧丞相楼】漳浦旧怀多感慨建安遗响未销沈言虽穷苦君能听试写孤音入夜琴

二月二日过吴德仁二首

清门令德江南吴三纪兰洲心自娱明时中林隐君子蚤岁东门贤大夫老去笑谈惟玉尘病余风韵更冰壶世于出处罕无意两忘未见斯人徒

三径长篱依断崖筑堂能向紫溪开案头日有青精饭
垆面常浮白玉醅坐对云山飞鸟没笑看花木早春回
高情不厌城中客更许时时杖履来

贻致政吴德仁朝请

四十悬车三十年白云山下古溪边松姿郁郁霜中
壽鸿意冥冥物外天归为田园陶令达化行乡党郑公贤
我慙出处今如此应得高人一粲然

初到蕲州

卜筑南城三径开寬恩容此养衰颓舟从灩澦堆中出
人是邯鄲道上回憔悴幸非兰泽去因缘如为祖山来
江湖本是忘机地笑许残年付酒杯

寄鼎州陶使君商翁【原注近蒙示诗】

诗坛曾识旧将军新寄长编慰俗尘梦到钧天醉闻乐
心疑明月暗投人谁悲正雅全忘古自是淫哇每乱真
安得高门占旗鼓与公吟啸武陵春

舟次浔阳寄兴国李使君舜卿

江南太守画船飞湘水羈鸿病翼迟岁晏风霜时易失
人生离合事难期相思坐叹琼枝隔寓意徒令玉轸悲
遥想翠屏山下望楼中还有谢公诗

送柳判官引对次邹主簿韵

斯文复古魏郊东【原注仲涂先生自谓东郊野夫】
落落名孙祖气同待诏方探采兰舍最书催见受厘宫
十年罇酒瞻燕碣几日歌吟笑郢中天下求才君必用
莫悲长劔匣秋风

赤岸过柳明之别业

主人潇洒武陵仙别业河东大道边心画美田皆枕水
手栽佳木已参天园林有地时难者钟鼎铭功事莽然
倦客过门空大嚼卜邻安得买清泉

青山高竹楼别业昔尝题诗其壁诗故在而竹楼物故三年矣感而赋诗

故人别墅俯青郊曾许幽人近结茅苔壁雨荒留旧蹟
竹林云矗见新梢楼成白玉山无主鳞出黄金客有肴
怅念同游歌楚些风声萧飒鸟咬咬

已日泊桃源亭

桃源亭北值佳辰桃萼飘残畹晚春
缙幕惜芳林下子彩衿修禊水边人
风谣渐喜南音变节物偏于久客新
道不与时当勇去归心何必计吴蓴

病中闻子客被召次中东归

一夜奎星向紫微朝来黄鹄又东归
谢庭春入新红药吴苑花迎旧绣衣
疲马顾鸣还有恋惊乌飞匝欲何依
无聊病况将离思并写孤音白玉徽

再和

诗酒相从道久微东西冠盖两将归
许公文诰专鸿笔太白江湖醉锦衣
揽辔慨然俱有意系匏于此独无依
犹怜眷得河梁句常与都人记盛徽

送郑毅夫舍人被召五首

金鱼宝带紫微仙刺史荆州帝倚贤
仁入刑书无滥狱政通和气屡丰年
芝函晓下浮云阙奎曜宵还北斗天
士望区区翰林主不知舟楫赴商川

三国遗基楚子宫洞庭游乐与民同
画船载酒春波绿叠鼓随车夜烛红
爱此南阳歌召父学如西蜀化文翁
去思不用甘棠赋恩在邦人骨髓中

永昭陵上土新乾又见弓遗四海冤
旒冕嗣天承顾命金縢倾帑入私门
已多困瘠悲邦衅况有跳梁玩国恩
归奉清闲疏奇蘊席前应讲太平源

旌旗占晓动星躔冠盖倾都海岳旋
归觐明堂瞻日表过家郾社卜松阡
郢山残雪梅寒後汉水东风柳暖天
无限春风入佳句何时珠玉看盈编

簪绂忘怀出处均行行犹眷楚都春
嗣皇小愆方求助太守三公古重民
燕厦久依王粲幕鸛书曾媿孔融
宾士儒以义酬知己敢向东原涕满巾

九日病起寄文莹

春城别去已秋穷犹喜音书继递筒
身外光阴一飞隼天南踪迹两飘蓬
夜乌三匝惊明月胡马长嘶向北风
无酒无人更无菊重阳愁过鹿皮翁

春日书事

年华欢绪两蹉跎扬白浮红日日多
酒怯病怀无旧户睡便春昼长新魔
些思楚客招魂语噫笑梁生愤世歌
鸟雀相忘来亦少不须门外更张罗

跋罢西邑时将营山居路有二诗次其韵

半年西邑祗徒劳
天数人谋两不饶
分定一枝难驻足
时来三组并垂腰
是非未了今犹古
饮啄诚安谷亦乔
何日一尘能负郭
杖藜春雨看脊苗

求田问舍此心劳
两处如闻胜势饶
张氏泉塍近城角
邵家林屋在山腰
倒冠来伴樊川杜
飞舄新闲叶县乔
昨日雪霜枯槁地
百般苍翠发新苗

忠肃集卷十九

卷二十

钦定四库全书

忠肃集卷二十

宋 刘摯 撰

七言律诗

孙少卿鹿头山诗并画图二首

诛茅搜险旋寻真闻说山岩一日新佳境留连应有待先时登览岂无人披榛好石来如召随
手清泉应若神不独山中兴胜事几多风爱在邦民

使君镇爱鹿头山图画歌吟去为传尘世那知武陵事时人争诵永嘉篇行春游醉常劳梦按
部登临又隔年有客平生志林壑坐怜双眼隔云烟

次韵蔡景繁红梅三首

故人江驿寄瑶华紫玉枝头散嫩霞日暗露桃春尚浅醉余收面粉难遮綠溪地静东风遇雕
檻香寒晓月斜水满琉璃聊自喜不堪尘眼祇空花

萧疏仙梗擢芳华巧刻圆琼傳淡霞素质本非桃杏质酡顏聊避雪霜遮香含暮雨栏边散艳
倚春风鬓上斜闻说樽前偏属党青黄朱粉更无花

仙圃瑶林冠物华靓英明媚洗晴霞醉装却费臙脂晕纨扇应烦绦粉遮天上念奴春睡足风
前飞燕舞容斜後房宜劝歌声小惜爱今年第一花

再次红梅【兼简李质夫】

色不夭穠始是华仙家林观倚云霞春酣白玉醕香入日射红鸾扇影遮攢萼乱须能淡伫抱
枝寒蓓更疏斜为寄瑶林主人语争妍应有曲房花

庭前有古槐一株枝叶扶疏广?一亩每当月夕风晨辄为婆娑其下空翠滴衣心神清越感秋
寄兴情见乎词

绿玉交柯蔽郁深碧萝寒幄静沈沈最宜初旭曦晴霭时有珍禽宅翠陰终日对为佳客伴几

年相慰故谿心主人已有秋风兴更聽疏蝉抱叶吟

盆中移白菊

九秋风露下星榆玉刻圆钱散晓株人住水涯多白髮地应花谷近清都按香清酒登新谱【原注君倚以菊酿酒】益气轻身载旧图移取黄堂朝夕见北洲亭远故台芜【原注郡中旧有白菊台今荒废】

次南阳钱紫微白菊

清根灵气本仙通白玉葩华绿玉丛山远莫寻幽谷水洲香聊近百花丛神寒缥缈梅同格英出繁多雪魄工【原注菊英二十一出】篱下区区醉金蕊酃醁应笑鹿皮翁

次韵傅推官宏月菊

应怜陶令爱东篱分付黄花特地迟百卉浪随秋色尽孤芳自与岁寒期冷香直欲梅相鬪金蕊悬知雪更宜空使诗人咏重九天公造物本无时

挽慈圣光献皇后二首

翼子诒孙庙社功忧劳嘉佑治平中泽流自配皇图远仙去谁期寿劫空三献奄违长信殿万灵神会永昭宫母仪五十年间事愁入西郊鼓吹风

孝孙皇帝念终天毁慕难留王座迁庙謚易名尊四字宸闈行服自三年宝衣鸾凤藏华殿哀仗星辰下洛川从此都人想游幸无因重见九龙輶

挽资政殿学士吏部尚书曾公二首

怀诏归来望九霄伾山才隔渡河桥履声未彻君王聽车左俄悲道路招韦氏诗书传秘阁石家孝谨冠中朝灵輶闻说都门过愁彻西风鼓吹箫

百岁悲欢俯仰间讵惊畴昔涕丸澜玉堂天圣传先契兰省元丰事长官寂寂尘音华屋闭萧萧云木故山寒深心令德今何愧付与无穷後世看【原注礼诸候行而死于道则升其乘车左轂以其綏复先子出宣靖公榜下元丰乙丑之政前为吏部尚书时某其郎中也】

挽宋次道二首

橐笔周旋侍汉宫博知前载问无穷朝廷人物儒林丈家世文章太史公俯仰顿惊华屋换声容徒望總帷空寝门一哭何嗟及付与悲哀挽铎风

平生襟尚苦清通白首耽心翰墨中万卷囊书推沈氏一时碑字贵顔公尘栖村馆稀宾至山抱佳城与祖同已矣善人那复见萧萧溱洧祗秋风

哀吕西台行父四首

大夫门户斗魁旁落落南宫旧望郎收斂壮心书万卷沈浮高兴酒千觴乘驄始欲新年去藏壑俄惊半夜亡索我贈言曾未暇哀怀今变紼尘章

仙骨萧疏古栢秋合于尘世独悠悠人间未熟黄粱饭天上新成白玉楼隐几不闻遗治命飞旌何日向西州识君惟有崔夫子【原注伯益】预说衣冠一蜕留

前月南河欲放船壶觴一夕暂盘桓吐霏珠玉音犹在风折簣簞墨未乾皎皎不应随物转滔滔从此缔交难孤怀幽调谁知者寂寞金徽不复弹

吴兴空望使君车道厄陈州亦命坎归路自为兜率去遗忠谁访茂陵书粃糠世俗心无累兰玉阶庭善有余一束生刍犹未至春风洒泪满襟裾

五言絕句

次韵唐诵植櫻櫚三絕句

亭亭员干直翦翦翠轮齐叶散夜叉樣恶名谁品题荣悴逐时序纷纷红翠多谁同岁寒操旁有羽林戈种兰不当户李以苦见容珍重主人意东亭非要冲

次长守长历两孙自汶寄读诗韵

阿守似其父丰姿仍秀疎别翁犹数月书驿且渠渠历也驹千里新诗慰远思霜秋鱼酒美来趁寿觴时七言絕句

戏简许教授

虽有董盐甘寂寞如闻顔粥更艰辛莫将秉釜论多少聊为君家拂甌尘

马融绦帐台

汉守曾为绦帐师升堂高弟许抠衣传经无复当时事只有沙禽自在飞

国风亭

地灵真合有清辞正在中和乐职时谁道诸诗吟不尽试看亭上国风诗

复古亭

功大文雄岁月深巍然高碣字生金台池得与吾民共谁识邦家复古心

穿杨亭

华构翬飞一望中颜间篆墨扬秋风休矜百步穿杨巧未及当年射虎功

迎春亭

亭接东风近晓霞几多和气到萌芽也知当日迎春意不为松筠只为花

朝宗亭

亭下长江走浪花朝宗东委去无涯何时银汉风涛稳待泛仙人八月槎

激心阁

危栏倒影下千寻空水无声万象沉试问登临来往客几人澄得利名心

七瑞堂

草木生成亦偶然谁将枝干验祥编如何并作当时瑞寂寞如今五十年

水舫

天水相将远欲无扁舟双桨似飞鳧此身未是逃名客且学?夷泛五湖

双桥

双桥十里跨虚明波面无风两足轻雨歇烟收人不见路岐依约是蓬瀛

十月六日与客游金山乾明宣塔戒坛弥勒舍利广教七山寺三首

水落溪桥霜未寒冈林平浅是西山路穿峭蒨青葱?寺在崎岖屈曲间

排门金碧七禅关松阁相望石径连不为勤求善知识可能一日徧诸天

行彻云烟到上方青林深壑对重冈山中底处饶风月要着江州一草堂

偶作

春气未强寒惨惨羁人多病兴寥寥闲愁付与毫端遣长日期于局上销

次韵张供备逵夫观回鴈峯二首

图志分明传者谬峯名元在岳山隈邦人试看春岩上岂有燕鸿到此回

林麓坡陀湘水侧烟岚朝暮楚城隈峯前迁客翻堪笑不及飞鸿一岁回

樊山口二絕

洲觜嶄嶄乱石排濯风寒浪踏苍苔长江万里从西北泻向幽人两足来

无数江鸥似雪霜暂来还去俯沧浪幽人已自忘机久却恐窥鱼意未忘

九日依唐生韵五絕句

三岁重阳负玉觞悲欢不定客途长元光节物真虚掷赖有新诗付锦囊

白醪趁节醕已发黄菊候霜花未开独上荒城拱双?风云惨惨鴈声来

无处登临百尺楼若为销散仲宣忧拒霜寒菊常烟雨愁满江城冷澹秋

悄悄登山临水兴纷纷泛菊佩萸人不须吹落簪花?但愿常存漉酒巾

长松老桂风霜足细草幽花雨露沾天寒日下音书少鴈自高飞鱼自潜

次韵燕中舍若水苦雨五絕句

湖水漫漫日夜添茭芒蒲?鬬尖鋸不须更问雨多少且喜西牕青入帘

风欺炊竈晨烟重泥隔宾车午枕高谁记幽人张仲蔚都将三径付蓬蒿

池蛙联络声方旺迳草纵横势未锄不厌微凉生枕簟只忧新蠹入图书

声入高梧翠竹边故携枕簟北牕前无端唤起江南梦记得扁舟夜不眠

嘉谷连空指岁丰幽潜无复有乖龙何时浩荡风吹日照彻陰云几万重

泛舟南湖二絕句寄公秉二首

路转芳洲面面风回环慙媿刺船翁画桥东北桃花坞时有飘红落酒中
不知芳物过春风傲兀扁舟怯浪翁得似王猷剡溪上何须范蠡五湖中
木芙蓉

谁染轻红皱万囊靚如妆面照寒塘蜀葵千叶仍陪菊芍药重台更耐霜
湖上口号三首

绿荷深不见湖光万柄清风动晓凉莫恨红葩犹未烂叶香元自胜花香
湖上清怀各自知凉风吹我独依依吏曹姑去母催我待得临流弄月归
柳色映花春岸北人家临水画桥南回舟欲向东城望恰似清溪玉镜潭
六月二十日湖上四絕句

莲的纷纷玉手来欲攀莲叶卷狂盃冰浆未见菱腰折珠实何时芡觜开
红蕖白藕满平湖曾爱新梢玉不如今日水深那可得野人盘上欠香蔬
气候凄炎倾刻中晚来宜此一樽同乍收荷叶萧骚雨便得苹花细碎风
浓云忽忽漫天围四面凉风弄客衣霹雳一声湖雨白鱼兒惊没鹭狂飞
雪中次韵王巩廷平四絕句

此时遥忆子猷家幽兴应思剡水涯未向东风见琼树且传春色赠梅花
渐飞大片纷如靴更扑惊风乱似麻为谢妻孥衣但典莫愁米贵酒难賒

檐边骚屑竹声乾炉畔龙鍾病骨寒坐想兰歌倾桂酒清虚堂上有余欢【原注君之西斋】

袁安祇有高眠兴谢眺空伤後会难十万健儿春瘴近飞花宜过海南山

平原君

徒称館舍三千客岂捄长平百万军焉在平原多得士功名翻属信陵君

信陵君

客赵忘梁久不归先王宗社若巢危归来未久秦人入魏国存亡亦可悲

甘罗

甘罗徒挟虎狼威入赵安能策是非大抵诸侯畏秦尔一言轻得五城归

汲黯

汲黯刚纯社稷臣张汤巧诋更平津贤人所贵忠邪异惜对君王论未伸

次韵龚谏议辅之同游灵岩寺

琳宫仙老鬓虽霜不厌山头石径长杖履更为他日约姓名聊记旧碑旁

戏李质夫

曾醉江梅烂漫时北鄉寒冷见花迟知君独倚瑶林赏不向春风赠一枝

再赠李质夫

赠春须记折花时坐恨江南信息迟还向瑶林主人问东风应傍去年枝

絕句

日日新诗出锦囊清言飘洒句琅琅幕中病客疲酬报走马真难伴放羊

东郊次韵器资子开六絕句

几年空有忆梅诗常恐江南驿使迷慙媿一枝偿病眼春风须劝笛声低

刻玉沾酥三两枝霜空林杪早春时萧疏仙骨闲相并缈缈幽香冷自知

江南诗客两仙才携手东原赋早梅琼树令人常愿见还家何事更徘徊

右见早梅

五日重来蹶马尘此君时节已残春
吹衣拂面寒犹峭谁道春风似故人
悄悄轻冰断水涯欣欣羣木荫人家
春风巧思无寻处红白青黄各自花
昔年花卉烂春林今日重来老病侵
岁月漫为流俗叹行藏谁见古人心
右漫成

九月十八日离魏都寄内二首

南鸿无计与同飞鸿翼翩翩我马迟
若过平台寄家信为言今日是归期
肃肃霜风吹客衣客怀多少寄金徽
到家细说淹留事应笑苏秦困始归
寄倩

近时颇少飞鸿信几日应占喜鹊声
相见便须持宝镊为翁衰鬓摘霜茎
题齐己草堂

一曲流泉对草堂何人与续帐前香
清诗自共秋风老依旧钟声送夕阳

忠肃集卷二十